

清 張廷玉 等撰

则



中 華 書

局

## 明史卷三百四

# 列傳第一百九十二

#### 宦官一

其後以市馬出者,又有司禮監慶童等,然皆不敢有所干竊。 建文帝嗣位,御內臣益嚴,詔出 退。太祖愛之,然亡他寵異,後遷出爲光祿寺卿。有趙成者,洪武八年以內侍使河州市馬。 道,外臣也,以鑷工侍帝數十年,帷幄計議皆與知,性縝密不泄,過諸大臣前一揖不**啓口而** 來。 外稍不法,許有司械聞。 各司局、稍稱備員矣。然定制,不得無外臣文武衡,不得御外臣冠服,官無過四品,月米一 石,衣食於內庭。 嘗鐫鐵牌置宮門曰:「內臣不得干預政事,預者斬。」敕諸司不得與文移往 有老閹供事人,一日從容語及政事,帝大怒,卽日斥還鄉。嘗用杜安道爲御用監。 明太祖旣定江左,鑒前代之失,置宦者不及百人。迨末年頒祖訓,乃定爲十有二監及

安

七七六五

列

傳第一

百

九十二

宦官

始。 置東廠,令刺事。 舟師下西洋。 得幸,即位後遂多所委任。永樂元年,內官監李興奉敕往勞暹羅國王。 及燕師逼江北, 八年, 蓋明世宦官出使、專征、監軍、 內臣多逃入其軍,漏朝廷虛實。 都督譚青營有內官王安等。 分鎭、 又命馬靖鎭甘肅, 文皇以爲忠於己,而狗兒輩復以軍功 刺臣民隱事諸大權, 馬騏鎭交阯 三年遣太監鄭 皆自永樂間 十八年 和 帥

害百也。 卒於魏忠賢。 遂爲定制。 初,太祖制,內臣不許讀書識字。 今摭其有關成敗者,作宦官傳。 用是多通文墨,曉古今,逞其智巧,逢君作好。 考其禍敗,其去漢、唐何遠哉。 後宣宗設內書堂, 雖問有賢者,如懷恩、李芳、陳矩輩,然利一而 選小 數傳之後,勢成積重,始於王振, 內侍, 令大學士陳山教習之,

汪 鄭 直 和 侯顯 梁芳 金英 錢能 等 興安 何鼎 范弘等 鄧原等 王 振 李廣 曹吉祥 蔣琮 劉永誠 劉 瑾 懷恩 張永 覃吉

鄭 成祖疑惠帝亡海外,欲蹤跡之,且欲耀兵異域,示中國富强。 和 雲南 人,世所謂三保太監者也。 初事燕王於藩邸,從起兵有功,累擢 永樂三年六月命和 太監。

及其

谷大用

魏彬等

和使使招諭,祖義詐降,而潛謀邀劫。 和獻所俘舊港酋長。帝大悅,爵賞有差。 番國,宣天子詔,因給賜其君長,不服則以武懾之。五年九月,和等還,諸國使者隨和 八丈者六十二。 **儕王景弘等通使西洋。將士卒二萬七千八百餘人,多齎金幣。造大舶,修四十四丈、廣十** 自蘇州劉家河泛海至福建,復自福建五虎門揚帆,首達占城,以次福歷諸 和大敗其衆,擒祖義,獻俘,戮於都市 舊港者,故三佛齊國也,其會陳祖義,剽掠商旅。 朝見。

衆旣出,國內虛,率所統二千餘人,出不意攻破其城,生擒亞烈苦柰兒及其妻子官屬。 破滅,郡縣其地,諸邦益震響,來者日多。 舟者聞之,還自救,官軍復大破之。九年六月獻俘於朝。 六年九月再往錫蘭山。 國王亞烈苦柰兒誘和至國中,索金幣,發兵劫和舟。 帝赦不誅,釋歸國。是時,交阯已 和覘賊大 劫和

和 大喜,資諸將士有差 賜不及己,率兵邀擊官軍。 十年十一月復命和等往使,至蘇門答剌。 和力戰,追擒之喃渤利,並俘其妻子,以十三年七月還朝。 其前爲王子蘇幹刺者,二 方謀弑主自立,怒 帝

和齎敕印往賜 年 七 月還。 十四年冬,滿刺加、古里等十九國咸遣使朝貢,辭還。 十九年 之。 **比還,而成祖已晏駕。** 春復往,明年八月還。 洪熙元年二月,仁宗命和以下番諸軍守備南京。 二十二年正月, 復命 舊港酋長 和等偕往,賜其君長。 施 濟孫 請襲宣 慰 使職, 十七七

南京設守備 自和始也。「三宣德五年六月,帝以踐阼歲久,而諸番國遠者猶未朝貢,於是

和、景弘復奉命歷忽魯謨斯等十七國而還。〔三〕

命 國 沙里灣泥、竹步、榜葛剌、天方、黎伐、那孤兒,凡三十餘國。 錫蘭山、喃渤利、彭亨、急蘭丹、忽魯謨斯、比剌、溜山、孫剌、木骨都東、麻林、剌撒、祖法兒、 答剌、阿魯、柯枝、大葛蘭、小葛蘭、西洋瑣里、瑣里、加異勒、阿撥把丹、南巫里、甘把里、四 海 耗廢亦不貲。 表者,莫不盛稱和以夸外番,故俗傳三保太監下西洋,爲明初盛事云。 和經事三朝,先後七奉使,所歷占城、爪哇、眞臘、舊港、暹羅、古里、滿剌加、渤泥、蘇門 自宣德以還,遠方時有至者,要不如永樂時,而 所取 和亦老且死。 無名寶物,不可勝計,而 自和後,凡將 中

當 率使 成 祖 侯顯 時,銳意通四夷,奉使多用中貴。西洋則和、景弘,西域則李達,迤北則海童,而

西番

則

番 始 之,道路烜赫。 與其 乃命 侯 (僧偕· 顯 者 顯 來 齎書幣往迓,選壯 司 禮 五年二月建普度大齋於靈谷寺,爲高帝、高后薦福 詔 駙 少監。 馬都 尉沐昕 帝聞 鳥思藏 士 一健馬 迎之。帝延 護行。 僧尚師哈立 見奉天殿,寵賚優 元年四 麻 月奉使,至陸行數萬里,至 有道術,善幻 渥,儀仗鞍馬什器 化,欲致一見,因 或言卿雲、天花、甘露 多 四 以 年 通 十二月 迤 金銀為 西

應祐 表 雨 賀,學士胡廣等咸獻聖孝瑞應歌詩。 國 、青鳥、青獅、白象、白鶴及舍利祥光,連日畢見,又聞梵唄天樂自空而下。帝益大喜,廷 「演教 如來大寶法王西天大善自在佛,領天下釋教,給印誥制如諸王, 乃封哈立 麻 萬行 具足十方最 勝圓 覺妙智 其徒三人亦封 慧 善 普

灌頂大國師,再宴奉天殿。顯以奉使勞,擢太監。

藏、思達藏諸國 月命顯往宣諭,賜金幣,遂罷兵。 之西,有國曰沼納樸兒者,地居五印度中,古佛國也,侵榜萬剌。 東印度之地,去中國絕遠。 貢方物。 + |顯有才辨,强力敢任,五使絕域,勞績與鄭和亞。 年春復奉命,賜西番尼八剌、地湧塔二國。 韶封國王,賜誥印。 而還。途遇寇劫,督將士力戰,多所斬獲。 其王賽佛丁遣使貢麒麟及諸方物。 十三年七月,帝欲通榜葛刺諸國,復命顯率舟師 宣德二年二月復使顯賜諸番,偏歷烏斯藏、必力工 尼八剌王沙的新葛遣使隨顯入朝, 還朝,錄功陞賞者四百六十餘人。 帝大悅,錫予有 賽佛丁告於朝。 以行 加。 十八年九 ,其 榜葛 瓦、 國 東 卽

英宗立,與興安並 金英者,宣宗朝 司 貴 禮 幸。 太監也,親 及王 |振擅權,英不敢與抗。 信用 事。 宣德 七 年賜 英及 正統十四年夏旱,命英 范弘 冤 死 詔 解 極 理刑部、都 褒美。

七七六九

列

其秋 察院 扶理出,大言曰:「敢言遷者斬」。遂入告太后,勸郕王任于謙治戰守。 ,英宗北狩,中外大震。 獄囚,築壇大理寺。 英張黃蓋中坐,尚書以下左右列坐。自是六年一審錄,制皆如此。 郕王使英、安等召廷臣問計。 侍讀徐程倡議南遷,安叱之,令 或曰叱程者,英 也。

也。 景泰元年十一月,英犯贓罪,下獄論死。 也先入寇,至德勝門,景帝敕安與李永昌同于謙、石亨總理軍務。 帝令禁錮之,終景帝世廢不用,獨任安 永昌,亦司禮近侍

者? 遂疑安預謀矣。 書不及迎上皇。 孰爲文天祥、富弼」詞色俱厲。尚書王直面折之,安語塞。及遣都給事中李寔往,敕 也先遣使議和,請迎上皇,廷議報使。 廛驚,走白內閣,遇安。 安復詬曰:「若奉黃紙詔行耳,他何預」」及易儲,人 帝不懌,令安出,呼羣臣曰:「公等欲報使,孰

安有廉操,且知于謙賢,力護之。或言帝任謙太過, 安曰:「爲國分憂如于公者,

#### 二人

子,且與于謙、王文謀立外藩。 英宗復辟,盡磔景帝所用太監王誠、舒良、張永、王勤等,謂其與黃弦搆邪議,「尽」易太 是時,中官坐誅者甚衆,安僅獲発云。 於是給事、御史皆言安與誠、良等爲黨,宜同罪。帝宥之,但

安佞佛,臨歿,遺命春骨爲灰,以供浮屠。

弘,嘗目之曰蓬萊吉士。十四年從征,歿於土木,喪歸,葬香山永安寺,弘建也。而王瑾至景 安、阮浪等與焉。 更名,累遷司禮太監,偕英受免死詔,又偕英及御用太監王瑾同賜銀記。正統時,英宗眷 范弘、交阯人,初名安。 占對嫻雅,成祖愛之,敎令讀書,涉經史,善筆札,侍仁宗東宮。宣德初, 永樂中,英國公張輔以交童之美秀者還,選爲奄,弘及王瑾、阮

清」。 四方兵事,賞賚累巨萬,數賜銀記曰「忠肝義膽」,曰「金貂貴客」,曰「忠誠自勵」,曰「心跡雙 又賜以兩宮人,官其養子王椿。其受寵眷,英、弘莫逮也。 瑾,初名陳<del>燕</del>。 宣宗爲皇太孫時,朝夕給事。及卽位,賜姓名。從征漢王高煦還,參預

泰時始卒。

正統時,重建三殿,治楊村河,並有功。景泰中,治張秋河,道卒,囊無十金 阮安有巧思,奉成祖命營北京城池宮殿及百司府廨,目量意營,悉中規制,工部奉行而

之,浪、瑶皆磔死,詞終不及上皇。 皇城使王瑤。 阮浪至景帝時,爲御用監少監。|英宗居南宮,浪入侍,賜鍍金繡袋及鍍金刀。 |平令校尉||李善上變,言||浪傳上皇命,以袋刀結||瑤謀復位。 錦衣衞指揮盧忠者,險人也,見瑤袋刀異常製,醉瑤而竊之,以告尙 英宗復辟、磔忠及平、而贈浪太監 景帝下浪、路韶獄,忠證 浪 衣監 以贈

列傳第一百九十二 宦官一

後, 得因以市權。 歡,遂越金英等數人掌司禮監,導帝用重典御下,防大臣欺蔽。 心憚之未敢逞。 漸加委寄,然犯法輒置極典。 王振,蔚州人。少選入內書堂。 又裴可烈等不法,立誅之。 然是時,太皇太后賢,方委政內閣。 宣宗時,袁琦令阮巨隊等出外採辦。 侍英宗東宮,爲局郞。 諸中官以是不敢肆。及英宗立,年少。 閣臣楊士奇、楊榮、楊溥,皆累朝元老,振 初,太祖禁中官預政。 於是大臣下獄者不絕,而 事覺,琦磔死,巨 振狡黠得帝 自永樂 振

講劉 謪。 嶺 李時勉素不 逮之,並坐需舉主王鐸。 勢輕,振遂跋扈不可制。 衞 球因雷震上言陳得失,語刺振。 內侍張環、顧忠,錦衣衛卒王永心不平,以匿名書暴振罪狀。 至正統七年,太皇太后崩,榮已先卒,士奇以子稷論死不出,溥老病,新閣臣馬愉 駙馬都尉石璟詈其家閹,振惡賤己同 禮振。 振摭他事陷瑄幾死,時勉至荷校國子監門。 又械戶部尚書劉中敷,侍郎吳璽、 作大第皇城東,建智化寺,窮極 振下球獄,使指揮馬順支解之。 類,下璟獄。 土木。 怒霸 陳端於長安門。 州 興麓川之師 御史李鐸遇 事發,磔於市,不覆奏。 知州張 大理 需禁飭牧馬校卒, 所件恨 振 , 西南 少卿薛瑄、祭酒 不 跪, 謫 骚動 ,輒加罪 曹鼐 戍鐵 侍

膝。 畏 禍 其從 者 帝 爭 方 子 附 傾 <u>山</u> 心嚮振 振 **免死** 林 至 一嘗以 一廕都 賕 賂 先生 督指 輳 集。 呼 揮。 之。 工 部 私 黨馬順 賜 郎 振 中 Ė 敕,極褒美。 、郭敬、陳官 祐 以善諂 擢 振 本 權 唐童等並 部 日 侍 益 郞 積 兵 重 上肆行 一、公侯 部 尙 無 書徐晞 忌 勛 戚 **外之**, 呼 等多 日 翁 構釁 至屈 父。

瓦

刺刺

振

逐敗

勇等 寨, 並 振 舉 御史陳鎰等廷奏振 走,壬戌始 七尺者二十餘株,他珍玩 振 終 文 雨 念,振 自 黨誅之,振族無少長皆斬。 弗 瓦 基。 刺 從。 者,元 ,成 挾帝 次土木。 振初 八月已 膝行 裔 親 議道紫荆 進。 也。 征 酉 罪,江給事 瓦刺兵追至,師大潰。帝蒙塵,振 ,帝駐大同 十四四 尚書 鄺埜、王佐忤 廷 無算。 臣 關 交 年,其太師也先貢馬,振減其直,使者恚而去。 諫, 由 中王竑等立擊殺馬順 振益 蔚州 振 弗 擅權 聽。 邀帝幸 欲 七年,籍其家,得金銀六十餘庫,玉盤 至宣府, 北。 振意、罰 其第, 旣恐蹂鄉 鎭守太監 脆草 大 風 乃爲 及毛、王二中官。 中。 雨, 郭敬 亂兵所殺。 復 其黨欽 以敵勢告,振 稼, 有 諫者,振益 復 天監正彭德清 改道宣府。 敗報聞 郕王 始懼 一虓怒。 秋七月, 一命臠 ,百官慟哭,都 百,珊瑚高六 軍 王山 以天 班 士紆 成 師 也先 國 於市, 至雙 象諫, 公朱 廻 奔 大

寧侯宋瑛、駙馬 先是 ,郭敬鎭大同 都 尉 井 源 ,歲造箭鏃數十甕,以振命遺瓦剌 爲前鋒,遇敵陽和,敬又撓使敗。 、瓦剌 至是逃歸,亦坐誅 輒報以良馬。 及帝親征,西

傳第一百九十二 宦官一

列

英宗復 辟,顧念振 不置。 用太監劉恒言,賜振祭,招魂以葬,祀之智化寺,賜祠曰精

而振門下曹吉祥復以奪門功,有寵顓政。

監劉 永誠 曹吉祥,欒州 分道。 又與寧陽侯陳懋等征鄧茂七於福建。吉祥每出,輒選達官、跳盪卒隸帳下, 人。 素依王振。 正統初,征麓川,爲監軍。 征兀良哈,與成國公朱勇、太

師還畜於家,故家多藏甲。

欽,從子鉉、鐸、鎔等皆官都督。欽進封昭武伯,門下厮養冒官者多至千百人,朝士亦有依附 希進者,權勢與石亨埓,時並稱曹、石。 景泰中,分掌京營。 後與石亨結, 帥兵迎英宗復位。 遷司禮太監,總督三大營。 嗣

韶,韶語激切。 爲下瑄等詔獄,而逮治閣臣徐有貞、李賢等。 悟,悉還其職。 於是給事何玘等十三人改州判官,御史吳禛等二十三人改知縣。 二人惡言官有言,共譖於帝, 未幾,一人爭寵有隙,御史楊瑄、張鵬劾之,吉祥乃復與亨合,乘問愬帝。帝 古祥、亨復愬正謗訕,帝又謫正。 命吏部尚書王翺察核年三十五以上者留,不及者調用。 事具賢傳。 焰益張,朝野仄目。 承天門災,帝命閣臣岳正草罪己 會有風 雷雨雹之變,帝乃

欽大喜。 祥不自安,漸蓄異謀,日犒諸達官,金錢、穀帛恣所取。 諸達官恐吉祥敗 而 己隨黜退也,皆 願盡力效死。 久之,帝覺其奸,意稍稍疑。 及李賢力言奪門非是,始大悟,疎<u>吉</u>祥。 天順五年七月,欽私掠家人曹福來,爲言官所劾。 |欽問客||為日:「自古有宦官子弟爲天子者乎。」||益日:「君家魏武,其人也。」 帝令錦衣指揮逯杲按之,降敕 無何,石亨敗,吉

**偏灕羣臣。欽驁曰:「前降敕,遂捕石將軍。** 

今復爾,殆矣。」謀遂決。

| 運 俱 守衞 序、馮益及吉祥姻黨皆伏誅。 散 房。 是月庚子昧爽,欽擁兵入,而已以禁軍應之。 於內,而敕皇城及京城九門閉弗啓。 會大雨 走攻東安門,道殺瑾。 去 者拆河 以杲頭示賢曰:「杲激我也。」又殺都御史寇深於西朝房。攻東、西長安門不得入,縱火。 宿朝房。 是時甘、凉告警,帝命懷寧侯孫鏜西征,未發。 螳勒 如 注,鏜督諸軍 兵逐飲,斬鉉、鎔,蹚子軏斫飲中膊。 「壖甎石塞諸門。 達官馬亮恐事敗,逸出,走告瑾。瑾趣饄由長安右門隙投疏入。帝急繫吉祥 復縱火,門燬。 大呼入,欽投井死。 賊往來叫呼門外。 馬亮以告反者,授都督。 飲知<u></u>
亮逸,中夜馳往<u></u>
遠果家,殺果,斫傷<u>李</u>賢於東朝 門內聚薪益之,火熾,賊不得入。 遂殺鐸,盡屠其家。 謀定,欽召諸達官夜飲。是夜,鏜及恭順侯吳 鐘遣二子急召西征軍擊欽於東長安門。 飲走突安定諸門,門盡閉。 吉祥使其黨掌欽天監太常少卿湯序擇 越三日,磔吉祥於市。 天漸曙,欽黨稍稍 奔歸家 ,拒戰。 欽 湯

英宗始任王振,繼任吉祥,凡兩致禍亂。 其他宦者若跛兒干、亦失哈、喜寧、韋力轉、牛

压之屬,率兇狡。

使寧還京索禮物,而命校尉袁彬以密書報邊臣。至獨石,參將楊俊擒寧送京師,景泰元年 所需索、景帝執而誅之。喜寧數爲也先畫策、索賞賜、導入邊寇掠。 一月磔於市。云 土木之敗,跛兒干、喜寧皆降敵。跛兒干助敵反攻,射內使黎定。 上皇患之,言於也先, 旣又爲敵使至京,有

亦失哈。 亦失哈鎭遼東。 正統十四年冬,帶兒逃歸,巡按御史劉孜並劾亦失哈及他不法事。景帝命誅帶 敵犯廣寧,亦失哈禁官軍勿出擊。百戶施帶見降敵,爲脫脫不花通於

兒,而置亦失哈不問。

事。 射殺養子。天順元年,工部侍郎霍瑄發力轉僭用金器若王者,及强娶所部女爲妾諸不法 帝怒,執之下錦衣衞獄,旣而 韋力轉者,性淫毒,鎭守大同,多過惡。 宥之。 牛玉事,詳吳廢后傳。 **衡軍妻不與宿,杖死其軍。** 又與養子妻淫戲,

兀良哈。 其與吉祥分道征兀良哈者劉永誠,永樂時,嘗爲偏將,累從北征。 後監鎭甘、凉,戰沙漠,有功。 景泰末,掌團營。 英宗復辟,勒兵從,官其嗣子聚。 宣德、正統 中,再擊

被宮爲小黃門,賜名懷恩。 懷恩,高密人,兵部侍郎戴綸族弟也。至宣宗殺綸,並籍恩父太僕卿希文家。 憲宗朝,掌司禮監。 時汪直理西廠、梁芳、韋興等用事。 恩方幼, 恩班在

前,性忠鯁無所撓,諸閹咸敬憚之。

萬貴妃言,欲易太子,恩固爭。 奈何以賄進。」當是時,尙書王恕以直諫名,恩每嘆曰:「天下忠義,斯人而已。」憲宗末,惑 萬安,用王恕。 天雷擊汝矣」敏愧恨,遂死。 傳奉者,帝許之。 恩発冠伏地號哭。 徑歸,稱疾不起。 員外郎林俊論芳及僧繼曉下獄,帝欲誅之,恩固爭。 一時正人彙進,恩之力也。卒,賜祠額曰顯忠。 敏謁恩,恩大罵曰:「星變,專爲我曹壞國政故。今甫欲正之,又爲汝壞, 帝怒解,遣醫視恩,卒釋俊。 帝叱之出。 進寶石者章瑾求爲錦衣衞鎭撫,恩不可,曰:「鎭撫掌詔獄, 恩遣人告鎭撫司曰:「汝曹諂芳傾俊。 帝不懌,斥居鳳陽。 會星變,罷諸傳奉官。 孝宗立,召歸,仍掌司禮監,力勸帝逐 帝怒,投以硯曰:「若助俊訕 俊死,汝曹何以生! 御馬監王敏請留馬房

列

**驚曰:「老伴來矣。」亟手孝經。 吉跪曰:「太子誦佛書乎。」曰:「無有。** 憲宗賜太子莊田,吉勸毋受,曰:「天下皆太子有也。」太子偶從內侍讀佛經,吉入,太子 同 時有覃吉者,不知所由進,以老閥侍太子。太子年九歲,吉口授四書章句及古今政 佛書誕,不可信也。」弘治之世,政治醇美,君德清明,端本正始,吉有力焉。 孝經耳。」吉頓首曰:

爲人便點,帝因令易服,將校尉一二人密出伺察,人莫知也,獨都御史王越與結歡。 見宮中,妖人李子龍以符術結太監韋舍私入大內,事發,伏誅。帝心惡之,銳欲知外事。 明年設西廠,以直領之,列官校刺事。南京鎭監覃力朋進貢還,以百艘載私鹽,騷擾州 汪直者,大藤峽瑶種也。初給事萬貴妃於昭德宮,遷御馬監太監。成化十二年,黑眚 直

縣。 倖免,而帝以此謂直能摘姦,益幸直。直乃任錦衣百戶韋瑛爲心腹,屢興大獄 武城縣典史詰之,力朋擊典史,折其齒,射殺一人。直廉得以聞,逮治論斬。 力朋後得

請瑛,瑛陽諾而馳報直。 而 建寧衞指揮楊曄,故少師榮曾孫也,與父泰爲仇家所告,逃入京,匿姊夫董璵所。 直即捕嘩、興考訊,三琶之。琶者,錦衣 酷刑也。 骨節皆寸解,絕 ) 興 為

掠其妻孥。 重法,人情大擾。直每出,隨從甚衆,公卿皆避道。 福等皆無故被收案。 獄具, 曄死獄中, 泰論斬, 士偉等皆謫官, 郎中武淸、樂章, 行人張廷綱, 自諸王府邊鎭及南北河道,所在校尉羅列,民間鬭詈雞狗 兵部尚書項忠不避,迫辱之,權焰出東 瑣 事, 參政劉 輒置

廠上。

中外大悅 入。帝不得已,罷西廠,使懷恩數直罪而宥之,令歸御馬監,調韋瑛邊衞,散諸旗校還錦衣。 無有先後。」 珝慷慨泣下。愿遂據實以奏。頃之,傳旨慰勞。翼日,尚書忠及諸大臣疏亦 高 **[至閣下,厲色傳旨,言:「疏出誰意。」」輅口數直罪甚悉,因言:「臣等同心一意,爲國除害,** 五. 月,大學士商輅與萬安、劉珝、劉吉奏其狀。 帝震怒,命司禮太監懷恩、覃吉、日三黃

吳綬爲鎭撫,直焰愈熾。 數十人。 褫職,[15] 大學士輅亦罷去。 帝命三法司、錦衣衞會問。 於南京。 然帝眷直不衰。 御史戴縉者,佞人也,九年秩滿不得遷。窺帝旨,盛稱直功。 以所善王越為兵部尚 直因言閣疏出司禮監黃賜、陳祖生意,爲楊曄報復。 未幾,令東廠官校誣奏項忠,且諷言官郭鐘、馮貫等論忠違法事。 衆知出直意,無敢違,竟勒忠爲民。 書兼左都御史,陳鉞爲右副都御史巡撫遼東 時九卿劾罷者,尚書董方、三三薛遠及侍郎滕昭、程萬里等 而左都御史李賓亦失直旨 詔復開西廠,以千戶 帝卽斥賜、祖生

列

大悅。 遼東,直至,不爲禮,又輕餓,被陷坐戍。由是直威勢傾天下。 御史畏直,服橐鞬迎謁,供張百里外。至遼東,陳鉞郊迎蒲伏,廚傳尤盛,左右皆有賄。 惟 年秋,詔直巡邊,率飛騎日馳數百里,御史、主事等官迎拜馬首,箠撻守令。各邊都 河南巡撫秦紘與直抗禮,而密奏直巡邊擾民。帝弗省。 兵部侍郎馬文升方撫諭 直

耳。 其軍。 銘 永同越西討,直爲監軍。 中 事,帝始疎直 曰:「今人但知汪太監也。」 又為直狀,操 殺掠甚衆。 **| 獲賊得厚賞,直忌,且怒銘不告。** 官阿丑 問 直年少喜兵。陳鉞諷直征伏當加,立邊功自固。 師還,永封保國公,鉞晉右都御史,直加祿米。 何 工俳優,一日於帝前爲醉者謾罵狀。 鉞, 遼東巡按强珍發鉞奸狀,直右鉞謫珍。 曰:「王越、陳鉞也。」帝听然而 越封威寧伯,直再加祿米。 **| 銘懼,乃廉得其所洩禁中祕語奏之,盡發|王越交通不法** 兩鉞趨帝前。 笑,稍稍悟, 人言駕至, 謾如故。 於是惡直者,指王越、陳鉞爲二鉞。 已, 伏當加寇遼東, 亦思馬因寇大同 又用王越言,詐稱亦思馬因犯邊。 直聽之,用撫寧侯朱永總兵,而自監 旁人問之,曰:「吾將兵, 然廷臣猶未敢攻直也。 言汪太監至, 仗此 則 會 東 避 廠尚 兩鉞 小

獨 留直、越。 七年 秋,命直偕越往宣府 直旣久鎭不得還,龍日衰。 禦敵。 敵退,直請班師。 給事御史交章奏其苛擾,請仍罷西廠 不許,徙鎮大同,而 盡 石將 閣臣萬安 吏還

西 亦力言之。 一致仕,不問。 廠 不復設。 越、鉞頗 而大同巡撫郭鐘復言直與總兵許寧不和,恐悞邊事。 中外 韋瑛後坐 進。 欣然。 縉無他: 他事誅, 尋又以言官言,降直奉御,而褫逐其黨 能,工側媚而 人皆快之,然直竟良死。 已。 縉由 御史不數年至南京 王越、戴縉 帝乃調直南京御馬 、吳綬等。 監 一部尚 陳鉞 元龍

以

材

不至。 懷恩,旣代銘,誠諸校尉曰:「有大逆,告我。 西廠 帝尋覺之,謫充南京 廢, 尚銘 遂 專 東 廠 淨軍 事 ·,籍其家,輦送內府 聞京師 有富室,輒以 非是,若勿預也。」都人安之。 數 事羅織,得重賄 日 不 盡。 而 陳準代爲東廠 乃已。 賣官鬻爵,無所 準素善

皆由 盏 奏,然 鄭 其黨錢能 時 謂芳及 論 芳進,共爲 梁芳 不罪芳也 芳被黜,陝民哭送之。 者, 韋 韋眷 興 憲宗朝內侍也。 姦利。 二、王敬 目 刑部 等,爭假 費帑 員 取 外 中旨授官,累數千人,名傳奉官,有白衣躐至太常卿者。 郞 藏 帝聞 林俊 採辦 **貪黷諛佞**, 實由 名, 以劾芳及繼曉下獄。 頗悔,斥傳奉官十人,繫六人獄 汝二人。」 出 監 與韋興比。 大鎭。 興不 帝以妃故,不問也。 · 敢對。 而諂萬貴妃,日 久之, 帝視 芳曰:「建 認 內帑 顯 自後傳旨授官者 進 靈宮及諸祠 妖 ,見累朝 美珠珍 人李孜 省 寶悅妃意 金七窖俱 陜 「僧繼曉 廟 西 俱 巡撫

列

傳

第

子,而 下 耐萬 立 年 興王 福 耳 會泰山 帝 不懌曰:「吾不汝瑕,後之人將與汝計矣。」 累震,占者言應在 東朝。 帝懼,乃 止 芳大懼, 遂說貴妃勸帝

湖廣 行 孝宗立, 都 司 地方。 謫芳居南京, 尚書劉大夏、給事中周璽 尋下 獄, 興亦斥退。 御史曹來旬諫, 正德 初, 羣閹復薦興 不聽。 司香太和山,兼 興遂復 用 而芳卒廢 分 守

許爲奏授宣撫。 南。 夤緣得南京守備。 格之不 使郭景往諭 巡 求宥,帝曲從之。 鍾蕃往按,事皆實。 撫 陳宣 舊 錢能 制 得入,乃去。 劾忠, 芳黨也。 安南貢 其王, 韶從之。 因 踰三年,事發。 巡按御史甄希賢復劾能杖守礦千戶一人死,亦不罪。召歸,安置南京。復 道出 請 時恕爲南京參贊尚書,能心憚恕不敢肆。 帝宥能,而致其黨九人於法。 復遺景與指揮盧安等索寶貨於干崖、孟密諸土司,至逼 憲宗時,鄭忠鎭貴州,韋朗鎭遼東,能鎭雲南,並恣縱,而能 盡撤 廣西,後請改由雲南, 諸鎭監, 能逐令景以玉帶、 韶巡撫都御史王恕廉之,捕景,景赴井死。 帝不允。 mi 弗許也。 綵繒、犬馬遺王,紿其貢使改道雲南。 雲南巡按御史郭陽顧上疏譽能,請 指揮姜和、李祥不就逮,能復上疏 能 **祚言安南捕盜兵入境**, 淫爨罕弄女孫, 再遣刑部 尤横。 請遣 留 爲二人 之雲 指 郎 中 揮

莫敢逆眷者。 戶六十隸市舶。 章眷、王敬亦芳黨。 弘治初,眷因結察用妄舉李父貴冒紀太后族,自即降左少監,撤回京。 布政使彭韶爭之,詔給其半。 眷爲廣東市舶太監,縱賈人通諸番,聚珍寶甚富。 眷又誣奏布政使陳選,被逮道卒。 請以廣南均徭 自是, 事詳紀

詔斬臣,而黜敬充孝陵衞淨軍。 兩。 至蘇州,召諸生使錄妖書, 王敬好左道,信妖人王臣。 且辱之。 使南方,挾臣同行。 諸生大譁。 **僞爲詔,括書畫、古玩,聚白金十萬餘** 巡撫王恕以聞。 東廠尚銘亦發其事

太后傳。

昆、進士吳宗周先後論救,帝以后故,俱不納。 使, 寧侯張鶴齡兄弟出入宮禁,嘗侍內庭宴。 窺御帷、鼎持大瓜欲擊之,奏言:「二張大不敬,無人臣禮。」皇后激帝怒,下鼎錦衣獄。問 鼎曰:「有。」問為誰,曰:「孔子、孟子也。」給事中龐泮、御史吳山及尚書周經、主事李 何鼎,餘杭人,一名文鼎,性忠直。 弘治初,爲長隨,上疏請革傳奉官,爲儕輩所忌。 帝如 后竟使太監李廣杖殺鼎。 **厠,鶴齡倚酒戴帝冠,鼎心怒。** 帝追思之,賜祭, 他日鶴齡 復 主

勒其文於碑。

民。 帝嘗語劉 而敬至世宗朝,年九十餘始卒。 兵部 是時 上其 大夏曰:「蕭敬朕 中官多守法,奉詔出鎭者,福建鄧原、浙江麥秀、河南藍忠、宣府劉淸,皆廉潔愛 事, 賜敕旌勵。 所顧問,然未嘗假以權也。」獨李廣、蔣琮得帝寵任,後二人俱敗, 叉有司 禮太監蕭敬者, 歷事英宗、憲宗,諳習典故, 善鼓琴。

廣懼自殺。 幾,清寧宮災。 御史張縉等交章論劾,帝不問。十一年,廣勸帝建毓 方爭納賄賂。 李廣,孝宗時太監也。 又擅奪畿內民田,專鹽利鉅萬。 日者言廣建亭犯歲忌,太皇太后恚曰:「今日李廣,明日李廣,果然禍及矣。」 以符籙禱祀蠱帝,因爲奸弊,矯旨授傳奉官,如成化間故事,四 起大第,引玉泉山水,前後 秀亭於萬歲山。 亭成,幼公主殤,未 送之。 給事 葉紳、

諸交結廣者,走壽寧侯張鶴齡求解,乃寢勿治。廣初死時,司設監太監爲請祠額葬祭,及是 驚曰:「廣食幾何, 以大學士劉健等言,罷給祠額,猶賜祭。 帝疑廣有異書,使使卽其家索之,得賂籍以進,多文武大臣名,餽黃白米各千百石。帝 乃受米如許,」左右曰:「隱語耳,黃者金,白者銀也。」帝怒,下法司究治。

江 地,故不 而 蔣琮, 瀕 隸三廠。 江 生沙 大興人。 別六,民請耕之,以補沉 太監黃賜 孝宗時,守備南京。 爲守備時,受奸民獻, 江 沿江蘆 田額 o 場, 洲 俱指 與蘆場近,又瓦屑壩廢 舊 爲蘆場,盡收其利。 隸 三廠。 成化 初, 江 民已 地 浦 及 石 縣 失業, 城門 田 多沉於 而 外 歲 湖

額租 課仍責償之民。 孝宗立 一,縣民相率愬於朝,下南京御史姜綰等覆按。

遣太監何穆、大理寺少卿楊謐 監陳 鏞 中, 等及南京諸司 用 擅 放故 令主事 弘治 遊 祖 爲祖 禁地 生 復 二年,綰等劾琮與民爭利,且用揭帖抗 、給事中 生所奏。 奏戶 鏞怒, 違法事。 部 主事 各一人守之, 歸愬於帝 事下南京法司。 給事中韓重 盧錦、給事中方向 ,言府尹楊守隨勘錦 再勘後湖 百司不得至。 因星變請斥踪及太監郭鏞 適郭鏞奉使兩廣,道南京,往觀焉。 田,幷覆綰、琮訐奏事 私種 南京後湖 歲久湖塞,錦、 部旨。 、向失出,御 穿條辨館疏 田 事。 等,以 向於 史不 後湖者,洪武 ·劾奏, ,而泛及御史劉愷、 湖灘稍 弭天怒, 獨繩 御史孫 種蔬 時置黃册 未 內 伐葦, 報。 臣。 紘等因 方岳 帝 給 庫 而 太 劾 其 公

誣, 縮等劾琮 明 年 ,奏上,褫錦職,謫守隨、向以下官有差。 亦多不實, 並宜逮治。 詔逮維等。 御史伊宏、給事中陳璚等皆言不宜以一內 又勘踪不當受獻地,私 屬勘官,所託 事皆

列

傳

第

百

九

+

宦

官

納。 商人諸罪。 己,故興此獄。 臣 mi 琮由是益無忌。 置 御史十 **踩竟免死,充孝陵淨軍。** À 尚書王恕、李敏,給事中趙竑 八於獄, 久之,廣洋衞指揮石文通奏琮僭侈殺人,掘聚寶山傷皇陵氣, 不聽。 **縮等鐫級調外,而宥琮不問。** ,御史張賓先後言踪、綰同 時劉吉竊 罪異罰, 柄、素惡南京 失平 及毆殺 御 史劾 亦不

皆格不行,而勸帝令內臣鎭守者各貢萬金。又奏置皇莊,漸增至三百餘所,畿內大擾。 行。 舊恩得幸,人號「八虎」,而瑾尤狡狠。 得侍武宗 帝大歡樂之,漸信用達,進內官監,總督團營。孝宗遺詔罷中官監鎗及各城門監局,瑾 劉瑾 東宮。 「<br />
興平人。本談氏子,依中官劉姓者以進,<br />
冒其姓。 武宗即位,掌鐘鼓司,與馬永成、高 嘗慕王振之爲人,日進鷹犬、歌舞、角觝之戲,導帝微 鳳、羅祥、魏彬 孝宗時,坐法當死,得免。 、丘聚、谷大用 、張永 並 已, 以

聽。 臣繼之。帝不得已,使司禮太監陳寬、李榮、王岳至閣,議遣瑾等居南京。 、胡煜、楊一瑛、張繪,御史王渙、趙佑,南京給事、御史李光翰、陸崑等,交章論 五官監候楊源以星變陳言,帝意頗動。 外廷知八人誘帝游宴,大學士劉健、謝遷、李東陽驟諫,不聽。尚書張昇,給事 健、遷等復連疏請誅瑾,戶部尚書韓文率諸 三反,健等執不 諫, 中陶 亦不

瑾 掌 伏 出 瑾 智折臂。 以 可 、闕,知 健 入, 故先去所忌耳。 **瑾大懼** .(等語告帝,且言閣臣議是。 司禮監,永成掌東廠,大用掌西廠,而 尙 書許進曰:「過激將有變。」健不從。 事已變,於是健、遷、東陽皆求去。 時正德元年十月也 ,夜率永成等伏帝前環泣。帝心 且鷹犬何損萬幾。 健等方約文及諸九卿詰朝伏闕面爭,而 若司禮監得人,左班官安敢如是。」帝大怒,立 夜收岳及亨、智充南京淨軍。 帝獨留 王岳者,素謇直,與太監范亨、徐智心嫉八人,具 動,瑾因曰:「害奴等者王岳。 原陽,而令焦芳入閣,追殺岳、亨於途,箠 吏部尚書焦芳馳 旦日諸 岳結閣臣欲制 臣入朝, 命 自 將 F

官張 創 旨 不贍。 守仁,復以救銑等謫 等六人,御史薄彥徽等十 用 授錦 枷 駿 瑾 等 法,給 衣 因 旣 得罪,珩 改謄 官 題 得 數百員。 志 擅 事 威 ,遂以事革韓文職,而 中 超 福 、瀚勒致仕,削承慶半祿。 吉 拜 時 杖有差。 官 通鑑纂要 悉遺黨閥 御 秩 Ė. ・史王 人。 駿 時 由 成,瑾誣諸翰林纂修官謄寫不謹,皆被譴, 分鎭各邊。 中,郎 守備南京武靖伯趙承慶、三三府 光 禄 杖責請 卿 中劉釋、張瑋,尚寶卿顧璿, 擢 毛毛 敍大同 禮部 南京 留健、 舉官僚細 尚書, 副 遷者給 功,遷擢官校至一千五百六十餘 都御史陳壽,御 他授京 過,散布 事中 呂翀 卿者數人, 校尉,遠近 尹 陸 史陳琳 劉蒞 副使: 珩 ()) 姚祥, 及南京給 裝潢 王 而 値 書林瀚, 命文華殿 良臣 に何っ使 匠役悉授官 參議吳廷舉 事 , 人,又傳 人 主事 皆 中 書辨 救 戴 以 過 銑 傳

斌 谨 等, 善視 一每奏 並 摭 事 獄 小過、枷瀕死、始釋而戍之。 囚,权 必偵帝爲戲弄時。 而 錮之。 府丞周璽、五 帝厭之,亟麾去曰:「吾用若何事, 其餘枷死者無數。 官監候楊源杖至死。 錦衣獄徽纆相屬。 源初以星變陳言, 乃溷我一自此遂專決,不 惡錦衣愈事牟 罪瑾者也。

復白。

苦之。 遂成。 辭率鄙冗,焦芳爲潤色之,東陽頻首而 浩、陸崑、張鳴鳳、蕭乾元、姚學禮、黃昭道、蔣欽、薄彥徽、潘鐘、王良臣、趙佑、何天衢、徐 徐暹、張良弼、葛嵩、趙士賢,御史陳琳、貢安甫、史良佐、曹閔、王弘、任諾、李熙、王蕃、葛 守隨、張敷華、林瀚,部曹則郎中李夢陽,主事王守仁、王綸、孫磐、黃昭,詞臣 压、楊璋、熊卓、朱廷聲、劉玉等,皆海內號忠直者也。 又令六科寅入酉出,使不得息,以困 言路則給事中湯禮敬、陳霆、徐昂、陶諧、劉蒞、艾洪、呂翀、任惠、李光翰、戴銑、徐蕃、牧相、 二年三月,瑾召羣臣跪金水橋南,宣示奸黨,大臣則大學士劉健、謝遷,尚書則韓文、楊 令文臣毋輒予封誥,痛繩文吏。 **瑾不學,每批答章奏,皆持歸私第,與妹壻禮部司務孫聰、華亭大猾張文冕相參決,** Ę 寧王宸濠圖不軌,賂瑾求復護衞。 瑾予之, 濠反謀 則檢討劉

賄 ,不得,又聽都御史劉宇讒,怒御史楊南金,乃以大計外吏奏中,落二人職。 當 是時 ,瑾權擅天下 ٠, 威福 任情。 有罪 人溺 水死,乃坐御史匡翼 之罪。 嘗求 授播州土司 學士吳嚴

楊斌 拜。 章奏先具紅揭投瑾,號紅本,然後上通政司,號白本,皆稱劉太監而不名。 爲四川按察使。令奴壻閭潔督山東學政。 公侯勳戚以下,莫敢鈞禮,每私謁,相率跪 都察院奏讞

湯全、劉憲,布政以下官孫祿、冒政、方矩、華福、金獻民、劉遜、郭緒、張翼,郎中劉繹、王蓋 誤名瑾,瑾怒詈之,都御史屠滽率屬跪謝乃已。 遣使察覈邊倉,都御史周南、張鼐、馬中錫、

奇等。 等,並以赦前罪,下獄追補邊粟,憲至瘐死。又察鹽課,杖巡鹽御史王潤,逮前運使甯舉、楊 察內甲字庫,謫尙書王佐以下百七十三人。復創罰米法,嘗忤瑾者,皆擿發輸邊。

賢、任良弼,御史張津、陳順、喬恕、聶賢、曹來旬等數十人悉破家,死者繫其妻孥

故尚書雍泰、馬文升、劉大夏、韓文、許進、都御史楊一淸、李進、王忠,侍郎張縉,給事中趙

其年夏,江沿御道有匿名書詆瑾所行事,瑾矯旨召百官跪奉天門下。 **瑾立門左詰** 責,日

暮 收五品以下官盡下獄。 明日,大學士李東陽申救,瑾亦微聞此書乃內臣所爲,始釋諸臣。 瑾惡

之。 枉 而 主事 太監黃偉憤甚,謂諸臣曰:「書所言皆爲國 何釴、順天推官周臣、進士陸伸已暍死。 日勒榮閒住,而逐偉南京。 爲民事,挺身自承,雖死不失爲好男子,奈何 是日酷暑,太監 李榮以冰瓜 陷羣臣,

又悉逐京師客傭 時 東廠 、西廠 ,令寡婦盡嫁,喪不葬者焚之,輦下洶洶幾致亂。 緝 事 人 四出 , 道路惶 懼。 瑾復立 內行廠,尤酷烈,中人 都給 事中許天錫欲劾瑾, 以微法,無得 全者。

列 傅 第 百 ル -|-宦 官

懼弗克,懷疏自縊。

當遷秩,瑾惡翰林官素不下已,調侍講吳一鵬等十六人南京六部。 皆坐,或瞰河居者,以河外居民坐之。 屢起大獄,冤號遍道路。 浙江鹽運使楊奇逋課死,至鬻其女孫。而給事中安奎、潘希曾,御史趙時中、阮吉、張彧、劉 察,有司爭厚斂以補帑。所遣人率阿瑾意,專務搏擊,劾尚書顧佐、倡鍾、韓文以下數十人。 之。 子厲,以無重劾下獄。奎、彧枷且死,李東陽疏救,始釋爲民。希曾等亦皆杖斥,忤意者謫 斥有差。又矯旨籍故都御史錢鉞、禮部侍郎黃景、尚書秦紘家。 「今天下所餽遺公者,非必皆私財,往往貸京師,而歸則以庫金償。公奈何斂怨貽惠。」瑾然 會御史歐陽雲等十餘人以故事入路,瑾皆舉發致罪。乃遣給事、御史十四人分道盤 瑾故急賄,凡入覲、出使官皆有厚獻。 給事中周鑰勘事歸,以無金自殺。 孝宗實錄成,翰林預纂修者 凡瑾所逮捕,一家犯,鄰里 其黨張綵曰:

官」,兵部卽奉行,不敢復奏。 撫 達腹心。 地,誅求苛刻。 陸完後至,幾得罪,旣賂,乃令試職視事。 是時,內閣焦芳、劉宇,吏部尙書張綵,兵部尙書曹元,錦衣衞指揮楊玉、石文義,皆爲 變更舊制,令天下巡撫入京受敕,輸運路。延綏巡撫劉宇不至,逮下獄。 邊軍不堪,焚公廨,守臣諭之始定。 邊將失律,賂入,卽不問,有反陞擢者。 都指揮以下求遷者,蓮第書片紙曰「某授某 給事中高涝丈滄州,所劾治六十一人, 又遣其黨丈邊塞屯 宣府巡

劉璟無所彈劾,瑾詬之。 西 名,亦爲芳增河南額至九十五名,口口以優其鄉士。 至劾其父高銓以媚瑾。 鄕 試試 額五十名,仍禁授京秩 又以謝遷故,令餘姚人毋授京官。 璟懼,劾其屬王尚賓等三人,乃喜。 如餘姚,以焦芳惡彭華故也。[17] 瑾又自增陝西鄉試額 其年,帝大赦, 瑾峻刑自 以占城國使人亞劉謀逆獄,裁江 給事中都變核楡林功,懼失瑾 如 刑部 至百 尙 .

意,自縊

死。

給事中屈銓、祭酒王雲鳳請編瑾行事,著爲律令。

欲逐永,永以譎免。及永出師還,欲因誅瑾,一淸爲畫策,永意遂決。瑾好招致術士,有偸 造弓弩,瑾皆藏於家 日明者,妄言瑾從孫二漢當大貴。兵仗局太監孫和數遺以甲仗,兩廣鎭監潘午、蔡昭又爲 爲總督 五年四月,安化王寘鐇反,檄數瑾罪。瑾始懼,匿其檄,而起都御史楊一淸、太監張永 · 討之。 初,與瑾同爲八虎者,當瑾專政時,有所請多不應,永成、大用等皆怨瑾。又

勞永 我。」永曰:「此不可緩。」永成等亦助之。 晏朝後,帝出永奏示內閣,降瑾奉 弓弩、袞衣、玉帶諸違 ,瑾等皆侍。 永捷疏至,將以八月十五 及夜,瑾退,永出寘鐇檄,因奏瑾不法十七事。 禁物。 日獻俘,瑾使緩其期。 一御,謫 叉所常持扇,內藏利匕首二。 居鳳陽。 逐執<u></u> 强,繫於菜廠,分遣官校封其內外私第。 帝親籍其家, 永慮有變,遂先期入,獻俘畢,帝置 得偽璽 始大怒曰:「奴果反。」趣付 帝已被酒,俛首曰:「瑾負 , 穿宫牌五 日 次 及 衣 酒 日

列

傳第

百

九十二

宦

官

變法 屍。 獄。 ,更部二十四事,戶部三十餘事,兵部十八事,工部十三事,**詔悉釐正如舊制**。 閣臣焦芳、劉宇、曹元 獄具 詔磔於市,梟其首,榜獄詞處決圖示天下。族人、逆黨皆伏誅。 而下,尙書畢亨、朱恩等,共六十餘人,皆降謫。 已,廷臣奏瑾所 張綵獄斃,磔其

也。 至,將以是日獻俘,瑾使緩其期,欲俟事成並擒永。或以告永,永先期入獻俘,是夜遂奏 時,瑾兄都督同知景祥死,京師籍籍謂瑾將以八月十五日俟百官送葬,因作亂。適永捷疏 帝戎服送之東華門,賜關防、金瓜、鋼斧以行,寵遇甚盛。瑾亦忌之,而帝方嚮永,不能間 曰:「彼在上左右,公言能必入乎?不如以計誅之。」因爲永畫策,永大喜,語詳一淸傳。 也,言於帝,將黜之南京。 帝令谷大用等置酒爲解,由是二人益不合。及寘鐇反,命永及右都御史楊一清往討。 師出,寘鐇已擒,永遂率五百騎撫定餘黨。還次靈州,與一淸言,欲奏瑾不法事。 張永,保定新城人。 正德初,總神機營,與瑾爲黨。 永知之,直趨帝前,訴瑾陷己。 帝召瑾與質,方爭辯,永輒奮拳毆 已而惡其所為, 瑾亦覺其不附己

於是英國公張懋、兵部尚書王敞等,奏永輯寧中外,兩建奇勳,遂封永兄富爲泰安伯、

意沮,乃辭殆恩澤。吏部尚書楊一淸言宜聽永讓,以成其賢,事竟已。久之,坐庫官盜庫銀 鑑乞加永封,下廷臣議。永欲身自封侯,引劉永誠、鄭和故事風廷臣,內閣以非制格之。永 弟容爲安定伯。 涿州男子王豸嘗刺龍形及「人王」字於足,永以爲妖人,擒之。兵部 尚書何

事,閒住。九年,北邊有警,命永督宣府、大同、延綏軍禦之,寇退乃還。

江上檻車曰:「此宜歸我。」守仁曰:「我何用此。」卽付永,而與永偕還江西。 極,王師至,亂將不測。永大悟,乃曰:「羣小在側,永來,欲保護聖躬耳,非欲攘功也。」因指 徑入,大呼曰:「我王守仁也,來與公議國家事,何拒我」」永爲氣懾。守仁因言江西茶毒已 遮守仁,欲縱宸濠於鄱陽湖,俟帝至與戰。守仁不可,至杭州詣永。 守仁,亦賴永營解獲免。武宗崩,永督九門防變。 已從大江至南昌,方窮治逆黨,見永至,大沮。 寧王宸濠反,帝南征,永率邊兵二千先行。時王守仁已擒宸濠,檻車北上。永以帝意 永留數旬,促忠同歸,江西賴以安。忠等屢讒 永拒不見,守仁叱門者 時太監張忠等

學士楊一淸等言,永功大,不可泯,乃起永掌御用監,提督團營。 復刻永在江西不法事,再降永奉御,司香孝陵,然永在江西,實非 世宗立,御史蕭淮奏谷大用、丘聚輩蠱惑先帝,黨惡爲奸,並及永。 未幾卒。 有不法也。 詔永閒住。 嘉靖八年, 已而淮

五日爲競渡,誣以擅造龍舟,籍其家,天下皆重足屏息。建鷹房草場於安州,奪民田無數。 谷大用者, 蓮掌司禮監時提督西廠, 分遣官校遠出偵事。江西南康民吳登顯等, 五月

伯矣,義子冒陞賞者,不可勝紀。 清, 召邊將許泰、CI也卻永、江彬、劉暉等入內地,聽調遣。 風舟覆,陸完兵至殲之,遂封大用弟大亮爲永清伯。 六年,劉六、劉七反,命大用總督軍務,偕伏羌伯毛銳、兵部侍郎陸完討之。 而先是平寘鐇時,其兄大寬已封高平 、人之無功,會賊過鎭江 狼山,遇 大用駐臨 飓

 騎十年籍其家。 世宗立,以迎立功賜金幣。 給事中閻閎極論之,尋降奉御,居南京。 已,召守康陵。 嘉

兄山 事中楊秉義、徐景嵩、吳嚴皆言彬附和逆瑾,結姻江彬,宜置極典。 亦封平涼伯。 魏彬 ,當瑾時,總三千營。 世宗立,彬不自安,爲英辭伯爵。 **瑾誅,代掌司禮監。** 其年,敍寧夏功,封弟英鎭安伯,馬永成 韶改都督同知, 世襲錦衣指 帝宥不問。已而御史復 揮 使。 給

論之,始今閒住。

濠,受臧賢、錢寧等賄,以助成其叛。 皆兇悖。 不見。同儕勸之,乃垂簾杖其父,然後相抱泣,其無人理如此。」銳以捕妖言功,加祿至一百 二十石。每緝事,先令邏卒誘人爲奸,乃捕之,得賄則釋,往往以危法中人。三人並交通宸 張忠, 霸州人。 正德時御馬太監,與司禮張雄、東廠張銳並侍豹房用事,時號三張,性 |忠利大盜||張茂財,結爲弟,引入豹房,侍帝蹴鞠。而||雄至怨其父不愛己致自宮,拒 寧王反,忠勸帝親征。其遮王守仁捷,欲縱宸濠鄱陽,

家,掠以出,號哭震遠近,許以金贖,貧者多自經。 是時,又有吳經者,尤親暱。 帝南征,經先至揚州。 嘗夜半燃炬通衢,遍入寡婦、 處女

待帝自戰,皆忠之謀也。

充軍 諫,不聽。 士死者數百人,盡亡其所齎。 ,張雄、張銳下都察院鞫治,允亦得罪。 先是,又有劉允者,以正德十年奉敕往迎烏斯藏僧,所齎金寶以百餘萬計。 允至成都, 治裝歲餘, 費又數十萬, 公私匱竭。 及歸,武宗已崩,世宗用御史王鈞等言,張忠、吳經發孝陵衞 既至,爲番人所襲。 允走强,將 廷臣交章

忠 守內臣及典京營倉場者 、麥福、黃錦輩,雖由興邸舊人掌 世宗習見正德時宦侍之禍,卽位後御近侍甚嚴,有罪撻之至死,或陳尸示戒。 終 四十餘年不復設,故內臣之勢,惟嘉靖朝 司 禮監,督東廠,然皆謹飭不敢大肆。 少殺 云。 帝又盡撤天下鎮 張佐、鮑

傳第一百九十二 宦官一

列

### 校勘記

- 其前僞王子蘇幹刺者 前僞王子,本書卷三二五蘇門答剌傳作「老王弟」,太宗實録卷九七成祖
- |永樂十三年七月壬寅條都作「前僞王弟」。
- 南京設守備自和始也 伯李隆爲之」,與此異。 按本書卷八仁宗紀載永樂二十二年九月戊子,「始設南京守備,以襄城
- 於是和景弘復奉命歷忽魯謨斯等十七國而還 十七國, 本書卷三二五蘇門答刺傳作「二十餘
- 國」,宣宗實録卷六七宣德五年六月戊寅條作「二十國」。
- 介 元年四月奉使 本書卷六成祖紀、 太宗實録卷一六永樂元年二月乙丑條繁侯顯奉使之命於元

本書卷三二六世巴里傳及宣宗實錄卷六七宣德五年六月戊寅條作「甘巴里」。

/\ |23 |\_\_\_\_

甘把里

- 謂其與黄竑搆邪議 黄竑,原作「王竑」,據本書卷一七〇于謙傳及英宗實録卷二七四天順元年
- 正月丁亥條改。
- フォン 都御史陳鎰等廷奏振罪 及英宗實録卷一八一正統十四年八月庚午條改。 陳鎰, 原作 「陳鑑」,據本書卷一一一七卿年表、又卷一五九陳鑑傳

- 景泰元年二月磔於市 二月,原作「三月」,據本書卷一一景帝紀及英宗實録卷一八九景泰元
- 懷恩高密人兵部侍郎戴綸族弟也 年二月壬辰條改 孝宗實録卷十弘治元年閏正月甲午條作三恩,直隸蘇州府
- (10) 妄言寄金於其叔父兵部主事士偉所 宣德間人禁中,賜姓懷。」與此異。 士偉,明史卷一八四張元禎傳同,憲宗實録卷一六二成化

十三年二月丁丑條、國權卷三七頁二三七六都作「仕偉」。

- △□〕 覃吉 明史稿傳一七八汪直傳及憲宗實録卷一六六成化十三年五月丙子條作「覃
- $\subseteq$ 而左都御史李賓亦失直旨褫職 八汪直傳及憲宗實録卷一六八成化十三年七月丁卯條改。 李賓、原作「方賓」,據本書卷一一一七卿年表、明史稿傳一七
- 尚書董方 卯條改。 **董**方, 原作「董芳」,據明史稿傳一七八汪直傳及憲宗實録卷一六八成化十三年七
- 眷因結蔡用妄舉李父貴冒紀太后族 實録卷四○弘治三年七月乙丑條改。 李父貴,原作「李文貴」,據本書卷一一三紀太后傳、孝宗
- 二吾 守備南京武靖伯趙承慶 列 僔 第 百 九 += 校 武靖伯,原作「武清伯」, 勘 記 據本書卷一〇七功臣世表、 七七九七 卷一八八劉蓝

}傳, 明史稿傳一七八劉瑾傳及武宗實錄卷二二正德二年閏正月庚戌條改。

- 二六 其年夏 其年,承上文當指二年。按匿名書事在正統三年六月,「其年」應作「三年」。
- 以焦芳惡彭華故也 原脫「彭」字,據本書卷三〇六焦芳傳補。
- 亦爲芳增河南額至九十五名 三月壬戌條補 原脫「五」字,據本書卷七〇選舉志及武宗實錄卷三六正德三年
- (13) 召邊將許泰 許泰,原作「許恭」,據本書卷三〇七許泰傳、明史稿傳一七八谷大用傳及武宗實

錄卷七七正德六年七月壬申條改。

### 明史卷三百五

# 列傳第一百九十三

### 宦官二

李芳 馮保 張鯨 陳增 陳奉 高淮 梁永 楊榮 陳矩

高起潛 王承恩 方正化

王安

魏忠賢

王體乾

李永貞等

崔文昇

張彝憲

躐官工部尚書,修盧溝橋,所侵盜萬計。 方有寵,爭飾奇技淫巧以悅帝意,作鰲山燈,導帝爲長夜飲。一芳切諫,帝不悅。 隸,減光祿歲增米鹽及工部物料,以是大爲同類所嫉。而是時,司禮諸閹滕祥、孟沖、陳洪 元年二月,芳劾之。 李芳,穆宗朝內官監太監也。帝初立,芳以能持正見信任。初,世宗時,匠役徐杲以營造 時果已削官,乃下獄遣戍,盡汰其所冒冗員。又奏革上林苑監增設皂 其屬冒太僕少卿、苑馬卿以下職銜者以百數。隆慶 祥等復媒孽

列

傅

第

百

九

十 三

宦官

七七九九

狀未明,臣等莫知所坐。」帝曰:「芳事股無禮,其錮之。」 帝遂怒,勒芳閒住。 二年十一月復杖芳八十,下刑部監禁待決。 尚書毛愷等言:「芳罪

藩輔 請宥芳,乃得釋,充南京淨軍。 三人各廕錦衣官至二十人,而淓獨久繫獄。 少卿周怡 帑無算。 辦器物及修補壇廟樂器,多自加徵,糜費巨萬。 乞早賜罷。」帝不罪祥,而令禮致仕。 :國將軍|縉燉賄,越制得嗣封|肅王。|洪尤貪肆,內閣大臣亦有因之以進者。 三人所糜國 芳錮 以外補去,給事中石星、李已、陳吾德,御史詹仰庇,尚寶丞鄭履淳, 帝享太廟,三人皆冠進賢冠,服祭服以從,爵賞辭謝與六卿埓。 ,祥等益横。 前司禮太監黃錦已革廕,祥輒復予之。 沖傳旨下海戶王印於鎭撫司,論成,法司不預聞。納肅 四年四月, 工廠存留大木,斬截任意。 ,刑科都給事中舒化等以熱審屆期, 工部尚書雷禮劾祥:「傳造採 廷臣論劾者,太常 臣禮力不能爭, 皆廷杖削籍

罷 掌印缺,保 ,拱復薦用孟沖。 馮保,深州人。 以次 當得之,適不悅於穆宗。 沖故掌尚膳監者,例不當掌司禮。 嘉靖中,爲 司 禮 秉筆太監 大學士 高 隆慶 拱 薦御用 元年提督東廠 保疾拱彌甚,乃與張居正 監 陳洪 代, 兼掌 保 御 由 馬 監 是疾拱。 事。 深相結,謀 時 及洪 司禮

責居正曰:「我當國,奈何獨與中人具遺詔。」居正面赤謝過。 拱益惡保,思逐之。 會居正亦欲去拱專柄,兩人交益固。 穆宗得疾,保密屬居正豫草遺詔,爲拱所見,面

程文、十三道御史劉良弼等,交章數其奸,而給事中雒遵、陸樹德又特疏論列,拱意疏下卽 升立寶座旁不下,舉朝大駭。保旣掌司禮,又督東廠,兼總內外,勢益張。 擬旨逐保。而保匿其疏,亟與居正定謀,遂逐拱去。 穆宗甫崩,保言於后妃,斥孟沖而奪其位,又矯遺詔令與閣臣同受顧命。及帝登極,保 拱諷六科給事中

斬,拱 大臣疾呼曰:「許我富貴,乃掠治我耶!且我何處識高閣老。」希孝懼,不敢鞫而罷。 楊博、葛守禮等保持之,居正亦迫衆議微諷保。 儒飲食之,納刃其袖中,俾言拱怨望,遣刺帝。大臣許之。踰日,錦衣都督朱希孝等會鞫。 月,有王大臣者,僞爲內侍服,入乾淸宮,被獲下東廠。保欲緣此族拱,與居正謀,令家人辛 十歲孩子,如何作人主。」后妃大驚,太子聞之亦色變。迨拱去,保憾猶未釋。萬曆元年正 初,穆宗崩,拱於閣中大慟曰:「十歲太子,如何治天下。」保譖於后妃曰:「拱斥太子爲 由是舉朝皆惡保,而不肖者多因之以進。 保意稍解,乃以生漆酒瘠大臣,移送法司坐 會廷臣

危坐曰:「大伴來矣。」所昵 慈聖太后遇帝嚴。 保倚太后勢,數挾持帝,帝甚畏之。 孫海、客用爲乾淸宮管事牌子,屢誘帝夜游別宮,小衣窄袖,走馬 時與小 內豎戲,見保 入,輒

列傳第

百九十

Ξ

宦

官二

居正 草帝 持 刀,又數進奇 罪己 乃 上 手詔, 疏切諫。 巧之物,帝深 令頒示 又緣保意劾去司 閣臣。 龍幸。 詞 過 挹損, 禮 保白太后,召帝 秉筆 帝年已十八, 孫德秀、溫太及掌兵仗局周海,而 切責。 覽之內 帝長跪受教,惶懼 慚, 然迫於太后, 甚。 令諸内侍俱自 不得 保屬居正 不下。

陳。

由

是保所

不悅者,斥退殆盡,時八年十一

月也

弟,不敢肆惡,都人亦以是稱之。 有 積不能 雙白燕, ·曰「風雲際會」,所以待之甚隆。 保善琴能書。 堪,而 居正 保內倚太后,外倚居正 以進。 帝屢賜牙章曰「光明正大」,曰「爾惟鹽梅」,曰「汝作舟楫」,曰 保使使謂居正 ,帝不能去也。 後保益横肆,即帝有所賞罰,非出保口,無敢行 曰:「主上沖年,不可以異物啓玩好。」 然保亦時引大體。 內閣產白蓮,翰 又能約束其子 「魚水相 者 林院

中。 徐爵 正之奪情及杖吳中行等,保有 事與籌畫,因恃勢招權利,大臣 、內官張大受,爲保、居正交關語言。 固有才,其所以得委任專國柄者,由保爲之左右也。 :力焉 亦多與通。 且數用計使兩人相疑,旋復相好,兩人皆在 爵夜至禁門,守衛者不敢詰,其横如 然保性貪,其私人錦衣指 此。 爵術 居 揮

已 而 居正 死,其黨益結保自固。 居正以遺疏薦其座主潘晟入閣,保卽遺官召之。 內閣張四維度申時行不肯爲 御史

爵,四維以無故事難之,擬廕弟姪一人都督僉事。 晟下,擬旨允之,帝卽報可。 郭惟賢請召用吳中行等,保責其黨護,謫之。 保時病起, 話曰:「我小恙, 遽無我耶?」 皇太子生, 保欲封伯 吏部尚書王國光罷,保輒用其鄉人梁夢龍代。 保怒曰:「爾由誰得今日,而負我」」御史

爵、大受等竊權如故。

戍。 閒住。 職下獄,瘐死。大受及其黨周海、何忠等八人,貶小火者, 史李植、江東之彈章入,遂謫保奉御,南京安置,久之乃死。 盡籍其家,保金銀百餘萬,珠寶瑰異稱是。 然是時太后久歸政,保失所倚,帝又積怒保。 帝猶畏之,曰:「若大伴上殿來,朕奈何。」鯨曰:「旣有旨,安敢復入。」 東宮舊閹張鯨、張誠 司香孝陵。 其弟佑、從子邦寧並官都督,削 爵與大受子,烟瘴永 乘間陳其過惡 乃從之。 一請令 會御

貴。」太后曰:「已籍矣,必可得。」帝曰:「奴黠猾,先竊而逃,未能盡得也。」而其時,錦衣都督 劉守有與僚屬張昭、龐淸、馮昕等,皆以籍罪人家,多所隱沒,得罪。 婚,所需珠寶未備,太后間以爲言。 保之發南京也,太后問故。 帝曰:「老奴爲張居正所惑,無他過,行且召還。」時潞王將 帝曰:「年來無恥臣僚,盡 貨以 獻張、馮二家,其 價 驟

保,宏遂代保掌司禮監,而鯨掌東廠。 籍其家,弟姪皆削職治罪。 十八年,鯨罷東廠,誠棄掌之。二十四年春,以誠聯姻武淸侯,擅作威福,降奉御,司香孝陵, 鯨害其寵,爲帝畫策害保。 宏謂鯨曰:「馮公前輩,且有骨力,不宜去之。」鯨不聽。 新城 人,太監張宏名下也。 內豎初入宮,必投一大璫爲主,謂之名下。馮保用事 宏無過惡,以賢稱,萬曆十二年卒。張誠代掌 司 旣 禮監。 譖逐

帝納 智論 住。 事中陳尚象、吳文梓、楊文煥,御史方萬策、崔景榮復相繼論列,報聞。 聽,命下 尚智,招權受財。 相倚爲奸,專擅威 已而 鯨金寶,故寬鯨罪。帝大怒,言沂等爲張居正、馮保報復,杖六十,削其官,鯨亦私家閒 死,鯨被 鯨性 象乾韶獄。 南京兵部尚書吳文華率南九卿請罪鯨 剛果,帝倚任之。 切責。 萬曆十六年冬,御史何出光劾鯨及其黨鴻臚序班尚智與錦衣都督劉守有 福,罪當死者八。帝命鯨策勵供事,而削尙智、守有 以時行及同官許國、王錫爵等申救,象乾 給事中張應登再疏論之,御史馬象乾幷劾大學士申時行阿縱。 其在東廠兼掌內府供用庫印,頗爲時相所憚。 而宥言者,帝亦不聽。 疏 乃留 中。 職,餘黨法司 法司奏鯨等贓罪,尚 給事· 而其用事 中李沂 提問。給 可房那 帝皆不 至謂

以通等言益力,俱不報。 尋復 召鯨入。 給事中陳與郊、御史賈希夷、南京吏部尚書陸光祖、給事中徐常吉、御史 最後大理評事維于仁上酒色財氣四箴,指鯨以賄復進。帝怒甚,

召申時行等於毓德宮,命治于仁罪,而召鯨,令時行等傳諭責訓之,鯨寵遂衰。 尚智後減死

充軍。

行等仍執不可 申 十六年,中使祠 時行等言而止。 陳增,神宗朝礦稅太監也。萬曆十二年,房山縣民史錦奏請開礦,下撫按查勘,不果行。 五. 臺山,還言紫荆關外廣昌 十八年,易州民周言、張世才復言阜平、房山各產礦砂,請遣官開礦。 、靈丘有礦砂,可作銀冶。 帝聞之喜,以大學士 時

採山西 <u>漸、永則王亮,昌黎、遷安則田進,昌平、橫嶺、淶水、珠寶窩山則王忠,眞定復</u> 遺官自二十四年始,其後言礦者爭走闕下,帝卽命中官與其人偕往,天下在在有之。眞、保、 則 寧兩宮災。二十五年,皇極、建極、中極三殿災。營建乏資,計臣束手,礦稅由 二十七年,播州用兵,又費帑金二三百萬。三大征踵接,國用大匱。而二十四年,乾淸 李鳳、李敬 至二十年,寧夏用兵,費帑金二百餘萬。其冬,朝鮮用兵,首尾八年,費帑金七 平定、稷山、浙江則 、雲南 則楊榮,遼東 曹金,後代以劉忠,陝西則趙欽,山西 則高淮 ,江西則潘相,福建則高寀, 則張忠,河南 湖廣 則陳奉 則魯坤, 益 此大興矣。其 以王虎,弁 而增奉敕 百餘萬。 坤

列

傳第

百

九

十三

縱 開 横 採 繹 Щ 騷,吸髓 東 通 都 飲 大邑 血 ,以供進奉。 皆有稅監,兩淮 大率入公帑者不及什 則有 鹽監,廣 東則有珠監,或專遣,或兼攝。 一,而天下蕭 然, 生靈塗炭 矣。 大璫 其 小監 最

横

者增及

陳奉

高

淮

課 被陷 物,所破滅什伯家,殺人莫敢問。 官 監 全治等,自江 餘萬,聞於朝。 馬堂相 帝俱弗省。 幾死 + ·四年 爭。 詔 獄 帝爲 ,增始至山東,即劾福山知縣韋國賢,帝爲逮問削職。 南北至浙江,大作奸弊。 **外之**, 巡撫 命械入京鞫治,乃論死。而增肆惡山東者十年,至三十三年始死。 和 尹應元 解,使堂稅臨清,增稅 鳳陽巡撫李三才劾守訓奸贓。 奏增二十大罪 御史劉曰梧具以狀聞,鹽務少監魯保亦奏守訓等阻 稱奉密旨摻金寶,募人告密。 東昌。 ',亦罰 俸。 增益 增懼,因搜得守訓違禁珍寶及賕銀 已, 肆無忌,其黨內閣中書程守訓 復命 增兼 徵山東店稅, 益都知縣吳宗堯抗增, 誣大商巨室藏 與臨清稅 蹇 違禁 中 軍 四 鹽

鼓鑄 煒、[1] 荆州推官華鈺、[1] 荆門知州高則巽、黃州經歷車任重等煽亂。帝爲逮鈺、任重,而謫 抵荆 事。 陳奉,御馬監奉御也。 州,聚數千人譟於塗,競擲 奉兼領數使,恣行 !威虐。 萬曆二十七年二月命徵荆州店稅,兼採興國州礦洞丹砂及錢廠 瓦石擊之。 每託巡歷,鞭笞官吏,剽劫行 奉走免,遂誣襄陽 旅。 知府李商畊、黄州 商民恨刺骨,同奉自武 知府趙文

驤衞 言所 商畊等官。 掘 百戶仇世亨奏之,帝命奉括進內庫。奉因毒拷責償,且悉發境內諸墓。巡按御史王立賢 一乃元呂文德妻,非林甫妻。奸人訐奏,語多不讐,請罷不治,而停他處開掘 興國州奸人漆有光,計居民徐鼎等掘唐相李林甫妻楊氏墓,〔三〕得黃金巨萬。騰 一、不報。

昌、寶慶、德安、湘潭等處,變經十起,幾成大亂。立乞撤回,以收楚民之心。」帝皆置不問。 亂,將何所底!大學士沈一貫亦言:「陳奉入楚,始而武昌一變,繼之漢口、黃州、襄陽、武 憤,萬餘人甘與奉同死,撫按三司護之數日,僅而得全。而巡撫支可大曲爲蒙 黨至直入民家,奸淫婦女,或掠入稅監署中。 奉復使人開穀城礦,不獲,脅其庫金,爲縣民所逐。」武昌兵備僉事馮應京劾奉十大罪, 二十八年十二月,武昌民變。 南京吏部主事吳中明奏言:「奉嚇詐官民,僭稱千歲。 王生之女、沈生之妻,皆被逼辱。 蔽。 以致士民公 天下禍 其

報。 民。 十六人於江。回 京罪狀於衢。民切齒恨,復相聚圍奉署,誓必殺奉。 奉逃匿楚王府,衆乃投奉黨耿文登等 通判邸宅、推官何棟如,緹騎逮訊,幷追逮應京。 奉隨誣奏,降應京雜職。奉又開棗陽礦,知縣王之翰以顯陵近,執不可。奉劾之翰及襄陽 帝始召奉歸,而用一貫請,革可大職。 而 御馬監監 丞李道方督理湖口 以巡撫可大護奉,焚其轅門。 船稅,亦奏奉水沮商舟,陸 **奉在湖廣二年,慘毒備至。** 事聞, 應京素有惠政,民號哭送之。奉又榜列應 一貫及給事中姚文蔚等請撤奉,不 截販 賈, 徵三解一, 病國剝 及去,金寶財物鉅萬

如 星復 可大 懼爲民所掠,多與徒衞,導之出疆,楚民無不毒恨者。 極言其罪。 帝不懌,降二人雜職。三十二年始釋應京歸,之翰卒瘐死。 奉至京師,給 事 中陳維春、

不問 府李士登恤其母妻,臨清民立祠以祀。後十餘年,堂擅往揚州,巡鹽御史徐縉芳劾其九罪, 詔捕首惡,株連甚衆。有王朝佐者,素仗義,慨然出曰:「首難者,我也。」臨刑,神色不變。知 破者大半,遠近爲罷市。州民萬餘縱火焚堂署,斃其黨三十七人,〔三皆黥臂諸偸也。事聞, 命從者數百人,白晝手鋃鐺奪人產,抗者輒以違禁罪之。 僮告主者,畀以十之三,中人之家 當 奉 · 劾商畊等時,臨淸民亦譟而逐馬堂。 馬堂者,天津稅監也,兼轄臨淸。 始至,諸亡

遣人邀於路,責其奏事人,錮之獄,匿疏不以聞。 爲己下,劾罷之。 按楊宏科救之,不報。 梁永尤甚。 下百餘疏,悉寢不報。 高淮 ,尙膳監監丞也。 准與陳奉同時採礦徵稅遼東。 給事 中侯先春疏救,遂戍林而 參隨楊永恩婪賄事發,奉旨會勘,卒不問。 而諸稅監有所糾劾,朝上夕下,輒加重譴。以故諸稅監益驕,而淮及 神宗寵愛諸稅監,自大學士趙志皐、沈一貫而下,廷臣諫者不 委官廖國泰,虐民激變,淮誣繫諸生數十人。 調先春雜 又請復遼東馬市,巡撫趙楫力爭,始得寢。 職。 巡按 淮又惡遼東總兵馬林不 何爾健 與淮 互 許 奏,淮 巡

惡萬端,且無故打死指揮張汝立,亦不報。潍因上疏自稱鎮守協同關務,兵部奏其妄。 有之事。御史袁九皐、劉四科、孔貞一、給事中梁有年等,各疏劾淮、不報。巡撫楫劾淮罪 意欲何爲。」東部尚書李戴、刑部尚書蕭大亨皆劾淮擅離信地,挾兵潛住京師,乃數百年未 給事中田大益、孫善繼、姚文蔚等言:「淮搜括士民,取金至數十萬,招納諸亡命降人, 三十一年夏,淮率家丁三百餘,張飛虎幟,金鼓震天,聲言欲入大內謁帝,潛住廣渠門

錦州 陽竟死獄中,邦才至四十一年乃釋。 人皆逮問,邊民益 海關內外咸被其毒。 、松山軍復變。淮懼內奔,誣同知王邦才、參將李獲陽逐殺欽使,云劫奪御用錢糧。 淮自是益募死士,時時出塞射獵,發黃票龍旂,走朝鮮索冠珠、貂馬,數與邊將爭功,山 譁。 又扣除軍士月糧。三十六年四月,前屯衞軍甲而課,誓食淮肉。六月, 薊遼總督蹇達再疏暴淮罪,乃召歸,而以通灣稅監張曄兼領其事。獲

心護淮,謬曰:「朕固命之矣。」

獨畜馬五百 梁永,御馬監監 匹,招致亡命,用千戶樂綱出入邊塞。 丞也。 萬曆二十七年二月命往陝西徵收名馬貨物。 富平知縣王正志發其奸,并劾礦監趙欽。 稅監故不 典兵,永

列傳第

百

九

+

Ξ

宦官

死。 詔逮 巡 正 撫 志 賈待問奏之,帝 瘐 死 詔 獄中。 顧使永會勘。 渭南 知縣徐斗牛,廉吏也。 永反劾西安同 **永責**路, 知宋賢,并劾待問有私 斗牛憤恨 ,請皆勘。帝從 自縊

之,而宥待問

藍田 鼓吹、 縣 指揮劉 宋 等七關 時際怒,勿予。 永又請棄鎮守職銜。 巡行陝 應聘、諸生李洪遠等。 歲得十萬。 地。 盡發歷代陵寢,搜摸金玉,旁行劫掠。 復用奸人胡奉言,索咸陽冰片五十斤、羊毛一萬斤、麝香二十斤。知 又請率兵巡花馬池、慶陽諸鹽池,徵其課。 縱樂綱等肆爲淫掠,私宮良家子數十人。 所至,邑令皆逃。杖死縣丞鄭思顏 緣是帥諸亡命具旌蓋 稅額外增 耗 數 倍,

永。 逮 時際,而 大學士沈鯉、朱賡請械永歸,以安衆心。帝悉置不報,而釋時際勿逮,復朝薦官。 咸 寧 人道行遇盜、跡之、稅使役也、知縣滿朝薦捕得之。水誣時際、朝薦劫稅銀、帝命 以|朝薦到官未久,鐫秩一級。|陝西巡撫||顧其||志盡發其奸,且言|秦民萬衆,共圖

陣以行。 諸亡命乃稍稍散。其渠魁王九功、石君章等齎重寶,輜輧盈路,詐爲上供物,持劍戟弓弩,結 ,見九功等後至無驗,邏兵與格鬭,追至渭南,殺數人,盡奪其裝。 會御 一史余懋衡方按陝西,永懼,使綱酖懋衡幾死。 而永所遣人解馬匹者,已乘郵傳先發。 九功等急馳,欲追及與同出關。 訟於朝,言官攻永者數十疏,永部下 御史懋衡以捕盜 朝薦疑其 殺 傷

知縣 聞。 代爲報復,且劫貢物。」敕逮朝薦,而令撫按護永等還京。 朝薦 永大窘,聽樂綱謀,使人繫疏髮中馳奏:「九功等各貢名馬、金珠、睛綠諸寶物, 承余御史指,伏兵渭南遮劫之,臠君章等,誣以盜。」帝怒曰 三十四年事 一一御史耽 也。 無恙,而朝薦 而 咸 率

是年,楊榮爲雲南人所殺。

詔獄 民。 採。 之。 人焚榮第,殺之,投火中,幷殺其黨二百餘人。 以求馬不獲,繫指揮使賀瑞鳳,且言將盡捕六衞官。 自撤 乘雲兼攝雲南 一沈鯉揭爭,且密屬太監陳矩剖示。 旣而樂所進不得什一,乃誣知府熊鐸侵匿,下法司。 榮弗俊, 恣行 藩蔽,生遠人心。」不報。榮由是愈怙寵,誣劾尋甸知府蔡如川、趙州知州甘學書,皆下 巡按御史宋興祖言。「太祖令木氏世守兹土,限石門以絕西域,守鐵橋以斷土蕃,奈 初,榮妄奏阿瓦、猛密諸番願內屬,其地有寶井,可歲益數十萬,願賜敕領其事。 已,又誣劾雲南知府周鐸,下法司提問。 ·威虐,杖斃數千人。 至是怒指揮使樊高明後期,榜掠絕觔,枷以示衆。 帝乃止誅世勛等,而用巡撫陳用賓議,令四川稅使丘 事聞,帝爲不食者數日,欲逮問守土官。大學 百姓恨榮入骨,相率燔稅 於是指揮賀世勛、韓光大等率冤民萬 又請詔麗江土知府木增獻 廠,殺委官張安 地聽開 帝許 何 叉

列傳第一百九十三 宦官二

當是時,帝所遣中官,無不播虐逞兇者。

湖 口稅監李道劾降九江府經歷樊圃充,又劾逮南康知府吳寶秀、星子知縣吳一元,降

臨江知府顧起淹。

山西稅監孫朝劾降夏縣知縣韓薰。 給事中程紹以救薰鐫一級, 給事中李應策等復数

之,遂削紹、薰職。巡撫魏允貞以阻撓罷去。

廣東稅監李鳳劾逮鄉官通判吳應鴻等。 鳳與珠池監李敬相仇, 巡按李時華恃敬援劾

鳳。 給事中宋一韓言鳳乾沒五千餘萬,他珍寶稱是。 吏部尚書李戴等言鳳釀禍,致潮陽鼓

課 粤中人爭欲殺之。 帝不問。 而敬惡亦不減於鳳,採珠七八年,歲得珠近萬兩。其後珠池

**盗起,敬乃請罷採。** 

Щ 西礦監張忠劾降夏縣知縣袁應春,又劾逮西城兵馬戴文龍

江西礦監潘相激浮梁景德鎭民變,焚燒 廠房。 饒州 通判 陳奇 可諭 散 之,相反 劾 逮奇

可。 相機上饒縣勘礦洞,知縣李鴻戒邑人敢以食物市者死。 相竟日饑渴,憊而歸,乃螫鴻,

罷其官。

横嶺礦監王虎以廣昌民變,劾降易州知州孫大祚。

**蘇、杭織造太監兼管稅務孫隆激民變,遍焚諸札委稅官家,隆急走杭州以免。** 

思誠、僉事呂純如等至私署要盟,始釋一驥。 萬衆洶洶欲殺宋。 福建稅監高宋薦布政使陳性學,立擢巡撫。 宋率甲士二百餘人入巡撫袁一驥署,露刃劫之,令渝衆退。 復拘同知陳豸於署者久之。 事聞,帝召宋還, 居閩十餘年,廣肆毒害。四十二年四月, 復挾副使李

中使還京。 他若山東張曄、河南魯坤、四川丘乘雲輩,皆爲民害。 迨帝崩,始下遺詔罷礦稅,

撤諸

命出豸,而一驥由此罷。

或作閨範圖說跋,名曰憂危竑議,大指言貴妃欲奪儲位,坤陰助之,幷及張養蒙、魏允貞等 奉詔收書籍,中有侍郎呂坤所著閨範圖說,帝以賜鄭貴妃,妃自爲序,鋟諸木。時國本未定, 陳矩,安肅人。萬曆中,爲司禮秉筆太監。二十六年提督東廠。 爲人平恕識大體。

**(議** 言貴妃與大學士朱賡,戎政尚書王世揚,三邊總督李汶,保定巡撫孫瑋,少卿張養志,錦 至三十一年十一月甲子昧爽,自朝房至勳戚大臣門,各有匿名書一 帙,名曰續憂危竑

九人,語極妄誕。

踰三年,皇太子立。

列傳第

百

九十三

宦

學士 衣都 以 風 影捕繫,所株連甚衆。 賡 督 奏亦 王 一之楨 入。 千戶王 帝大怒,敕矩及錦 名世、王承恩等相結,謀易太子,其言益妄 之楨欲陷錦 衣衞 衣指 大索,必得造妖 揮周嘉慶,首輔沈一 書者。 時大 貫欲 誕 不 獄猝發、緝校交錯都 陷 經。 次 矩 輔沈鯉、侍郎郭 獲之 以 聞, 大

正域,俱使人屬矩。

矩正

色拒之。

念生光 以生光 黄屋」之句,以脅國泰及繼志金,故人疑而 獄 楊榮,帝欲 且 十年,法司請於矩求出,矩謝 三十三年掌 已而百 入前詩 即冤,然前罪已當死, 盡捕 1月蔣臣: 與妖 亂者,亦以矩言獲免。 書詞合。 司禮監,督廠 捕皦生光至。 乃具獄 且獄 如故。 不敢。 ,生光坐凌遲死。 無主名,上必怒甚,恐輾轉攀累無已。 生光者,京師無賴人也,嘗爲作富商包繼志詩,有「鄭主乘 帝 明年奉韶慮囚,御史曹學程以阻封日本貧關白 欲 已而密白之,竟得釋,餘亦多所平反。 杖建言參政姜士昌,以矩諫而止。 捕 之。 酷 訊 鯉、正域、嘉慶及株連者,皆賴 不承,妻妾子弟皆掠治 禮部 侍郎· 雲南民殺稅 無完膚 又明年卒, 矩 李廷機 得全。 事,緊 矩 亦 監 ì

晚年,用事者寥寥,東廠獄中至生 子常雲獨辦,以故偵卒稀簡,中外相安。 自 馮保、張誠、張鯉相繼獲罪,其黨有所懲,不敢大肆。 一青草。 惟四方採權者,帝實縱之,故貪殘肆虐,民心憤怨, 帝常膳舊以司禮輪供,後司禮無人,乾清宮管事牌 帝亦惡其黨盛,有缺多不補。迨 賜

湳

額

日

「淸忠。

子屬草,下令旨,釋羣臣疑,以安貴妃。帝大悅。光宗卽位,擢司禮秉筆太監,遇之甚厚。安 妃謀立己子,數使人摭皇長子過。 安善調護,貴妃無所得。 「梃擊」事起,貴妃心懼 **翕然稱賢。大學士劉一燝、給事中楊漣、御史左光斗等皆重之。** 用其客中書舍人汪文言言,勸帝行諸善政,發帑金濟邊,起用直臣鄒元標、王德完等,中外 王安,雄縣人,初隸馮保名下。萬曆二十二年,陳矩薦於帝,命爲皇長子伴讀。 。安爲太 時鄭貴

忠等謀挾皇長子自重,安發其謀於漣。漣偕一燝等入臨,安給選侍抱皇長子出,擇吉卽位, 選侍移別宮去。事詳一燝等傳。熹宗心德安,言無不納。 初,西宮李選侍怙寵陵熹宗生母王才人,安內忿不平。及光宗崩,選侍與心腹閹李進

賢,安信之。 曰:「爾我孰若西李,而欲遺患耶。」忠賢意乃決,嗾給事中霍維華論安,降充南海子淨軍,而 月,帝命安掌司禮監,安以故事辭。 安爲人剛直而疎,又善病,不能數見帝。魏忠賢始進,自結於安名下魏朝,朝日夕譽忠 及安怒朝與忠賢爭客氏也,勒朝退,而忠賢、客氏日得志,忌安甚。天啓元年五 客氏勸帝從其請,與忠賢謀殺之。忠賢猶豫未忍,客氏

列傳第

百九十三

宦官

安食。 以劉朝爲南海子提督,使殺安。 **交通,興大獄,淸流之禍烈矣。** 安取 籬落中蘆菔啗之,三日猶不死,乃撲殺之。 莊烈帝立,賜祠額曰昭忠。 劉朝者,李選侍私閹,故以移宮盜庫下獄宥出者。 安死三年,忠賢遂誣康林諸人與安 旣至,絕

後 謂對食者也。 母王才人典膳,諂事魏朝。 乃復姓,賜名忠賢云。忠賢自萬曆中選入宮,隸太監孫暹,夤緣入甲字庫,又求爲皇長孫 魏忠賢,肅寧人。 及忠賢入,又通焉。 少無賴,與羣惡少博,不勝,爲所苦,恚而自宮,變姓名曰李進忠。 朝數稱忠賢於安,安亦善遇之。 客氏遂薄朝而愛忠賢,兩人深相結 長孫乳媼日客氏,素私侍朝,所 其

侯國 忠賢不識字,例不當入司禮,以客氏故,得之。 興、弟客光先及忠賢兄釗俱錦衣千戶。忠賢尋自惜薪司遷司禮秉筆太監兼提督寶和三 光宗崩,長孫嗣立,是爲熹宗。 忠賢、客氏並有寵。 未踰月,封客氏奉聖夫人,廕其子

護,俟皇祖大葬議之。」忠賢顓客氏,逐魏朝。 史畢佐周、劉蘭請遣客氏出外,大學士劉一燝亦言之。 天啓元年詔賜客氏香火田,敍忠賢治皇祖陵功。 又忌王安持正,謀殺之,盡斥安名下諸閹。 御史王心一諫,不聽。及帝大婚,御 帝戀戀不忍舍,曰:「皇后幼,賴媼保

氏淫而 學士沈淮爲援。 相、王心一復言之,並謫外,尚未指及忠賢也。 周宗建、侍郎陳邦瞻、御史馬鳴起、給事中侯震暘先後力諍,俱被詰責。給事中倪思輝、朱欽 監 王體乾及李永貞、石元雅、涂文輔等爲羽翼,宮中人莫敢 狠。 忠賢不知書,頗强記,猜忍陰毒,好諛。 又日引帝爲倡優聲伎,狗馬射獵。 忠賢乃勸帝選武閹、錬火器爲內操, 刑部主事劉宗周首劾之,帝大怒,賴大 帝深信任此兩人,兩人勢益 件。 旣而 客氏 出,復召入。 張, 密結 用 御 司 禮 史

學 士葉向高 救免。

在言路,皆力持淸議,忠賢未克逞。 葉向高 之以傾東林。 忤者,衆目之爲邪黨。 夫多附之,「東林」之名自是始。 指斥宫禁。 初 、韓爌 ,神宗在位久,怠於政事,章奏多不省。 宰輔大臣爲言者所彈擊,輒引 方輔 而徐大化、霍維 政,鄒元標、趙南星、王紀、高攀龍等皆居大僚,左光斗、魏大中、黃尊素等 天啓初,廢斥殆盡,識者已憂其過激變生。 華、孫杰首附忠賢,劉 旣而「梃擊」、「紅丸」、「移宮」三案起, 盈廷如聚訟。 疾避去。 廷臣漸立門戶,以危言激論相尙,國本之爭, 一燝及尚書周嘉謨並爲杰劾去。然是 吏部郎顧憲成講學東林書院,海內士大 及忠賢勢成,其黨果謀: 與東林 時 倚

魏,俱被譴去。 一年敍慶陵功,廕忠賢弟姪錦衣衞指揮僉事。給事中惠世揚、尚書王紀論沈淮交通客、 會初 夏雨雹,周宗建言雹不以時,忠賢讒慝所致。 修撰文震孟、太僕少卿滿

列傳

第

百

九

+

 $\equiv$ 

宦

官

朝薦相繼言之,亦俱黜。

掌東廠 嗣。 秋,韶忠賢及客氏子國興所廕錦衣官並世襲。 裕妃張氏有娠,客氏譖殺之。 交諫,不從。 保舉熊廷弼,黨邪 他所害宮嬪馮貴人等,太監王國臣、劉克敬、馬鑑等甚衆。禁掖事秘,莫詳也。是冬,兼 三年 春 ,引其私人魏廣微爲大學士。 忠賢益無忌,增置內操萬人,夷甲出入,恣爲威虐。 誤國。 宗建駮鞏受忠賢指揮,御史方大任助宗建攻鞏及忠賢,皆不勝。其 又革成妃李氏封。 令御史郭鞏訐宗建、一燝、元標及楊漣、周朝瑞等 兵部尚書董漢儒、給事中程註、御 皇后張氏娠,客氏以計墮其胎,帝由 矯詔賜光宗選侍趙氏死。 史汪 此乏 泗論

賢濫廢 剖析 魏大中及給事中陳良訓、許譽卿,撫寧侯朱國弼,南京兵部尚書陳道亨,侍郎岳元聲等七十 十四大罪。 人許顯純代。 「鎭撫獄,將大行羅織。 四年,給事中傅櫆結忠賢甥傅應星爲兄弟,誣奏中書汪文言,並及左光斗、魏大中。 體乾等翼之。 陳,給 疏上,忠賢懼,求解於韓爌。 事中沈惟炳以立枷諫,忠賢皆矯旨詰責。於是副都御史楊漣憤 是時御史李應昇以內操諫,給事中霍守典以忠賢乞祠額諫,御史劉廷佐以忠 帝懵然不辨也。 掌鎭撫劉僑受葉向高教,止坐文言。忠賢大怒,削僑籍,而以私 遂溫諭留忠賢,而於次日下漣疏,嚴旨切責。 **媽不應,逐趨帝前泣訴,且辭東廠,而客氏從旁爲** 甚, 劾忠賢二 連旣絀, 下

餘 人,交章論忠賢不法。 向高及禮部尚書翁正春請遣忠賢歸私第以塞謗,不許

爪牙。 卿 郎 御史高攀龍 起 體 鄒元標、 事辱向高,向高遂致仕去,汝翥亦予杖。 徐兆魁、王紹徽、喬應甲、徐紹吉、阮大鍼、陳爾翌、張養素、李應薦、李嵩、楊春懋等,爲之 李邦 |乾復昌言用廷杖,威脅廷臣。 ,呂鵬雲、孫杰爲大理丞,復霍維華、郭興治爲給事中,徐景濂、賈繼春、楊維垣爲御史,而 當 華。 未幾,復用擬成崔呈秀爲御史。 是時,忠賢憤甚,欲盡殺異己者。 顧憲成 、吏部侍郎陳于廷及楊漣、左光斗、魏大中等先後數十人,已又逐韓爌及兵部侍 正人去國,紛紛若振稿。 、葉向高 劉一 **憬等爲魁,盡羅入不附忠賢者,號曰東林黨人,獻於忠賢。** 未幾,工部郎中萬燝上疏刺忠賢,立杖死。又以御史林汝翥 乃矯中旨召用例轉科道。以朱童蒙、郭允厚爲太僕少 呈秀乃造天鑒、同志諸錄,王紹徽亦造點將錄,皆以 廷臣俱大響。 顧秉謙因陰籍其所忌姓名授忠賢,使以次斥逐。 一時罷斥者,吏部尚書趙南星、左都

賢喜,於是羣小益求媚忠賢,攘臂攻東林矣。

諸正 獄,下鎭撫 文煥,給 人,遂相 初,朝臣 事 中 司 拷死 李魯生, 率歸忠賢,稱義兒,且云:「東林將害翁。」 爭三案及辛亥、癸亥兩京察與熊廷酮獄事,忠賢本無預。 許顯純 工部主事 具爱書,詞連趙南星、楊漣等二十餘人,削籍遣戍有差。 曹欽程等, 競搏擊善類爲報復。 以故, 忠賢欲甘 m 御史梁夢 其黨 心焉。 欲 環復興汪文言 御史張訥、倪 藉 忠賢 逮漣及 力傾

剜

丽 左 而 光 斗、 而 杖 特召亓詩教、劉 其 魏 姻 大 御 中 史吳裕中 周 朝 瑞 述祖 、袁化 至 等爲御史,私人悉不次超 死 .中、顧大章等六人,至牽入 叉 削 逐尚書李宗延 、張 /擢。 問達,侍郎 熊廷 於是忠賢 阿案 中 公鼐等五十餘人, 之黨編要津矣 ,掠治死 於 獄 O 朝署 叉 殺廷

斃懷賢 家藏 剝 叔 冒 魏 皮 志德 到 公主賜 當 是時 舌 籍其家。 都 器。 督 東東 所殺 | 僉事 廠番役橫行,所緝 忠賢 不 武弁 ဝ 可勝 擢傅應星 蔣應 數,道路以目。 陽爲廷弼訟冤 乘輿服御物 二 爲 左都 訪 無論 督, 冷論 其年, 虚 7,立誅| 且. 實 死。 旌 輒 敍門 其母。 糜爛。 死。 中 書吳懷賢讀楊漣疏,擊節 功, 民間 而 戚臣李承恩者,寧安大長公 加 偶語,或觸忠賢, 以魏良 恩三等,廕都督 卿僉書錦 衣 同 朝被擒! 衞 知 稱歎。奴告之, 掌南 叉廕 僇, 主 子也 鎭 甚至 其族 撫

韋等五 謙等修三朝要典,極意武諸黨人惡。 立東林黨碑。 赴 天 巡 水 六年二月,鹵簿大駕成,廕都督僉事。 撫 死,順昌等六人死 人悉誅死。 周起元及江、浙 海內皆屛息喪氣。 刑部尚書徐兆魁治獄,視忠賢 里 獄 一居諸! 中。 蘇州 臣 高 霍維華遂教忠賢冒邊功矣。 攀龍、 御史徐復陽請毀講學書院,以絕黨根。 民見順昌逮,不平,歐殺二校尉,巡撫 周宗建、繆昌期、周 復使其黨李永貞爲爲浙江太監李實奏,逮治 所怒,即坐大辟。 順昌、黃尊素、李 叉從 霍 維 毛 華 御史盧承欽 鷺爲 應昇 言,命 等。 捕 顧 顏 Ìİ 佩

遼陽男子武長春遊妓家,有妄言,東廠擒之。 許顯純掠治,故張其辭云:「長春敵間,不

鎭 獲 書王紹徽 Щ 且 海關 亂,賴廠臣忠智立奇勳。」詔封忠賢姪良卿爲肅寧伯,賜宅第、莊田,頒鐵券。 請崇其先世,詔贈忠賢四代如本爵。忠賢又矯詔遣其黨太監劉 ,收攬兵柄。 再敍功,廕都督同 知,世 襲錦衣衞指揮使,各一人。 應坤、陶文、紀 浙江巡撫潘汝楨 吏部尚

皆自

此始矣。

奏請

爲忠賢

人建祠。

倉場總督薛貞言草場火,以忠賢救,得無害。

於是頌功德者相繼

諸祠

前 何 孫 以 亂 事 士晉 涯 事,激忠賢怒。 文多誄 呂下問、評事許志吉先後往徽州籍其家,株蔓殘酷。 眦 其黨都督張體乾誣揚州知府劉鐸代李承恩謀釋獄,結道士方景陽詛忠賢,鐸竟斬。 編修吳孔嘉與宗人吳養春有響,誘養春僕告其主隱占黃山,養春父子 怨,誣新城侯子 程註 熊廷弼,坐妖言律斬。 等,雖已去,必削籍,重或充軍,死必追贓破其家。 錦衣 王國 又逮侍郎王之寀,斃於獄。凡忠賢所宿恨,若韓爌 興、論斬、並黜主事徐石麒。〔日〕御史門克新誣吳 知府石萬程 不 忍,削 髮 去,徽州幾 或忠賢偶忘之,其黨必追論 , 瘐 死。 人 忠賢 顧 張 問達 同寅 遣 叉

泰、梁棟等三十 當 此 之時,內外大權 餘 人,為 左 右 歸忠賢。 擁護。 外廷文臣則崔呈秀、田吉、 內豎自王體乾等外,又有 李朝欽 吳淳夫、 王 李夔龍、〇倪文煥 朝 輔 孫進、 王國

列

傳

第

百

九

+

Ξ

宦官

父張 尚書周應秋、太僕少卿曹欽程等,號「十狗」。又有「十孩兒」、「四十孫」之號。 主謀議、號「五虎」。武臣則田爾耕、許顯純、孫雲鶴、楊寰、崔應元主殺僇,號「五彪」。又吏部 丞 下者,又不可數計。 志選、御史梁夢環交發國紀罪狀,並言后非國紀女。 國紀縱奴不法,矯中宮旨,冀搖后。 自內閣、六部至四方總督、巡撫,偏置死黨。 帝爲致奴法,而誚讓國紀。 會王體乾危言沮之,乃止 心忌張皇后,其年秋,誣后 忠賢未慊,復使順天府 而爲呈秀輩門

馬、珍 **僭濫,於是爲** 希孟世襲錦 自奏三年緝捕功,詔書褒獎。 矣,亦晉寧國公,食祿如魏國公例,再加恩廕錦衣指揮使一人,同知一 奏給賜第。 王之錦獄 其冬,三殿成。 玩勿絕 ,南京修孝陵工竣,甘鎭奏捷,蕃育署丞張永祚獲盜,並言忠賢區畫方略。 衣同 已而太監陶文奏築喜峰隘口成,督師王之臣奏築山海城,刑部尚書薛貞奏大 極。其 知,甥傅之琮、馮繼先並都督僉事,而擢崔呈秀弟凝秀爲薊鎭副總兵。名器 同類盡鎭薊、遼,山西宣、大諸阨要地。 李永貞、周應秋奏忠賢功,遂進上公,加恩三等。 半歲中,所廕錦衣指揮使四人、同知三人、僉事一人。 總兵梁柱朝、楊國棟等歲時賂名 人。工部尙 魏良卿時已晉肅寧侯 書辞 忠賢又 授其姪 鳳翔 盜

所攻者也。 年春,復以崔文昇總漕運,李明道總河道,胡良輔鎭天津。 海內爭望風獻諂,諸督撫大夷閻鳴泰、劉詔、李精白、姚宗文等,爭頌德立祠,洶 文昇故侍光宗藥、為東林

胸若不及。 下及武夫、賈豎、諸無賴子亦各建祠。 窮極工巧,攘奪民田廬,斬伐墓木,莫敢

控愬。 而監生陸萬齡至請以忠賢配 孔子,以忠賢父配啓聖公。

麟 不名。 闍 敕 孫 煃 遵化道耿如杞入祠不拜,皆下獄論死。 國楨 無算,誥命皆擬 ,巡撫李精白圖 郭希 、中書朱愼鉴 初 張 ,潘汝禎首上疏,御史劉之待會藁遲一日,卽削籍。 大學士黃立極、施鳳來、張瑞圖票旨,亦必 禹 翌明 、徐溶輩,佞詞 ,勳戚若豐城侯李永祚,廷臣若尙書邵輔忠、李養德、曹思誠,總督張我續及 、郭允厚、楊維和 象以 九錫文。 聞。 、累牘, 立極等票旨云:「廠臣修德,故仁獸至。」其誣罔若此。 不顧羞恥。 、李時馨、汪若極 故天下風靡,章奏無巨細,輒頌忠賢。宗室若楚王華 忠賢 曰「殷與廠臣」,無敢名忠賢 亦時加恩澤以報之。 、何廷樞、 而薊州道胡士容以不具建祠文, 楊維新、 陳維新、 所 有 疏 者。 陳爾 成 稱 Щ 前後賜獎 翼、 東 一廠 郭如 產麒 臣

未 子良棟爲東安侯,加良卿 督 族 極 孫 同 了,會袁崇煥奏寧遠捷,<br />
忠賢乃令周應秋奏封其從孫鵬翼爲安平伯。再敍三大工功,封 知 希孔、希孟、希堯、希舜、鵬程 是 年 、僉事等官。 自春及秋,忠賢冒款汪燒餅、擒阿班歹羅銕等功 叉 加客氏弟光先亦都督。 太師、鵬翼 一, 姻 少師,良棟太子太保。 戚董芳名、王選、楊六奇、楊祚昌,皆至 魏撫民又從錦衣改尚 , 積 廕 錦 衣 指 揮 使 至 十 有 七 人 。 其 因偏 **寳諸廷臣,用呈秀爲兵部尚** 寶 卿。 左、右都督及 而 忠賢志願 猶 都 從

列

書兼 饗南北郊,祭太廟。 左都御史,獨絀崇煥功不錄。 於是天下皆疑忠賢竊神器矣。 時鵬翼、良棟皆在襁褓中,未能行步也。 良卿至代天子

簿。 隸相 顧盼未嘗及也。 若飛,鐃鼓鳴鏑之聲,轟隱黃埃中。 曰:「朕已悉矣,汝輩好爲之。」忠賢以是恣威福惟己意。 忠賢 隨屬以萬數。 帝性機巧,好親斧鋸髹漆之事,積歲不倦。 (故騃無他長,其黨日夜敎之,客氏爲內主,羣凶煽虐,以是毒痡海內。 客氏居宮中,脅持皇后,殘虐宮嬪。 百司章奏,置急足馳白乃下。 錦衣玉帶鞾袴握刀者,夾左右馳,廚傳、優伶、百戲、輿 每引繩削墨時,忠賢輩輒奏事。 所過,士大夫遮道拜伏,至呼九千歲,忠賢 偶出歸私第,騶從赫奕照衢路,望若鹵 歲數出,輒坐文軒,羽幢 帝厭之,謬 青蓋,四馬

先攻 氏於浣衣局。 於鳳陽,尋命逮治。 聖,七濫爵,八掩邊功,九朘民,十通關節。 興貢生錢嘉徵劾忠賢十大罪:一並帝,二蔑后,三弄兵,四無二祖列宗, 重寶啗信邸太監徐應元求解。 從呈秀以嘗帝,主事陸澄原、錢元殼,員外郎史躬盛遂交章論忠賢。 七年秋八月,熹宗崩,信王立。王素稔忠賢惡,深自儆備,其黨自危。 魏良卿、侯國興、客光先等並棄市、籍其家。客氏之籍也,於其家得宮女八人, 忠賢行至阜城、聞之,與李朝欽偕縊死。 應元,故忠賢博徒也。帝知之,斥應元。十一月,遂安置忠賢 疏上,帝召忠賢,使內侍讀之。 詔磔其屍,懸首河間。 五剋削藩封, 帝猶未發。於是嘉 忠賢大懼, 楊所修 、楊維垣 急以 六 無

蓋將效呂不韋所爲,人尤疾之。

用 圖 中璫。 報 復。 崇禎 其後溫體仁、薛國觀輩相繼柄政,潛傾正人,爲翻逆案地。 而逆案中阮大鋮等卒肆毒江左,至於滅亡。 二年命大學士韓爌等定逆案,始盡逐忠賢黨,東林諸人復進用。 帝亦厭廷臣黨比,復委 諸麗逆案者日夜

賢,爲之盡力。 棟、史賓等為秉筆。 爲錢謙益、黃尊素兄弟,欲並禁錮,其阿媚忠賢如此。 忠賢冒陵工、殿工、邊功等賞,體乾、永貞輩亦各廕錦衣官數人。 不識字,體乾與永貞等爲之謀主,遇票紅文書及改票,動請御筆,體乾獨奏,忠賢默然也。及 **漣劾忠賢疏上,帝命體乾誦之,置疏中切要語不讀,漣遂得譴。 萬燝之死,出體乾意。** 遷司禮秉筆。 永貞 王體乾、李永貞、涂文輔,皆忠賢黨。體乾,昌平人,柔佞深險。熹宗初,爲尙膳太監 通州 王安之辭司禮掌印也,體乾急謀於客、魏奪之,而置安於死。 故事,司禮掌印者位東廠上。體乾避忠賢,獨處其下,故忠賢一無所忌。楊 人。 萬曆中爲內侍,犯法被繫者十八年,光宗立,得釋。忠賢用事,引其黨諸 永貞入棟幕,與忠賢掌班劉榮爲死友。 及莊烈帝定逆案,革體乾職,籍其家 陳死,夤緣得通於忠賢,由文書 嘗疑選人錢受益、黃願素 用是,一意附忠 忠賢

陽引退,行十五萬金於體乾及司禮王永祚、王本政求援。三人惡其反覆,首於帝。 某錄中人也。」故無得免者。 **遂亡去。旣而被獲,謫鳳陽,尋以僞草李實奏,逮至,伏誅。** 窾要,白忠賢議行。 房陞秉筆太監,匝月五遷,與體乾、文輔及石元雅共爲忠賢心腹。凡章奏入,永貞等先鈐識 崔呈秀所獻諸錄,永貞等各置小册袖中,遇有處分,則爭出册告曰:「此 永貞性貪,督三殿工,治信王邸,所侵沒無算。 莊烈帝立,永貞 永貞懼,

庫。 閹上。莊烈帝立,復附徐應元,謫南京 奪寧安大長公主第爲廨,署曰「戶工總部」。騶從常數百人,部郎以下皆庭參,勢焰出羣 文輔,初爲客氏子侯國興授讀,諂附忠賢,由司禮秉筆歷掌御馬監,總督太倉、節愼二

及、旣幽囚、痛己之冤、而恨體乾、文輔輩之得漏網也,作野史志以自明,凡四卷,見者憐之。 永貞多密謀,若愚心識之,不敢與外廷通。 史劉重慶以李實誣高攀龍等七人事劾實。 帝驗疏,墨在朱上,遂誅永貞,坐若愚大辟。 時有劉若愚者,故隸陳矩名下。善書,好學有文。天啓初,李永貞取入內直房,主筆札 忠賢敗,若愚爲楊維垣所劾,充孝陵淨軍。已,御 實疏辨言係空印紙,乃忠賢逼取之,令永貞塡書 **外之**,得釋。 若愚當忠賢時,祿賜未嘗一

罪,其實出於文昇果否,未知也。未幾,光宗服鴻臚丞李可灼紅丸,遂崩。言者交攻可灼及 謀。給事中楊漣言:「陛下哀毁之餘,萬幾勞瘁。文昇誤用伐藥,又搆造流言,謂侍御蠱惑, 莊烈帝卽位,召回。 謂其罪浮可灼。 閣臣方從哲,惟御史鄭宗周等直指文昇。給事中魏大中言文昇之惡不下張差,御史吳甡亦 損陛下令名。陛下奈何置賊臣於肘腋間哉。」然搆造之說,遵疑文昇誤用藥,故爲此以圖卸 人,帝幸焉,旣而有疾。文昇用大黃藥,益劇,不視朝。外廷洶洶,皆言文昇受貴妃指,有異 文昇者,鄭貴妃宮中內侍也。光宗立,陞司禮秉筆,掌御藥房。時貴妃進帝美女四 下廷議,可灼論戍,文昇謫南京。及忠賢用事,召文昇總督漕運兼管河道。 御史吳煥復劾之。 疏甫上,文昇卽結同黨伏宮門號哭,聲徹御座。帝大

怒,並其黨皆杖一百,充孝陵淨軍。

監 臣。 、二二部出入,如涂文輔故事,爲之建署,名曰戶工總理,其權視外總督, 視關 旣 張彝憲,莊烈帝朝司禮太監也。 而 、寧,又遣王坤宣府,劉文忠大同,劉 ..廷臣競門戶,兵敗餉絀,不能贊一策,乃思復用近侍。 帝初卽位,鑒魏忠賢禍敗,盡撤諸方鎭守中官,委任大 允中山西,監視軍馬。 崇禛四年九月,遣王應朝等 而以彝憲有 內團營提督焉 心計,令鈎校

列

傅第

李孫宸 恐稽滯 高 給 周 士樸 弘 事 臣 殫 圖 中宋可 以不赴彝憲期,被詰問,罷去。 軍 亦以召 心 不 爲 爲 事 ', 因 國 下,抗疏乞歸, . 朕 對力諫,俱 馮元 劾其悞 何事 **颰等十餘人論諫,不納。** 國。 乎內臣。」衆莫敢對。 不 削籍去。 聽。 帝命回奏,罪至遺戍。 彝憲遂按行 彝憲益驕縱, 南京侍郎呂維祺疏責輔臣不能匡救,禮部 兩部: 踞尚書上, 命郎中以下謁見。 吏部尚書閔洪學率朝臣具公疏爭, 故勒邊鎭軍器不發。 主事金鉉、周鑣皆以諫斥去。 管盔甲主事 帝日 工 部 部 孫 尚書 肇 侍郎 侍郎 興

道言 按治。 其 抗 得 何 (文詞 以副 疏 劾 是時,中璫勢復大振。 「近者內臣 練達 修撰 給事 明主 一之知。」皆備責延儒,欲以動 陳于泰,謂 中魏呈潤爭之,亦謫 ,機鋒挑激,必有陰邪險 一舉動, 其盜竊科名,語侵周延儒。 幾於 王坤至宣府,甫踰月, 手握皇綱, 外。 人主之,其意指溫體 坤 帝。 性狂躁敢言,朝中大吏有欲倚之相 而 輔臣終不敢 帝怒,削其籍。 卽劾巡按御史胡良機。 給事 中傳朝佑言坤妄干彈 問。 時帝方一意用內 帝置不問。 至於 身被彈擊, 帝落 左 傾擠者。 副 劾之權 臣, 良機 猶 都 忍辱不言 故言者多 御 職 於是坤 史王志 一歪且 命坤

總理。」又明年,命彝憲守備南京,尋死。 至 八 年八月始下詔曰:「往以廷臣不職,故委寄內侍。今兵制麤立,軍餉稍清,盡撤 然帝卒用高起潛輩典兵監鎭,馴至開關延賊,遂底 監 視

明年凱旋。時流賊大熾,命太監陳大金、閻思印、謝文舉、孫茂霖等爲內中軍,分入大帥曹 而 文詔、左良玉、張應昌諸營,名曰監軍,在邊鎭者,悉名監視。而起潛得監視寧、錦諸軍。已 :諸監多侵剋軍資,臨敵輒擁精兵先遁,諸將亦恥爲之下,緣是皆無功。八年盡撤諸鎭內 高 起潛,在內侍中,以知兵稱,帝委任之。五年命偕其儕呂直督諸將征孔有德於登州

臣,惟起潛監視如故。

賞功牌千,以司禮大璫張雲漢、韓贊周副之。 河。 明年,起潛行部視師,令監司以下悉用軍禮。 而 與兵部尚書楊嗣昌比,致宣大總督盧象昇孤軍戰歿,又匿 時兵部尚書張鳳翼出督援軍,宣大總督梁廷棟亦引兵南,特命起潛爲總監,給金三萬、 九年七月復遣太監李國輔、[10]許進忠等分守紫荆、倒馬諸關,孫惟武、 然起潛實未嘗決一戰,惟割死人首冒功而已。 永平道劉景耀、關內道楊於國 .不言狀,人多疾之。 疏爭,被黜。 劉元斌防馬水

聞 ·,延臣請急撤城守太監,忽傳旨云:「<u>杜勵</u>罵賊殉難,予廕祠。」 蓋爲內臣蒙蔽也。 十七年,李自成將犯闕,帝復命起潛監寧、前諸軍,而以杜勳鎭宣府。勳至鎭卽 未幾,勳 降賊。事

列

停第

百九十三

宦官

淳入國朝,上疏奏辨甚力,時倉卒莫能明也。 折,至是賊卽以其杖驅焉。 之出,復縋下,語守城諸璫曰:「吾曹富貴固在也。」俄而城陷,諸璫皆降。 督,後亦降於我大清。 令盡逐內豎,無貴賤老弱皆號哭徒跣,破面流血,走出京城門。 **賊逐捆載其金帛珠寶西去**。 璫縋之上,同入大內,盛稱賊勢,勸帝自爲計。 從賊至,自成設黃幄坐廣寧門外,秦、晉二王左右席地坐,勳侍其下,呼城上請入見。守城諸 初,內臣 .奉命守城,已有異志,令士卒皆持白楊杖,朱其外,貫鐵環於端使有聲,格擊則 廣寧門之啓,或曰太監曹化淳獻之,或曰化淳實守東直門,而化 起潛赴寧、前,中道棄關走。 左右請留之,勳曰:「不返,則二王危。」乃縱 及賊敗將遁,乃下 福王召爲京營提

祠立碑旌其忠,附葬故主陵側。 內城陷。 敗坎牆,急發礮擊之,連斃數人,而諸璫泄泄自如。 承恩提督京營。 王承恩,太監曹化淳名下也,累官司禮秉筆太監。崇禎十七年三月,李自成犯闕,帝命 天將曙,帝崩於壽皇亭,承恩卽自縊其下。 是時,事勢已去,城陴守卒寥寥,賊架飛梯攻西直、平則、德勝三門。承恩見 帝召承恩,令亟整內官,備親征。 福王時,諡忠愍。 本朝賜地六十畝,建 夜分,

公也!賊攢刀斫殺之,其從奄皆死。 曰:「我方寸已亂,諸公好爲之。」及城陷,擊殺數十人,賊問:「若爲誰。」厲聲曰:「我總監方 爲,不過一死報主恩爾。」帝亦垂涕遣之。 城功,已而撤還。十七年二月復命出鎮,正化頓首辭,帝不許。 方正化,山東人。 崇禎時,爲司禮太監。 旣至,與同知邵宗元等登陴共守。 十五年冬,畿輔被兵,命總監保定軍務,有全 又頓首曰:「奴此行萬無能 有請事者,但

|褚憲章、張國元四人。 督東廠太監王之心家最富,旣降,賊勒其貲,拷死。 南渡時,建旌忠 祠祀諸死難者,以王承恩爲正祀,內臣正化等附祀,而之心亦濫與焉。 時內臣殉難者,更有故司禮掌印太監高時明,司禮秉筆太監李鳳翔,提督諸監局太監

### 校勘記

黄州. 知府趙文煒 趙文煒,本書卷二三七華鈺傳作「趙文煥」。

荆州推官華 三四三萬曆二十七年八月丁丑、二十八年正月丁卯條改。 鈺 華 鈺,原作「華珏」, 據本書卷二三七及明史稿傳一一三華鈺傳, 下同 神宗實錄卷

七八三一

列

僔

第

百

九十

三

校勘記

- = **計居民徐鼎等掘** 唐相李林甫妻楊氏墓 徐鼎,本書卷二一六馮琦傳作「徐鼐」。
- PR 衆 乃投奉黨耿文登等十六人於江 十六人,本書卷二三七馮應京傳作「六人」。
- 五 斃其黨三十七人 三十七人,本書卷二一神宗紀作「三十四人」。
- へなし 參將李獲陽逐殺欽使 李獲陽,原作「李孟陽」,據本書卷二三七華鈺傳、 神宗實錄卷四四七

並黜主事徐石麒 萬曆三十六年六月庚申條改。 徐石麒、原作「徐石麟」,據本書卷二七五徐石麒傳、明史稿傳一七九魏忠賢 下同。

T U

}傳 改。

李夔龍 原脫「變」字,據本書卷三〇六雀呈秀傳、明史稿傳卷一七九魏忠賢傳補。

へたし 給事中傅朝佑言坤妄干彈劾之權 傅朝佑,原作「傅朝佐」,據本書卷三〇八周延儒傳、又卷二

五八傅朝佑傳改。

太監李國輔 李國輔,原作「李輔國」,據本書卷二三莊烈帝紀、國権卷九五頁五七四七改。

### 明史卷三百六

## 列傳第一百九十四

#### 閹黨

也。 其流毒誠無所窮極 惡正醜直之私。衣冠塡於狴犴,善類殞於刀鋸。迄乎惡貫滿盈,亟伸憲典,刑書所麗,迹穢 門戶之爭固結而不可解。凶豎乘其沸潰,盜弄太阿,點桀渠儉,竄身婦寺。淫刑痡毒,快其 臣首與之比,於是列卿爭先獻媚,而司禮之權居內閣上。迨神宗末年,訛言朋興,羣相敵讐, 簡編,而遺孽餘燼終以覆國。 **「忠賢不過一人耳,外廷諸臣附之,遂至於此,其罪何可勝誅。」痛乎哉,患得患失之鄙夫,** 中葉以前,士大夫知重名節,雖以王振、汪直之横,黨與未盛。至劉瑾竊權,焦芳以閣 明代閹宦之禍酷矣,然非諸黨人附麗之,羽翼之,張其勢而助之攻,虐焰不若是其烈 也 ? 莊烈帝之定逆案也,以其事付大學士韓爌等,因慨然太息曰:

第一百九十四 閹黨

列

傳

如王驥、王越

)、楊維!

垣、張捷之徒,則仍別見焉。

今錄 自焦芳 張綵 以下,迄天啓朝,爲閹黨列傳, 用 垂鑒誠。 其以功名表 見, 或晚節自

焦芳 劉志 選 劉宇 梁夢環等 曹元 張 曹欽程 綵 韓福等 石三畏等 顧 秉謙 王 一紹徽 魏廣微等 周應秋 崔呈秀 霍維 吳淳夫等 華 徐大化等

閻鳴泰 賈繼春 田爾耕 許顯純

知 粗 進講東宮,其書皆華等所爲。 芳恥不與,每進講,故摘其疵,揚言衆中。 我也。我不學士,且刺華長安道中。」華懼,言於安,乃進芳侍講學士。 滿 陋 九年考,當遷學士。 **|芳知出華、安二人指,銜次骨** 無學識,性陰很,動輒議訕,人咸畏避之。 焦芳,泌陽 人。 天順八年進士。大學士李賢以同鄉故,引爲庶吉士,授編修,進侍講 或語大學士萬安:「不學如芳,亦學士乎?」芳聞大恚曰:「是必彭華間 尹晏之罷也,芳與其子龍相比,謫桂陽州同 先是,詔纂文華大訓, 翰林尚文采,獨芳

授 卽引筆抹去,不關白尙書。 太常少 弘治初,移霍州知州,擢四川提學副使,調湖廣。 卿兼侍講學士, 尋擢 俄改吏部,轉左侍郎。 禮部右侍郎。 怨劉健尼己, 馬文升爲尚書,芳輒加姗侮,陰結言官, 未幾,遷南京右通政,以憂歸 日於衆中嫚罵。 健判牒 不 可意, 服闋,

姚 使抨擊素所不快及在己上者。 、江西人,以遷及華故,肆口詬詈。 又上言禦邊四事以希進用,爲謝遷所抑,尤憾遷。 **芳旣積忤廷臣,復銳進,乃深結閹宦以自固,日夜謀逐** 每言及餘

健、遷,代其位。

 路 芳。 縉紳. 閣 刻劉瑾,疏當首吏部,以告芳。 聽者,大言曰:「庶民家尙須用度,況縣官耶? 不是檢索,而但云損上何也。」武宗聞之大喜。 大學士,入閣輔政,累加少師 ,皆芳導之。 正德初,戶部尚書韓文言會計不足。 每過瑾,言必稱千歲,自稱曰門下。 芳陰洩其謀於瑾。 、華蓋殿大學士。 廷議謂理財無奇術,唯勸上節儉。 諺云『無錢揀故 會文升去,遂擢 居內閣數年,瑾濁亂海內,變置成法,茶毒 瑾遂逐文及健、遷輩,而芳以本官兼文淵 裁閱章奏,一阿瑾意。 紙。 爲吏部尚書。 今天下遠租匿 韓文將率九卿 四方路瑾者先 芳知左右有竊 稅何限,

甚拙,顧恨李耶 徑授翰林檢討,俄進編修。 子黃中,亦傲很不學,廷試必欲得第一。 **芳以黃中故,時時詈東陽。** 李東陽、王鏊爲置二甲首,芳不悅。 **瑾聞之曰:「黃中昨在我家試石榴詩** 言於瑾

沮。 **瑾怒翰林官傲己,欲盡出之外,爲張綵勸沮。及修孝宗實錄成,瑾又持前議,綵復力** 而芳父子 與檢討段炅輩,教瑾以擴充政事爲名,乃盡出編修顧淸等二十餘人於部曹。

列傳

有司 罪,不當除名耶。」乃黜健、遷爲民,而榜逐餘姚人之爲京官者。 等皆遷鄉 應詔 入,而 舉懷材抱德之士,以餘姚人周禮、徐子元、許龍,上虞人徐文彪四人名上。 詔草出健,因下四人詔獄,欲併逮健、遷。 東陽 力解之。 芳厲聲曰:「縱貰其 瑾 以 禮

解之曰:「以一盜故,禍連一方,至裁解額矣。宋、元人物,亦欲倂案耶。」乃止。 京職、著爲令。」且言:「王安石禍宋,吳澄仕元,宜榜其罪,使他日毋得濫用江西人。」楊廷和 旣 多玩法,如彭華、尹直、徐瓊、李孜省、黃景等,多被物議。 又謀入浡泥國索寶,且殺亞智等。事聞,方下所司勘奏。芳卽署其尾曰:「江西土俗,故 滿 刺加使臣亞劉,本江西萬安人,名蕭明舉。以罪叛入其國,與其國人端亞智等來朝。 宜裁減解額五十名,通籍者勿選

進蓮 **芳深惡南人,每退一南人,輒喜。** 其總裁孝宗實錄,若何喬新、彭韶、謝遷皆肆誣詆,自喜曰:「今朝廷之上,誰如我直 雖論古人,亦必詆南而譽北,嘗作南人不可爲相圖

同 異,遂有隙。 始張綵爲郎時,芳力薦以悅瑾,覬其爲奸利。 而段炅 見瑾暱綵,芳勢稍衰,轉附綵,盡發芳陰事於瑾。 比綵爲尚書,芳父子薦人無虛 **瑾大怒**,數於衆中 日,綵時有

黃中匄閣廕,以侍讀隨父還。 瑾敗,給事、御史交劾,削其官,黜 黃中爲民。 久之,芳 斥芳父子。

芳不得已,乃乞歸

使詩 中齎金寶遺權貴,上章求湔雪復官,爲東科所駁。 於是東部覆奏,請械繫黃中法司,以

彰天討。黃中狼狽遁走。

豈非冤哉。」芳父子竟良死。 當死,三 爲天子誅此賊。」燧後臨刑歎曰:「吾不能手刃焦芳父子以謝天下,死有餘恨」 墓 一,雜燒以牛馬骨。 |芳居第宏麗,治作勞數郡。 亦曰:「吾死固當,第吾家所爲,皆焦芳與張綵耳。 求芳父子不得,取芳衣冠被庭樹,拔劍斫其首,使羣盜糜之,口曰「吾 大盜趙錢入泌陽,火之,發窖多得其藏金,乃盡掘其先人塚 今綵與我處極刑,而芳獨晏然, 瑾從孫二漢

兵部尚 盡信也。」宇閉,以大夏不爲己地,深憾之。 後大夏 弘治中,以大學士劉健薦,擢右僉都御史,巡撫大同,召爲 書馬文升薦之,進右都御史,總督宣府、大同、山西軍務。 劉宇,字至大,鈞州人。成化八年進士。 :書劉大夏因孝宗召見,語及之。 再召對,帝曰:「健薦宇才堪大用,以朕觀之,此小人,豈可用哉。 由是知內閣亦未可 帝密遣錦衣百戶邵琪往察, 由知縣入爲御史, 左副都御史。 宇初撫大同, 坐事 宇厚賂琪,爲之抵諱。 謫, 私市善馬賂權要。 累遷山東按察使。 正德改元,吏部尚

劉 瑾 用 事,宇介焦芳以結瑾。 二年正月入爲左都御史。 **瑾好摧折臺諫,字緣其意,請** 

列

內批授庶吉士,踰年遷編修。 喜曰:「劉先生何厚我。」尋轉兵部尙書,加太子太傅。子仁應殿試,求一甲不得。厚賄瑾, 敕箝制御史,有小過輒加笞辱,瑾以爲賢。 **瑾初通賄,望不過數百金,宇首以萬金贄,瑾大** 

交章劾奏,削官致仕,子仁黜爲民。 後瑾欲用綵代字,乃令字以原官兼文淵閣大學士。宇宴瑾閣中,極驩,大喜過望。明日將 入閣辦事。 及爲吏部,權歸選郞張綵,而文吏贈遺又不若武弁,嘗悒悒歎曰:「兵部自佳,何必吏部也。」 時許進爲東部尚書,字讒於瑾,遂代其位,而曹元代字爲兵部。字在兵部時,賄賂狼籍。 

酒諧謔而已。 與劉瑾有連,自瑾侍東宮,即與相結。及瑾得志,遂夤緣躐至卿相,然瑣瑣無能,在閣中飲 加太子少保。將校遷除,皆惟瑾命。元所入亦不貲。五年拜吏部尚書兼文淵閣大學士。元 邊釁,上疏請止,不從。 正德二年累遷右副都御史,巡撫甘肅。分守中官張昭奉命捕虎豹,元以軍士出境搜捕,恐啓 曹元,字以貞,大寧前衞人。柔佞滑稽,不修士行。舉成化十一年進士。授工部主事。 **谨敗,**元即日上疏請罪,詞極哀。 改撫陝西。踰年,召爲兵部右侍郎,轉左,尋代字爲尚書兼督團營, 韶許致仕,言官交劾,黜爲民。元無子,病

琳。 仁、憲、鳳鳴、鍾除名,亨、昂閒住,善、巖、諒、志淳、綸、直、彦奇、良器、哲致仕,選、以貞、論 中学、龍、滕、銓、炅、溪、滾、紀、琳、九思,納誨謫外,朝署爲淸。 巡撫 九思、王納誨。 則陳良器,府丞則石祿。 通政吳釴、王雲鳳,參議張龍。 江王彦奇。 部崔巖、夏昂、胡諒,南京禮部常麟、工部張志淳。 張 統、戶部劉璣、兵部王敞、刑部劉璟、工部畢亨、南京戶部張澯、禮部朱恩、刑部劉纓、工部 其他郎署監司又十餘人。 則 當劉瑾時,廷臣黨附者甚衆。 順天劉聰、應天魏訥、宣府楊武、保定徐以貞、大同張禴、 侍郎則吏部柴昇、李瀚, 前總督文貴、馬炳然。 給事中則李憲、段豸。御史則薛鳳鳴、朱袞、秦昂、 翰林則侍讀焦黃中,修撰康海,編修劉仁,檢討段炅。 於是綵論死,福謫戍,元、恩、震、聰、訥、武、恬、介、黃中、海、 太常則少卿楊廷儀、劉介。 前戶部韓福,禮部李遜學,兵部陸完、陳震 大理寺則卿張綸,少卿董恬,丞蔡中孚、張檜。 **瑾誅**,言官交劾。 都察院則副都御史楊綸 內閣則焦芳、劉宇、曹元。 尚寶卿則吳世忠,丞屈銓。 淮揚屈直、 字文鍾、崔哲、 ,刑部張子麟,工 僉都 兩廣林廷選,操 吏部郎則王 尚書則 御史蕭 通政司 李紀、周 府 吏 選。 尹 則

列

僉都: 劉瑾 慚,而綵丰采英毅,大用等皆稱羨,瑾 之。 冠鮮 指。 由綵,多不關白字,卽白字,字必溫言降接。 遇子!時文選郞劉永已遷通政,次當驗封郞 論稱之。越數日,給事中李貫薦綵有將略。 析,且譽其聰明剛正,爲上下所推服。 鼎,合水人。 御史,與戶部右侍郎韓鼎同廷謝。 綵自是一意事瑾。 衣,貌白晢修偉,鬚眉蔚然,詞辯泉湧。 同鄉,力薦於瑾。 張綵 初矯飾徼聲譽,尚書馬文升等皆愛之。 ,安定人。弘治三年進士。 弘治時,爲給事 **瑾惡進不附己,綵因媒孽去進,以劉宇代之。** 中, 乃喜。 負直 授吏部主事,歷文選司郎中。 詔令辦事如故。 鼎老,拜起不如儀,爲谷大用、張永輩所竊笑。 摩。 **瑾大敬愛,執手移時,曰:「子神人也,我何以得** 給事中劉蒞嘗劾其顚倒選法數事,文升悉爲辯 越二日罷鼎,而綵踰年超拜吏部右 **綵抱案立語,宇俯僂不敢當。居文選半載,擢** 石確。 楊一淸總制三邊,亦薦綵自代。而焦芳以綵與 後遷右通政,治水安平有勞績,以通政 疏旣入, 谨令尚書許進追 綵即五疏移疾去,文升固留不得,時 綵乃就道。 綵議論便利,善伺權貴 字雖爲尙書, 原 侍 疏, 旣見瑾,高 鄎 銓政 以綵 使家 達方 率 易 左

一歲中,自郎署長六卿。 僚友守官如故,咸

居。

至是爲瑾所引,復挫歸,遂失其

、素望。

得見。 妾美,索之不肯,令御史張論按致其罪,擬戍。 府劉介,其鄉人也,娶妾美。紙特擢介太常少卿,盛服往賀曰:「子何以報我。」介皇恐謝曰: 諮司臺諫謫辱日甚。 惴 朝臣言 一身外,皆公物。」綵曰:「命之矣。」卽使人直入內,牽其妾,輿載而去。 惴白事尚書前,**綵厲色無所假借**。 ,呼瑾爲老者。 綵故徐徐來,直入瑾小閣,歡飲而出,始揖衆人。衆以是益畏綵,見綵如瑾禮。 變亂舊格,賄賂肆行,海內金帛奇貨相望塗巷間。 凡所言,瑾無不從。 尋加太子少保。 因不時考察內外官,糾摘嚴急,間一用薄罰 恕獻妾,始得論減。 每瑾出休沐,公卿往候,自辰至哺未 性尤漁色。 又聞平陽知府張恕 撫州知 綵與 而

害爲 謀反,瘐死獄中,仍剉屍於市,籍其家,妻子流海南 按 會御史胡節巡按山東還,厚遺瑾。 盜官帑,即剝小民。 事 福 少衰,中外或稱綵能導瑾爲善矣。 綵旣銜瑾恩,見瑾擅權久,貧冒無厭,天下怨之,因 建 還,餽瑾白金二萬。 彼借公名自厚,入公者未十一,而怨悉歸公, **瑾疏納金於官,而按三人罪。** 瑾發之,捕節下獄。 及瑾伏誅,綵以交結近侍論死,遇赦當免。改擬同瑾 少監李宣、侍郎張鸞、指揮同 乘間說曰:「公亦知賄入所自乎?非 其他 因賄 何以謝天下』瑾大然之。 得禍者甚衆。 知趙良 苛斂之

韓福者,西安前 衞 人也。 成化十七年進士。 爲御史,按宣府、 大同,數條奏軍民利病,

列

左參政,病発。

邊人悅之。 弘治中,遷大名知府,奸盜屛跡,道不拾遺, 政績爲畿輔冠。 以卓異舉,遷浙江

等極 堪代者以聞。」福引罪求罷,乃召還。 又奉行過當。 怒福,取詔旨報曰:「湖廣軍民困敝,朕甚憫之。」福任意苛斂,甚不稱朕意,令自劾,吏部舉 科不力,自巡撫鄭時以下凡千二百人。奏至,舉朝駭愕,戶部尙書劉璣等議如福言。 務爲嚴苛。 亦時召與謀,委寄亞於綵。 戶部左侍郎。 入爲右副都御史。坐累,下詔獄。 論之。 武宗立、言官交薦、召爲大理右少卿。正德二年以右僉都御史督蘇、松糧儲。 瑾迫公議, 勒福致仕。 湖廣民租自弘治改元後,逋六百餘萬石,皆遇災蠲免。福欲追徵之,劾所司催 福故强幹吏,所在著能聲。至是受挫,爲瑾所拔擢,遂精心事瑾,爲効力。 軍士不能堪,焚掠將吏及諸大姓家。 會湖廣以缺餉告,命兼僉都御史往理之。 獄上,劉瑾以同鄉故,立命出之。召與語,大悅,卽用 明年達敗,籍其貲,則福在湖廣時所飽白金數十萬兩 四年復命覈遼東屯田。 守臣發帑撫慰之,亂始定。 福性故刻深,所攜同 **瑾喜操切,福希指,**益 給事 知劉 未幾,召 中徐仁 瑾忽 玉等 瑾 爲

李憲,岐山人。 爲吏科給事中,諂事瑾,每率衆請事於瑾,盛氣獨前,自號六科都給事 識宛然,遂遣戍固原。

中。時袖白金示同列曰:「此劉公所遺也。」」瑾敗,虞禍及,亦刻瑾六事。 蓮在獄,笑曰:「李憲

亦劾我乎。」卒坐除名。

嘉興 徐璉 後以私取賄,爲寧所覺,斥逐之。」嘉靖初,下獄論死。 孫淸並貪殘,天下目爲「四害」。離朝覲入都,中旨擢右通政,爲寧通中外賄,所乾沒不貲。 (同知)遷登州知府。言官彈射無虛月。與山西左布政使倪天民、右布政使陳達、右參議 以下米三百石有差。瑾以爲能,擢通政參議。瑾敗,謫知灤州。後又結朱寧爲父,起 正德三年夤緣爲兵科給事中,出覈遼東軍餉,得腐豆四石。請逮問監守諸臣,罰郎 張龍,順天人。官行人,邪媚無賴,與壽寧侯通譜系,因得交諸中人、貴戚,恃勢奪人田 中

結外廷諸臣、秉謙及魏廣微率先諂附、霍維華、孫杰之徒從而和之。 啓元年晉禮部尚書,掌詹事府事。二年,魏忠賢用事,言官周宗建等首劾之。 顧 秉謙 ,崑山人。萬曆二十三年進士。改庶吉士,累官禮部右侍郎,敎習庶吉士。天 明年春,秉謙、 忠賢於是謀 廣微逐

與朱國旗、朱延禧俱入參機務。

列傅

第

百九十四

閥滅

南樂 人,侍郎允貞子也。 萬曆三十二年進士。 由庶吉士歷南京禮部侍郎。

用 て、以同 鄉同姓潛結之,遂召拜禮部尚書。 至是,與秉謙俱以原官兼東閣大學士

七月,秉謙晉太子太保,改文淵閣。十一 月晉少保、太子太傅。五年正月晉少傅、太子

太師、吏部尚書,改建極殿。九月晉少師。

爲邪 泉,允貞別號也。廣微聞之,恨刺骨。旣柄政,三及南星門,閽人辭不見。廣微怫然曰:「他 攀龍、喬允升、李邦華、鄭三俊、楊漣、左光斗、魏大中、黃尊素、周宗建、李應昇等百餘人,目 純便覽一册, 給事中魏大中、御史李應昇連劾之。廣徽益憤,遂決意傾善類,與秉謙謀盡逐諸正人,點縉 進之,俾據是爲黜陟。 人可拒,相公尊,不可拒也。」益恨南星。楊漣之劾忠賢二十四罪也,忠賢懼,屬廣微爲調旨, 如忠賢意。而秉謙以漣疏有「門生宰相」語,怒甚。會孟冬饗廟,且頒朔,廣微偃蹇後至, 秉謙爲人,庸劣無恥,而廣微陰狡。 趙南星與其父允貞友善,嘗歎曰:「見泉無子。」見 而以黃克纘、王永光、徐大化、賈繼春、霍維華等六十餘人爲正人, 若葉向高、韓爌、何如寵、成基命、繆昌期、姚希孟、陳子壯、侯恪、趙南星、高 忠賢得內閣爲羽翼,勢益 張。秉謙、廣微亦曲奉忠賢,若奴役 由閹人王朝用 然

有一舉動,輒擬旨歸美忠賢,褒贊不已。 直 ,皆秉謙票擬。 众向高 韓爌相 三朝要典之作,秉謙 繼罷,何宗彥卒,秉謙遂爲首輔。 爲總裁,復擬 廣微以札通忠賢,簽其函曰「內閣家報」,時稱日 御製序冠其首,欲用是鉗 自四年十二月至六年九月,凡 天下 口 傾害忠 朝廷

「外魏公」。先是,內閣調旨,惟出首輔一人,餘但參議論而已。 廣微欲擅柄,謀之忠賢,令衆

輔分任,政權始分,後遂沿爲故事。

佐。 保、太子太傅,改吏部尚書、建極殿大學士,至是復加少傅、太子太師,廕子中書舍人,賜白 謙爲解,忠賢意少釋。然廣微卒不自安,復三疏乞休,五年八月許之去。<a>[三] 廣微先已加少 章,而曰『朝政日亂』,朕方祖述堯、舜,而曰『大不相侔』」,蓋卽指廣徹疏語。廣微益懼,丐秉 宗之制,將朝政日亂,與古之帝王大不相侔矣。」疏入,大忤忠賢意。廣微懼,急出景榮手書 金百、坐蟒一、綵幣四表裏,乘傳,行人護歸。典禮優渥,猶用前好故也。居二年,卒於家, 自明,而忠賢怒已不可解。乃具疏乞休,不許。居兩月,矯詔切責廷臣,中言「朕方率循舊 贈太傅,恤典如制。 重刑之下,就死直須臾耳。以理刑之職,使之追贓,官守安在?勿論傷好生之仁,抑且違祖 杖下,亟請廣微諫止。廣微不自安,疏言:「漣等在今日,誠爲有罪之人,在前日實爲卿寺之 縱使贓私果真,亦當轉付法司,據律論罪,豈可逐日嚴刑,令鎭撫追贓乎?身非木石, 楊連等六人之逮也,廣微實與其謀,秉謙調嚴旨,五日一追比。尚書崔景榮懼其立死

應昇等下詔獄, **乘謙票擬,事事徇忠賢指。** 秉謙請付法司, 毋令死非其罪。 初矯旨罪主考丁乾學,又調旨殺漣、光斗等。 內臣出鎭,秉謙撰上諭,已復與丁紹軾請 惟周順昌、李

列傳第

百

罷。 遣戍中。 年八十,倉皇竄漁舟得免,乃獻窖藏銀四萬於朝,寄居他縣以死。 坐交結近侍,入逆案中,論徒三年,贖爲民。 疏乞休,後廣微 二事微 有 執 一年致仕去。 爭。 馮銓旣 入閣, 崇禎 元年,爲言官祖重曄、徐尙勳、汪應元所糾,命削 同黨中日夜交軋,羣小亦各有所左右。 二年,崑山 民積怨秉謙,聚衆焚掠其家。 廣微亦追論削奪,列逆案 秉謙不自安,**屢** 籍。 秉謙 已,

自 秉謙、廣微當國,政歸忠賢。 其後入閣者黃立極、施鳳來、張瑞圖之屬,皆依媚取容,

名麗逆案。

微、顧秉謙皆以附忠賢居政府。未幾廣微去,如磐卒。明年夏,紹軾亦卒,銓罷。其秋,施 月,忠賢以同鄉故,擢禮部尚書兼東閣大學士,與丁紹軾、周如磐、馮銓並參機務。 鳳來、張瑞圖、李國槽入。已而秉謙乞歸,立極遂爲首輔。 <u>黄立極,字中五,元城人。萬曆三十二年進士。累官少詹事、禮部侍郎。天啓五年八</u> 時魏廣

瑞圖會試策言:「古之用人者,初不設君子小人之名,分別起於仲尼。」其悖妄如此。 同授編修,同積官少詹事兼禮部侍郎,同以禮部尚書入閣。 施鳳來,平湖人。張瑞圖,晉江人。皆萬曆三十五年進士。鳳來殿試第二,瑞圖第三, 鳳來素無節概,以和柔媚於世。 忠賢生

不至。 猶優詔報之。十一月,立極乞休去,來宗道、楊景辰並入閣,鳳來爲首輔。 御史羅元賓復疏 漫 祠 無主持。 碑文,多其手書。 律以逢奸之罪,夫復何辭。」帝爲除煥猷名,下吏。 甚至顧命之重臣,斃於詔獄;五等之爵,尚公之尊,加於閹 莊烈帝卽位,山陰監生胡煥猷劾立極、鳳來、瑞圖、國槽等,「身居揆席, 立極等內不自安,各上疏求罷,帝 一寺,而生祠碑頌,靡所

道笑曰:「渠何事多言,詞林故事,止香茗耳。」時謂宗道淸客宰相云。 務。 宗道官禮部時,爲崔呈秀父請卹典,中有「在天之靈」語。編修倪元璐屢疏爭時事,宗 宗道,蕭山人。立極同年進士,累官太子太保、禮部尚書,以本官兼內閣大學士,預機

糾,鳳來、瑞圖俱告歸。

時,爲要典副總裁,一徇奸黨指,又三疏頌忠賢。 景辰,瑞圖同縣人。萬曆四十一年進士。積官吏部右侍郎,與宗道同入閣。 及朝局已變,乃請燬要典,給事、御史交劾 官翰林

之,與宗道同日罷。

碑,宗道稱呈秀父『在天之靈』, 而立極、鳳來、景辰落職閒住。 其後定逆案,瑞圖、宗道初不與,莊烈帝詰之,韓爌等對無實狀。 非實狀耶。」乃以瑞圖、宗道與顧秉謙、馮銓等坐贖徒爲民, 帝曰:「瑞圖爲忠賢書

私 獪 狼 ,不修士行。 籍。 崔呈秀,薊州 霍丘知縣鄭延祚貪,將劾之,以千金賄免。 見東林勢方盛,將出都,力薦李三才,求入其黨,東林拒 人。 萬曆四十一 年進士。 授行人。 延祚知其易與,再行千金,卽薦之。 天啓初,擢御史,巡按淮 不納 在淮 揚。 卑污狡 揚,贓

行

事

多類

此。

勘。 居,與熊廷弼 爲養子。 晚,遂用爲腹 呈秀 四 年 當是時, 大窘,夜走魏忠賢所,叩頭乞哀,言攀龍、南星皆東林,挾私 九月還朝,高攀龍爲都御史,盡發其貪污狀。 心,日與計畫。 有隙,遺書魏 忠賢爲廷臣交攻,憤甚,方思得外廷爲助。 良卿勸興大獄。 忠賢冀假事端傾陷諸害己者, 吏部尚書趙南星議 涿州 人馮銓,少年官侍從 排陷, 成之, 得呈秀,恨相 復叩頭涕泣,乞 詔革職 見 家 候

鶴 集蟻附,其門如市。 天鑒錄,皆不附東林者。 三殿工,忠賢以閱工故,日至外朝。 鳴、申用懋、王永光、商周祚、許弘綱等,而 明年正月,給事中李恒茂爲呈秀訟冤。 累擢工部右侍郎並兼御史,督工如故。 令忠賢憑以黜陟,善類爲一空。暮夜乞憐者,莫不緣呈秀以進,蠅 呈秀必屏人密語,以間進同志諸錄,皆東林黨人。 中旨卽言呈秀被誣,復其官。呈秀乃首疏薦張 再疏請令京官自陳,由是淸流多屛斥。 御史田景新言,侍郎兼御史非 叉進 尋督

便,請改僉都御史,從之。

史,仍督大工。母死,不奔喪,奪情視事。 矣。時方創三朝要典,呈秀疏陳要典之源,追論並封、妖書、之藩三事,凡擁衞光宗者,悉加 末言:「臣非行媚中官者,目前千譏萬罵,臣固甘之。」疏出,朝野轟笑。 八百餘言,褒忠賢,極口揚詡,前代九錫文不能過也。 忠賢嘗修鄉縣肅寧城,呈秀首上疏稱美。六年二月,復疏頌忠賢督工功,請賜敕獎諭, 忠賢悅,宣付史館。其年七月,進本部尚書。十月,皇極殿成,加太子太保兼左都御 自是,中外章疏,無不頌忠賢功德者 閣臣 顧秉謙輩撰敕

主事,妾弟優人蕭惟中爲密雲參將,所司皆不敢違。 之。子鐸不能文,屬考官孫之獬,獲鄉薦。用其弟凝秀爲浙江總兵官,女夫張元芳爲吏部 者,輒使其黨排去之,時有「五虎」之目,以呈秀爲魁。諸所傾陷,不可悉數,雖其黨亦深畏 呈秀負忠賢寵,嗜利彌甚。朝士多拜爲門下士,以通於忠賢。其不附己及勢位相軋

聞。 兵部尙書,仍兼左都御史,並綰兩篆,握兵權憲紀,出入烜赫,勢傾朝野。無何,熹宗崩,廷臣 或言忠賢欲篡位,呈秀以時未可,止之也。 明年八月冒寧、錦功,加太子太傅。 內使十餘人傳呼崔尚書甚急,廷臣相顧愕胎。 俄敍三殿功,加少傅,世廕錦衣指揮僉事。 呈秀入見忠賢,密謀久之,語秘不得 其月遷

壞之,飲已自縊。 垣 詔逮治,籍其貲。 工部尙書吳淳夫、兵部尙書田吉、太常卿倪文煥、副都御史李夔龍,號稱「五虎」,宜肆市朝。 、賈繼春相繼力攻,呈秀乞罷。 莊 烈帝卽 位 ,其黨知忠賢必敗,內相攜。 **詔戮其屍,子鐸除名,弟凝秀遣戍。後定逆案,以呈秀爲首。** 時忠賢已死,呈秀知不免,列姬妾,羅諸奇異珍寶,呼酒痛飲,盡一卮即擲 帝猶慰留。 章三上,溫旨令乘傳歸。 副都御史楊所修首請允呈秀守制, 已而言者劾呈秀及 御史楊維

暱 中 注右侍郎。 ·,與文煥、吉、夔龍並 呈秀妬之,淳夫卽爲攻銓。六年冬,擢太僕少卿,視職 淳夫,晉江人。萬曆三十八年進士。 冒寧、錦及三殿功,累進工部尚書,加太子太傅。 由呈秀進,爲忠賢義子。 歷官陝西僉事,以京察罷。 大學士馮銓釋祸十三年登宰輔,爲忠賢所 方事。 歲中六遷,至極品 旋擢 五年夤緣 太僕卿, 歷工部添 起兵部郎

等數十人。輕者削奪,重者拷死。 昌、林枝橋。回再劾戶部侍郎孫居相、御史夏之令及故吏部尚書崔景榮、吏部尚書李宗延 謁呈秀求救,遂引入忠賢幕,爲鷹犬。 政王維章數牒文煥,文煥納其賄,反劾罷維章。 倪文煥,江都人。 由進士授行人,擢御史,巡視南城。 呈秀首頌忠賢,文煥卽繼之。 首劾兵部侍郎李邦華,御史李日宣,吏部員 嘗誤撻皇城守卒,爲中官所糾,大懼,走 山東多大猾,事發則走匿 出按畿輔,爲忠賢建三祠。 外郎周順

河南道缺掌印官,呈秀爲懸缺待文煥,至越十餘人任之。 冒寧、錦、殿功,加太僕卿,掌道如

故。尋改太常卿。忠賢敗,文煥懼,乞終養歸。

連擢至兵部尚書,加太子太保。 兵部郎中。六年冬,遷淮楊參議,取中旨,擢太常少卿,視職方事。 田吉者,故城 人。 萬曆三十八年廷對懷挾,罰三科,以縣佐錄用。 諸逆黨超擢,未有如吉者。 明年擢太常卿。 已,補試,由知縣歷 未匝歲,

專承呈秀指,引用邪人以媚忠賢。擢太常少卿,仍署選事。 李夔龍,福建南安人。 由進士歷吏部主事,被劾罷去。天啓五年夤緣復官,進郎中。 **尋遷左僉都御史。三殿成,進** 

莊烈帝嗣位,淳夫、文煥、吉、夔龍,並以上林典簿樊維城、戶部員外郎王守履言,逮治

論死。

左副都御史。

閱日,召入便殿,案有布囊,盛章疏甚夥,指之曰:「此皆奸黨頌疏,可案名悉入。」爌等知帝 附為目,且曰:「內侍同惡者亦當入。」爌等以不知內侍對,帝曰:「豈皆不知,特畏任怨耳。」 怨,僅以四五十人上。帝少之,令再議,又以數十人上。帝不懌,令以贊導、擁戴、頌美、諂 方忠賢敗時,莊烈帝納廷臣言,將定從逆案。大學士韓爌、李標、錢龍錫不欲廣搜樹

刑名對,乃詔刑部尚書喬允升、左都御史曹于汴同事,於是案名羅列無脫遺者。 意 三月上之,帝爲詔書頒示天下。 不可回, 乃曰 :「臣等職在調旨,三尺法非所習。」帝召吏部尚書王永光問之,永光以不習 崇禎二年

首逆凌遲者二人:魏忠賢,客氏。

首逆同謀決不待時者六人、呈秀及魏良卿、客氏子都督侯國興、太監李永貞、李朝

欽、劉若愚。

李夔龍、曹欽程,大理寺正許志吉,順天府通判孫如冽,國子監生陸萬齡,豐城侯李承 交結近侍秋後處決者十九人一劉志選、梁夢環、倪文煥、田吉、劉韶、薛貞、吳淳夫、

祚,都督田爾耕、許顯純、崔應元、楊寰、孫雲鶴、張體乾。

結交近侍次等充軍者十一人:魏廣微、周應秋、閻鳴泰、霍維華、徐大化、潘汝禎、

黃運泰、郭尙友、李從心,巡撫尙書李精白等一百二十九人。 魁、薛鳳翔、孫杰、楊夢袞、李養德、劉廷元、曹思誠,南京尚書范濟世、張樸,總督尚書 書王紹徽、郭允厚、至張我續、曹爾禎、孟紹虞、馮嘉會、李春曄、邵輔忠、呂純如、徐兆 李魯生、楊維垣、張訥,都督郭欽,孝陵衞指揮李之才。 交結近侍又次等論徒三年輸贖爲民者:大學士顧秉謙、馮銓、張瑞圖、來宗道,尙

交結近侍滅等革職閒住者,黃立 極等四十四人。

忠賢親屬及內官黨附者又五十餘人。

給事中虞廷陛、郭如闇,御史周昌晉、 如 起,國亡乃止。 黨乃不敢言。 ,被劾去。 案旣定,其黨日謀更翻,王永光、溫體仁陰主之,帝持之堅,不能動。 唐世濟薦霍維華, 福王時,阮大鋮冒定策功,起用,其案始翻。 福建巡按應喜臣薦部內閒住通 陳以瑞、 徐復陽, 編修吳孔嘉, 於是太僕 政使周維京,罪 參政虞大復輩相繼而 少卿楊維垣、徐景濂, 其後,張捷薦呂純 至謫戍。

其

縣,以大計罷 「陛下謫 鄭貴妃、王恭妃册封事 劉 志選,慈谿 懋檜 歸,家居三十年。 ,使人箝口結舌,蒙蔽耳目,非國家福也。」帝怒,謫福寧州 人。 0 萬曆中,與葉向高同舉進士。 後懋檜因給事中邵庶請禁諸曹言事,抗疏力爭,貶二秩。 授刑部主事,偕同官劉復初、李懋檜爭 判官。 稍遷合肥知 志選言

志選與遊宴彌月。 光宗、熹宗相繼立,諸建言得罪者盡起,志選獨以計典不獲與。 還朝,用爲南京工部主事,進郞中。 時已七十餘,嗜進彌銳, 會向高赴召,道杭州 上疏追論

列

「紅丸」,極詆孫愼行不道。 魏忠賢喜,天啓五年九月召爲尚寶少卿。 在道,復力攻愼行,遂

**幷及向高。忠賢益喜,出兩疏宣史館。** 

紀女也。疏上,事叵測。帝伉儷情篤,但令國紀自新而已。后爲故司禮劉克敬所選,忠賢 論國紀罪,而末言「毋令人訾及丹山之穴,藍田之種」。蓋前有死囚孫二言張后已所生,非國 后,草一疏,募人上之。諸人慮禍不敢承。志選惑家人言,謂己老必先忠賢死,竟上之。極 遷怒克敬,謫發鳳陽,縊殺之。 手。 之。 邵輔忠、孫杰謀因此興大獄,盡殺東林諸人,而借國紀以搖中宮,事成則立魏良卿女爲 會有張 明 年擢 匿名榜於厚載門者,列忠賢反狀,幷其黨七十餘人。 順天府丞。冬十月遂上疏劾張國紀。 國紀者,后父也。 忠賢疑出國紀及被逐諸人 忠賢忌后賢明,欲傾

簡端 黄克纘、徐景濂、范濟世、賈繼春幷及傅櫆、陳九疇。 擢,之寀被逮,慎行遣戍,悉如志選言。 魏廣微也,當還之揆席,以繼五臣之盛事。 焉,洵游、夏無能贊一詞者。」因力詆王之寀、孫愼行、楊漣、左光斗,而極譽劉廷元、岳駿聲、 未幾,志選疏頌要典,言:「命德討罪,無微不彰,卽堯、舜之放四凶,舉元、愷,何以加 以揚一 德之休風。」又言:「之寀宜正典刑,愼行宜加謫戍。」忠賢大悅,於是駿聲等超 赤忠報國,弼成巨典於不日者,廠臣 且言:「慷慨憂時,力障狂瀾於旣倒者, 也,當增入

律無傾搖 七年擢右僉都御史,提督操江。 國母文,坐子罵母律,與梁夢環幷論死。 其年,熹宗崩,忠賢敗,言官交劾,詔削籍。 志選先自經。 後定逆案,

海關 封 環建祠祀忠賢,三疏頌功德。寧、錦之役,復稱忠賢「德被四方,勳高百代」,於是有安平之 紀罪,且故詩「丹山、藍田」二語,冀傾后。 萬,廷弼已死,家益破。 ,夢環擢太僕卿。 夢環,廣東順德人。 會寧遠敍功,崔呈秀不獲與,夢環力敍其賢勞,遂進侍郎。 志選之劾國紀也,忠賢意未逞。夢環偵知之,七年二月馳 舉進士。 歷官御史。 顧事重,忠賢亦不能驟行,而國紀竟勒還籍。夢 父事忠賢, 興汪文言獄, 殺楊漣等。 劾熊 廷酮乾沒軍資十七 疏 極論 出巡山

或

**|秀所親蕭惟中主郵騎,直接都門,此其意何爲。」由是三人皆被逮,論死。** |薊州,迎忠賢像,五拜三稽首,呼九千歲。 搖動宮闡,如詔及劉志選、梁夢環三賊者,罪實浮於「五虎」「五彪」,而天討未加。 釋褐九年,驟至極品。 年 代閻鳴泰總督薊、遼、保定軍務。 又劉詔者、杞縣人。萬曆四十七年進士。授盧龍知縣。天啓二年超擢山東僉事。 建四祠祀忠賢。 **尋進兵部尚書,加太子太保。** 忠賢敗,僅罷官聽勘。 及聞先帝彌留,詔卽整兵三千,易置將領,用崔呈 御史高弘圖言"「傾危社稷, 韶嗜利無恥,父事忠賢。 且韶建祠

列

其 謝 所 病 主使。 去, 邵 輔忠 久之起故官。 七年三月護桂王之藩衡州,加太子太保。還朝,時事已變,移疾歸。 定海 萬曆二十三年進士。 天啓五年附忠賢,驟遷至兵部尚書,視侍郞事。 爲工部郎中,首劾李三才貪險假橫四大罪。 諸奸黨攻擊正人,多 **尋麗逆案**, 葬

贖

徒爲民

忠賢 內外 魯生 淸 吳淳夫等,先擊去銓。 議 所棄。 .誅,<<br />
杰被劾罷,名麗逆案,贖徒三年。<br />
輔忠、<<br />
杰本謀搖中宮,<br />
而事發於<br />
志選、<br />
夢環,故得 兼用疏以堅之。 、李蕃擁戴爲首輔,素與崔呈秀暱。 孫杰, 錢塘人。 出爲江西參議,引疾歸。 萬曆四十一年進士。 自是,魯生、蕃與杰等分途,其黨日相軋矣。 又恐王紹徽爲吏部,不肯推呈秀,令袁鯨疏攻紹徽,而襲萃肅上閣臣 忠賢召爲大理丞,累擢 而杰與霍維華以呈秀最得忠賢歡,欲令入閣,謀之 官刑科右給事中,以附忠賢劾劉一燝、周嘉謨,爲 工部 右侍郎。大學士馮銓由 杰官亦至尚書,加少保。 李

曹欽程,江西德化人。 舉進士。授吳江知縣,贓污狼籍,以淫刑博强項聲。 及文言敗,欽程力 巡撫周起

屬 擠之一由座主馮銓父事魏忠賢、爲「十狗」之一。銓欲害御史張愼言、周宗建,令李魯生草疏, 欽程 上之,因及李應昇、黃尊素,而薦魯生及傅櫆、陳九疇、張訥、李蕃、李恒茂、梁夢環輩

十餘人。愼言等四人並削籍。

自成 忠賢 指 以忠賢親己。 力薦其賢,遂由員外郎擢太僕少卿。 意以 陷京師,欽程首破獄出降。 忠賢誅,入逆案首等,論死。 欽程 敗羣,削其籍。 於羣小中尤無恥,日夜走忠賢門,卑諂無所不至,同類頗羞稱之。 給事 中吳國華劾之,忠賢怒,除國華名,欽程益得志。 瀕行猶頓首忠賢前 自成敗,隨之西走,不知所終。 緊獄久之,家人不復饋食,欽程掠他囚餘食,日醉飽。 後忠賢亦厭之,六年正月爲給事中潘士聞 曰:「君臣之義已絕,父子之恩難忘。」絮泣 福王時,定從賊案,欽程復 給事中 欽程顧驕衆人 楊所修緣忠賢 所劾。 李 而

當忠賢盛時,其黨爭搏擊淸流,獻諂希寵。 最著者,石三畏、張訥、盧承欽、門克新、劉

徽、智鋌。

出 爲王府長史。 三畏,交河人。 故 事 知文登、曹二縣,大著貪聲。 , 外吏行取無爲王官者,三畏以是大恨。 以御史陳九疇薦,得行取。 及忠賢得志,三畏諂附之, 趙南星 秉銓,

列

傳

第

百

淑 南 於 察三 遂 瑾 主, 京 授 酗 是三才等生 抃 尙 變, 酒 御 趙南 鍛 書 史。 成楊、 力 沈儆 劇。 星 詆 首 李三才、 刻 炌、 者除名,死者追奪。 忠賢聞,大怒,削籍歸。 張問達、王允成、 左之獄, 都 大理 給 事 王圖 丞張廷拱, 中劉 咆哮特甚。 弘化護熊 孫丕 涂一 揚 已, 三人亦獲譴。 日<sub>,</sub> 榛、王象春等十五人,而 曹于汴、 廷 忠賢殛,借忤璫名,起故官, 極論三案, 丽, 赴戚畹宴,魏良卿在焉。 太僕 湯兆京 三畏爲忠賢 請以其疏付 卿吳炯黨顧 、王宗賢 (「十孩 史館, 薦 憲 顧憲成 喬 成 爲南京御史朱純所劾,罷 應甲 兒」之一。 而 三畏醉,誤 兩 劾 、徐兆魁等十三人。 人 胡 禮部侍郎周 獲嚴 忻 令優 叉倚 譴。 王元 人演 追論 呈秀爲 翰 炳 謨、 {劉 京

<del></del>
弁及侍 擊 諸 湖 鄒 廣 人並 維 ,爲忠賢建四祠。 用力多 巡 璉 訥, 一獲罪。 撫孫 、程 郎鄭三俊、 閬 中人。 國祥、夏嘉遇。 鼎相 忠賢深 尋請毀東林、關中、江右、徽州諸 ,舊給事中毛士龍、魏大中,光祿 由行人擢御史,承忠賢指,首劾趙南星十大罪,幷及御史王允成, 畢懋良等, 德之,用 兄弟並入逆案。 忠賢大喜,立除南星等名, 其兄太僕少卿撲至南京戶部尚書,加太子太保。 亦坐削 奪。 復劾罷江西 書院。 少卿史記事等十七人,誣以 痛詆 巡撫韓光祐。 且令再奏。 鄒元標、馮從吾、余懋衡 乃羅 訥為忠賢鷹犬,前後 織兵部 賄 侍郎 樸官宣大總 南 、孫愼行 李 星得官, 吏部郎 ,邦華, 搏

神。 謂之『先鋒』, 李三才、趙南星而外,如王圖、高攀龍等謂之副帥,曹于汴、湯兆京、史記事、魏大中、袁化中 請以黨人姓名、罪狀榜示海内。」忠賢大喜,敕所司刊籍,凡黨人已罪未罪者,悉編名 |承飲,餘姚人。 由中書舍人擢御史,首劾罷户部侍郎孫居相等,因言:「東林自顧憲成、 丁元薦、沈正宗、李朴、賀烺謂之『敢死軍人』,孫丕揚、鄒元標謂之『上木魔

其中。

承欽官至太僕少卿卒。

初,引疾去。 嘗客廷弼所。 譬。」裕中疏上,遂命於午門杖之百,舁至家死。 魏廣微將謝政,克新言:「廣微砥柱狂瀾,厥 御史吴裕中,廷弼姻也,憤曰:「廷弼已死人,何必疏促。」與克新絶,逆黨由此銜之。」廷弼之 門户,且請速誅熊廷弼。忠賢大喜,立傳旨行刑。 誇聞,兩人遂棄市,連及同郡編修陳仁錫、故修撰文震孟, 功甚偉,宜錫之温綸,優以禮數。」以是稍失忠賢意。 大學士丁紹軾有力焉。馮銓因使人嗾裕中劾紹軾,而先報忠賢曰:「裕中必爲廷弼報 克新,汝陽人。由青州推官擢御史,劾右庶子葉燦、光禄卿錢春、按察使張光縉倚傍 廷弼死,文豸爲詩誄之,同寅題尺牘亦有追惜語,爲邏卒所獲。 以閣臣固争,乃令俟秋後,而除燦等名。 太倉人孫文豸,與同里武進士顧同寅 並削籍。 克新尋巡按山東,崇禎 克新遽以誹

徽,清苑人。 列 傳 第 百 由臨淮知縣擢御史。 九 + 四 N 滋 陳朝輔劾馮銓,徽出疏繼之,且曰:「臣與銓同鄉,痛 七八五九

萬,而僅以十七萬還公家,何以申國法。」因誣給事中劉弘化、 惡羣 關 贓賄事。 ,誣熊廷弼侵盜軍貲十七萬。 小之悞銓, 忠賢喜,削弘化等籍,敕所司徵廷弼贓。 不忍銓坐失燕、 徽言:「廷弼原領帑金三十萬, 趙本色。」聞者笑之。 尋加徽太僕少卿,先後頌忠賢至十一 出督遼餉, 毛士龍, 茫無 所歸。 乾沒不貲。 御史樊尙燝、房可壯 其家貲不下百 初, 梁夢環巡 疏。

忠賢敗,被劾回籍。

詔奪職。 大喜,加太僕少卿,以憂歸。 南星為元惡。 鋌,元氏 後與三畏、訥、承欽、克新、徽並入逆案,訥遣戍,三畏等論徒 人。 先後劾罷禮部侍郎徐光啓等。 舉鄉試,受業趙南星門,授知縣。 崇禎初,禮部主事喬若雯劾鋌及陳九疇、張訥爲魏廣微 疑以乙榜起家,欲得忠賢歡,搏擊彌銳。 由魏廣微通於忠賢,得擢御史, 遂疏詆 爪牙, 忠賢

誣 百餘人,他革職貶黜者不可勝計。 以東林而逐之。 當忠賢橫時,宵小希進干寵,皆陷善類以自媒。 自四年十月迄熹宗崩,斃詔獄者十餘人,下獄謫戍者數十人,削奪者三 始所擊皆東林也,其後凡所欲去者,恐

王紹徽,咸寧人,尚書用賓從孫也。 舉萬曆二十六年進士。授鄒平知縣,擢戶科給事

用 中。 年 居官 例 出 爲 强執,頗以淸操聞。 Щ 東 參 議 紹徽 辭疾不 湯賓尹號召黨與, 就。 泰昌 時, 起通 圖柄用。 政參議,遷太僕少卿, 吏部尚 書孫丕揚以紹徽其門生 被劾引

以

拾

遺

紹徽 受中傷。 成,兩殿宜緩,請敕 復 求 史。 世 上言:「四方多事,九邊缺饟,難觅催科,乞定分數,寬年限,以緩急之宜付撫按。 乃偕 封, 尋 天 進戶 啓四 紹徽即為奏請良卿 同 逮繫重刑 官陳四不可。 部 年冬,魏忠賢旣逐去左光斗,卽召紹徽代爲左僉都御史。 侍 郎 ,加於封疆、顯過、三案巨奸,則人心悅服,餘宜少寬貸。」復忤忠賢意 工部裁省織造、瓷器諸冗費,用佐大工。 督倉場, 王恭廠、朝天宮並災、紹徽言誅罰 封伯。 甫 視 事,改· 請推崇其三世,紹徽亦議如其言。 左都 御史。 十二月拜 奸黨削除已盡,恐藏 過多。 吏部尚 **忤忠賢意**,得譙 書。 明年六月進左副都 至忠賢遣內臣 忠賢爲 嗣蓄怨,反 從子良 正殿 譲。 . 出 鎭, 卿 旣 御

鯨、張文熙詆紹徽朋比。 進者求速化, {傳 ,編東林一 初 紹徽在萬 百八人為點將 妬諸人妨己, 擬次第逐之。 唇朝,素以排擊東林爲其黨所推,故忠賢首用居要地。 鯨再疏列其鬻官穢狀,遂落紹徽職,而以周應秋代。 錄 獻之, 令按名黜汰,以是益爲忠賢所喜。 孫杰乃謀使崔呈秀入閣,先擊去紹徽, 旣而 紹徽傲民間水滸 逆案旣定,紹 奸黨轉盛,後 令御史袁

列傳第一百九十四 閱黨

徽

削籍

論

徒

師。 歡,時號「煨蹄總憲」。明年七月代紹徽爲吏部尚書。與文選郎李夔龍鬻官分賄。淸流 顯爵, 位,被劾歸。 者,應秋毛舉細故,削奪無虛日。忠賢門下有「十狗」,應秋其首也。冒三殿功,屢加太子太 明年冬,魏忠賢起爲南京刑部左侍郎。 初, 應秋,金壇人。 故兩京大僚多添註。 楊漣等拷死,應秋夜半叩戶語其館客曰:「天眼開,楊漣、左光斗死矣。」 莊烈帝嗣 已,入逆案,遣戍死。 萬曆中進士。 尋改左都御史。 歷官工部侍郎,生平無持操。 五年召拜刑部添註尙書。 家善烹飪,每魏良卿過,進豚蹄留飲,良卿大 時忠賢廣樹 天啓三年避東林謝病去。 私 人 ,悉餌以 未盡 逐

以兄應秋在位,引嫌歸。 弟維持。 天啓中爲御史,請刊黨籍,盡燬天下書院。 崇禎初,起按浙江,被劾罷。兄弟並麗逆案。 俄劾兵部尚書趙彦等,並削籍。

者,維華內弟也,偵知之以告。 中官王安當掌司禮 霍維 華,東光人。 監 前 萬曆四十一 , 辭疾居外邸, 維華故與忠賢同郡交好,遂乘機劾安,忠賢輒矯旨殺之。 年進士。 冀得溫旨卽視事 除金壇 知縣,徵授兵科給 0 安與魏忠賢有隙, 事中。天啓元年六月, 閹 人陸蓋臣 劉

燝 周嘉謨咸惡維華, 用 年 例 出為陝西 [僉事。 其同官孫杰言, 維華三月兵垣 一無過

憬、嘉謨仰王安鼻息 ,故擯於外。 忠賢大喜,立逐 兩 人,而 維華亦以外艱

俄 罪,尚書趙彥宜去,御史方震孺 年,延綏奏捷,進右都 五 志道等京卿 光宗實錄,宣其疏史館。 而 輔 諸 轉 為趙 敍三殿 年冬擢太僕 譽范濟世 、萬言揚。 孫 杰 几 南 俱 年冬,朝事大變,南京御 功,加太子太保 星 擢 一斥者, 、王志道、汪 京 追論三案,痛 嗣美以下悉起用, 少卿。 卿 ,維華及王志道、郭 競起 明 御史,廕子錦衣千戶。 年 用 慶百 忠賢立傳旨削一 事。 詆 擢本寺卿。 劉 劉 維 不宜逮,韓敬宜復官,湯賓 實錄 廷元、徐景濂 史呂鵬雲以 憬、韓爌、孫愼行、張問達、周嘉謨、王之寀、楊漣、左 華盆銳意攻東林 興治、徐景濂 更撰, 尋擢 **帰等五** 兵部 而 寧、錦敍 外轉請告。 、郭如楚、張捷、唐嗣美、岳駿聲、曾道唯 以閣臣言免一燝等罪。 右 、賈繼 人籍,逮之寀, 侍 劾罷御 功,進兵部 郎,署 春、楊維 忠賢傳旨令與被察徐 尹宜雪。 史劉璞、 部 事。 垣 尙 発李| 書,視侍郎 並復故 **忤忠賢意,傳旨譙責** 南京御史涂世業、 每陳奏, 可灼 尋言, 官。 戍, 事,廕子如之。 總督張我 必頌忠賢。 擢 大 維 化 華 濟世 得 、年例外 一。請改 光斗, 巡 刑 黄公 續宜 撫 科 七

帝 初 甚甘之,已 維 華 性 **懒邪** 漸 ,與崔呈秀爲忠賢謀主。 厭 及 得 疾,體腫,忠賢頗以咎維華。 所親爲近侍, 宮禁事皆預 維華甚懼, 而 知,因進仙 慮 有後 患, 方靈露飲。 欲先自貳

七八六三

宗崩、忠賢敗 於忠賢, 乃力 ///維 辭 寧、錦恩命,讓功袁崇煥,乞以己廕授之。 華與楊維垣等彌縫 百方。 其年十月,以兵部尚書協理 忠賢覺其意,降旨頗 戎 政 厲。 無何,熹

渠二百餘里,引黃河水通漕,冀敍功復職。 維華戍徐州 及,有賚 擊楊、左者,維華也。 邊自固。 ,維華意乃沮。 崇禎 必 改元 帝已可之,給事中顏繼祖極論其罪,言:「維華狡人也,璫熾則借璫,璫敗則攻璫。 加,即 ,氣勢猶盛。 ,附璫者多罷去,維華自如。 維華亦難以自解。」乃寢前命。 九年,邊事急,都御史唐世濟薦維華邊才,至,下獄遣戍。維華遂憂憤死 楊、左逮,而陽爲救者,亦維華也。以一給事中,三年躐至尙 七年,駱馬湖淤,維華言於治河尚書劉榮嗣,請自宿遷抵徐州, 樂嗣然其計,費金錢五十餘萬,工不成,下獄論 遼東督師王之臣免,代者袁崇煥未至,維華謀行 頃之,言者踵至,維華乃引退。 逆案旣定, 書,無敍不

等忠, 徐卿伯、陸澄源,名不麗逆案,而爲淸議所抑者,亦賜卹有差 官 贈廕祭葬不予諡者, 不 賜 福 追賜卹典。 |時,楊維垣翻逆案,爲維華等訟冤,章下吏部。 ) 王紹徽 贈廕祭葬諡 、徐兆魁、喬 徐大化、范濟世二人。 全者,維華及劉廷元、呂純如、楊所修、徐紹吉、徐景濂六人。 應甲三人。 贈官祭葬者,徐揚先、劉廷宣、岳駿聲三人。 他若王德完、黃克纘、王永光、章光岳、徐鼎臣、 尚書張捷重述三朝舊事,力稱維華 復

徐 大化,會稽 人,家京師。 由庶吉士改御史,以京察貶官,再起再貶, 至工部主 孫

魏廣 鎬 請速誅,與朝瑞相訐,尚書王紀劾罷之。 發,逐勒閒 丕揚 史,歷工部 左僉都 破 例 熊廷弼 御史張 微微 起之。 典 (京察 御史楊遵等之下獄也,大化獻策於忠賢曰:「彼但坐移宮罪,則無贓可指。 比,助忠賢爲虐。 住。 賄, 左、右侍郎。 新詔抉其閨房之隱,大化頗愧沮。 ,坐不謹落職。 天啓初, 則封疆事重,殺之有名。」忠賢大悅,從之,由是諸人皆不免。 後入逆案,戍死 屢遷刑部員外郎, 皇極殿成,加尙書,貪恣無忌,忠賢亦厭之。 疏薦邵輔忠、姚宗文、陸卿榮、郭鞏等十三人,即召用。 故 事,大計 斥退官無復 結魏忠賢、 尋復罹察典,削職。 已,承要人指,力詆熊廷弼。 起者。 劉朝, 萬 爲之謀主。 曆末、羣邪 四年冬,中旨起大理丞,益 七年四月那移金錢 給事 用 事,文選 中周朝瑞 及 尋進左副都御 廷 俄遷少卿 一碗入 若坐納楊 郎陸 劾 、關,又 其奸 卿 與

敗,改 或 間、眞定,呼忠 垣 中 ,不爲忠賢 , 李蕃 事 皆爲 馮銓,銓寵 日照 魏 所喜,蕃希指 忠 貿 人。 賢 九 心腹。 千 衰, 與李魯生皆萬曆四十一年進 歲。 叉 改 孫承宗請入朝,蕃以王敦 劾去之。 加太僕卿,視御史事。 事崔呈秀, 同官排擊忠良,多其 時 號 兩 人為 士。 忠賢敗,被劾罷 四姓 ` 李懷 蕃由廬江知縣入爲御史,魯生亦方居 代 奴。 光爲比,承宗逐還鎭。 草。 出 督畿輔學政, 始 與魯生 諂 事 建祠天津 魏 廣微 朱國 质 禎 微 當

列

傳

第

卑污. 事呂下 大鋮 帝 遷 憂。魯生獨上言:「執中者帝,用中者王,旨不從中出而誰出?」舉朝大駭。 老乎年。 老成幹濟者。 即位 左給 始罷去。 、陳爾翼、張素養、李嵩、張捷輩十一人,悉其私黨。 奸險,常參密謀。 問治徽州吳養春獄,株累者數百家,知府石萬程不能堪,棄官去。 事 魯生 幹乃稱濟,而卽有濟於國。」銓果柄用。時有「十孩兒」之號,魯生其一也。嘗薦阮 中,典試湖廣,發策詬楊漣,因歷詆屈原、宋玉等。 **霑化人,知邢臺、邯鄲、儀封、祥符四縣。** 御史汪應元再劾之,乃削籍。 知 馮銓資淺,年未及四十,魯生、蕃欲令入閣。 魯生遂上言:「成卽爲老,而非必 禍及,疏請免連等追贓。 周起元劾朱童蒙,魯生希忠賢指,攻罷起元。 給事中汪始亨、顏繼祖,「尽」御史張三謨交章發其 擢兵科給事中,由座主廣微通於忠賢, 疏詆家居大學士韓爌,削其籍。 冒寧、錦功,進太僕少卿。 時中旨頻出,朝端以爲 魯生反劾罷萬程 內閣缺人,詔 莊烈 主

託,時 僕 鄒毓祚劾罷 少卿孫之益、太常少卿莊欽鄰,皆不附忠賢者也。 又有李恒茂者,邢臺 人爲之語曰:「官要起,問三李。」後忽與呈秀交惡,削 逆案旣定,魯生遣戍,蕃、恒茂贖徒爲民。 人。 爲禮科給事中,薦呈秀復官,與深相得。 恒茂、魯生 籍歸。 、蕃日走吏、兵二部,交通 忠賢敗,起故官,爲御史 劾罷: 侍郎扶克儉、太

閻 鳴泰,清苑人。萬曆中進士。除戶部主事,屢遷遼東參政,拾遺被劾罷歸。久之,起

**僉事,分巡遼海。 開原旣失,經略熊廷弼遣撫瀋陽,半道慟哭而返。** 尋託疾謝歸

史,巡撫遼東。 部右侍郎。 有所爲。明年五月復移疾去,家居三年。魏忠賢竊柄,鳴泰潛結之,用御史智疑薦,召爲兵 工諂佞,以虛詞罔上而已。其年八月,廷推鳴泰遼東經略,會承宗自請督師,乃擢右僉都御 天啓二年起故官,監軍山海關。旋進副使,受知孫承宗,屢疏推薦,而 自王化貞棄地後,巡撫罷不設。至是承宗以重臣當關,事權獨操,鳴泰不能 鳴泰實無才略,

後麗逆案,遣戍死。 代崔呈秀爲兵部尙書。 進太子太傅。尋召還,協理戎政。敍錦州功,加少保。 代之。未幾,代王之臣總督薊、遼、保定軍務。寧遠敍功,進本部尚書。 祠,多至七所。 六年正月,寧遠告警,畿輔震驚。內閣顧秉謙等以順天巡撫吳中偉非禦侮才,薦鳴泰 其頌忠賢,有「民心依歸,卽天心向順」語,聞者咋舌。 鳴泰由忠賢再起,專事諂諛。 三殿成,加少師兼太子太師。 每陳邊事,必頌功德,於薊、遼建生 崇禎初,爲言者劾罷。 以繕修山海關城, 熹宗崩,

督學政 巡按王珙建之虎丘。 萊巡撫李嵩 韶賜名「普德」。自是,諸方效尤,幾遍天下。 其年十月,孝陵衞指揮李之才建之南京。 監 巡撫朱童蒙建之延綏,巡視五城御史黃憲卿、王大年、汪若極、張樞、智鋌等建之順天,戶部 前 丫髻山 同巡撫王點、巡按素養及建之大同。 正月,宣大總督張樸、宣府巡撫秦士文、宜大巡按張素養建之宣府、大同,應天巡撫毛一鷺、 巡鹽龔萃肅、淮揚巡鹽許其孝、應天巡按宋禛漢、陝西巡按莊謙,各建之所部。 書郭尚 主 工部郎中曾國禎建之盧溝橋。 |事張化愚建之崇文門,武清侯李誠銘建之藥王廟, 保定侯梁世勳建之五軍營大教場,登 ,<br />
宣大總督樸、山西巡撫曹爾禎、巡按劉弘光又建之五臺山,<br />
庶吉士李若琳建之蕃育署, 丞 張 洞 永祚 李蕃 友 ,又建之昌平、通州,太僕寺卿何宗聖建之房山。 之建,始於潘汝禛。〔日〕汝禛巡撫浙江,徇機戶請,建祠西湖。 建之淮安。 、山東巡撫李精白建之蓬萊閣、寧海院,督餉尙書黃運泰、保定巡撫張鳳翼、提 建之良牧、嘉蔬、林衡三署,博平侯郭振明等建之都督府 、順天巡按文煥建之河間、天津,河南巡撫郭增光、巡按鮑奇謨建之開封,上林 二月,鳴泰與順天巡撫劉韶、巡按倪文煥建之景忠山,宣大總督樸、大 是月,順天巡按盧承欽 五月,通政司經歷孫如冽、順天府尹李春茂建之宣武門外, 三月,鳴泰與詔、文煥,巡按御史梁夢環建之西協密雲 、山東巡按黃憲卿、順天巡按卓邁, 四月,鳴泰與巡撫袁崇煥又建之寧 、錦衣衛。六月,總漕尚 六年六月疏聞 八月, 七月, 於朝 總河 長蘆

李從 晏,巡按謙、袁鯨建之固原太白山。 陽 撫治 心、總漕尚友、山東巡撫精白、巡按黃憲卿、巡漕何可及建之濟寧,湖廣巡撫姚宗文、鄖 梁應澤、湖廣 巡按溫皐謨建之武昌、承天、均 楚王華奎建之高觀山 州 ò 三邊總督史永安,陝西巡撫胡廷 山西巡撫牟志夔,巡按李燦然

弘光

建之河東

州,金像用冕旒 間 起立乎」忠賢聞, 首而已。 毁民舍二千餘間,創宮殿九楹,儀如帝者。 ,祠宇相望。 毎 一祠之費,多者數十萬,少者數萬,剝民財,侵公帑,伐樹木無筭。 鏘與魏良卿善, 有建之內城東街者,工部郎中葉憲祖竊歎曰:「此天子幸辟雍道也, 即削其籍。 祠成, 熹宗已崩, 上林一苑,至建四祠。 參政周鏘、祥符知縣季寓庸恣爲之,巡撫增光 猶抵書良卿,爲忠賢設滲金像。 童蒙建祠延綏,用琉璃瓦。 開封之建祠也,至 而都城數十里 | 韶建祠薊 土偶能 俛

釋 請 應。 事 縗 賴 以 多吉, 遊 九千 運泰 凡 擎 疏詞揄揚, 歲 迎忠賢像,五拜三稽首,率文武將吏列班階下,拜稽首 相率 人守祠 扶植 往 拜。 稽首 ,後建祠 如頌聖,稱以「堯天帝德,至聖至神」。而閣臣輒以駢語 監生 謝。 者必守。 陸萬齡至謂:「孔子作春秋, 某月荷 九千 其孝等方 歲拔擢, 建 祠 又稽首謝。 揚州, 忠賢作要典。 將 上 還就 梁, 如初 班,復稽首 而 熹宗哀 孔子誅少正卯,忠賢 已, 詣像前, 褒答, 詔 如 至,旣 初 中 禮 祝 外若響 哭臨 運泰 稱某

列

傳

第

程 **賢覺其意,具疏僞辭,帝輒報允。** 誅 銘 東  $\equiv$ 輩,以藩 賢祠,益其地,鬻澹臺滅明祠, 林 宜 王之尊,戚畹之貴, 建 祠 國 學西, 與先 〈聖並尊。」 司業朱之俊輒爲舉行,會熹宗崩 亦獻諂 無何,忠賢誅,諸祠悉廢, 曳其像碎 希恩,祝釐 之。 恐後。 此 **疏至**, 最 凡 熹宗已崩, 莊烈 後,巡撫楊 建祠者概入逆案 邦 憲 · 乃 止。 帝且 建祠 云。 閱 南昌 而華奎、誠 且 笑。 毁 周 忠

投井。 當體 **燃富** 先皇 謂:「宸宮未定,先帝之社稷爲重,則平日 駁之,繼春 以違忤先皇, 聖主 三彌留. 賈繼 恐釀今日之疑端,流爲他年之實事。」帝於是宣敕數百言, 時頗 如 面 春,新鄉 再揭,謂「選侍雉經,皇八 天之度。 以選侍 逼迫,然故無恙也。 逼逐庶 人。 諭諸臣,而 臣所以請移宮者如此。 母,通國痛 萬曆三十八年進士。 玉體未寒,愛妾莫保。 心。 繼 春聽流言,上書內閣方從 、妹入 昔孝宗不問昭德,先皇優遇鄭妃, 之龍 并」,至稱選侍爲未亡人。 歷知臨汾、任丘二縣, 而蜚語謂選侍踉蹌徒跣,屢欲 愛爲輕。 忝爲臣子,夫獨何 及宸居已安,旣盡 哲等, 極言選侍無狀,嚴責廷臣 入爲御史。 略言: 楊漣乃上移宮始末疏, 何不 心。」給事 | 臣子防危之忠,即 新 自裁、皇妹失所 輔 君御 李選侍移喊 上取 中 極 周朝瑞 法? 了,首導 且.

黨庇。

列傳第一百九十四 閱黨

繼春 帝嚴旨窮詰,令再陳。 之,乃停愼言、弘圖、大年俸,宥志道等。 議。 永錮,時天啓元年四月也。 建、劉廷宣,給事中王志道、倪思輝等交章論教,給事、御史復合詞爲請,諸閣臣又於講筵救 王安激帝怒,嚴旨切責,令陳狀。 誤 尙 時繼春出按江西,便道旋里,馳疏自明上書之故,中有「威福大權,莫聽中涓旁落」語。 聽 .'書周嘉謨等言:「臣等意陛下篤念聖母,不能忘選侍。 風聞,愼言等又連疏瀆奏。 嘉謨等復力教,帝不許。 其後言者屢請召還,帝皆不納 於是御史張愼言、高弘圖 然意本無他,罪當宥。」未報。 既而繼春回奏,詞甚哀, 繼春益箸,惶恐引罪,言得之風聞。 連章爲求寬。 及誦 且隱「雉經、入井」二語。 敕諭,知聖心自體恤 御史王大年、張捷、周宗 帝益怒,下廷臣雜 乃除名 丽

世知 忠賢大喜 必 無先皇,罪不容死。 殛。 ,朝廷之罪<u>漣</u>等以不道無人臣禮也。」疏娓娓數百言,且請用楊所修言,亟修三朝要典, 四年冬,魏忠賢旣逐楊漣等,卽以中旨召復官。至則重述移宮事,極言:「漣與左光斗目 而止坐納賄結黨,則漣等當死之罪未大暴天下。 且漣因傅樾發汪文言事,知禍及,故上劾內疏,先發制人,天地祖宗所 宜速定爱書布中外,昭史册, 使後

副都御史李夔龍,羣小始自貮。 莊 烈帝卽位,繼春方督學南畿,知忠賢必敗,馳疏劾崔呈秀及尚書田吉、順天巡撫單明 旋由太常少卿進左僉都御史,與霍維華輩力扼正人。

籍。

七八七二

崇禎 改元 五月, 給 事 ,中劉斯球極言其反覆善幻,乃自引歸。 已, 楊漣子之易疏訐之, 韶削

己意。還朝 初,繼春以移宮事詆|漣結|王安圖封拜,後見公議直|漣,畏|漣嚮用,俛首乞和, 則極詆 漣。 及忠賢殛,又極譽高 弘圖 之救連,且薦韓爌 、倪元璐,以求容於淸議。 聲言疏非

小人。」遂引交結近侍律,坐徒三年,自恨死。

掌錦 羅織 可勝紀。 帝定逆案,繼春 不納 、孫雲鶴有「五彪」之號。 [<] 累加至少師兼太子太師, 廕錦衣世職者數人, 歲時賞賚不 衣衞事。 平人,鍛鍊嚴酷,入獄者率不得出。 田 朝 爾耕,任丘人,兵部尚書樂孫也。 顯純等加官亦如之。忠賢敗,言者交劾,下吏論死。崇禎元年六月與顯純並伏誅。 士輻輳其門。 狡黠陰賊,與魏 不列名,帝問故。 魏廣微亦與締姻,時有「大兒田爾耕」之謠。 良卿 閣臣言繼春 爲莫逆交。 宵人希進者,多緣以達於忠賢,良卿復左右之,言 用祖廕,積官至左都督。 雖 魏忠賢斥逐東林,數興大獄 反覆,持論亦可取。 天啓四年十月代駱思恭 帝曰:「惟反覆,故爲眞 又與許顯純、崔應元、 爾耕 廣 布偵卒,

顯純

,定興人,駙馬都尉從誠孫也。

舉武會試,擢錦衣衞都指揮僉事。

天啓四年,劉僑

皆顯純自爲之。 毒刑鍛錬,楊漣、左光斗、周順昌、黃尊素、王之宗、夏之令等十餘人,皆死其手。 掌鎭撫司,治汪文言獄,失忠賢指,得罪,以顯純代之。 每讞鞫,忠賢必遣人坐其後,謂之聽記,其人偶不至,卽袖手不敢問。 顯純略曉文墨,性殘酷,大獄 諸 人供狀, 頻興,

理刑官。 田爾耕 應元,大興人。 心腹。 寰,吳縣人。 及顯純論死,法司止當應元、雲鶴、寰戍。 市井無賴,充校尉,冒緝捕功,積官至錦衣指揮。 隸籍錦衣,爲東司理刑。 凡顯純殺人事,皆應元等共爲之。 後定逆案,三人並論死,寰先死 雲鶴 ,霸州 人,為東廠 而 寰爲

### 校勘記

戍所。

使羣盜糜之 糜,原作「麋」,據明史稿傳一八一焦芳傳改。

**瑾從孫二漢當死** 從孫、原作「從子」。 按本書卷三〇四劉瑾傳作「從孫」, 武宗實錄卷六六正

德五年八月戊申條作「侄孫」,據改。

宗實錄卷五七天啓五年八月己亥條改。 五年八月許之去 五年八月,原作「六年九月」,據本書卷二二熹宗紀、卷一一 ○宰輔年表及熹

23 林枝橋 原作「林梓橋」, 據熹宗實錄卷五六天啓五年七月壬戌條、 明進士題名碑錄萬曆丙辰

列

傳

第

百 九

+

四

校

勘記

科改。

P E U 尚書王紹徽郭允厚 郭允厚,原作「郭允寬」,據本書卷一一二七卿年表、熹宗實錄卷七八天啓

七年四月丁未條、國權卷九〇頁五四七四改。

ハベン

顏繼祖

[47 始於潘汝禎 潘汝禎,熹宗實錄卷六八天啓六年閏六月辛丑條同。本書卷二二熹宗紀、

原作「顧繼祖」,據本書卷二四八顏繼祖傳、國権卷八九頁五四二五改。

卷八七頁五三三〇都作「潘汝楨」,下同。

又與許顯純崔應元楊寰孫雲鶴有五彪之號 文臣崔呈秀等號「五虎」,武臣田爾耕等號「五彪」,據改。 五彪,原作「五虎」,按本書卷三〇五魏忠賢傳載:

## 明史卷三百七

# 列傳第一百九十五

#### 佞倖

目。 入繼大統,宜嬌前軌,乃任陸炳於從龍,龍郭勛於議禮,而一時方士如陶仲文、邵元節、藍道 錦衣幸,臧賢以伶人幸,江彬、許泰以邊將幸,馬昂以女弟幸。 任,萬安、尹直、彭華等至因之以得高位。」武宗日事般遊,不恤國事,一時宵人並起,錢寧以 見親信。至其後,廠衞遂相表裏,淸流之禍酷焉。憲宗之世,李孜省、僧繼曉以祈禱被寵 衣衞,典親軍,暱居肘腋。成祖卽位,知人不附己,欲以威讋天下,特任紀綱爲錦衣,寄耳 千古,未聞以武夫、健兒、貪人、酷吏、方技、雜流任親暱,承寵渥於不衰者也。明興,創設錦 綱刺廷臣陰事,以希上指,帝以爲忠,被殘殺者不可勝數。英宗時,門達、遂杲之徒,並 漢史所載佞倖,如籍孺、閎孺、鄧通、韓嫣、李延年、董賢、張放之屬,皆以宦寺弄臣貽譏 禍流中外,宗社幾墟。 世宗

第一百九十五 佞倖

列傳

行之輩 從 顯,乃以秘術干榮,爲世戮笑。 已爲可 風。 一,紛 信,而孰知其害之至於此 雖以成祖、世宗之英武聰察,而嬖倖 然並 進,玉 杯 牛帛,詐妄滋 此亦佞倖之尤者,附之篇末,用以示戒云。 也。 興。 至顧可學、盛端明、朱隆禧之屬, 凡此 醸 亂, 諸人,口銜 幾與昏庸失道之主同其蒙蔽。 天憲,威福 在 皆起家甲科, 手,天 下士大夫靡 彼 第 致位通 以 然 親

紀 綱 門達 逯杲 李孜省 繼曉 江 杉 許泰 錢寧 陸炳

邵元節 陶仲文 顧可學 盛端明等

軍 便 辟詭黠, 司 紀綱 詔 獄 臨邑人,爲諸生。 善鈎 人意嚮。 王大愛幸,授忠義衞千戶。 燕王起兵過其縣, 綱叩馬請自效。 旣卽帝位,擢錦衣衞指揮使, 王與語, 說之。 綱善騎射, 令典親

下 揮莊敬、袁江,千戶王謙、李春等爲羽翼,誣逮浙江按察使周新,致之死。帝所怒內侍及武臣 陰 ·網論死,輒將至家,洗沐好飲食之,陽爲言,見上必請赦若罪,誘取金帛且盡,忽刑於市 事。 數使家人僞爲詔,下諸方鹽場,勒鹽四百餘萬。 都御史陳瑛滅建文朝忠臣數十族,親屬被戮者數萬人。綱覘帝旨,廣布校尉,日摘臣民 帝悉下綱治,深文誣詆。帝以爲忠,親之若肺腑。擢都指揮僉事,仍掌錦衣。 還復稱韶,奪官船二十、牛車四百輛 綱用指

進黃 待年 度 失帖木不避道,誣以冒賞事,捶殺之。腐良家子數百人,充左右。 僭乘輿。 放晉王、吳王,乾沒金寶無算**。** 載入私第,弗予直。 因挾綱勢,什五而中分之。 、金及龍角、龍文被、奇寶異錦,願得爲門下,歲時供奉。 ,綱私納其尤者。 欲買一女道士爲妾,都督薛祿先得之,遇祿大內,過其首,腦裂幾死。 **搆陷大賈數十百家,罄其資乃已。** 吳中故大豪沈萬三,洪武時籍沒,所漏貲尙富。 得王冠服服之,高坐置酒, 詐取交阯使珍奇。 命優童奏樂奉觴,呼萬 綱乃令文度求索吳中好女。 韶選妃嬪, 試可, 其子文度 蒲伏見綱, 奪吏民田宅。 **患都指** 歲, 令暫出 器 揮啞 籍 物

無少長皆戍邊,列罪狀頒示天下。 七月,內侍讐綱者發其罪,命給事、御史廷劾,下都察院按治,具有狀。 折柳鼓躁,以覘衆意。」暎如其言,無敢糾者。 綱 又多蓄亡命,造刀甲弓弩萬計。 其黨儆、江、謙、屠、暎等,誅譴有差。 端午,帝射柳,綱屬鎭撫龐瑛曰:「我故射不中,若 即日磔綱於市,家屬 十四年

**久之,遷指** 門達, 揮僉 豐潤人。 事, 坐累解職。 襲父職爲錦衣衛 景泰七年復故官,佐理衛事氣鎭撫 百戶。 性機警沉鷙。 正統末,進千戶,理鎮 理刑。 天順改元,與「奪 撫 司 刑。

列

傅

第

恕,達: 黨比,欲知 功 倍 う進指 信之。 外事,倚錦衣官校爲耳目,由是逯杲得大幸,達反爲之 揮 同 重獄 知 多平反, 旋進指揮使,專任 有罪者以下禁獄爲幸, 理刑。 千戶謝通者,浙江人也,佐達理司 朝 士翕然稱達賢。 用 然是時英宗慮廷臣 事 丁用法

杲乃摭 果劾奏、還其田於官。 錦 臣等俱特恩,非以序故。 子彪有罪下 授本衞 坐,杲進指揮同 衣 百戶楊瑛,指爲張永親屬, 逯杲者,安平人也,以錦衣衞校尉爲達及指揮劉敬腹 百戶。 羣臣細故 獄,命杲赴大同械其黨都指揮朱諒等七十六人。 以捕 知。 以稱 妖賊功, 明 帝旨。 年復奏序怨望,懷不軌,亭下獄死。 懋等皆服罪,乃已。 帝優韶留任,以果發亨奸,益加倚 進副千戶。 英國公張懋、 又執千戶劉勤於朝,奏其訕 叉 用曹吉祥薦,擢指揮僉事。 太平侯張瑾、外戚會昌侯孫繼宗兄弟並 石亨恃寵不法,帝 心,從「奪門」。 重 有韶 |果 |因 上 漸惡之,杲卽伺其陰事。 盡革 兩 發彪弟慶他罪,連及者皆 人並 帝以杲强鷙,委任之, 「奪門」功,達、杲言 帝大治奸黨、杲縛 坐誅。 用 侵官田, 楊善薦, 亨從

杲 四 親 方奸民詐稱校尉,乘傳縱橫,無所忌。 劾奏,幾得重罪。 藩 杲 王亦 益發舒,勢出達上。 然。 無賄者輒執送達,鍛錬成獄。天下朝覲官大半被譴,逮一人,數大家立破。 果所遣校尉誣寧府弋陽王奠壏母子亂,帝遣官往勘,事已白,靖王奠 白遣校尉偵事四方,文武大吏、富家高門多進伎樂貨賄 彭城伯張瑾以葬妻稱疾不朝,而與諸公侯飲私第。 以耐强,

|培等亦言無左驗。[1] 帝怒責杲, 杲執如初, 帝竟賜奠壏母子死。 **|亨報讐。」|杲以聞,下錦衣獄,達坐斌謀反。帝兩命廷臣會訊,畏杲不敢平反。|斌兄弟置極** 覆讞,石亨囑宥薄斌罪。至是,校尉言:「斌素藏妖書,謂其弟健當有大位,欲陰結外番爲石 水數尺,人咸以爲冤。 指揮使李斌嘗搆殺弘農衛千戶陳安,爲安家所訴, 方异尸出,大雷 下巡按御史邢宥 雨,平地

月,飲反,入杲第斬之,取其首以去。事平,贈杲指揮使,給其子指揮僉事俸。 「果本由石亨、曹吉祥進、計亭致死,復奏吉祥及其從子欽陰事、吉祥、欽大恨。 五年七

刑,坐死者二十八人。

所爲,益布旗校於四方。告訐者日盛,中外重足立,帝益以爲能。 及得志恣甚。達怒,力逐之。杲旋復官,欲傾達,達惴惴不敢縱。杲死,達勢遂張。欲踵杲 時達已掌衞事,仍兼理刑。尽被殺,達以守衞功,進都指揮僉事。初,果給事達左右,

謫官。 鼓,有軍士妻愬冤,會齋戒不爲奏。 犯贓罪,給事中趙忠等報不以實。 盗竊戶部山西司庫金,巡城御史徐茂劾郎中趙昌、主事王珪、徐源疏縱。達治其事,皆下獄 外戚都指揮孫紹宗及軍士六十七人冒討曹欽功,達發其事。 達以囚多,獄舍少,不能容,請城西武邑庫隙地增置之,報可。 達劾其徇私,亦下獄謫官。給事中程萬里等五 達劾諸人蒙蔽,詔下達治。已,劾南京戶部侍郎馬諒, 紹宗被責讓,餘悉下獄。 御史樊英、主事鄭瑛 人直登聞

列

治,蕃 告蕃 湖廣 裁耳。」達以爲 問,卒不罪雲。 瑛,陝西僉事 吳中以下及先後巡按御史吳琬等四人下獄,臣等停俸,琬等謫縣丞。御史李蕃按宣府 左 員外郎 都 衣黃衣 擅撻 諸生馬雲罪黜,詐稱錦衣鎭 御史石璞,掌前府忻城伯趙榮,都督同知范雄、張斌老瞶,皆罷去。 、琪並荷校死。 貝鈿 |軍職,用軍容迎送。 御史楊璡按遼東,韓琪按山西,校尉言其妄作威福。 閱兵。帝怒,命達遣官覈,籍其貲,戮永昌,榜示天下。 `,給事 李觀,四川巡按田斌,雲南巡按張祚 然,故· 達初 中 改行督責之術,其同 文 黄甄,皆爲校尉所發下獄。 陝西督儲參政婁良,湖廣參議李孟芳,陝西 更禍 尤酷 撫,奉命葬親,布政 列呂貴曰:「武臣不易犯, | 瑛守官無玷,不勝憤,自縊死,其他 ,清軍御史程萬鍾及刑部郎 使孫毓等八 人咸賻祭。 **幷逮布政使侯臣、按察使** 按察使錢博,福建僉事包 曹欽 裕州民奏知州秦永 可 鑒也。 事 中馮維 覺,法 獨文吏易 多遺戍 皆下達 孫瓊, 司請逮 或

罪,下 達,韶幷下達治。 私 獄 論 第,索內官督工 都 詔 贖 指揮袁彬恃帝舊恩,不爲達下。 徒還 獄 達坐安 職 者 有趙安者,初爲錦衣 當是時,達害大學士李賢寵,又數規己, 甎 改補府軍由 瓦,奪人子女爲妾諸罪名。 杉請託 力士役 故,乃復 達深銜之, 於彬,後謫 捕 軍匠 彬 廉知彬妾父千戶王欽誆 ,搒掠, 誣彬 楊塤 戍鐵嶺衞, 嘗譖於帝,言賢受陸瑜金,酬以 不平,擊登聞 受石亭、曹欽 赦還 鼓爲彬 改府 人財,奏請下彬 賄 軍 訟冤,語侵 用官木為 前 衞 有

尙 數達納賄狀,法司畏達不敢聞,坐彬絞輸贖,塤斬。帝命彬贖畢調南京錦衣,而禁錮塤 大喜,立奏聞,請法司會鞫塤午門外。帝遣中官裴當監視。 可辱。」乃止。 書。 帝疑之,不下詔者半載。至是,拷掠塤,敎以引賢,塤卽謬曰:「此李學士導我也。」達 及訊,熉曰:「吾小人,何由見李學士,此門錦衣教我。」達色沮 達欲執賢幷訊,當曰:「大臣不 不能言,彬亦歷

同謀殺 降調有差。 州 都勻衞帶俸差操。 明年,帝疾篤,達知東宮局丞王編必柄用,預爲結納。 人,罪如之。子序班升、從子千戶淸、壻指揮楊觀及其黨都指揮牛循等九人,謫戍、 後當審錄,命貸達,發廣西南丹衞充軍,死。 甫行,言官交章論其罪。 命逮治,論斬繫獄,沒其貲鉅萬。 無何,憲宗嗣位,綸敗,達坐調貴 指揮張山

雷 法,厚結中官梁芳、錢義,以符籙進。 李孜省,南昌人。以布政司吏待選京職,贓事發,匿不歸。時憲宗好方術,孜省乃學五

改上 爲奸,漸于 一林苑 成化十五年,特旨授太常丞。 監丞。 預政事。 日寵幸,賜金冠、法劍及印章二,許密封奏請。 十七年,擢右通政,寄俸本司,仍掌監事。 御史楊守隨、給事中李俊等劾孜省贓吏,不宜典祭祀,乃 同官王泉輕之,不加禮。政 益獻 淫邪方術,與芳等表裏

列

傳

第

百

九

+

Ŧ.

佞俸

省譖泉,左遷太僕少卿。 故事、寄俸官不得預郊壇分獻、帝特以命改省。廷臣懲恳事、無敢

**孜省**寵固未嘗替也。 史張稷等交劾之。乃貶二秩,爲本司左參議,他貶黜者又十二人。蓋特借以塞中外之望, **曉輩,皆尊顯,與孜省相倚爲奸,然權寵皆出孜省下。居二年,進左通政。** 至百十人,時謂之傳奉官,文武、僧道濫恩澤者數千。 初,帝踐位甫踰月,卽命中官傳旨,用工人爲文思院副使。 自後相繼不絕,一傳旨姓名 頃之,復遷左通政。 鄧常恩、趙玉芝、凌中、顧玒及奸僧繼 給事中王瑞、御

斥罷,中外大說。,孜省緣是恨廷臣甚,搆逐主事張吉、員外郞彭綱,而益以左道持帝意。 帝頗感悟,貶孜省上林監丞,令吏部錄冗濫者名凡五百餘人。帝爲留六十七人,餘皆 二十一年正月,星變求言。九卿大臣、給事御史皆極論傳奉官之弊,首及孜省、 常恩

尚書李裕、禮部侍郎謝一夔,皆因之以進。 術言江西 而附麗之。 御史余子俊、李敏諸名臣,悉密封推薦。 其年十月,再復左通政,益作威福。 人赤心報國,於是致仕副都御史劉敷、禮部郎中黃景、南京兵部侍郎尹直、工部 通政邊鏞爲僉都御史,李和爲南京戶部侍郎,皆其力也。 **搢紳進退,多出其口,執政大臣萬安、劉吉** 搆罪吏部尚書尹旻及其子侍講龍。(三) 間採時望,若學士楊守陳、倪岳,少詹事劉健,都 所排擠江西巡撫閔 又假扶鸞 、彭華從

珪、洗馬羅璟、兵部尚書馬文升、順天府丞楊守隨,皆被譴,朝野側目。

司事 吏部奏通政使缺,即以命孜省,而右通政陳政以下五 ,通政故未嘗缺使也。 已,復擢禮部右侍郎,掌通政 人, 遞進一官。 如故。 時張文質方以尚

常恩 ,臨江人,因中官陳喜進。 玉芝,番禺人,因中官高諒進。 並以曉方術,累擢太常

卿。玉芝丁母憂,特賜祭葬,大治塋域,制度踰等。

放省以星變貶,常恩亦貶本寺丞,而玉芝、玒、中並如故。 經、綸,亦官太常少卿。 載 無給誥賜祭者、憲宗特予之。吏部尚書尹是因請幷贈其父。 有李文昌者,試術不效,杖五十,斥還。 五、中不知何許人。
五以扶鸞術、累官太常少卿、喪母賜祭、且給贈誥。 中以善書供事文華殿,不數年爲太常卿。 岳州通判沈政以繪事夤緣至太常少卿,請斂天 孜省復通政,常恩亦復太常卿 未幾,進本寺卿。 踰月,以諫官言,降寺丞。 故事,四品未 其二子

下貨財充內府。帝怒,下獄,杖謫廣西慶遠通判。 人頗以爲快。

召見, 尙 郎、通政、太常、太僕、尙寶者,不可悉數 寶 少卿 然羣 因自陳乞復給事 奸 日 日 中外蟠結,士大夫附者日益多。 與市井工技伍 中, 士論以 ,趨走闕廷。 爲羞。 兵科左給事中張善吉謫官,因秘術干中官高英,得 大學士萬安亦獻房中術以固寵。 進士郭宗由刑部主事, 以篆刻爲中人所引, 而諸雜 流加侍 擢

死,仍戍邊。 孜省不勝搒掠,瘐死。 叉 以中官蔣琮言,「三逮孜省、常恩、玉芝等下詔獄,坐交結近侍律斬,妻子流二千里。 韶免 憲宗崩 了,孝宗嗣位,始用科道言,盡汰傳奉官,謫孜省、常恩、玉芝、 玒、中、經戍邊衞。

鄓 道,帝悉從之。 敎 林俊請斬芳、繼曉以謝天下,四幾得重譴。 廣 金善國 繼 曉,江夏僧也。 師 日 誘帝爲佛事,建大永昌寺於西市,逼徙民居數百家,費國帑數十萬。 憲宗時,以秘術因梁芳進,授僧錄司左覺義。 繼曉虞禍及,乞歸養母,幷乞空名度牒五百 進右善世,命爲通元 員 外 翊

實巴爲 參、端竹也失皆爲國師,錫誥命。 翊 錦衣玉食幾千人。 圓 明能仁感應顯國光教弘妙大悟法王西天至善金剛普濟大智慧佛, 正 帝初卽 覺大濟法王西天圓 法王,班卓兒藏卜爲國師,又封領占竹爲萬行淸脩眞 位,即以道士孫道玉爲眞人。 取荒塚頂骨爲數珠, 智大慈悲佛,又封西天佛子劄失藏卜、劄失堅參、乳奴班丹、鎖南 服食器用,僭擬王者。 髑髏爲法盌。 其後西番僧劄巴堅參封萬行莊嚴功德最 給事中魏元等切諫, 出入乘椶輿,衞卒執金吾仗前導, 如 自在廣善普慧弘度妙 其徒劄實巴、 不納。 尋進劄 鎖南堅 、勝智慧 應掌教

人、高 堅參、法領占五人爲法王,其他授西天佛子、大國師、國師、禪師者不可勝計。 所奏請立從。 士者, 亦盈都下。 成化二十一年,星變,言官極論其罪,始勒爲民,而諸番僧如故。 大國師以上金印,眞人玉冠、玉帶、玉珪、銀章。 機曉尤奸 羽流加號真 點竊權,

奪誥敕、印章、儀仗諸法物。 百二十三人,請俱貶黜。詔法王、佛子遞降國師、禪師、都綱,餘悉落職爲僧,遣還本土,追 止 留善世等九員,道錄司留正一等八員,餘皆廢黜。 華人爲禪師及善世、覺義諸僧官一百二十人,道士自眞人、高士及正一演法諸道官一 |孝宗初, 韶禮官議汰。禮官言諸寺法王至禪師四百三十七人, 刺麻諸僧七百八十九 眞人降左正一,高士降左演法,亦追奪印章及諸玉器。 而繼曉以科臣林廷玉言,逮治棄市 僧錄司

宣府。 以 被三矢,其一著面,鏃出於耳,拔之更戰。 曰:「彬健能 大同遊擊隸總兵官張俊赴調。 江彬,宣府人。 軍過京師,犒之,遂幷宣府守將許泰皆留不遣。 爾 耶 初爲蔚州衞指揮僉事。 過薊州,殺一家二十餘人,誣爲賊,得賞。 武宗聞而壯之。 正德六年,畿內賊起,京軍不能制,調邊兵。 彬因錢寧得召見。帝見其矢痕,呼 七年,賊漸平,遣邊兵還鎭 後與賊戰淮上, 大同、

列傅

第

百 九

十五

起。 進鋪 花氊幄百六十二間,制與離宮等,帝出行幸皆御之。 嘗與帝弈不遜,千戶周騏 彬 狡 點强很,貌魁碩有力,善騎射。 叱之。 彬陷騏搒死,左右皆畏彬。 談兵帝前,帝大說,擢都指揮僉事,出入豹房,同臥 |彬導帝微行,數至教坊司;

稱十不便,皆不聽。於是調遼東、宣府、大同、延綏四鎭軍入京師,號外四家,縱橫都市 皆寧黨,欲籍邊兵自固,因盛稱邊軍驍悍勝京軍 曰 每團練大內,間以角觝戲。 :「吾自足辦,安用爾。」然心德||桃而乐||寧。 寧 見彬驟進,意不平。一日,帝捕虎,召寧,寧縮不前。虎迫帝,彬趨撲乃解。帝戲 帝戎服臨之,與彬聯騎出,鎧甲相錯,幾不可 寧他日短彬,帝不應。彬知寧不相容,顧左右 ,請互調操練。言官交諫,大學士李東陽疏 辨。

臨閱, 統之。 召侍豹房,同賜姓爲義兒。 兵部尙書王瓊 賜彬 八年命許泰領敢勇營,彬領神威營。 名過錦。 帝自領羣閹善射者爲一營,號中軍。 、泰國姓。 得賜 諸營悉衣黃罩甲,泰、琮、周等冠遮陽帽,帽植天鵝翎,貴者三翎,次二翎 越二年,遷都督僉事。 翎,自喜甚 毁積慶、鳴玉二坊民居,造皇店酒肆,建義子府。 改太平倉爲鎭國府,處邊兵。 彬薦萬全都指揮李琮、陝西都指揮神周 **晨夕馳逐,甲光照宮苑,呼譟聲達** 建西官廳 四鎭 九 門。 軍,彬兄 勇略,並 於 奮 帝時 武 兼

|彬旣心忌寧,欲導帝巡幸遠寧。 因數言宣府樂工多美婦人,且可觀邊釁,瞬息馳千里,

之,忘歸,稱曰家裏。未幾,幸陽和。 府 稱軍門。 斬首十六級,官軍死數百人,以捷聞京師。帝自稱威武大將軍朱壽,又自稱鎭國公,所駐蹕 何鬱鬱居大內,爲廷臣所制。帝然之。十二年八月,急裝微服出幸昌平,至居庸關,爲御史 欽 所 |彬爲建鎭國府第,悉輦豹房珍玩、女御實其中。|彬從帝,數夜入人家,索婦女。 帝大樂 遮,乃還。 中外事無大小,白彬乃奏,或壅格至二三歲。廷臣前後切諫,悉置不省 數日,復夜出。先令太監谷大用代歐,止廷臣追諫者。 迤北五萬騎入寇,諸將王勛等力戰。至應州,寇引去。 因度居庸,幸宣

還,下詔 餘 封彬平廣伯,子三人,錦衣衞指揮,泰,安邊伯,琮、 周, 駐 知府毛思義忤彬,下獄謫官。 將葬,如昌平,祭告諸陵,遂幸黃花、密雲。|彬等掠良家女數十車,日載以隨,有死者。 大喜峯口,欲令朶顏三衞花當、 人,賞賜億萬 十三年正月還京,數念宣府。 |稱總督軍務威武大將軍總兵官朱壽統率六軍,而 計 典膳李恭疏請回鑾,指斥彬罪。未及上,彬逮恭死 把兒孫等納質宴勞, |彬復導帝往,因幸|大同。聞太皇太后崩,乃還京 俱都督。 御史劉 命彬 士元陳四不可, 爲威武 陞賞內外官九千五百五十 副將軍。 不報。 錄應州功, 詔 獄 發 帝旣 帝

頭關 彬 抵太原, 又導帝由大同渡黃 大徵女樂, 河,次楡林,至綏德,幸總 納晉府樂工楊騰妻劉氏以歸。 兵官戴欽第,納其女。 彬與諸近 幸皆母 事之, 還, 由 西安 稱日劉娘 

列

傳第

進其妾杜氏,遂傳陞艮都指揮,泉儀眞守備。 太平倉。給事、御史諫,不應。嘗幸昂第,召其妾。昂不聽,帝怒而起。昂復結太監張 |彬奪歸,進於帝,召入豹房,大寵。 傳陞|昂右都督,弟炅、<|泉並賜蟒衣,大璫皆呼爲舅,賜第 女,皆彬所導也 初,延綏 總兵官馬昂罷免,有女弟善歌,能騎射,解外國語,嫁指揮畢春,有娠矣。 昂喜過望,又進美女四人謝恩。 及是,納欽 昂因 忠

意沮,議得 可, 且極 涉險阻,冒風雪,從者多道病,帝無倦容。及還京,復欲南幸。 十四年正月自太原還至宣府,命彬提督十二團營。 言酣酒當戒,帝不省。廷臣百餘人伏闕諫,彬故激帝怒,悉下獄,多杖死者。 寢。 帝東西遊幸,歷數千里, 刑部主事汪金 一疏陳 乘馬腰弓 彬亦 九不

萬, 欲 十二月至 錦 導帝幸 止寧,令董皇店役,不得從。 衣官校辨 跋扈甚。 寧王 蘇州,下浙江 揚州,即民 事。 宸濠反,彬復贊帝親征,下令諫者處極刑。 成國公朱輔爲長跪,魏國公徐鵬舉及公卿大臣皆側足事之。惟參贊 是時,張銳治東廠,錢寧治錦衣,彬兼兩 居爲都督府,逼刷 一、抵湖、 湘。 八月發京師。 諸臣 處女、寡婦,導帝漁獵。 極諫, 彬在途,矯旨輒縛長吏,通判胡踪懼 會其黨亦勸沮,乃止。 命彬提督贊畫機密軍 人之任,權勢莫與比,遂扈帝以行。 以劉姬 諫,稍 當是時, 此。 務, 彬 至南京,又 並督 一,自縊 率邊兵數 尚 東廠 死。 喬

字、應天府丞寇天敍挺身與抗,彬氣稍折。

威武 溺, 歲 中, 賴 加加 鎭國公朱壽指授方略,擒宸濠逆黨申宗遠等十五人,乞明正其罪。」乃下詔褒賜鎭國公, 遂得 杉禄 民間 團練營,自提督軍馬,令泰、周、琮等提督教場操練。 十五 數訛傳將爲變。 米百石,廕一子錦衣千戶。會帝體憊甚,左右力請乃還京。 十月,帝至通州。 月幸牛首山。 帝心疑,欲歸。閏八月發南京。 諸 軍 彬尙欲勸帝幸宣府,矯旨 夜驚,言彬欲爲逆,久之乃定。時宸濠已就擒,繫江 召勳戚 至清江浦,漁 大臣議宸濠獄。 彬猶矯旨改團練營爲 積水池, 帝舟覆被 叉上言 上舟

即位 之,拔 安門。 功臣家 魏彬計,因中官溫祥入白太后,請除彬。 會坤寧宮安獸 吻,卽 命彬與工部尚書李鐩入祭 |彬禮服入,家人不得從。 心,夷甲觀變,令泰詣內閣探意。廷和以溫語慰之,彬稍安,乃出成服。 一、磔彬於 及帝崩,大學士楊廷和用遺命,分遣邊兵,罷威武團練營。 以其鬚<sup>1</sup> 門閉。 爲 奴。 且 市、周、琮與彬子爋、杰、鰲、熙俱斬、繪處決圖,榜示天下,幼子然 盡 尋走<u>北安門,門者曰:「有旨留提督。」|彬曰:「今日安所得旨。」排門者。</u> 時京 收者至,縛之。 師 久旱,遂大雨。 事竟將出,中官張永留彬、錢飯,太后遽下詔收彬。 有頃、周、踪並縛至、罵彬曰:「奴早聽我、豈爲 籍彬家,得黃金七十櫃,白金二千二百櫃,他珍珤不可 彬內疑,稱疾不出,陰布腹 廷和密與司禮中官 彬覺,亟走西 及 人擒 妻、女俱發 二世宗 門者執

七八八九

數計。

姓,歷遷左都督。 都督僉事新衡,仍以都指揮同知辦賊。 縣、臨城,泰等不敢擊,被劾停俸。 店。 尋充 未幾,復敗賊棗强。 副總兵,協守宣府。 許泰,江都人。 冒應州功,封安邊伯。 都督寧子,襲職爲羽林前衞指揮使。 劉六寇曹州,泰與馮楨、邵永擊却之,乘勝擒斬千八百人。 正德六年,與郤永、江彬俱調剿流賊,敗賊霸州,追敗之東光 既而賊奔衞輝,泰爲所敗。 賊平,進署都督同知, 中武會舉第一,擢署都指揮同 留京師, 調赴萊陽,逗遛不進,詔革署 與彬日侍左右,賜國 賊 半壁 犯蠡 知

攘其 備以虐民妒功狀上聞,下獄論死。夤緣貴近,滅死徙邊。 仁功,排擠之百方。 功,疾馳至南昌,窮搜逆黨,士民被誣陷者不可勝計。 宸濠反,帝以泰爲威武副將軍,偕中官張忠率禁軍先往。 執伍文定,窘辱備至。居久之,始旋師。世宗即位,廷臣交劾,文定亦 馬昂亦罷,炅等戍邊。 誅求刑戮,甚於宸濠之亂。 宸濠已爲王守仁所擒。 嫉守 泰欲

錢寧,不知所出,或云鎭安人。 幼鬻太監錢能家爲奴,能嬖之,冒錢姓。 能死,推恩家

人,得爲錦衣百戶。

錦 房、新寺,恣聲伎爲樂,復誘帝微行。 不聽,其名刺自稱皇庶子。 德 初 ,曲事劉瑾,得幸於帝。 引樂工臧賢、回回人于永及諸番僧, 性獧狡,善射,拓左右弓。 帝在豹房,常醉枕寧臥。 累遷左都督,掌錦衣衞事,典詔獄,言無 帝喜,賜國姓,爲義子,傳陞 以秘戲進。 百官候朝,至晡莫得帝起 請於禁內建豹

居,密伺寧,寧來,則知駕將出

矣。

懼 藏悉據有之。 謝寧,立釋注,乃已。 撻 工部郎督乾清宮工、乾沒帑金數十萬。 沈 ,使其嬖妾私 人至死,員外郎劉秉鑑持其獄急。 光大皆以杖繫校尉,爲寧所奏,逮下錦衣獄,黜光大,貶華一級。 太監張銳領東廠 中官廖堂鎭 事 寧,得留 緝事,横甚,而寧典詔獄,勢最熾,中外稱曰「廠、衞」。 廠衞校卒至部院白事,稱尙書子麟輩曰老尊長。太僕 任 河南,其弟錦衣指揮鵬肆惡,爲巡撫鄧庠所劾, 寧匿 經死,寧佯遣校尉治喪,迫經妻子扶櫬出, 注 於家,而屬 東廠發刑部 他事。 錦衣千戶王注 韶降級安置。 尙 司務林華 少卿趙經 書張子麟 姬妾、帑 與寧暱, 初以 亟 鵬

無子 ,思結强藩 寧子永安,六歲爲都督。 自 爲寧王 養子 宸濠營復護衞, 錢傑、錢靖等,俱冒 又遣人往宸濠所, 國 姓, 授錦衣 有異謀。 衛官。 又令宸濠數進金 念富貴已 極 帝

列

傅

第

銀玩好於帝。 凡宸濠所遣私人行賄京師,皆主伶人臧賢家,由寧以達帝左右。 謀召其世子司香太廟,爲入嗣地。又以玉帶、綵紵附其典寶萬銳歸,詐稱上

帝曰:「黠奴,我固疑之。」乃羈之臨淸,馳收其妻子家屬。帝還京,裸縛寧,籍其家,得玉帶 以滅口,又致孔章瘐死,冀得自全。然卒中江彬計,使董皇店役。彬在道,盡白其通逆狀。 二千五百束、黄金十餘萬兩、白金三千箱、胡椒數千石。 人皆斬,子永安幼,免死,妻妾發功臣家爲奴。 宸濠反,帝心疑寧。寧懼,白帝收宸濠所遣盧孔章,而歸罪賢,謫戍邊,使校尉殺之途 世宗即位,磔寧於市。養子傑等十

選爲儀衞司典仗。 陸炳,其先平湖人。 世宗入承大統,松以從龍恩,遷錦衣副千戶。 祖墀,以軍籍隸錦衣衞爲總旗。 父松,襲職,從興獻王之國 累官後府都督僉事,協理 安陸,

錦衣事。

行步 鎭撫事。 類鶴。 世宗始生,松妻爲乳媼,炳幼從母入宮中。 十八年從帝南幸,次衞輝。 舉嘉靖八年武會試,授錦衣副千戶。 夜四更,行宫火,從官倉猝不知帝所在。 稍長,日侍左右。 松卒,襲指揮僉事。 炳武健沉鷙,長身火色, 尋進署指揮使, 炳排闥負帝

出,帝自是愛幸炳。屢擢都指揮同知,掌錦衣事。

衞。 佐 帝 一嘗保持張鶴齡兄弟獄,有賢聲。 初 嗣 位 ,掌錦衣者朱宸,未 人罷。 寅 代者駱安, 小亦謹 厚不 · 爲 惡。 繼而 王佐、 及炳代寅,權勢遠出諸 陳寅, 皆以 興邸 舊 人上。 人掌 錦 未 衣

幾,擢署都督僉事。又以緝捕功,擢都督同知。

得 及鸞病亟 言 言 故 搆 寵 卽 日 一。陵嵩 炳 炳驟貴 擬旨逮治。 益 重。 助嵩,發言 ,炳盡發其不軌狀。 出其上,獨憚炳。 嘗捶殺 同列多父行 炳窘,行三千金求 與邊將關節書,言罪死。 兵馬指 ,炳陽敬事之,徐以計去其易己者。 揮,為御史所糾 炳曲奉之,不 帝大驚,立收鸞敕印,鸞憂懼 解 不得, ,韶不問。 敢與鈞禮, 長跪泣謝罪, 嵩德炳,恣其所爲,引與籌畫,通 言故暱炳, 而私出金錢結其所親 乃已。 死,至剖棺戮屍 又能 炳自 得閣臣夏言、嚴嵩歡,以 日, 是嫉言次骨。 御 史劾炳 愛, 脉 賂。 得鸞陰私 諸 不 後仇鸞 及嵩 法事 與

料 祿。 太保兼少傅,掌錦衣如故。 事, ,營墳墓,僭擬 錦衣列於西。帝以炳故,特命上坐,班二品之末。 三十三年命入直西苑,與嚴嵩、朱希忠等侍修玄。 炳先進左都督,錄擒哈舟兒功,加太子太保。 山陵,與其黨杜泰三人論斬,籍其貲,銀四十餘萬,金珠珍寶無算。 三公無兼三孤者,僅於炳見之。 以發鸞密謀,加少保兼太子太傅,歲給伯 明年疏劾司禮中官李彬侵盜 三十五年三月賜進士 恩樂 尋加炳 工 宴。故 所物

其子繹爲本衞指揮僉事 夫,未嘗搆陷一人,以故朝士多稱之者。三十九年卒官。贈忠誠伯,諡武惠,祭葬有加,官 爭走其門,歲入不貲, 別宅十餘所, 炳 任 惡吏爲爪牙,悉知民間錄兩奸。 莊園 遍 四方, 結權 要, 勢傾天下。 周旋善類,亦無所吝。 時嚴嵩父子盡攬六曹事,炳無所不 富人有小過輒收捕,沒其家。 帝數起大獄,炳多所保全,折節士大 關說。 **積貲數百萬**, 文武 大 吏

釋等追償,久之貲盡。 奸黨,無籍沒者,況籍沒、追贓,二罪幷坐,非律意。 隆慶初 ,用御史言,追論<br />
炳罪,削秩,籍其產,奪釋及弟太常少卿<br />
燒官,坐贓數十萬,繫 萬曆三年,釋上章乞免。張居正等言,炳救駕有 帝憫之,遂獲免。 功,且律非謀反叛逆

邵 元節,貴溪人,龍虎山上淸宮道士也。師事范文泰、李伯芳、黃太初,咸盡其術。

王宸濠召之,辭不往。

濟守靜修眞疑玄衍範志默秉誠致一眞人,統轄朝天、顯靈、靈濟三宮,總領道教,錫金、玉、 徵元節入京,見於便殿,大加寵信,俾居顯靈宮,專司禱祀。 世宗嗣位,惑內侍崔文等言,好鬼神事,日事齋醮。諫官屢以爲言,不納。 雨雪愆期,禱有驗,封爲淸微妙 嘉靖三年,

詔獄。 比還朝,舟至潞河,命中官迎入,賜蟒服及「闡敎輔國」玉印 旣成,乞假還山。中途上奏,言爲大學士|李時弟員外阪所侮。|時上章引罪,|败下獄獲譴。 石,以校尉四十人供灑掃,賜莊田三十頃,蠲其租。又遣中使建道院於貴溪,賜名仙源宮。 二品。 六年**乞還山**,詔許馳傳。 敕建眞人府於城西,以其孫啓南爲太常丞,曾孫時雍爲太常博士。歲給元節祿百 贈其父太常丞,母安人,幷贈文泰眞人,賜元節紫衣玉帶。給事中高金論之,帝下金 未幾,趨朝。 有事南郊,命分獻風雲雷雨壇。 預宴奉天殿,班

子疊生,帝大喜,數加恩元節,拜禮部尚書,賜一品服。 先是,以皇嗣未建,數命元節建醮,以夏言爲監禮使,文武大臣日再上香。 孫啓南、徒陳善道等咸進秩,贈伯 越三年,皇

芳、太初爲眞人。

至太常少卿。 有司營葬,用伯爵禮。 帝幸承天,元節病不能從。 善道亦封淸微闡教崇眞衞道高士。 禮官擬諡榮靖,不稱旨,再擬文康。 無何死,帝爲出涕,贈少師,賜祭十壇,遣中官錦衣護喪還, 隆慶初,削元節秩諡。 帝兼用之,日文康榮靖。 啓南官

陶 仲文,初名典真,黄岡人。嘗受符水訣於羅田萬玉山,與邵元節善。

帝大怒,悉下詔獄,拷掠長繫。 督趨甚急,公私騒然。 臧宗仁爲左至靈,馳驛往,督黃州同知郭顯文監之。工稍稽,謫顯文典史,遣工部郎何成代, 良輔爲太常博士。帝有疾,旣而瘳,喜仲文祈禱功,特授少保、禮部尚書。久之,加少傅,仍 死,廷臣震懾。大臣爭諂媚取容,神仙禱祀日亟。以仲文子世同爲太常丞,子壻吳濬、從孫 **兼少保。仲文起筦庫,不二歲登三孤,恩寵出元節上。乃請建雷壇於鄕縣,祝聖壽,以其徒** 烈宣教振法通真忠孝秉一眞人。明年八月欲令太子監國,專事靜攝。太僕卿楊最疏諫,杖 見,治不效,因薦仲文於帝。以符水噀劍,絕宮中妖。莊敬太子患痘,禱之而瘥,帝深寵異。 十八年南巡,元節病,以仲文代。 是夕行宮果火,宮人死者甚衆。帝益異之,授神霄保國宣敎高士,尋封神霄保國弘 嘉靖中 ', 由 黃梅縣吏爲遼東庫大使。秩滿,需次京師,寓元節邸舍。元節年老。宮中黑眚 御史楊爵、郎中劉魁言及之。給事中周怡陳時事,有「日事禱祠」語。 吏部尚書熊浹諫乩仙,即命削籍。 次衞輝, 有旋風繞駕, 帝問:「此何祥也。」對曰:「主 自是, 中外爭獻符瑞, 焚

得時見,見輒賜坐,稱之爲師而不名。 帝自二十年遭宮婢變,移居西內,日求長生,郊廟 心知臣下必議己,每下詔旨多憤疾之辭,廷臣莫知所 不親,朝講盡廢,君 臣不 相接,獨仲文 修、齋醮之事

丁無敢

指及之者矣。

指。 傅 **廕子世恩爲尚寶丞。** 而嚴嵩 少保。 小 人顧可學、盛端明、朱隆禧輩, 以虔奉焚修蒙異眷者二十年。 一人兼領三孤,終明世,惟仲文而已。 復以聖誕加恩,給伯爵俸,授其徒郭弘經、王永寧爲高 皆緣以進。 大同獲課者王三, 久之,授特進光祿大夫柱國兼支大學士俸, 其後,夏言以不冠香葉冠,積他釁至死 帝歸 功上 玄, 加仲文少師,仍無少 士

子世昌 恭誠 國公 又突出 慮 有 張 伯 時都 冤 石沙 **勠** 溶往行安神禮,仲文偕顧可學建醮 國子生。三十二年,仲文言:「齊河縣道士張演昇建大清橋,濬河得龍骨 歲祿千二百石,弘經、永寧封眞人。 御史胡 得雨 一脈,長數丈,類有神相。」帝卽發帑銀助之。 方解。 續宗下獄,株連數十人。二十九年春,京師災異頻見,帝以咨仲文。 俄法司上續宗等爰書,帝悉從輕典,果得雨。 祈福。 仇鸞之追戮也,下詔稱仲文功, 明年,聖誕,加恩,廕子錦 時建元嶽湖廣太 乃以平獄功,封仲文 衣百 和 Щ 增祿 戶。 ,旣成,遣英 一,重千斤。 百石,廕 對言

寵日隆,久而 可佩 、藍道行、王金、胡大順 帝益求長生,日夜 不替,士大夫或緣 禱祠,簡文武大臣及詞臣 、藍田玉 以進。 之屬,咸以燒煉符咒熒惑天子, 又創二龍不相見之說,青宮虛位者二十年 入直西苑,供奉 一青詞。 然不 四方奸人段朝用、 人皆敗, 獨 仲文恩

帝 皇妣號爲三天 三十五 年,上皇考道號爲三天金闕 金闕 無上玉 堂總仙法主玄元道德哲慧聖母天后掌仙妙化元君 無上玉堂都仙法主玄元道德哲慧聖尊 開 帝 眞仁化大 自

傳

霄 陽眞 Ŀ 清 人元 統 雷 虚 元 陽 玄應開 妙一飛玄眞君,後 化伏魔忠孝帝君,再號 加 號九天弘教普濟生靈掌陰陽功過大道 太上大羅天仙紫極長 生聖智昭 靈統 思仁紫極 元證 應玉 仙

法 虚 冠 總掌 及 白 五. [金萬 雷大眞人玄都境萬壽帝君。 兩。 旣 一歸,帝念之不置,遣錦衣官存問,命有司以時加禮,改其子尚寶 明年,仲文有疾,乞還山, 獻上歷年所賜蟒玉 少卿世 金寶、

恩爲太常丞兼道錄司右演法,供事眞 入府。

痛悼,葬祭視邵元節, 獄論死。 仲文得寵二十年,位極人臣。然小心愼密,不敢恣肆。 仲文秩諡亦追削。 特諡榮康惠肅。 世恩後至太常卿。 隆慶元年坐與王金偽製藥物,下 三十九年卒,年八十餘。 帝聞

帝 朝 金 人,復上疏瀆 用 大悅。 以資國 所獻 段朝用,合肥人。 銀,故出 用, 仲文亦薦之,獻萬金助雷壇工費。 帝益喜。 [勛資。 以燒煉干郭勛,言所化銀皆仙物,用爲飲食器,當不死。 已而 事旣敗、帝亦寖疎勛。 術 不 驗, 其徒王子巖攻發其詐。 帝嘉其忠,授紫府宣忠高士。 明年,勛亦下獄,朝用乃脅勛賄,捶死其家 帝執子巖、朝用,付鎭撫拷訊 朝用請歲進數萬 勛進之帝,

襲可佩,嘉定人。 出家崑山爲道士,通曉道家神名,由仲文進。 諸大臣撰青詞者,時從

奏。

帝怒,

逐論

死。

可 可 佩 佩 所惡,誣其嗜酒,使使偵之,報可佩醉員外郎邵畯所。 問 杖死,屍暴潞河,爲羣犬所食,唆亦奪官。 道家故事,俱愛之,得爲太常博士。 帝命入西宫,教宫人習法事,累遷太常少卿。 畯與可佩故無交,無敢白其枉者。 執下詔獄,幷逮畯,俱杖六十。 爲

御史鄒 嚴嵩,假乩仙言嵩奸罪。 法 褻,中官懼,交通道行,啓視而後焚,答始稱旨。帝大喜,問:「今天下何以不治。」道行故惡 藍道行 下詔獄、坐斬、死獄 應 龍 以扶鸞術得幸,有所問,輒密封遣中官詣壇焚之,所答多不 劾嵩疏上,帝卽放嵩還。 帝問:「果爾, 中。 已,嵩铜知道行所爲,厚賂帝左右,發其怙寵招權諸不 上仙何不殛之。」答曰:「留待皇帝自殛。」帝 如旨。 帝咎中官穢 الله 動

會

其子元 籍。 後凱 胡 玉 大順者, 一從妖 復用 ,偽撰萬壽金書一 人何廷玉齎入京,因 仲文同縣 人也。 帙, 詭稱呂祖 緣仲文進, 左演法藍 供事靈 田玉、左正 所作,且言呂祖授三元大丹, 濟宮。 一羅萬象以通內官趙楹 仲文死,大順以奸欺 可却疾不老。 ,獻之帝 事發, 斥回 遺

供奉西內, 至,嵩索田 田 玉 者,鐵柱觀 玉 因 諸 歡 符 籙進獻。 楹 道 時帝 士。 嚴嵩 玉田 方幸此三人,故大順書由三人進。 亦 罷 自以召鶴術託 歸,至南昌,值聖誕, 儆附奏, 田 玉 得召爲演 爲帝建醮。 帝覽書問 法, 與萬 會 「旣 御 史 象 云 姜儆 並 乩 以扶 書,扶乩 訪 鸞 秘 術 法

列

逐與大順、田玉、萬象、廷玉、元玉並論死。 楹瘐死。 帝以逆囚當顯戮,怒所司不如法,詔停 下諸人法司,令重擬。 下錦衣獄,不知其奸由楹也。錦衣上獄詞,帝有意寬之,以問階。階力言不可不重治,乃 服食,詐傳詔旨罪尤重。倘置不問,羣小互相朋結,恐釀大患。」乃命執大順、田玉、萬象等 |玉無狀,去冬代||廷玉進水銀藥,遂詐傳密旨,徵取||大順,不治無以儆將來。」||階對:「水銀不可 今宮擊已久,似非道行所致。 且用此輩,孽未必消。 小人無賴,宜治以法。」帝悟,報曰:「田 擾宮。今大順來,可復用乎。」對曰:「扶乩之術,惟中外交通,間有驗者,否則茫然不知 刑部司官俸。 何不來。」田玉遂詐爲聖諭徵之,至則屢上書求見。 嘉靖四十四年也 | 楹伺間, 具密奏,爲諸人申理。 帝大怒,付司禮拷訊, 具得其交通狀, 帝語徐階曰:「自藍道行下獄,遂百孽

後朝 入,前朝官不與聞,故無人摘發。賴帝晚年漸悟其妄,而政府力爲執奏,諸奸獲正法云。 世宗朝,奏章有前朝、後朝之說。前朝所奏者,諸司章奏也;他方士雜流有所陳請,則從

江南,金落魄無所遇。 解,得末減。 王金者,鄠縣 金遂 一逃京師,匿通政使趙文華所。 人也。 一日,帝於秘殿扶乩,言服芝可延年,使使採芝天下。 爲國 子生,殺人當死。 知縣陰應麟雅好黃白術,聞金 以仙酒獻文華, 文華獻之帝。 四方來獻者, 有秘方,爲之 及文華視師

又偽 積苑中,中使竊出市人,復進之以邀賞。 爲五 色龜,欲因禮部以獻,尚書吳山不爲進。 金厚結中使,得芝萬本,聚爲一山,號萬歲芝山, 山罷、金自進之。帝大喜、遣官告太廟。

禮官袁煒率廷臣表賀,而授金太醫院御醫。

玄告廟。是月,冤又生二子,帝以爲延生之祥,特建謝典告廟。 西苑嘉禾,顯陵甘露,無不告廟稱賀者。 宗憲獻靈芝五、白龜二。帝益喜,賜金幣、鶴衣,告廟表賀如初。不數日,龜死,帝曰:「天降 靈物,朕固疑處塵寰不久也。」淮王獻白雁二,帝曰:「天降祥羽,其告廟。」嚴嵩孫鵠獻玉兔 、靈芝六十四,藍道行獻瑞龜。俱遣中官獻太廟,廷臣表賀。 先是,總督胡宗憲獻白鹿者再。 帝喜,告謝玄極寶殿及太廟,進宗憲秩,百官表賀。已, 未幾,冤生二子,禮官請謝 已又生數子,皆稱賀。其他

下。 邑不樂,中官因詐飾以娛之。四十三年五月,帝夜坐庭中,獲一 帝大喜曰:「天賜也。」修迎恩醮五日。明日復降一桃,其夜白兔生二子。 當是時,陶仲文已死,嚴嵩亦罷政,藍道行又以詐偽誅,宮中數見妖孽,帝春秋高,意邑 未幾,壽鹿亦生二子,廷臣表賀。 帝以奇祥三錫,天眷非常,手詔褒答。 桃御幄後,左右言自空中 帝益喜,謝玄

十二種、醫士申世文亦進三種。 時遣官求方士於四方,至者日衆。 帝知其多妄,無殊錫。 豐城人熊顯進仙書六十六冊,方士趙添壽進秘法三 金思所以動帝,乃與世文及陶世恩、

列

傳

第

陶倣 慶四年十月,高拱柄國,盡反除階之政,乃宥金等死,編口外爲民。 醫院使,文彬太常博士。未幾,帝大漸,遺詔歸罪金等,命悉正典刑,五人並論死繫獄。 其方詭秘不可辨,性燥,非服食所宜。 、劉文彬、高守中偽造諸品仙方、養老新書、七元天禽護國兵策, 與所製金石藥並進。 帝御之,稍稍火發不能愈。世恩竟得遷太常卿,做太

年。 年。 拜工部尙書,尋改禮部,再加至太子太保。 公事, 嵩爲言於帝,遣使齎金幣就其家賜之。 **瞷世宗好長生,而同年生嚴嵩方柄國,乃厚賄嵩,自言能煉童男女溲爲秋石,服之延** 顧可學,無錫人。舉進士,歷官浙江參議。言官劾其在部時盜官帑,斥歸,家居二十餘 人咸畏而惡之。 時盛端明亦以方術承帝眷,可學獨揚揚自喜,請 可學詣闕謝,遂命爲右通政。嘉靖二十四年超

銀幣。 乃詔 舊儀、王充論衡、瑞命記、言:「歷代皆以芝爲瑞,然服食之法未有傳,所產地 有司採之五嶽及太和、龍虎、三茅、齊雲、鶴鳴諸山。 帝惑乩仙言,手詔問禮部:「古用芝入藥,今產何所。」尚書吳山博引本草、黃帝內經、漢 自是,來獻者接踵。 時又採銀礦、龍涎香,中使四出,論者咸咎可學。 無何,宛平民獻芝五本。 亦未敢預擬。」 可學尋以年老 帝悅,賚

他途進,士論恥之。端明內不自安,引去,卒於家。賜祭葬,諡榮簡。 部,加太子少保,皆與可學並命。 石,服之可長生,由陶仲文以進,嚴嵩亦左右之,遂召爲禮部右侍郎。 端明,饒平人。舉進士,歷官右副都御史,督南京糧儲,劾罷,家居十年。 二人但食祿不治事,供奉藥物而已。 **葬拜工部尚書**, 端明頗負才名,晚由 隆慶初,二人皆褫官 自言通曉藥 改禮

會有邊警,仲文乘閒薦隆禧知兵。帝曰:「祖宗法不可廢。」卒不用。旣卒,其妻請卹典,所 邀 司 "執不予,帝特諭予之。 隆慶初,褫官。 至其家,以所傳長生秘術及所製香衲祈代進。仲文還朝,奏之。帝悅,卽其家賜白金、飛 朱隆禧者,崑山人。由進士歷順天府丞,坐大計黜。二十七年,陶仲文赴太和山,隆禧 隆禧入朝謝恩,帝以大計罷閒官例不復起,加太常卿致仕。居二年,加禮部右侍郎。

廣、四川、山西、陝西、雲南、貴州。 帝晚年求方術益急,仲文、可學輩皆前死。四十一年冬,命御史姜儆、王大任分行天下, 至四十三年十月還朝,上所得法秘數千冊,方士唐秩、劉

列

第

百九十五

佞倖

校勘記

七九〇四

同官所齒。 隆慶元年正月,言官劾兩人所進劉文彬等已正刑章,宜幷罪,遂奪職。

### 校勘記

- C一〕 靖王奠培等亦言無左驗 靖王,原作「寧王」,據本書卷一一七寧王權傳改。
- **搆罪吏部尚書尹旻及其子侍講龍** 吏部、原作「禮部」、據本書卷一一一七卿年表、 孝宗實錄卷

八成化二十三年十二月辛卯條改。

叉以中官蔣琮言 蔣琮,原作「蔣宗」,據明史稿傳一八〇李孜省傳、 孝宗實錄卷八成化二十三

年十二月辛卯條改。

- 員外郎林俊請斬芳繼曉以謝天下 林俊,原作「淩俊」,據本書卷一九四林俊傳、明史稿傳一八
- 〇繼曉傳改。

## 明史卷三百八

# 列傳第一百九十六

#### 奸臣

竊弄 瑣鄙夫, 饕殘恣惡。 莊烈帝手除逆黨,而周延儒、溫體仁懷私植黨,悞國覆邦。南都末造,本無足言,馬士英庸 豎,懷奸固寵之徒依附結納,禍流搢紳。惟世宗朝,閹宦斂迹,而嚴嵩父子濟惡,貪醟無厭。 所值,皆英武明斷之君,而包藏禍心,久之方敗。令遇庸主,其爲惡可勝言哉。厥後權歸內 庸兇狡自肆,竟坐叛逆誅死。 有明一代,巨奸大惡,多出於寺人內豎,求之外廷諸臣,蓋亦鮮矣。 |威柄、搆結禍亂、動搖宗祏、屠害忠良、心跡俱惡、終身陰賊者,始加以惡名而不 (宋史)論君子小人,取象於陰陽,其說當矣。 之數人者,內無閹尹可依,而外與羣邪相比,罔恤國事,職爲亂階。 陳瑛在成祖時,以刻酷濟其奸私,逢君長君,茶毒善類。 然小人世所恒有,不容概被以奸名。 當太祖開國之初 が胡惟 ·敢辭。 此其 必其

列

其心迹、殆將與杞、檜同科。 吁可畏哉! 作奸臣傳。

胡惟庸 陳寧 陳瑛 馬麟等 嚴嵩 趙文華等 周 延儒

溫體仁 馬士英 阮大鍼

已,代汪廣洋 吉安通判,擢 胡惟庸、 定遠人。 爲左丞。六年正月,右丞相廣洋左遷廣東行省參政,帝難其人, 湖廣 歸太祖於和州,授元帥府奏差。 吳元 年,召爲太常少卿,進本寺卿。 尋轉宣使,除寧國主簿,進知縣,遷 洪武三年拜中書省參知政事。 久不置 相,惟

數尺,諛者爭引符瑞,又言其祖父三世塚上,皆夜有火光燭天。惟庸益喜自負,有異謀矣。 其從子佑。學士吳伯宗劾惟庸,幾得危禍。 久之<u>基</u>病,帝遣惟庸挾醫視,遂以毒中之。<u>基</u>死,益無所忌。與太師<u>李善長相結,以兄女妻</u> 奸,從容言於帝。惟庸遂誘達閽者福壽以圖達,爲福壽所發。 之徒及功臣武夫失職者,爭走其門,饋遺金帛、名馬、玩好,不可勝數。 歲,生殺黜陟,或不奏徑行。內外諸司上封事,必先取閱,害己者,輒匿 庸獨專省事。 自楊憲誅,帝以惟庸爲才,寵任之。 七月拜右丞相。 久之,進左丞相,復以<u>廣</u>洋爲右丞相 惟庸亦自勵,嘗以曲謹當上意,寵遇日盛,獨相數 自是,勢益熾。其定遠舊宅井中,忽生石筍,出水 御史中丞劉基亦嘗言其短。 大將軍徐達深疾其 不以聞。 四方躁進

吉安侯陸仲亭自陝西歸,擅乘傳。 帝怒責之,曰:「中原兵燹之餘,民始復業, 籍戶買

乃與御史大夫陳寧、中丞涂節等謀起事,陰告四方及武臣從己者。 於市,墜死車下,惟庸殺輓車者。帝怒,命償其死。惟庸請以金帛給其家,不許。惟庸懼, 馬 **倭**,與期會。 又遣元故臣<u>封績致書稱臣于</u>元嗣君,請兵爲外應。 已老,不能强拒,初不許,已而依違其間。惟庸益以爲事可就,乃遣明州 言:「吾等所爲多不法,一旦事覺,如何?」二人益惶懼,惟庸乃告以己意,令在外收集軍馬。 以權利脅誘二人,二人素戆勇,見惟庸用事,密相往來。 又嘗與陳寧坐省中,閱天下軍馬籍,令都督毛驤取衞士劉遇賢及亡命魏文進等爲心膂,曰: 命撫蘇州軍民,日嗜酒色。 艱苦殊甚。 所用 爾也。」太僕寺丞李存義者,善長之弟,惟庸壻李佑父也,惟庸令陰說善長。 使皆效爾所爲,民雖盡鬻子女,不能給也。」責捕盜於代縣。 帝怒、責往西北招降蒙古、無功、又切責之。二人大懼。 **嘗過惟庸家飲,酒酣,惟庸屛左右** 事皆未發。會惟庸子馳馬 衛指揮林賢下海招 平凉侯費聚 惟庸陰 奉

功臣 幾,賜廣洋死, 〈洋頓首謝罪,而微委其咎於禮部,部臣又委之中書。帝益怒, 家。 十二年九月,占城來貢,惟庸等不以聞。中官出見之,入奏。 文臣 何以得給。」乃敕法司取勘。 廣洋妾陳氏從死。 帝詢之,乃入官陳知縣女也。 于是惟庸及六部堂屬咸當坐罪。 大怒曰:「沒官婦女, 止給 盡囚諸臣,窮詰主者。 帝怒,敕責省臣。 明年正月,涂 惟庸及 未

列

訊,詞 節遂上變,告惟庸。 連寧、節。 廷臣言:「節本預謀,見事不成,始上變告,不可不誅。」乃誅惟庸、寧幷 御史中丞商暠時謫爲中書省吏,亦以惟庸陰事告。 帝大怒,下廷臣 更

及節

靖云。 狀,而陸仲亨家奴封帖木亦首仲亨及唐勝宗、費聚、趙庸三侯與惟庸共謀不軌。〔〕帝發怒, 肅淸逆黨,詞所連及坐誅者三萬餘人。 年五月,事發,捕績 月 ?,林賢獄成,惟庸通倭事始著。 二十一年,藍玉征沙漠,獲封績,善長不以奏。 惟庸旣死,其反狀猶未盡露。 下吏、訊得其狀,逆謀益大著。 至十八年,李存義爲人首告,殆死,安置崇明。 乃爲昭示奸黨錄,布告天下。 會善長家奴盧仲謙首善長與惟庸往來 株連蔓引, 迄數年未 至二十三 十九年十

知府。 之稱善,召試檄文,詞意雄偉,乃用爲行省掾吏。 ,太祖益才之。 陳寧,茶陵人。元末爲鎭江小吏,從軍至集慶,館於軍帥家,代軍 會大旱,乞觅民租,不許。 淮安納款,奉命徵其兵,抵高郵,爲吳人所獲。 寧自詣太祖奏曰:「民饑如此,猶徵租不已,是爲張士誠敺 時方四征,羽書旁午,寧酬答整暇 寧抗論不屈,釋還,擢 帥上書言事。 事 太祖 無留 廣

民也。」太祖壯而聽之。

寧已 擢 辛丑除樞密院都事。 中 書參議 大祖親 鞫之, 癸卯遷提刑按察司僉事。 寧首服, 緊應天 獄 歲。 明年改浙東按察使。有小 吳元 年, 冬盡將決, 太祖 隸訟其隱 惜 其才, 過,

將數 (其罪) 丽 宥之,用爲太倉市舶 提舉

洪 尋改 武 元 Щ 年召拜司農卿、遷兵部尚書。 西行省參政。 召拜參知政事,知吏、戶、禮三部事。 明年出爲松江知府。 用嚴爲治,積歲蠹弊,多所 寧,初名亮,至是賜名寧

預祭者不頒胙。久之,進左御史大夫。 相胡惟庸、參政馮冕、誠意伯劉基不陪祀而受胙,太祖以寧不舉奏,亦停俸半月。 御 釐 東閣,発冠 整冠出閣,始命入見。六年命兼領國子監事。 三年,坐事出 一而櫛。 知蘇州。 寧與侍御史商暠入奏事,太祖見之,遂移入便殿,遣人止寧毋 尋改浙江行省參政,未行,用胡惟庸薦,召爲御史中丞。 俄拜右御史大夫。八月遣釋奠先師。 自是,不 太祖嘗 入。 櫛 丞

死。 鐵。 三年正月,惟庸事發,寧亦伏誅。 太祖深惡其不情,曰:「寧於其子如此,奚有於君父耶」」寧聞之懼,遂與惟庸通謀。 及居憲臺,益務威嚴。 寧有才氣,而性特嚴刻。 太祖嘗責之,寧不能改。 其在蘇州徵賦苛急,嘗燒鐵烙人肌膚。 其子孟麟亦數諫,寧怒,捶之數百, 吏民苦之,號爲陳烙

愈 事。 陳英、滁人。 湯宗告瑛受燕王金錢,通密謀,逮謫廣西。 洪武中,以入才貢入太學。 擢御史, 出爲山東按察使。 建文元年調北平 燕王稱帝,召爲都察院左副都御史,署

輩,則吾等爲無名。」於是諸忠臣無遺種矣。 **閆之獄,所籍數百家,號冤聲徹天。** 者,勿問。」後瑛閱方孝孺等獄詞,遂簿觀、叔英等家,給配其妻女,疏族、外親莫不連染。 輩,後二十九人中如張紞、王鈍、鄭賜、黃福、尹昌隆,皆宥而用之。況汝所言,有不與此 按察使王良、知縣顏伯瑋等,其心與叛逆無異,請追戮之。」帝曰:「朕誅奸臣,不過齊、黃數 姓 率服,而廷臣有不順命、效死建文者,如侍郎黃觀、少卿廖昇、修撰王叔英、紀善周是修、 瑛天性殘忍,受帝寵任,益務深刻,專以搏擊爲能。 兩列御史皆掩泣,暎亦色慘,謂人曰:「不以叛逆處此 甫莅事,即言:「陛下應天順人,萬

胡

收繫。 劾曹國公李景隆謀不軌,又劾景隆弟增枝知景隆不臣不諫,多置莊產,蓄佃僕,意叵測,俱 惟愈言事忤帝意,瑛劾愈貪暴,愈坐誅死。 永樂元年擢左都御史,益以訐發爲能。 又劾長興侯耿炳文僭,炳文 自殺。 劾駙馬都尉梅殷邪謀,殷遇害。 又劾駙馬都尉胡觀强取民間女子,娶娼爲妾,預 八月劾歷城侯盛庸怨誹,當誅,庸自殺。二年 三年,行部尚書

景隆 逆謀,以親見宥不改。 帝命勿治,罷觀朝請。 已,又劾其怨望,逮下獄。 八年刻隆平侯

張信占練湖及江陰官田,命三法司雜治之。

瑞,指 瑛刻薄,非助股 部驗 然亦 行之。瑛劾文雅狂妄,請置之法。帝曰:「草野之人何知忌諱,其言有可采,奈何以直 瑄弟亭當連坐,而鑑釋亨不籍,宜罪。」 之,何以處不服者。」遂赦弗問。 先下刀臘法司,且逮治刀暹答。 陳俊 州刀算黨以歸。 曰:「兄弟同氣,得賊惟恐逸之,善何罪,其勿問。」車里宣慰使刀暹答侵威遠州 而 非盜 知 指指 不籍,不失爲愼 瑛 揮林泉、牛諒,通政司 其殘刻,所奏讞 爲都御 揮王恕,都督曹遠,指揮房昭, ,縱之。 史數年,所論劾 爲善者。」以文雅付吏部,量材授官。 帝遣使諭之,刀暹答懼,歸地及所執知州,遣弟刀臘等貢方物謝罪。 善白帝刑部故 重。」鑑得觅。戶部人材高文雅言時政,因及建文事,辭意率直,帝命議 不盡從。 參議賀銀等,先後 動成 帝曰:「蠻僚之性稍不相得則相響,改則已。今服罪而 出盜,帝命御史鞫治,果非盜。 中書舍人芮善弟夫婦爲盜所殺, 知嘉興縣李鑑廷見謝罪,帝問故。 、大臣十餘人,皆陰希帝指。 僉都 鑑言:「都察院文止籍瑄、未有亨名。」帝曰:「院文無 御史兪士吉, 又數十人, 俱得罪。 海運糧漂沒,瑛請治官軍罪,責之償。 大理 少卿 瑛因劾善妄奏,當下獄。 其他所劾順昌伯王佐,都 心疑其 袁復, 帝以爲能發奸,寵任之, 瑛言:「鑑籍奸黨姚瑄, 御史 所親,訟於官。 車舒, 地,執其知 而廢之。 都督王 復治 瑛請 刑 帝

列

傅

第

.:.「海濤險惡,官軍殆溺死,幸矣。」悉釋不問。 瑛之奸險附會,一意苛刻,皆此類也。

道。」時太子深惡瑛,以帝方寵任,無如何。久之,帝亦寖疎暎。 行,中允劉子春等復劾瑛方命自恣。 貞不承,不勝拷掠死,三皂隸皆笞死三日矣,貞實未嘗受金。先是,袁綱、覃珩兩御史俱至 下快之。 綱、珩,以其罪狀奏行在。 奸蒙蔽,擅殺無辜,請罪暎。 兵部索皂隸,貞猝無以應,兩御史銜之,興此獄。於是刑科給事中耿通等言暎及綱、珩 **萋擊登聞鼓訴冤。皇太子命六部大臣廷鞫之,自辰至午,貞等不至,惟葉轉至。** 北 巡,皇太子監國。瑛言兵部主事李貞受皂隸葉轉等四人金,請下貞獄 又有學官坐事謫充太學膳夫者,皇太子令法司與改役,瑛格不 皇太子曰:「瑛大臣,蓋爲下所欺,不能覺察耳。」置勿問,械繫 皇太子謂瑛曰:「卿用心刻薄,不明政體,殊非大臣之 九年春,瑛得罪下獄死,天 無何,貞 訊之,云 朋

爲, 如紀綱 帝以篡得天下,御下多用重典。 、馬麟 、丁珏、秦政學、趙緯、李芳,皆以傾險聞。 瑛首承風旨,傾誣排陷者無算。 綱在佞倖傳 時臣工多效其所

罷官. ,麟得召還。 。鞏人。 洪武末爲工科給事中, 尋進兵科都給事中。 建文時坐罪調雲南爲吏。 麟無他建白,專以訐發爲能。 成祖卽 帝久亦厭之, 位,悉復建文朝所 諭麟等

帝一日顧侍臣曰:「四方頻奏水旱,朕甚不寧。」麟遽進曰:「水旱天數,堯、湯不免。 者,不可宥。」帝曰:「彼亦偶脫漏耳。 退。麟居言路,糾彈諸司無虛日。 有之、未害。」帝曰:「洪範恒雨恒陽,皆本人事,可委天數哉?爾此言,不學故也。」 通政八年,卒於官。 曰:「奏牘一字之誤皆喋喋,煩碎甚矣。 嘗署兵部事,甫一日,輒有過,爲人所奏,自是稍戢。居 言官當陳軍國大務,細故可略也。」久之,擢右通政。 **偽謬卽改正,不必以聞。**」 麟等言:「奏內有不稱臣 麟慚而 一二郡

特擢刑科給事中。伺察百僚小過,輒上聞。居官十年,貪黷不顧廉恥。 邪,若悉行所言,廷臣豈有一人冤耶。〕遂謫戍邊。 事,輒隨衆大祀齋宮,復與慶成宴,爲御史兪信等所劾,論大不敬當死。帝曰:「朕素疑其奸 压,山陽人。<br />
永樂四年,<br />
里社賽神,<br />
誣以聚衆謀不軌,<br />
坐死者數十人。<br />
法司因稱<br />
珏忠, 母喪未期,起復視

政學,慈谿人。永樂二年進士。 歷行在禮部郎中,務掇人過失,肆爲奸貪。十六年春,

有

罪伏誅。

耶! 樂七年,復原官, 是無異蛇蝎。」遂謫嘉興典史。 緯 初爲大興教諭,燕兵起,與城守有勞。 務捃摭朝士過。 **外之,遷浙江副使。** 擢禮科給事 後入朝,仁宗見其名曰:「此人尚在 中,坐罪謫思南宣慰 司教授。冰

列傳第一百九十六 奸臣

不如意,卽詣帝前奏之,人比之紀綱。 久之,帝亦惡其奸,黜爲海鹽丞,棄官歸。 「洪武中,大臣 潁上人。 面議時政,必給事中二人與俱,請復其舊。」帝是之。 芳輒自矜,百司所爲,少 永樂十三年進士。歷刑科給事中。 宣宗數御便殿,與大臣議事。 芳言:

院事。 授編修。移疾歸,讀書針山十年,爲詩古文辭,頗著淸譽。還朝,久之進侍講,署南京翰林 嘉靖七年歷禮部右侍郎,奉世宗命祭告顯陵,還言:「臣恭上寶册及奉安神牀,皆應時 嚴嵩,字惟中,分宜人。長身戍削,疎眉目,大音聲。舉弘治十八年進士,改庶吉士, 召爲國子祭酒。

雨霽。 悦,從之。 又石產棗陽,羣鸛集繞,碑入漢江,河流驟漲。請命輔臣撰文刻石,以紀天眷。」帝大 遷吏部左侍郎,進南京禮部尚書,改吏部。

備。 入太廟。 士董其事。及夏言入內閣,命嵩還掌部事。 禮成、賜金幣。 居南京五年,以賀萬壽節至京師。 嵩與羣臣議沮之,帝不悅,著明堂或問示廷臣。 自是,益務爲佞悅。帝上皇天上帝尊號、寶册,尋加上高皇帝尊諡 會廷議更修宋史,輔臣請留嵩以禮部尚書兼翰林學 帝將祀獻皇帝明堂,以配 嵩惶恐,盡改前說,條畫 上帝。 已,又欲 禮 聖號 稱宗 儀 甚

以配,嵩乃奏慶雲見,請受羣臣朝賀。又爲慶雲賦、大禮告成頌奏之,帝悅,命付史館。

加太子太保,從幸承天,賞賜與輔臣埓。

冠,因刻沈水香冠五,賜言等。 言不奉詔,帝怒甚。 嵩因召對冠之, 籠以輕紗。帝見, 益內 親嵩。 論貪污大臣,皆首嵩。 其第,言辭不見。 必故稱賞,欲以諷止言者。 嵩 當遂傾言,斥之。言去,醮祀青詞,非嵩無當帝意者。 歸 H 驕。 諸宗藩請卹乞封,挾取賄賂。子世蕃又數關說諸曹。 嵩布席,展所具啓,跽讀。言謂嵩實下己,不疑也。帝以奉道嘗御香葉 嵩每被論, 亟歸誠於帝, 事輒已。 嵩科第先夏言,而位下之。 始倚言,事之謹,嘗置酒邀言,躬詣 帝或以事諮嵩, 所條對平無奇, 帝 南北給事、御史交章

嵩諷言官論之,變得罪去。東部尚書許讚、禮部尚書張壁同入閣,皆不預聞票擬事,政事一 苑。帝嘗賜嵩銀記,文曰「忠勤敏達」。尋加太子太傅。翟鑾資序在嵩上,帝待之不如嵩。 帝不聽,然心益喜嵩,累進吏部尚書、謹身殿大學士、少傅兼太子太師。 乃請凡有宣召,乞與成國公朱希忠、京山侯崔元及讚、璧偕入,如祖宗朝蹇、夏、三楊故事。 歸嵩。 發,不異少壯。 二十一年八月拜武英殿大學士,入直文淵閣,仍掌禮部事。 讚嘗歎曰:「何奪我吏部,使我旁睨人。」嵩欲示厚同列,且塞言者意,因以顯夏言短 朝夕直西苑板房,未嘗一歸洗沐,帝益謂嵩勤。 久之,請解部事,遂專直西 時嵩年六十餘矣,精爽溢

列

帝大喜,允其辭,而以世蕃爲太常卿。 雖設此官,左相國達,功臣第一,亦止爲左柱國。 言,益僞恭謹。 言嘗加上柱國,帝亦欲加嵩,嵩乃辭曰:「尊無二上,上非人臣所宜稱。 言,疏遣歸省墓。嵩尋加特進,再加華蓋殿大學士。窺言失帝眷,用河套事搆言及曾銑,俱 子大懼,長跪楊下泣謝,乃已。知陸炳與言惡,遂與比而傾言。世蕃遷太常少卿,嵩猶 棄市。已而南京東部尚書張治、國子 祭酒李本以疎遠擢入閣,益不敢預可否。 氣 ·陵嵩,頗斥逐其黨,嵩不能救。 子世蕃方官尚寶少卿,横行 久之,帝微覺嵩橫。 時讚老病罷,璧死,乃復用夏言,帝爲加嵩少師以慰之。 乞陛下 発臣此官,著爲令典,以昭臣節。」 公卿間。 言欲發其罪,嵩父 嵩旣傾殺 言至,復 國初 畏

瑜 激帝怒,戕害人以成其私。 遷除考察以斥者甚衆,皆未嘗 吳時來、張翀、董傳策皆被譴。 、葉經 嵩無他才略,惟一意媚上,竊權罔利。 一、童漢臣、趙錦、王宗茂、何維柏、王曄、陳塏、厲汝進、沈錬、徐學詩、楊繼盛 張經、李天寵、王忬之死,嵩皆有力焉。 有跡 經、鍊用他過置之死,繼盛附張經疏尾殺之。 也。 帝英察自信,果刑戮,頗護己短,嵩以故得因事 前後劾嵩、世蕃者,謝 他所不悅,假 、周鉄、

禮部。 俺答薄都城,慢書求貢。 帝悉用階言,稍輕嵩。 嵩復以間激帝怒,杖司業趙貞吉而謫之。 帝召嵩 與李本及禮部尚書徐階入對西苑。 兵部尚書丁汝夔受 嵩無所規畫,委之

嵩 指 不不 敢趣諸 將戰。 寇退,帝欲殺汝夔。 嵩懼其引己,謂汝變曰:「我在,毋慮也。」汝變臨

死始知爲嵩紿。

之, 憲策 泣。 華督察軍 信 矣。 任 寖相惡 嵩 臣 嵩 時陸炳掌錦 大 將 ,遣所 見徐階、李本入西 師嵩所授也。」遂命嵩兼支尚書俸無謝,自是褒賜皆 ·情,大納 軍 仇鸞 嵩 乘龍舟 密疏 衣, 賄賂以遺嵩 始爲曾銑所刻,倚嵩傾銑,遂約爲父子。 毁鸞, 過海 與鸞爭寵,嵩乃結 子召嵩,載直 丙, 帝 不 ,致寇亂益甚。 即與俱入。 聽, 而 頗 一西內如故。世蕃尋遷工部左侍郎。 炳 共圖鸞。會鸞病死,炳訐鸞陰事,帝追戮之。 納鸞所陳嵩父子過,少疏 至西華門, 及胡宗憲誘降汪直、徐海,文華乃言:「臣與宗 門者以非 已而鸞挾寇得帝重,嵩猶 示謝 詔旨格 之。 之。 嵩當 倭寇江南,用 嵩還第, 入直,不 於是 · 召 者 兒子 父子 趙文 對 \* 益 數

志。 宮,不入大內,大臣希得謁見,惟嵩獨承顧問,御札一日或數下,雖同列不獲聞,以故嵩得逞 稱 得帝窾要,欲有所救解,嵩必順帝意痛詆之,而婉曲解釋以中帝所不忍。 肩 其歲,而以微言中之,或觸帝所恥與諱。 輿入禁苑。 然帝雖甚親禮嵩,亦不盡信其言,間一取獨斷,或故示異同,欲以殺離其勢。 帝嘗以嵩直 帝自十八年葬章聖太后後,卽不視朝,自二十年宮婢之變,卽移居西苑萬 廬隘,撤小殿材爲營室,植花木其中,朝 以是移帝喜怒,往往不失。 夕賜 御膳、法酒。 士大夫輻輳附嵩,時 即欲排陷者,必先 嵩年八十,聽以 嵩父子 獨

列

傳

第

惴

惴

事

嵩

稱文選 郎 中 萬寀 、職方郎中方祥等爲嵩文武管家。 尚書吳鵬、歐陽 必進、高燿 許論輩,皆

世蕃 意揣 嵩 策 問多不及嵩,卽及嵩,祠祀而已。 南 嵩受詔多不能答, 遺使持問世蕃。 動 曹惟公乳哺之。」階謝不敢。 爲之,往往失旨。 :城離宮,南城, 英宗爲太上皇時所居也,帝不悅。 亦不 各疏論嵩 ,階因得間 當 帝 嵩 能救。 護喪 握權 指,然帝所下手韶,語多不可曉,惟世蕃 歸, 久, 遍引私人居要地。 **,嵩因密請究主使者,下詔獄,窮治無所引。** 傾嵩 有詔二王就婚邸第,嵩力請留內。 嵩請留侍京邸。 所進青詞 吏部尚書缺,嵩力援歐陽必進爲之,甫三月卽斥去。 ,又多假手他人不能工,以此積失帝**歡**。 帝許之,然自是不得入直所代嵩票擬,而 嵩懼,置酒要階,使家人羅拜,舉觴屬曰:「嵩旦夕且死,此 **值其方耽女樂,不以時答。** 帝亦寖厭之,而漸親徐階。 一覽了然,答語無不 帝不悦,嵩亦不能 而徐階營萬壽宮甚稱旨,帝益 帝乃不問,而慰留嵩, 會階所厚吳時來、張翀、董 中使相繼促嵩, 力持。 中。 會萬壽宮火,嵩請暫徙 及嵩妻歐陽氏死, 趙文華忤旨獲譴, 日 嵩雖警敏,能先 縦淫樂於家。 嵩不得已自 然 心不 親階,顧 能 無 傳

子不法,曰:「臣言不實,乞斬臣首以謝嵩、世蕃。」帝降旨慰嵩,而以嵩溺愛世蕃,負眷倚,令 未 幾,帝入方士藍道行言,有意去嵩。 御史鄒應龍避雨內侍家,知其事,抗疏極論嵩父

世蕃 獄 致仕、馳驛歸、有司歲給米百石、下世蕃於理。 擢 及其子錦 應龍通政司參議。 衣鵠、鳩,客羅龍文,戍邊遠。 時四十一年五月也。 韶從之,特宥鴻爲民,使侍嵩,而錮其 龍文官中書,交關爲奸利,而年最點惡,士大 |嵩爲|世蕃請罪,且求解,帝不 聽。 , 奴嚴 法 司奏論 年於

夫競稱萼山先生者也。

者,並 籙,幷己祈鶴文上之,帝優詔褒答。 不可, 移便地就養,終臣餘年。」不許。 死,得釋。 嵩 應龍俱斬。」嵩知帝念已,乃賂帝左右,發道行陰事,繫刑部,俾引階。 帝曰:「卿等不欲,必皆奉君命,同輔玄修乃可。 旣去,帝追念其贊玄功,意忽忽不樂,諭階欲逐傳位,退居西內,專祈長生。 嵩 初歸至南昌,值萬壽節,使道士藍田玉建醮鐵柱宮。 嵩因言:「臣年八十有四,惟一子世蕃及孫雋皆遠戍,乞 嚴嵩旣退,其子世蕃已伏法,敢 田玉善召鶴,嵩因取其符 道行不承,坐論 階極陳

寄食墓舍以死 年,溺信惡子,流毒天下,人咸指目爲奸臣。其坐世蕃大逆,則徐階意也。又二年,嵩老病, 衣蟒,有負險不臣之志。世蕃得罪後,與龍文日誹謗時政。其治第役衆四千,道路皆言兩 人通倭,變且不測。」詔下潤逮捕,下法司論斬,皆伏誅,黜嵩及諸孫皆爲民。 其明年,南京御史林潤奏:「江洋巨盜多入逃軍羅龍文、嚴世蕃家。 龍文居深山,乘軒 嵩竊政二十

東樓 其監工奴見袁州推官郭諫臣,不爲起。 或父執,虐之酒,不困不已。 匿。 屛 掌尙寶司 之屬,所到輒輦致之,或索之富人,必得然後已。 與陸炳 息, 其治第京師,連三四坊,堰水爲塘數十畝, 世 世蕃別號也。 不肖者奔走其門,筐篚相望於道。 、楊博 短短 爲三。 項肥體,眇一目,由父任入仕。 剽悍陰賊,席父寵,招權利無厭。 朝事 炳死,益自負。 一委世蕃,九卿以下浹日不得見,或停至暮而遣之。 居母喪亦然。 嵩耄昏,且旦夕直西內,諸司 世蕃熟諳中外官饒瘠險易, 好古尊彝、奇器、書畫,趙文華、鄢懋卿、胡宗憲 以築京師外城勞,由太常卿進工部左侍郎,仍 羅珍禽奇樹其中, 然頗通國典,曉暢時務。 被應龍劾戍雷州,未至而返,益大治園亭。 '白事, 輒曰:「以質 日擁賓客縱倡樂,雖大僚 責賄多寡, 嘗謂天下才,惟己 士 毫髮不能 大夫側 東樓。」 目

過也。 爲交通賄世蕃乞官。 「必欲死之。」曰:「若是,適所以生之也。 謂 其黨曰:「無恐,獄且解。」 御 必如是,諸君且不測,嚴公子騎款段出都門矣。」爲手削其草,獨按龍文與汪直姻舊 史林潤嘗劾懋卿 世蕃用彭孔言,以南昌倉地有王氣,取以治第,制擬王者。又結宗人 "懼相 法司黃光昇等以讞詞白徐階,階曰:「諸公欲生之乎。」 愈曰: 報,因與諫臣謀發其罪,且及冤殺楊繼盛、沈鍊狀。 夫楊、沈之獄,嵩皆巧取上旨。 今顯及之,是彰上 世蕃喜,

典模陰伺非常,多聚亡命。龍文又招直餘黨五百人,謀爲世蕃外投日本,先所發遣世蕃班 曰:「死矣。」遂斬於市。 頭 生信,亦自山海衞棄伍北走,誘致外兵,共相響應。 籍其家,黃金可三萬餘兩,白金二百萬餘兩,他珍寶服玩所直又數 卽日令光昇等疾書奏之。 世蕃聞、詫

百萬。

通 政使。性傾狡,未第時在國學,嚴嵩爲祭酒,才之。後仕於朝,而嵩日貴幸,遂相與結爲 趙文華,慈谿人。嘉靖八年進士。授刑部主事。以考察謫東平州同知。久之,累官至

別室,酒酣,嵩妻爲之解,文華卽出拜,嵩乃待之如初。以建議築京師外城,加工部右侍郎。 歸,九卿進謁,嵩猶怒文華,令從吏扶出之。文華大窘,厚賂嵩妻。嵩妻敎文華伺嵩歸,匿於 不先自己,召至直所詈責之。文華跪泣,久不敢起。徐階、李本見之爲解,乃令去。 嵩休沐 … 「文華安得爲此!」乃宛轉奏曰:「臣生平不近藥餌,犬馬之壽誠不知何以然。」 嵩恨文華 文華欲自結於帝,進百花仙酒,詭曰:「臣師嵩服之而壽。」帝飮甘之,手敕問嵩。嵩驚

骼 輕徭。 東南倭患棘,文華獻七事。 次增募水 軍。 次蘇、松、常、鎭民田,一夫過百畝者,重科其賦,且預徵官田稅三 首以祭海神爲言,請遣官望祭於江陰、常熟。 次令有司掩

列傳

第

百

九十六

奸臣

之名,令偵伺賊情,因以爲間。兵部尚書攝豹議行其五事,惟增田賦、遣重臣二事不行。 年。 次募富人輸財力自效,事寧論功。 次遺重臣督師。 次招通番舊黨並海鹽徒,易以忠義 帝

怒,奪豹官,而用嵩言卽遣文華祭告海神,因察賊情。

邦輔 戰,實文華、宗憲兵先潰也。 恣行 至是又傾邦輔,勢益張。 進兵。 里居搢紳,分督郡邑兵事。 解體,徵兵半天下,賊寇愈熾。 天龍 文華攘其功,謂己與巡按胡宗憲督師所致,經竟論死。 悅。 :無忌。 冤狀。 亦 當是時,總督尚書張經方徵四方及狼土兵,議大舉,自以位文華上,心輕之。文華不 狼兵稍有斬獲功,文華厚犒之,使進剿,至漕徑戰敗,亡頭目十四人。 論 經慮文華輕淺洩師期,不以告。文華益怒,劾經養寇失機,疏方上,經大捷王江涇。 死。 帝終信文華言,邦輔坐遣戍。 欲分蘇松巡撫曹邦輔滸墅關破賊功,不得,則以陶宅之敗,重劾 帝益以文華爲賢,命鑄督察軍務關防,卽軍中賜之。文華自此出總督上,益 文武將吏爭輸貨其門,顚倒功罪,牽制兵機,紀律 爲兵部所駁而 兵科給事中夏栻得其情, 文華又陳防守事 寢 文華旣殺經、天寵, 宜,請籍閒田百萬畝給兵,爲屯守計,而令 劾文華欺誕。 又劾浙江巡撫李天寵罪,薦宗憲代, 復先後 吏科給 論罷總督周 文華志,數趣經 大乖,將吏人人 郑輔。 事 中孫濬 珫 陶宅之 八楊宜 亦白

官軍旣屢敗,文華知賊未易平,欲委責去。 會川兵破賊周浦,兪大猷破賊海洋,文華逐

憲,兩人交甚歡。 保。 楊宜爲總督,及文華再出,宗憲欲藉文華以通於嵩,諂奉無不至。文華素不知兵,亦倚宗 社 南警遝至,部議再遣大臣督師,已命兵部侍郎沈良材矣,嵩令文華自請行,爲帝言江南 淮 言水陸成功,江南淸晏,請還朝。帝悅,許之。比還,敗報踵至,帝疑其妄,數詰嵩,嵩曲 矯首望文華。 解,帝意終不釋。 . 稷,加文華少保,廕子錦衣千戶。 召還朝,文華乃推功元輔嵩,辭陞廕,帝優詔不允。 、蔡,而晚業不終」。文華劾其謗訕,默坐死。帝以是謂文華忠,進工部尚書,且 是時 ,嵩年老,慮一旦死,有後患,因薦文華文學,宜供奉靑詞,直內閣。帝 帝以爲然,命兼右副都御史,總督江南、浙江諸軍事。時宗憲先以文華薦代 已而宗憲平徐海,俘陳東,文華以大捷聞,歸功上玄。帝大喜,祭告郊 會吏部尚書李默發策試選人,中言「漢武征四夷,而海內虛 不許。 耗。 加 唐憲 太子太 而 廟 復 爲 東

拜 材遲,文華似不 成甚亟,文華猝不能辦。 閣,不以時告成。 跪 不 文華旣寵貴,志日縣,事中貴及世蕃,漸不如初,諸人憾之。帝嘗遣使賜文華,值其醉, :「工部大木,半爲文華作宅,何暇營新閣。」 帝益慍。 如 禮,帝聞惡 如昔。」嵩猶未知帝意,力爲掩覆,且言:「文華觸熱南征,因致疾, 帝一日登高,見西長安街有高甍,問誰宅。 [其不敬。又嘗進方士藥,帝服之盡, 使小璫再索之,不應。 帝積怒,且聞 其連歲視師黷貨要功狀,思逐之,乃諭嵩曰 會三殿災,帝欲建正 左右曰:「趙尙書新宅也。」旁 陽門樓,責 宜增侍郎 :「門樓庀 西苑造新

列傅

第

是職 人專督大 文華 旣有 工。」帝從之。 疾 可可 回籍休養。」制下, 文華因上章稱疾,請賜假靜攝旬月。 舉朝相賀 帝手批曰:「大工方興,司空

瘴 詔 祀停封章 手捫其腹,腹裂,臟腑出,遂死。 是都給 微諸 地。 帝 雖逐 其家,至萬曆十一年徵猶未及半,有司援恩詔祈免。 事 中謝江 日請假送父,三帝大怒,黜文華爲民,戍其子邊衞。 文華猶 以下六人,並廷杖削籍。 以爲未盡其罪,而言官無攻者,帝怒無所洩。 後給事中羅嘉賓等核軍餉,文華所侵盜以十萬四千計。 文華故病蠱,及遭譴臥舟中,意邑邑不自聊,一夕 神宗不許,成其子愼思於烟 以禮科失糾劾,令對狀。 會其子錦衣千戶懌思以齊 於 有

蘆 至是懋卿 副都御史。 、河東鹽政不舉,請遣大臣一人總理,嵩遂用懋卿。 鄢懋卿 盡握天下利柄,倚嚴氏父子,所至市權納賄,監司郡邑吏膝行蒲伏 豐城人。 懋卿以才自負,見嚴嵩柄政,深附之,爲嵩父子所暱。 由行人擢御史,屢遷大理少卿。三十五年,轉左僉都御史。 舊制,大臣 理鹽 會戶部以兩浙、 政, 無總四 兩淮 運司者。 尋進

按部 ,常與妻偕行,製五綵輿,令十二女子舁之,道路傾駭。 懋卿 性奢侈, 至以文錦被厠 床, 白金飾溺器。 歲時饋遺嚴氏 淳安知縣海瑞、慈谿知縣霍與 及諸 權貴,不 可勝紀。 其

瑕 其害,乃復六十萬之舊。 部右侍郎。 日費千金、虐殺不辜、怨咨載路、苛斂淮商、幾至激變、五大罪。 ,以抗忤罷去。 兩淮餘鹽,歲徵銀六十萬兩,及懋卿增至一百萬。 御史林潤嘗劾懋卿要索屬吏,餽遺鉅萬,濫受民訟,勒富人賄,置酒高會, 懋卿去,巡鹽御史徐爌極言 帝置不問。 四十年召爲刑

兩 懋卿紿得其二萬,事皆露,兩人先後戍邊。 嵩 敗,御史鄭洛劾懋卿及大理卿萬寀朋奸黷貨,兩人皆落職。 旣而寀匿嚴氏銀八萬

笑。而材、汝楫俱出入嵩臥內,關通請屬,尤爲 楊繼盛。 材、太僕丞新喻張春及嵩壻廣西副使袁應樞等數十人,黜謫 南昌胡植 侍郎德安何遷、右副都御史信陽董威、僉都御史萬安張雨、應天府尹祥符孟淮 時坐嚴氏黨被論者,前兵部右侍郎柏鄉魏謙吉、工部左侍郎南昌劉伯躍、南京刑部右 啓常官禮部郎, 匿喪遷光 南京光祿少卿武進白啓常、右諭德蘭谿唐汝楫、南京太常卿掌國子監 禄, 與材、汝楫俱爲世蕃狎客。 人所惡云。 有差。 啓常至以粉墨塗面 植與嵩 鄉里, 、南京 嘗勸 事 新 光 供歡 嵩 城 禄 殺 卿

周延 列 儒, 傅 第 字玉 繩, 宜 興 萬曆四十一年會試、 殿試皆第 0 授修撰, 年甫二十餘。

事

美麗 自喜 與 同 年生馮銓友善。 天啓中,遷右中允, 掌司經局事。 尋以少詹事掌南京翰林

疑邊 莫如粟,山海 敵,今且防兵。 袁崇煥 「事迫,不得不發。 將要挾,聞延儒言大說,由此屬意延儒。 莊 清給 烈 帝即位,召爲禮部右侍郎。 餉。 栗不缺,缺銀耳。 寧遠譁, 帝御文華殿,召問諸大臣,皆請 但當求經久之策。」帝領之,降旨責羣臣。 餉之, 錦州 何故譁。譁必有隱情,安知非驕弁搆煽以脅崇煥邪。」帝方 華,復餉之,各邊且效尤。」帝曰:「卿謂何如 延儒性警敏,善伺意指。 發內帑。 延儒揣帝意,獨 居數日,復召問,延 崇禎元年冬,錦州兵譁,督師 進曰:「關門昔防 ?」延儒曰: 儒 前

閣大學士,參機務。 春論獨對 召對延儒於文華殿,漏下數十刻乃出,語秘不得聞。 李 爲逆黨翻局。」延儒 不預,大疑。及溫體仁計謙益,延儒助之。帝遂發怒,黜謙益,盡罷會推者不用。 騰芳、孫愼行、何如寵、薛三省、盛以弘、羅喩義、王永光、曹于汴十一人名上。 十一月,大學士劉鴻訓罷, 之非。 延儒乞罷,不允。南京給事中錢允鯨言:「延儒與馮銓密契,延儒 疏辨,帝優 明年二月加太子太保,改文淵閣。 詔褒答。 命會推,廷臣以延儒望輕置之,列成基命、錢謙益、鄭以偉、 其年十二月, 京師 御史黃宗昌劾其生平穢行,御史李長 六月,體仁亦入。九月,成基命致 有警, 特旨拜延儒 禮部 二年三月 尚書兼東 柄 帝以延儒 政,必

仕,延儒遂爲首輔。尋加少保,改武英殿。

孫元 體 歸 也 咎 冒錦 於 化 益 皆 欲 公。」 仁 有私 衣籍,「三授千戶,又用家人周文郁爲副總兵,益爲言者所詆 傾 與 旣 文吏部 延儒。 並 延儒愕然。 相, ,時論籍籍。 尚 務爲柔佞, 書王永光謀起逆案王之臣、呂純 四年春,延儒姻姬陳于泰廷 會帝以之臣問, 其子弟家人暴邑中,邑中民爇其廬,發其先壟,爲言官所糾。 帝意: 漸嚮之。 延儒 而體仁陽曲謹媚延儒, 2對第一,及所用大同巡撫張廷拱、登萊巡撫 曰:「用之臣,亦可 如 等。 或謂 延儒 雪崔呈秀矣。」 陰欲奪其位, 日 : 彼 將 翻 帝 逆案,而 延儒 悟而止。 不 知

象雲 烈。 儒 元 **訐奏,語侵延儒** 中 功 而 不 等, 能 ·官不 以 延儒 於是給事 五 爲 年 救 屢 庄 當 延 令于泰 数延 儒 體仁 b 動
首 月,叛將李九成等陷登州, 功 中孫三傑、馮元飇,御史余應桂、衞景瑗、 了,索 儒。 復嗾給事 揆,輕朝 陳時政四事 給事中李春旺亦論延儒當 獄 應桂 囚賊 廷, 中 並謂延儒納巨盜神一 謝。 陳贊化 , 疑有 宣府 而 邪人交搆 延儒至目陛下爲羲皇上人,語詩逆」。帝怒,下元功詔獄, 劾延儒 太監王坤承體仁 囚元化。侍郎劉宇烈視 「昵武 , 去。 副都御史王志道 一魁賄。 延儒 弁李元 指, 數上疏辯, 尹明翼、路振飛、吳執御、王道純、王 而監視中官鄧希詔與總督曹文衡相 功等, 直 劾延儒 亦言之。 師無功, 招搖 帝雖慰留, 庇于泰。 罔 利。 帝怒,削 言路咸指延儒庇宇 陛 給事 下 心不能 志道 特恩 中傅朝佑 停刑, 無動

列

傅

第

綵緞 儒 延 且 儒 窮詰費 語。 遣行 帝益怒。 化 人護行。 語 所自 體仁卒不應, 錦衣 得 體仁遂為首輔矣 贊化 衞 帥 王世 言得之上林典簿姚孫渠、給事中李世祺,而 且陰黜與延 一盛拷掠 儒 元功無所 善者 延儒 承。 大困。 獄上, 鐫 六年六月引疾乞歸,賜白金、 世 盛 五級,令窮 副使張 鳳翼 治 其 亦具述 事。延

九 取 而 士張溥 月至京,復爲首輔。 時爲交關近侍,馮銓復助爲謀。 ,皆得罪。 張 至發、 始 延儒 、馬世奇等,又皆東林也。 薛國 里居,頗從東林游,善姚希孟、羅喩義。 溥等憂之,說延儒曰:「公若再相,易前轍,可重得賢聲。」延儒 觀相繼當國,與楊嗣昌等並以娼嫉稱。 尋加少師兼太子太師,進東部尚書、中極殿大學士 會帝亦頗思延儒,而國觀適敗。十四年二月詔 至是 歸, 失勢, 心內 旣陷錢謙益,遂仇東林。 一時正 慚。 而體仁益橫,越五 人鄭三俊、劉宗周、黃道 以爲然。 及主 年始去。 一會試, 起延儒。 溥友吳 所 周 去

俊長東部,劉宗周掌都察院,范景文長工部,倪元璐佐兵部,皆起自廢籍。 嘉 還言 、湖諸府大水、許以明年夏麥代漕糧。 輩 延儒 一弊政。 事 被召 遷謫諸臣李淸等。 首請 ,溥等以數事要之。 釋漕糧白糧欠戶,蠲民間積逋,凡兵殘歲荒地,減見年兩稅 帝皆忻 延儒慨然曰:「吾當銳意行之,以謝諸公。」旣 然從之。 宥戍罪以下,皆得還家。 延儒 又言:「老成名德, 復 註誤 不可 輕 舉人,廣取 棄。」 其他李邦華、張 入朝,悉反 蘇、松、常、 於是鄭三 士額及

中 或 外 維 翕 徐 然 石麒 稱 賢 、張瑋、金光 嘗 燕 侍, 辰 帝語及黃道 等, 布滿 九 周 列。 , 時道周 釋在 獄傅宗 方謫 戍 龍 辰州。 等, 贈已故文震孟 延 儒 日 「道周 一、姚希 氣 質 少 孟 偏 等官。 然

學 與 、守皆 可 用。」 蔣德 璟請移道 周 戊戍近 地 延儒 日 「上欲 ) 用 即 用之耳, 何必 移戍。」 帝 卽 H

復道 周 官。 其 因 事 開 釋 如 此

利。 儒 實 無 所 庸 帝 信 謀 尊 駑 無材 禮 畫。 用文選郎吳昌時及給 延 略 儒 用 侯恂、范志完督師、皆僨 特 ,且性貪。 重,嘗於歲首 當 邊境 事 日 中 喪師 東向揖之,曰:「朕以天 曹良直 事 李自成殘掠 一、廖國 延儒 遴 無 一憂色。 、楊枝起、曾應遴 河南 下聽先生。」因偏 ,張獻忠破楚、蜀,天下 而 門 下客盛順 輩 董 及諸閣 廷 獻 大亂 因 臣。 緣 延 然 爲 延

叉

宗周 延儒 行人司副熊開元廷劾 會昌時以年例出言路十人於外,言路大譁。 時 嘉興 御史光辰以救開元、埰罷,尚 人。 有幹材,頗爲東 延 儒納 賄狀, 林效奔走。 書石麒 觸帝 怒, 然 文 與給 以救宗周 爲 人 掌科給事中吳麟徵、掌道御史祁彪佳 墨而 事 中姜埰俱廷杖,下詔獄。 傲,通 等罷,延儒皆弗救,朝議皆以 廠衛,把持朝官, 同朝 左 都 咸 御 咎 史 劾 嫉

時挾勢弄權,延儒 頗不自安。

又傲同官陳演 初 延儒奏罷 演銜 廠衛 刺 骨 緝事,都人大悅。 掌錦衣者駱養性,延儒所薦也,養性狡狠背延儒 朝士不肖者因通路遺, 而 廠衞以失權, 與 中官結, 胥怨 延 刺

列

傳

中事。 費百金,以彰保全優禮之意。及廷臣議上,帝復諭延儒功多罪寡,令免議。 之,延儒席藁待罪,自請戍邊。 兵去, 軍。 太師,廕子中書舍人,賜銀幣、蟒服。 不得已自請視師。帝大喜,降手敕,獎以召虎、裴度,賜章服、白金、文綺、上駟,給金帛賞 延儒駐通州不敢戰,惟與幕下客飲酒娛樂,而日騰章奏捷,帝輒賜璽書褒勵。 陰 乃言敵退,請下兵部議將吏功罪。旣歸朝,繳敕諭,帝卽令藏貯,以識勳勞。 帝乃大怒,諭府部諸臣責延儒蒙蔽推諉,事多不忍言,令從公察議。 十六年四月,大清兵略山東,還至近畿,帝憂甚。大學士吳甡方奉命辦流寇,延 帝猶降溫旨,言「卿報國盡忱,終始勿替」,許馳驛歸,賜路 延儒辭太師,許之。居數日,養性及中官盡發所刺 延儒遂歸 陳演等公揭救 論功,加 偵 大 清 軍

共排 儒知帝怒甚,宿留道中,俟應熊先入,冀爲請。 意誅 門,親鞫昌時,折其脛,無所承,怒不解。 洩漏 儒 延儒 已而 延 一機密,重賄入手,輒預揣溫旨告人。 旣去,給事中郝絅疏請除奸,以指延儒。 養性 御史蔣拱宸劾吳昌時贓私巨萬,大抵牽連延儒,而中言昌時通中官李端、王裕民, 初,薛 復 騰 國 蜚語。 觀 賜死,謂昌時致之。 帝遂命盡削 延 拱宸面訐其通內,帝察之有迹,乃下 給事 儒 其門人魏藻德新入閣有寵,恨昌時甚,因 職, 帝不聽。 帝知之,應熊旣抵京,命之歸。 中曹良直亦劾延儒十大罪。 遣緹騎逮入 山東僉事雷縯祚糾范志完,亦及延 京師 時舊輔王 帝怒甚,御中左 獄 應熊被召,延 延儒至,安置 論死,始有 與陳演

正陽門 外古 廟, 上疏乞哀,不許。 法司以戍請,同官申救,皆不許。冬十二月,昌時棄市,

命勒延儒自盡,籍其家。

溫體仁,字長卿,烏程 人。 萬曆二十六年進士。 改庶吉士,授編修,累官禮部侍郎。

避嫌 理其 中顧 更科都給事中章允儒 上孤立於上,是以不得不言。」帝久疑廷臣植黨,聞體仁言,輒稱善。 主試浙江,所取 劾己也 仁揣帝意必疑,遂上疏訐謙益關節受賄,神奸結黨,不當與閣臣選。 順初,遷尙書,協理詹 不言。 事,帝心動。次日,召對閣部科道諸臣於文華殿,命體仁、謙益皆至。 其仁所摘,謙益 崇禎元年冬,詔會推閣臣,體仁望輕,不與也。 了辭頗屈,而體仁盛氣詆謙益,言如湧泉,因進曰:「臣職非言官不可言,會推不與,**宜** 但枚卜大典,宗社安危所係。 士錢千秋者,首場文用俚俗詩一句,分置七義結尾,蓋奸人給爲之。爲給事 亦自發其事。 爭尤力,且言:「體仁熱中觖望,如謙益當糾,何俟今日。」 事府事。 爲人外曲謹而 法司戍千秋及奸人,奪謙益俸,案久定矣。至是體仁 **謙益結黨受賄**,舉朝 中猛鷙,機深刺骨。 侍郎周延儒方以召對稱旨,亦弗及。 無一 人敢言者,臣不忍見皇 而執政皆言謙益無罪, 先是,天啓二年,謙益 謙益不虞體仁之 復

秋 耜 禍 時 此 大臣 卷 耳。 御史房可壯 謙 嵬 益皆 無 且千 竟,責 助 閒 秋 體 仁 謙 事 等,皆坐謙益黨,降謫 者 益 有 今者糾之,正 獨 成案,不 謙益 延 儒 引 必復 罪。 奏日 爲 [:「會推 問 歎 朝 諸 曰 廷 愼 「微體 臣。」帝乃卽 有 差。 名 用 雖 人 仁,朕 耳。 公,主持者止一二人,餘皆 日罷謙益官, 如允儒 幾悞 ( ) 遂叱 言, 乃眞黨 允儒 命議罪。 下認 也。」帝怒, 不敢言, 允儒及給事 獄,幷切責諸 命禮部進千 即言, 中瞿式 大臣。 徒取

璟 世。 南 重 奪 州 一人皆 在 京 繩 建 人 劉廷佐, 逆祠, 產 亡何,御 前 御 以 而 史沈 謙益 諸 法 **汴**,大理寺卿 無 不 宜 作詩頌 體仁復 希 死 人 法 史毛 各疏言:「臣等雜治千秋,觀聽者數千人,非一手一口所能掩。 坐。 詔 黨。 事。 左 袒 相 、魏忠賢。 詔 九華 力求 帝 帝怒其語褻,貶一 繼 臣 康新 令 論 更 心 再 劾 體 仁 居 體仁 以爲 去 勘。 民,太僕寺卿蔣允儀,府丞 孤立可 以 帝 熱中會推, 要帝、帝 然,獨召 下 體仁復疏 見。」帝 浙江 家 時,以抑買商 秩調 巡撫 1大學士 優詔 言獄詞皆出 劫言者以黨,帝皆不聽。 再 沼 覈實。 慰答焉。 外。 內閣 韓爌等於 體仁 人木,為商人所訴,賂崔呈秀 明年 九 謙益 已,給 卿質 . 乞罷 魏光緒,給 內殿,諭諸 春,御史任贊化亦刻體仁 手。 之,體仁 事 因言:「 中 於是刑部 事 祖 中 與 臣 重曄、南京 比爲 法司 陶崇道,御史吳甡、樊尚 九 不 憂國 華、贊化 謙 尙 上 益 書喬 手 一,惟 故, 秋 給 以免。 體仁顧欺罔求 詰辯 允升,左 獄 事 挾 排撃 娶娼 ,言謙 私 中 錢允鯨 良 相 叉因杭 臣者百 、受金, 人,言 攻 都 益 自 御

列傳第一百九十六 奸臣

華 孤立 所 論 體仁見于汴等詞 體仁 ,益嚮之。 媚璫詩,亦卒無左驗。 未幾,延儒 直,乃不復深論千秋 入閣。 當是時, 其明年六月,遂命體仁以禮 事, 體仁 惟眡于汴等黨護 以私爈撑拒諸 部 而 大 臣 尙 書兼 展轉不肯詘。 謙益 東閣 坐杖 大 論 學 贖 帝謂 而 體 九

解救 永光 傑言:「君子小 贊化先後 去, 捷 異 等爲腹心,忌延儒居已上,幷思傾之。 己者,率以部 體仁遂爲首輔 無何 主之, 殊 體 難, 仁旣藉延儒 幼延儒 如寵 將興大 體仁則佯日 人不並 亦去。 議論罷,而體仁陰護其事。 獄 體仁默爲 力得 立, 延儒 梁廷棟不敢任 「帝固不甚怒也。」善龍錫者,因薄 輔政,勢益 如 寵 旣罷,廷臣惡體仁當國 助, 瞻顧不 延儒遂発歸。 張。 前, 而 止,事 踰 初,帝殺袁崇煥, 則體仁宜思自處。」帝爲 年,東部尚 又用御史史堂、高捷及侍郎 詳龍錫傳。 始與延 ,勸帝復 書王永光去,用 儒 同 比龍錫 事牽錢龍錫,論 召如寵 入閣者 延 儒。 減死 謫 何 其後太監 紹傑於外, 如寵 如 其 出 龍,錢 唐世濟、副都御史張 鄕 獄 屢辭,給 人閔 死。 ,延儒 王 象坤 **坤、給** 體仁 洪 如寵 學代之, 言帝盛怒, 踰 事 一與延儒、 卒辭 中 歲 事 黄紹 中陳 致 政 凡

體仁惡其偪, 寬 一假,中上所忌,激使自怒。 體 仁荷帝殊寵,益忮横,而 乃以冒籍武生 事,奪希孟一官,使掌南院去。 帝往 中阻深。 往 爲之移, 所欲推薦,陰令人 初未嘗 有 迹。 發端,己承其後。 禮部侍郎羅喻義,故嘗與基命 姚 希孟 爲 講官、 以 欲排陷,故爲 才 望遷

因 謙 自 益 劾 同 推 二 日 閣 .辞 臣 進 有物 規例 望。 從 簡, 會進講章 喻義駁改不 中有「左右未得人」語, 從, 由 臣 .不能表率。」帝命吏部議, 體仁欲 去之, 喻 洪學等因謂 義 執 不 可

聰天亶,何俟喻義多言。」喻義遂罷歸。

黨,而 爲 捷 之。 舉逆 時 愈側目 案 世 魏忠賢 濟 呂 葬 純 諸 遺黨日望體仁 以 如 不附 薦逆案霍 以嘗帝。 己者 維華 言者 翻 逆案, 得罪 大譁,帝 去。 攻 亦甚 東 維華之薦,亦體仁主之也,體仁自是不敢訟言用逆 林。 惡之, 會吏部 捷 氣 尙 沮 書、左都 體仁不 御 ·敢言. 史缺, 一乃薦 體仁 謝陞 陰使 唐 侍 世 郞 濟

孟旣去,體仁惐未釋。 擬 注 鎭, 行 用 旨降 憚 ,謂言官 給 體仁 使原 事 文 不 震 中許 調 敢往 文 廟 孟 却 震驚 罷斥爲至柴, FII 譽卿 以講 不用。 ,體仁庇二人,罷 故 誤 重 春秋稱旨, 事,逐之去。 其 國孰 旣 詞。 庶吉士鄭鄤與震孟同建言,相友善也,其從母舅大學士吳宗達已謝 而 大焉。」體仁素忌 蓋 賊大 帝果 以朝廷賞罰 命入閣。 其 至,焚皇陵。 先是,秦、楚 命削 議。 籍, 賊 體仁不能沮,薦其黨張至發以問 爲不足懲勸,悖 震孟力爭之,大學士何 犯 譽卿 鳳陽,南京 盜 譽卿 起,議設 7,見疏 言「體仁納 急 兵部尚 五省總督,兵部侍郎彭汝楠 憾。 理 茂 會謝陞 法。 賄庇 書呂維祺等議,令淮撫、操 吾騶助 帝遂逐震孟 私,貽憂要 以營求北 爲言。 之,而 地 日伺 缺劾譽卿 體仁 并 以以 罷 震孟 、汪慶百 皇陵 吾 計奏震孟 短, 體 爲 江 移 當 孤 逐

而 政 歸 帝怒鄤甚,不俟左 體仁劾鄭假乩 証, 仙 判詞,逼 磔死。 滋 父振先杖母,言出宗達。 陽 知 縣成德,震孟門人,以强直忤巡按御史禹好善,被 帝震怒,下鄤獄。 其後體仁 ·已去,

劾

、震孟

爲不平。

宗藩 誠 帝 昭 時 萬 | 効倪元璐,給 `)體仁言:「臣票擬多未中窾要,每經御筆批改,頌服將順不暇,詎能窺 毎 愈親信之。 流寇躪畿輔,擾中原,邊警雜沓,民生日困,未嘗建一策,惟 事件 訪 死不足塞責。 體仁輔政數 兵餉 帝指,竟下獄削 事, 輒 事中陳啓新劾黃景昉, 年,念朝 體仁劾德,杖戍之。 遜謝曰:「臣夙以文章待罪禁林,上不知其駑 顧臣愚無知,但票擬勿欺耳。 籍。 士多與爲怨, 其所引 與同 皆奉體仁指。 不敢恣肆,用廉謹自結於上,苞苴不入門。 列者, 皆庸材,苟以充位,且藉形己長, 兵食之事,惟聖明裁決。」有詆其窺帝意旨 禮部侍郎 下,擢至此 陳子壯 日 與善類 嘗 爲 一 面 責 位。 上旨。」帝以爲樸 仇 體仁 盗賊 誠意伯 , 固 日 郣 然當是 益 上龍 以議 劉 衆, 孔

之,言於帝,僅釋十餘人。 核,迎合帝意。 師, 進吏部 自體仁輔 尚書、中極殿大學士,階左柱國,兼支尚書俸,恩禮 政後,同官非病免物故,卽以他專去。 帝以皇陵之變,從子壯言,下詔寬恤在獄諸臣,吏部 秋決論囚,帝 再三諮問,體仁略無平反。 獨體仁居位八年,官至少師兼太子太 優渥無與比。 陝西華亭知縣徐兆麟涖 以百餘人名 而體仁專 上。 體 仁靳 務 刻

列

助 任 甫 修 七 城 日 , 而 以 已。 城 陷 所 論 J: 死 密 , 揭 帝 帝 頗 率 疑 報 之。 미 體 仁不 爲救, 竟 棄 市。 帝憂 兵餉 急, 體 惟 倡 衆

吉 丽 亦皆 危 有 將 示 中 化 ,冀以 罪、六奸 甚 再 張 興 士 淳 漢儒 劾 張 論 體 大 求 體 獄 溥 之, 仁 化淳 解 滅 時十 十 仁,帝命漢儒等立 自念 訐 光先 於 迹, 皆 知縣 嚴旨 錢 懼 司 车 謙益 (有指: 以故 排 禮太 ,自請案治, 至 六 ·察治, 張采等倡 擠 東槻 月也。 翟 實。 者 所 監曹化 衆 中 式 待 以提 宗藩 傷 、恐怨 命。 踰 耜 爲 人, 乃盡 枷 淳。 居 復社 年卒, 學御 如 死。 鄉 帝皆不省,愈以 歸 廷臣 唐 漢儒 得 己, 不 史 王 帝 體 漢 法 與 不能 倪 僧言 聿 獪 儒 仁 偵 事 東 元 鍵 借 等 乃佯引 o 林 知 珙 盡 ",勳 密 奸狀 之, 體仁故讐 之,贈太傅,諡文忠。 相 知 海 勿之地 應 臣 0 爲孤 告 體 道 及體仁密謀 疾,意帝必慰 和 如 當 副 0 撫 或 立 , 使 謙 體 寧 不 旣 馮元 益 毎 侯 宜 久 體仁 斥責 因 朱 宣 擬旨 颺 劾者章 推 或 留。 密奏帝, 不承 官 獄 言者 丽 逮二人下 上,帝 凡 周 , 及 布 風 閣 之夔 不 以慰之,至 得 指 衣 勝 揭 :旨竟: 請 始悟體仁 如 皆 及奸 計 皆降 幷 韶 何 ٠, 不 放 坐化 獄 儒 而 發, 人陸文 歸 ·謫之。 有 劉宗 嚴 顯 有 淳 幷不 杖 湉 楊 體仁方食, 黨 罪 死 周 摩託 光先 最 者。 謙 劾 存 帝 會國 益 後 錄 其 以 等 復 庶 閣

復 如 初 崇禎 末,福王立於南京 體仁雖前死 了,其所推薦張至發、薛國觀之徒,皆效法體仁,蔽賢植黨,國 一以尚 書願 錫 | 疇議 削 其贈諡 一,天下 快焉。 尋用給 事 事日壞,以 中 戴英言

|坤所發,坐遣戍。尋流寓||南京。時||大鍼名掛逆案,失職久廢,以避流賊至,與||土英相結甚歡。 五年,擢右僉都御史,巡撫宣府。 京 戶部主事。天啓時,遷郞 馬士英,貴陽人。 萬曆四十四年,與懷寧阮大鍼同中會試。 中,歷知嚴州、河南、大同 到官甫一月,檄取公帑數千金,餽遺朝貴,爲鎭守太監王 三府。崇禛三年,遷山西陽和道副使。 又三年,士英成進士,授南

其刺。 大鋮憤甚,私謂所親曰:「我猶善歸,未知左氏何如耳。」已而楊、左諸人獄死,大鋮對客翻翻 煥爲死友,造百官圖,因文煥達諸忠賢。 等以察典近,大鍼輕躁不可任,欲用魏大中。 大中疏。 大鍼倚爲重。 大鋮機敏猾賊,有才藻。 居數 尋召爲太常少卿,至都,事忠賢極謹,而陰慮其不足恃,每進謁,輒厚賄忠賢閣人,還 吏部不得已,更上大鋮名, 月, 四年春,吏科都給事中缺,大鍼次當遷,光斗招之。 復乞歸。 忠賢旣誅, 天啓初,由行人擢給事中,以憂歸。 即得請。 大鍼函兩疏馳示維垣。 然畏東林攻己,未一月遽請急歸。 大鋮至,使補工科。 大鍼自是附魏忠賢, 其一專劾崔、魏。 大鍼心恨,陰結中璫寢推 同邑左光斗為御史有 而趙南星、高攀龍、楊連 與霍維華、楊維垣、倪文 而大中掌吏科, 其一以七年

列

僔

第

得志 魏 林。 御史毛羽健劾其黨邪,罷去。 合算爲言,謂天啓四年以後, 爲邪黨,與編修倪元璐相詆,得大鍼疏,大喜,爲投合算疏以自助。 傳語維垣,若時局大變,上劾崔、魏疏,脫未定,則上合算疏。 亂政者忠賢, 明年定逆案,論贖徒爲民,終莊烈帝世,廢斥十七年,欝欝不 而翼以呈秀,四年以前, 會維垣方並指東林、崔、 亂政者王安, 崇禎 元年,起光祿卿。 而翼以東

侍 何 求湔濯。 防亂揭逐之。 樞 郞 如 蕪湖沈士柱、餘姚黃宗羲、鄞縣萬泰等,皆復社 ? 王錫袞薦士英才,延儒從中主之,遂起兵部右侍郎兼右僉都御 流 **| 瑶草,土英別字也,延儒許之。** 寇偪皖,大鋮避居南京,頗招納遊俠爲談兵說劍,覬以邊才召。 延儒 大鋮懼,乃閉門謝客,獨與士英深相結。 日:「吾此行,謬爲東林所推 十五年六月, 0 子名在逆案, 中名士,方聚講南京,惡大鍼甚, 鳳陽總督高斗光以失五城逮治。 周延儒內召,大鋮輦金錢要之維揚 可乎。」大鍼沉吟久之,曰:「瑤草 史,總 無錫顧杲、吳縣 督廬、 作留都 鳳等處 楊 禮 廷

家中, 得。 李自 永 以私怨殺御史魏景琦等三家,遂據城反。 城 成 人劉超者,天啓中以征安邦彥功,積官至四川遵義總兵官,坐罪免,數營復官不 圍 開封,超請募土寇協擊,乃用 爲保定總兵官,令率兵赴救。 巡撫王漢討之,被殺。 帝乃命士英偕太監 超憚不敢行,宿留

列 傅 第 百 九 + 六 奸 臣

朝,安用此。」手解其刀。 州 盧九德、河南總兵官陳永福進討。 時, 與士英相識, 緣舊好乞降。 已,潛去其親信,遂就縛。 **士英佯許之,超出見,不肯去佩刀。** 明年四月,圍其城,連戰,賊屢挫,築長圍困之。 獻俘於朝,磔死。 時流寇充斥,士英捍 士英笑曰:「若旣歸 超官貴

禦數有功。

福王 清、黃得功、劉良佐等結,而公致書於參贊機務兵部尙書史可法,言倫序親賢,無如福王。 可法意未決。及廷臣集議,吏科給事中李沾探士英指,面折大器。 往來遊 器,而右都御史張愼言、詹事姜曰廣皆然之。 王立, 則無後患, 且可邀功。 俱避賊至淮安,倫序當屬福王。 至江 十七年三月,京師陷,帝崩,南京諸大臣聞變,倉卒議立君。 說。 上,諸大臣乃不敢言。 時士英督師廬、鳳,獨以爲不可,密與操江誠意伯劉孔昭, 陰主之者,廢籍禮部侍郎錢謙益,力持其議者兵部侍郎呂大 王之立,士英力也。 諸大臣慮福王立,或追怨「妖書」及「挺擊」、「移宮」等案,潞 前山東按察使僉事雷縯祚、 而福王由崧、国路王常芳 士英亦自廬、鳳擁兵迎 總兵高傑、至劉澤 禮部員外郎周鑣

戶部尚書高弘 「我不可,士英何不可。」於是進士英東閣大學士兼兵部尚書、都察院右副都御 監國時,廷推閣臣,劉孔昭攘臂欲得之,可法折以勳臣無入閣例。 圖並命,士英仍督師鳳陽。 士英大 愠, 令 高傑、劉澤淸等疏趣可法督師淮、 孔昭乃訟言: 史,與可法及

扈 明 九 月, 年, 有 一而 異志 敍江 進太保。 士英留 北 而 輔 歷年 士英 當是時, 政, 戰 爲 仍掌兵部, 功, 人貪鄙無遠略,復引用大鍼,日 中原郡縣盡失,高傑死 加 少 傳兼太子太師、建極 權震 中外。 尋論 雕 定策功, 州,諸鎮權 殿大學士, 事報復,招權罔利,以迄於亡。 加太子太師, 侔無統。 廕子 如 前 廕錦 左良玉 十二月, 衣 衛指 擁 兵 Ŀ 進 揮 一流,跋 少師 僉事

柳 逆案巨魁,不可 中、左光斗,且指 冠 因 之,而薦 鋮 祚昌薦, [六] 中旨起大鍼兵部添註右侍郎。 一帶陛 贊 極 欽定逆案一書,不可擅改。 口 周 有詔 初 而 見。 稱 遍結之, 大鍼知 可法、弘圖 以大學士高 廣搜 大鍼才,士英亦言大鍼從山 大鋮 人材, 召。 為羣奄言東林當 兵。 大中爲大逆。 乃上守江策,陳三要、兩合、十四隙疏 及姜曰廣、張愼言等皆宿德在位,將以次引 士英爲大鍼奏辨,力攻曰廣、大器,益募宗室統鐁、建安王統鏤輩,連疏 初,大鍼在南京,與守備太監韓贊周暱。 獨言 弘 圖 爲御史時嘗詆東林,必當右己,乃言「弘圖素 逆案不可輕議。 於是大學士姜日廣、侍郎呂大器、懷遠侯常延齡等並言大鍼 旧所 士英與爭,弘圖 中 以危貴妃、福王者,俾備言於王, 致書與定策謀,爲白其附璫贊導無實 士英令孔昭及侯湯國祚、 左都御史劉宗周言:「殺大中者魏璫, 因乞罷。 ,幷自白孤忠被陷 士英意稍折,遲迴 京師陷, 海內 人望,而士英必 伯 以潛 中貴 知 「痛詆 趙之龍等攻愼 臣 傾 者 人悉南 月餘,用安遠侯 跡 可 孫愼行、魏 法等。 弘圖 遂命 奔, 大鍼其 欲 大鋮 羣奄 則言 大鋮 起

命。」有旨 使 也。 切責。 卽 才果足用, 未幾,大鍼兼右僉都御史,巡閱江防。 臣慮黨邪害正之才,終病世道。 尋轉左侍郎。明年二月進本部尚書 大鋮進退,實係江左興亡, 乞寢成

兼右副都御史,仍閱江防。

悲出語 林, 秘 錢 贈 倷 漢、五十三參之目, 逆案,吾作順案 政 盡 朝朝 卹 中 濁 謙益先已上疏頌 起逆案中楊維垣、虞廷陛、郭如 故重劾之。 亂 , 而 官田 呂 初, 士皆自危,而 防賄 大器、姜曰廣、劉宗周、高弘圖、徐石麒皆與士英齟齬,先後罷歸。 不類,爲總督京營戎政趙之龍 舉 與張捷、唐世 成輩,外結 朝 賂 公行。 以逆案攻大鋮,大鋮惐甚。及見北都從逆諸臣 與之對。」以李自成偽國號 大鍼又誣遠顧杲及左光斗 士英 書史 士英,且爲大鍼訟冤修好矣,大鍼憾 四方警報狎至,士英身掌 勳臣劉孔昭、朱國 濟等比 不 可法、高弘圖 欲 與大 若張孫 獄,乃當大悲妖言律斬而 闇、周昌晉、虞大復、徐復陽、陳以瑞、吳孔嘉;其死者悉予 所捕。 振 、姜曰廣等姓名, 弼、柳祚昌,鎭將劉澤淸、劉良佐等, 、袁弘勳 日順 弟光先 大鉞欲假以誅 中樞,一無籌畫,日 也。 、劉光斗皆得罪先朝,復置言路爲 下獄, 士英因疏糾從逆光時亨等,時亨名附 不 內大悲袖 劾 釋,亦 東林 周鑣 止 有附會淸流者,因倡言 列焉 及素所不合者,因造十八羅 、雷縯祚殺之。 中, 以鋤正 ,將窮治其 海內 人引兇黨 士英獨握 人望, 而一聽 事 時有 無 曰:: 爲 爪 大鍼 不備列 大柄,內 獄詞詭 狂 牙。 務 彼攻 僧 朝 東

耶? 侍 兵 州 立 北 部 講 躋 Ш 未 大帥 衞 右 乃史公 西 幾引 侍 胤 縉 鄓 文 彦 河 還。 妙 南 兼給事中 都 以 總督傑營將 用 人 軍 本 史可 · 務, 也。 爲語日 兵首從賊,賊敗 便宜 法以聞 、監高傑 歲將暮 「職方賤如 一行事。 士以分其權,可 一, 防 士 軍 ,縉彦 河 英大笑不 其他大僚降賊者, 傑死, 將 狗 吏應 意歸 ,都督滿街走。」其 法益 胤文窺 敍 止,坐客楊士聰 河南 功,耗費 不得展布 土英指、 ,自言集義勇收 賄 軍資 入, 刑賞倒 輒 論 應稽算,此特爲序 問 故。 可法 復其官。 . 亂 復 上英日 督師爲贅。 如 列 此。 城, 諸 [三]君以 白 卽授 大清 1 功、稽算 士英 原官, 兵抵 隸 爲 役 刨 誠有是事 宿遷 輸 擢胤 總督 地 重 耳。 邳 文 TI

**伴**引 搖首 故都督掌錦衣衛劉僑者,嘗遣戍, 監 獻 巡 且 韓贊 忠偽 按 馬公去, 疾 不言者久之,贊周即執志孔候命。 御 先 兵部 。 而 周 史黃澍 是,左良玉接 ηŁ 誰念上者。」王默然, 賂 志孔 尙 福邸舊奄田成等向王泣 書周文江 入賀,陰伺 退,士英跪乞處分,澍舉笏直擊其背曰:「願 監 國部 .重賄,爲題授參將,罪當 朝廷動 書,不肯拜,袁繼咸强之,乃開讀如禮。 静。 即慰留 由周文江賄張獻忠,受爲命,爲錦衣指揮使。 日 士英。 王因澍言意頗動 : 「上非馬公不得立,逐馬公,天下 將議上背恩矣 良玉勢,當陛見,面數士英奸貪不法,且言嘗受脹 士英亦畏良玉 斬。 志孔 夜 亦論士英罔上行私諸罪。 諭 《與奸臣同死。」士英大號呼,王 ,請釋志孔,而 一 費 周, 而屬承天守備 欲令士英避位。 命澍速還湖廣 及良玉復 何志孔 司禮 士英

言,逮 蘄 已,乃発逮。 、黄、僑 澍。 削髮逃 良玉令部將羣譁,欲下南京索餉,因保救澍。 澍 遂 匿 去,澍持之急。 良玉 軍 中,良玉 而 士英納僑賄,令計澍 與士英由此 有隙。 及僞 ,遂復僑官,削澍 袁繼咸為上疏代澍 太子獄起,良玉遂假 職。 申理 尋以楚府 為兵 士英不得 端端 中尉

諸幽囚。 督撫 甚者,借三案爲題,凡生平不快意之人,一網打盡。令天下士民,重足解體。目今皇太子 至,授受分明。 **童豔女,傷損盛德。** 黄鼎等,或行同 其杰貪婪遣戍,濫授節鉞。 士 斥士英等爲奸臣。又以士英裁其餉,大憾,移檄遠近,聲士英罪。 王 滅 英利災擅 一士伏皇城,跪名禁軍,動曰廢立由我。陛下卽位之初,恭儉明仁,士英百計誑惑,進優 絕倫 、鎭將交章爭太子及童妃事。 太子之來也,識者指其僞,而都下士民譁然是之。 凡有 理 權,事事爲難。 血氣,皆欲寸磔士英、大鋮等,以謝先帝。 澍在良玉軍中, 大鋮一手握定抹殺識認之方拱乾,而信朋謀之劉正宗,忍以十七年嗣君,付 狗彘,或罪等叛逆,皆用之當路。己爲首輔,用腹心阮大鍼爲添 復引用大鍼,睚眦殺人,如雷縯祚、周鑣等,鍛煉周內,株連蔓引。尤其 張孫振贓污絞犯,驟畀京卿。 逆案先帝手定,上英首翻之。要典先帝手焚,上英復修之。 日夜言太子冤狀,請引兵除君側惡。 王亟 出獄詞, **福示中外**, 時又有童氏者, 乞立肆市朝, 傳首抒憤。」 疏上, 遂 他如袁弘勳、楊文驄、劉泌、王燧、 衆論益籍籍,謂 復上疏言:「自先帝之變, 良玉亦上疏 自稱王妃, 士英等朋奸,導 註尙書。 請 亦下 全太子, 獄 越 又

列

傳

引兵而東。

京城。 若輩高官,我君臣獨死耳!」力排思孝等議,淮、揚備禦益弱。會良玉死,其子夢庚連陷郡 西。 縣,率兵至采石。得功等與相持,大鍼、孔昭方虛張捷音,以邀爵賞,而大淸兵已破揚州,逼 |土英厲聲叱曰:「若輩東林,猶藉口防江,欲縱左逆入犯耶? 北兵至,猶可議款。|左逆至,則 時大清兵日南下,大理少卿姚思孝,御史喬可聘、成友謙請無撤江北兵,亟守淮、揚。 士英懼,乃遣阮大鍼、朱大典、黃得功、劉孔昭等禦良玉,而撤江北劉良佐等兵,從之

即大器等之所議欲立者也。 已兵敗死,王被擒。 而去。走杭州,守臣以總兵府爲母妃行宮。 人爲衞,走浙江。 五月三日, 王出走太平, 奔得功軍。 孔昭斬關遁。 經廣德州,知州趙景和疑其詐,閉門拒守。 次日,請潞王監國,不受。未幾,大兵至,王率衆降,尋同母妃北去。 。不數日,大鍼、大典、方國安俱倉皇至,則得功 明日,士英奉王母妃,以黔兵四百 士英攻破,執景和殺之,大掠

逐,大典乃送之嚴州總兵方國安軍。 談兵,國安甚喜。 杭州 、旣降, 士英欲謁監 而士英以南渡之壞,半由大鍼,而己居惡名,頗以爲恨。 國魯王,魯王諸臣力拒之。大鍼投朱大典於金華,亦爲士民所 士英, 國安同鄉也, 先在其軍 中。 大鍼掀髯指掌, 已,我兵擊敗士 H

英、國安。 |鍼方遊山,自觸石死,仍戮屍云。 搜龍扛,「一〕得士英、大鍼、國安父子請王出關爲内應疏,遂駢斬士英、國安於延平城下。 欲人閩,唐王以罪大不許。明年,大兵剿湖賊,士英與長興伯吳日生俱擒獲,韶俱斬之。 乘載士英遁至台州山寺爲僧,爲我兵搜獲,大鍼、國安先後降。 具國史。 大鍼偕謝三賓、宋之晉、蘇壯等赴江干乞降,從大兵攻仙霞關,僵仆石上死。 無何、士英、國安率衆渡錢塘、窺杭州、大兵擊敗之、溺江死者無算。 尋唐王走順昌。 士英擁殘兵 我大兵至, 而野 事

### 校勘記

亦首仲亨及唐勝宗費聚趙庸三侯與惟庸共謀不軌 趙庸,原作「趙雄」,據本書卷一〇五功臣世

表、卷一二七季善長傳改。

會其子錦衣千户懌思以齋祀停封章日請假送父 · (世宗實録卷四五一嘉靖三十六年九月辛亥條補 懌思,原脱「思」字,據明史稿傳一八一趙文華

へ = 兄素儒冒錦衣籍 兄素儒,本書卷二三三姜應麟傳作「弟素儒」。

四 而福王由崧 由松,原作「由松」,據本書卷一二〇福王傳改。

Æ. 總兵高傑 高傑,原作「高杰」。 本書卷二七三有高傑傳,事跡與此合,據改。 本傳下文也作「高

列傳第一百九十六 校勘記

傑」。

(七) 捜龍扛 「六」用安遠侯柳祚昌薦 **龍扛,小腆紀年附考卷一三、小腆紀傳卷六二馬士英傳及阮大鋮傳都作「龍槓」,疑** 柳祚昌,本書卷一〇六功臣世表作「柳昌祚」。

「扛」字應從木作「杠」。

# 明史卷三百九

# 列傳第一百九十七

#### 流賊

延,幾危宗社,而卒以掃除。莊烈帝勵精有爲,視武宗何啻霄壤,而顧失天下,何也?明興 樂中,唐賽兒倡亂山東。厥後乘瑕弄兵,頻見竊發,然皆旋就撲滅。惟武宗之世,流寇蔓 盡凘,國脈垂絕。 旣專,旁撓絕少,以故危而不亡。莊烈帝承神、熹之後,神宗怠荒棄政,熹宗暱近閹人,元氣 餘年,仁澤深而人心固,元氣盛而國脈安。雖以武之童昏,亟行稗政,中官倖夫,濁亂左右, 百年,朝廷之綱紀旣肅,天下之風俗未澆。 而本根尙未盡撥,宰輔亦多老成。 盗賊之禍,歷代恒有,至明末李自成、張獻忠極矣。史册所載,未有若斯之酷者也。永 向使熹宗御宇復延數載,則天下之亡不再傳矣。 **迨盗賊四起,王瓊獨典中樞,陸完、彭澤分任閫帥,委寄** 孝宗選舉賢能,布列中外,與斯民休養生息者十

九十七 流賊

列傳第

百

行間未覩|李、郭之將,卒致宗社顚覆,徒以身殉,悲夫! 亡國之運,又乏救亡之術,徒見其焦勞瞀亂,孑立於上十有七年。 哉。 疽毒並發,厥症固已甚危,而醫則良否錯進,劑則寒熱互投,病入膏肓,而無可救,不亡何待 權中制,功過莫償。敗一方卽戮一將,隳一城卽殺一吏,賞罰太明而至於不能罰,制馭過嚴 過不給,人懷規利自全之心。言語戆直,切中事弊者,率皆摧折以去。 失措。當夫羣盜滿山,四方鼎沸,而委政柄者非庸卽佞,剿撫兩端,茫無成算。 能灼見於中,不搖於外也。且性多疑而任察,好剛而尙氣。任察則苛刻寡恩,尙氣則急遽 而至於不能制。 是故明之亡,亡於流賊,而其致亡之本,不在於流賊也。 莊烈雖銳意更始,治核名實,而人才之賢否,議論之是非,政事之得失,軍機之成敗,未 莊烈之繼統也,臣僚之黨局已成,草野之物力已耗,國家之法令已壞,邊疆之搶攘已 加以天災流行,饑饉洊臻,政繁賦重,外訌內叛。譬一人之身,元氣羸然, 嗚呼!莊烈非亡國之君,而當 而帷幄不聞良、平之謀, 」 其所任爲閩帥者,事 內外大臣救

自唐賽兒以下,本末易竟,事具剿賊諸臣傳中。獨志其亡天下者,立李自成、張獻忠傳。

## 李自成 張獻忠

李自成,米脂人,世居懷遠堡李繼遷寨。父守忠,無子,禱於華山,夢神告曰:「以破軍

犯 星 法 爲若子。」已,生自成。 知縣 晏子賓捕之,將置諸死,脫去爲屠。 幼牧羊於邑大姓艾氏,及長,充銀川驛卒。 天啓末,魏忠賢黨喬應甲爲陝西巡撫,朱童 善騎射,鬭 很 無賴 數數

蒙爲延綏巡撫,貪黷不詰盜,盜由是始。

聚 耿 劉 撫 左 張 如 應 衆 應之。 杷 掛 夢鯨恚死,承疇代之,召故總兵杜文煥督延綏、固原兵,便宜剿賊。 遇擊斬王二、王大梁,參政洪承疇擊破王左掛,回號稍稍懼。 崇禎 勤 王 元 兵譁而西,延綏總兵吳自勉、甘肅巡撫梅之煥勤王兵亦潰,與羣盜合。 飛山虎、大紅狼 年, 迎祥自稱闖王,大梁自稱大梁王。 陝西大饑,延綏缺餉,固原兵劫州庫。 等,一時並起。 有安塞馬賊高迎祥者,自成舅 二年春, 白水賊王二,府谷賊王嘉胤,宜 韶以楊鶴爲三邊總督,捕 會京師戒嚴, 也,與饑民王大梁 之。 山西巡撫 延綏巡 參政 ]]] 賊

甫川 子、李老柴、混天猴、獨行狼諸賊,所在蜂起,或掠秦,或東入晉,屠陷城堡。 兵部郎中李繼貞奏曰:「延民饑,將盡爲盜,請以帑金十萬振之。」帝不聽。 姦,民大困。 不 聽,從神木渡河犯山西。 、清水、木瓜三堡,陷府谷、河曲。 三年,王左掛、王子順、苗美等戰屢敗,乞降。而王嘉胤掠延安、慶陽間,楊鶴撫之, 以給事中劉懋議,裁驛站,山、陝游民仰驛糈者,無所得食,俱從賊,賊轉盛 是時, 秦地所徵日新餉,日均輸,日間架,其目日增,吏因緣爲 又有神一元、不沾泥、可天飛、郝臨菴、紅軍友、點燈 而嘉胤已襲破黃 官兵東西奔擊,

列

傳

第

贼 或降或 死,旋滅旋熾。 延安賊張獻忠亦聚衆據十八寨,稱八大王

地 楊鶴撫賊不效被逮,洪承 十六營,衆二十餘萬,聚山西。 天、閻正虎、滿天星、破甲錐、那紅狼、上天龍、蝎子塊、過天星、混世王等及迎祥、獻忠共三 略定。 其黨共 四 年 而 Щ 推王自用號紫金梁者爲魁。 孤 Щ 西賊大盛 副將曹文詔破賊 剽掠寧鄉、 ·疇代鶴,張 自成 河曲, 石樓、 福臻代承疇,督諸將曹文詔、楊嘉謨剿賊,所向克捷,陝 乃與兄子 王嘉胤 自用結羣賊老回回、 稷山 過往從迎祥,與獻忠等合, 遁去。 聞喜、河津 已, 間 復自岳陽突犯澤 曹操、 八金剛、 號闖將,未有名。 潞, 掃地王、射場 爲左右所

責 駐 以 (以
汾 平陽 許鼎 狼 五. (、上天 、太、沁、遼三十八州 年, ,責以平陽、澤、潞四 臣 代之,與宣大總督張宗衡 賊分道 龍據吳城, 四出, 窺汾州 連陷大寧 十一 縣。 ,自用、獻忠 州縣。 賊亦 分督諸將。 隰州、澤州 轉入磨盤 鼎臣 突沁州、武鄉、陷遼州 督張應昌、 山,分衆爲三: 宗衡督虎大威 、壽陽諸州縣, 頗希牧、 閻 、賀人龍、左良玉等兵 全晉震動 IE 艾萬年 虎據交城、文水、窺 o 兵七 乃罷 千人, 巡撫宋 駐 八 汾州 統殷 、千人,

等合剿 怒,敗約去。 六年春,官 屢戰皆大克, 會總兵官 兵 、共進 力擊。 前後殺混世王、滿天星、姬 曹文詔 率陝西 自用懼,乞降於故錦衣僉事 兵至,偕諸 將 關鎖 猛 如 翻 虎 山動、掌世王、顯道神等,破 張道濬 、虎大威 。約未定, 、頗希牧 、艾萬 陽和 兵襲之。 年、張應昌 自用 賊

獻忠、老回 回、蝎 子塊、掃地 王 諸 賊。 其後, 自用 又爲川將鄧 殺之。 Щ 西三大盗 俱 敗。

遣 不 走。 下 敢 總 抵 進。 別賊 兵倪龍、王樸 初, 武安, 贼 復闌 之破澤州也, 敗總兵左良玉, 入西山 率京營兵六千人,與諸將並進。 , 大掠順德、 分其衆, 河北三府焚劫殆偏 南踰 眞定間。 太行 掠 大名道盧象昇 濟源 潞王 賊聞 清化 之,欲從河內走太行。 上疏告急 修武 力戰却賊。 一、圍懷 ,兼請衞 慶。 賊自邢臺摩天嶺西 鳳 官軍擊之, 泗 文詔邀擊之, 陵寢 城遁 詔特

後, 陽、汝寧, 克, 逸, 會天寒河冰合,賊突從毛家寨策馬徑渡。 廣元,逼四川,所在告急。 御史復劾其驕倨,調大同總兵去。 阻於河, 左良玉 河南巡撫玄默率諸將盛兵待之,賊竄 賊之敗於山西者,亦奔河北合營,迎祥、自成、 入棗陽、當陽, 湯 大因 九州等扼其前, 賊素畏文韶、道濬,道濬先坐事遣戍,文詔轉戰秦、晉、河北,遇賊輒大 届 湖 廣。 連戰於靑店、石岡、石坡、牛尾、柳泉、猛虎村,屢敗之。 巡撫唐暉斂兵守境。犯歸、巴、夷陵等處,破夔州 賊遂詭辭乞降, 監軍太監楊進朝信之, [三] 爲入奏。 入盧氏山中,由間道直走內鄉,掠鄖陽,又分掠南 河南諸軍無扼河者,賊遂連陷澠池、伊陽、盧氏三 獻忠、曹操、老回 回等俱至。 京兵蹙其 ,區攻 賊 欲

七 年春,特設山、陝、河南、湖廣、四川總督,專辦賊,以延綏巡撫陳奇瑜爲之,以盧象昇 列 傅 第 百 九 + 七 流 賊 七九五

撫治 進 鄖陽 ),師次 烏林關,斬賊 奇 瑜 破賊延水關有威名, 數千級。 賊走漢南,奇瑜以湖廣不足憂,引 而象昇歷戰陣知兵也。 於是奇瑜自均州人,與象昇 兵西撃

商、雒, 矣。 卽大譟, 盡屠所過七州縣。 奇瑜左右,詐降。 廣思、李雙喜、顧君恩、高傑等自爲一軍。 始,賊自澠池渡河,高迎祥最强, 自成等陷於興安之車箱峽。 奇瑜意輕賊,許之,檄諸將按兵毋殺,所過州縣爲具糗傳送。 而略陽賊數萬亦來會,賊勢愈張。 會大雨兩月,馬乏芻多死,弓矢皆脫,自成用君恩計,賄 自成屬焉。 過、傑善戰, 及入河南,自成與兄子過結李牟、愈彬 君恩善謀。 奇瑜坐削籍,而自成名始著 及奇瑜兵至, 賊甫渡棧, 獻忠等奔

總兵左 終南 洮 疾, 上蔡,燒汝寧 鳳翔諸府 勿憂也。」未 Щ 光先 洪承 已而 與人龍 郛。 數十州縣 ·疇代奇瑜, 李喬巡撫陝西,吳甡巡撫山西。 東 幾,西寧兵變, 出,陷 合擊,大破之。 陳州 敗賀 、靈寶、汜水、榮陽。 人龍、張天禮 承疇 一賊,與 會朝 甫受命而 廷亦命豫、楚、晉、蜀兵四道 山東巡撫朱 軍 ,殺固原道陸夢龍。 東,聞變遽 聞左良玉 大典弁 返。 將至,移壁 大學士溫體仁謂姓曰:「流賊癬疥 力擊,賊 迎祥 、自成遂入鞏昌、平涼、臨 重 入陝,迎祥、自成 一梅山 偵 隴州四十餘日,承疇檄 之。 、溱水間。 部賊拔 逐竄 入

八年正月大會於滎陽。 老回回、 曹操、 革裏眼、左金王、改世王、射場天、横天王、混十

乃

命

承嚋

出關追

知

東 眼 萬 、左金 、過天 方, 猶 奮, 老回 王當 星、九條 況 回、九 十萬 川、湖兵,横天王、混十萬當陝兵,曹操、過 衆乎! 條龍往來策應。 龍、順天王及迎祥、獻忠共十三家七十二營,議拒敵,未 官 兵 無能 爲 陝兵銳,益以射塌 也。 宜分兵定所 向,利 天、改世 天星 鈍 扼 聽 之天。」 河上, 所 破城邑,子女玉 迎祥、獻忠及 一皆日 決。 善。 自成 自成 乃議 進 一帛惟 等略 革裏

衆

如

自

成

鶴 飮。 運 出出 都 鳴。 兵單 御 一合,復入陝西。 自成 先 史楊 ,固始、霍丘 乘勝 是,南京兵部尚書呂維祺懼賊南犯,請加防鳳陽陵寢,不報。 從獻忠求皇陵監小閹善鼓吹者,獻忠不與。 陷 鵬棄市,以朱大典代之,大徵兵討賊。 鳳陽,焚皇陵,留守署正朱國相等皆戰死。 俱失守。 獻忠獨東下廬州 賊燔 壽州,陷潁州 ( ) 知州 尹夢鼈 賊乃大書幟曰古元眞龍皇帝,合樂大 自成怒,偕迎祥西趨歸德,與曹操、過 事聞,帝素服哭,遣官告廟。 州 判趙 士寬戰死 及迎 祥、獻忠東下 一般故 尚 書張 逮 漕

湖廣、 出, 焚掠西安、平凉 大掠富平、 承疇 河南、鄖陽諸關 方馳至汝州 寧州 、鳳翔諸 隘,召曹文詔爲中軍。 老回回、 命諸將左良玉、湯九州、尤世 郡。 獻忠、 承疇亟還救,分遣諸將擊老回回等, 曹操、蝎子塊、過天星諸賊 文詔未至, 玘以兵亂死。 一威、徐來朝、陳永福 了, 聞 承壽出 令副 迎祥、自成從終南 、鄧玘、張應昌分扼 總兵劉成功、艾萬 關 ,先後皆走 狹 Щ

年 陽 照 關 擊迎祥 西安城 守關將徐來臣軍潰死,尤世威中箭遁。 中。 、自成於寧州。 承疇 力禦之涇陽、三原間,決死戰,賊不得過。 萬年中伏戰死,文詔怒,復擊之,亦中伏戰死。 於是羣賊皆出關,分十三營東犯,而迎祥、自 獻忠、老回回等由他道轉突朱 羣 賊 乘 、勝掠 地, 火

成

獨

留陝西

寬援維陽, 潼 昇督關外。 小 一,自成 月,羣賊 捷,至醴泉。 時盧象昇 大敗東走。 薄閿鄉 獻忠 賊亦分兵, 已改湖廣 走嵩、 賊將高傑通於自成妻邢氏,懼誅,挾之來降。 , 左 良 玉 迎祥亦屢敗,東踰華陰南原,絕嶺, 汝。 迎祥略武功、扶風以西,自成略富平、固州 巡撫,總理直隸、河南、山東、四川、湖廣諸軍務。 、祖寬禦之不克,遂陷陝州,進攻雒陽。 迎祥、自成走偃師、鞏縣,略魯山、葉縣, 偕自成出朱陽關 承疇身追自成,大戰渭南、臨 以東。 河南巡 陷光州,象昇擊敗之確 承疇遣將追自 撫陳必謙督良玉 韶承疇督關中, 與獻忠合。冬十

將祖 援, 等 戰於朱 **医** 又攻滁州 大樂破之。 九 年 春, 龍橋 迎祥、自成 城大 走密、登封 知知 州劉 敗,屍咽 大鞏 攻廬 ,故總兵湯九州戰死。 水不 州 、太僕卿 不拔。 流。 李 北攻壽州 覺斯堅守 陷 含山 **沐下**。 分道 故御史方震 和 州 犯南陽 象昇親 殺 知 孺堅守。 州黎弘業及在籍 裕州 督祖 寬 必謙援南陽, 、羅岱 折而西 て楊世 御史馬 、入歸德 象昇援 恩等來 如 邊 蛟

自成 Щ 軍 西 令大樂等擊賊,殺迎祥、自成精銳幾盡。 敗 由 兵遏之。 於 南 羅 山 踰 家 Щ, 復西掠米脂,呼知縣邊大綬,「以曰:「此吾故鄉也, 商 、雒,走延綏,犯鞏昌北 盡亡士馬器仗,總兵官兪沖霄被執。 境。 諸將 賊復分兵再 左光先、曹變蛟破之,自成走環 自成 入陝,迎祥由鄖、襄趨興安、漢中, 勢復振,進圍綏德,欲東 虐我父老。」遺之金,令 縣。 、渡河, 未幾,

於盩厔,獻俘闕下, 象昇 及大樂、寬等皆入援京師。 磔 死。 於是賊黨乃共推自成爲闖王矣。 孫傳庭新除陝西巡撫,銳意滅賊。秋七月, 是月,犯階、徽。未幾,出济 擒迎祥

隴、犯鳳翔、渡渭河。

廟。

將襲榆林

,河水驟長

,賊淹死甚衆,乃改道,從韓城

而

西

自成 主簿張應奇、金堂典史潘夢科皆死。「公」 、梓潼、江油、黎雅、青川等州縣。日 與過天星奔秦州。 年犯涇陽、三原。 入蜀,陷寧羌,破七盤關,陷廣元,總兵官侯良柱戰死,遂 蝎子塊、過天星俱來會。 劍州 進攻成都,七日不克,巡撫王維章坐避賊徵 知州徐尚卿、更目李英俊、昭化知縣王時化、 傳庭督變蛟連戰七日,皆克,蝎子塊降。 連陷昭化

益 自成 盡亡其卒,獨與劉宗敏、田 十一年春,官軍敗賊梓潼, 承疇 改薊遼總督,傳庭改保定總督。 見秀等十八騎潰圍,竄伏商、洛山 自成奔白水,食盡。 傳庭以疾辭,逮下獄。 承疇、傳庭 合擊於潼關原, [五] 大破之。 中。 二人去,自成稍得安。總 其年,獻忠降,自成勢

列

理熊文燦方主撫,諜者或報自成死,益寬之。

月也。 泰。 均走河南。河南大旱,斛穀萬錢,饑民從自成者數萬。遂自南陽出,攻宜陽,殺知縣唐啓 自成曰:「吾死從君矣。」軍中壯士聞之,亦多殺妻子願從者。 「人言我當爲天子,盍卜之,不吉,斷我頭以降。」宗敏諾,三卜三吉。宗敏還,殺其兩妻,謂 而止。賊將多出降。劉宗敏者,藍田鍛工也,最驍勇,亦欲降。自成與步入叢祠,顧而歎曰: 陵,檄令降,自成出謾語。官軍圍自成於巴西、魚復諸山中,自成大困,欲自經,養子雙喜勸 曰「圍師必缺」。自成乃由缺走,突武關,往依獻忠。獻忠欲圖之,覺,遁去。楊嗣昌督師夷 攻永寧,殺知縣武大烈,戕萬安王采鰹。攻偃師,知縣徐日泰罵賊死。時十三年十二 十二年夏,獻忠反穀城。自成大喜,出收衆,衆復大集。陝西總督鄭崇儉發兵圍之,令 自成乃盡焚輜重,輕騎由鄖、

減。 應之,共出信。 活我。」會繩伎紅娘子反,擄信,强委身焉。 塢堡不下。 二人皆往投自成,自成大喜,改信名曰巖。 自 成爲人高顴深鲰,鴟目曷鼻,聲如豺。 杞縣舉人李信者,逆案中尚書李精白子也,嘗出粟振饑民,民德之曰:「李公子 盧氏舉人牛金星磨勘被斥,私入自成軍爲主謀,潛歸,事洩坐斬, 信逃歸,官以爲賊,囚獄中。 性猜忍,日殺人斮足剖心爲戲。 金星又薦卜者宋獻策,長三尺餘,上讖記 紅娘子來救,饑民 所過,民皆保 已, 得末

自成從之,屠戮爲減。 云:「十八子,主神器。」自成大悅。 又散所掠財物振饑民,民受餉者,不辨巖、自成也,雜呼曰:「李公子 巖因說曰:「取天下以人心爲本,請勿殺人,收天下心。」

|巖復造謠詞曰:「迎闖王,不納糧。」使兒童歌以相煽,從自成者日衆。

萬,號 等固守。 陷襄陽,戕襄王翊銘。 之,名「福祿酒」。王世 小袁營。 四年正月攻河南,有營卒勾賊,城遂陷,福王常洵遇害。 自成攻七晝夜,解去,屠密縣。 汝才卽曹操,與獻忠同降復叛去者也。 子由崧裸而逃。[10] 自成發王邸金振饑民,遂移攻開封。 王開封者周王恭枵,聞賊至,急發庫金募死士,與巡撫都 賊魁羅汝才、土寇袁時中皆歸自成。 自成兵汋王血, 時張 御 時中衆二十 雑鹿 史 高 獻 名衡 忠亦 醢

賀 城 繼之,宗龍、文岳 保定總督楊文岳 被執死 人龍兵隸 自 四 自 成 城, 成 盡銳攻之,喬年與副 自成陷 初為 再 部下、亟出關。 圍 迎祥裨將,至是勢大盛。 開 葉縣, 會師。 以親軍築壘自固。 封。 殺副 宗龍馳 巡 撫 文岳率虎大威軍俱至新蔡,與自成遇。 名衡 將劉 將李萬慶皆 入關,與巡撫汪喬年調兵,兵已發盡,乃檄河南大將李國奇 國 總兵陳永福 能,遂 夜,文岳兵潰奔陳州 帝以故尚書傅宗龍爲陝西總督,使專辦自成,別敕 死。 圍 左 自成 力拒之,射中自成目,礮殪上天龍等,自成 良玉於郾城 劓刖諸生百九十人。 ,宗龍與賊持數日, 喬年代宗龍總督,出關, 人龍卒先奔,國奇、大威 遂乘 食盡,突圍走, 勝陷南陽、鄧 次襄

奴心。

城

壞

(處用

火

攻法

實藥甕

中

- ,火燃藥發,當者輒颴碎,名曰

放进。

城。[]]. 曳 絙 自 初僅 成 呼,而 每攻城,不用古梯 容一 柱折 入, 城 漸 崩矣。 至 百十,次第傅土 衝法,專 名衡於城 取飯 上鑿橫道,聽其下 甋,得 以 世。 朝 過三五 即歸營臥,後者 步, 有 留 聲, 用毒穢 土柱, 必 斬。取甎 灌 繫 以巨 之,多死。 已, 組。 卽穿穴穴 穿畢,萬 賊乃卽

州, 汴 丘 知縣梁以樟創死復甦,全家殲焉 都 副 ,金人所重築也。 使  $\dot{\overline{H}}$ 關 年正 永傑、知州 月, 侯君擢皆罵賊死。 城半圮,賊用放 厚數丈, 土堅, 火 进法攻之,鐵騎數千馳譟,伺城 外擊,賊騎多 歸德、睢 州、寧陵、太康數十郡縣 殲, 自成 駭 而 去。 頹 卽擁入城。 南陷 悉殘 西華、尋屠陳 燬。 城故 宋 商

漂沒萬餘,乃拔營西南去。 援 南門出 河 灌 開 一城,城 封。 亦 已,復攻 注 泰 部至。 良玉至朱仙 亦決 渦 水 開 馬家 封、築長圍 傳庭 城 中 П 鎭, 知開 河 百萬戶皆沒,得脫者惟周王、妃、世子及撫按以下不及二萬人。 欲灌城。秋九月癸未,天大雨,二口並決,聲如雷,潰北門入,穿東 大敗,奔襄陽。 [為持 封急,大會諸將西安,亟出關來救。 八人計。 詔起孫傳庭爲總督,釋故尚書侯恂命督師,召 諸軍皆屯 河北,不敢進。 未至,名衡等議 開 封食盡。 決朱家 Щ 東 左 總 賊亦 寒 兵劉 良玉

先是,有馬守應稱老回回、賀一龍稱革裏眼、賀錦稱左金王、劉希堯稱爭世王、藺養成

縣,皆下,再破夷陵、荆 所謂 稱 從軍,遂由確山、信陽、泌陽向襄陽。 五百餘里,再屠南陽, 亂 柿園之敗也。 世 王者,皆附自成,時號「革左五 是時大淸兵南侵,京師方告急,朝廷不暇復討賊。 門州。 進攻汝寧。 自成自攻荆州 總兵虎大威中礮死,楊文岳被殺。 營」。自成乃西迎傳庭兵,遇於南陽,傳庭軍潰走,豫人 左良玉望風南走,自成入襄陽。 ,湘陰王儼伊遇害,燒獻陵木城,穿燬宮殿。 自成乃脅崇王由 分徇屬城及德安諸州 自成乃收羣賊,連營 横使

等州縣,皆下。 十六年春陷承天。 先 驅 倡漢陽,良玉走九江。 將發獻陵,有聲震山谷,懼而止。旁掠潛山、京山、雲夢、黃陂、孝感 攻鄖陽,撫治都御史徐起元及王光恩力守不下

光恩,贼反正者也。

能人。 磔之。 白,右緋,前黑,後黃,纛隨其色。五營以序直晝夜,次第休息,巡徼嚴密。 得藏白金,過城邑不得室處,妻子外不得攜他婦人。 曰先、後、左、右營,各領兵三十餘隊。 自成自號奉天倡義大元帥、號羅汝才代天撫民威德大將軍。 收男子十五以上、四十以下者爲兵。 一兵倅馬三四匹,冬則以茵褥籍其蹏。 標營白幟黑纛,自成獨白鬃大纛銀浮屠,左營幟 精兵一人,主芻、 剖人腹爲馬槽以飼馬,馬見人,輒鋸牙思噬 寢興悉用單布幕。縣甲厚百層,矢礮不 掌械、執爨者十人。軍令不 分其衆,曰標營,領兵百 逃者謂之落草,

七九五

九

列

流 之,珠玉爲下。 若虎豹。 人得免。 之七,三日屠之。 長鎗三萬, 惟憚黃河 臨陣,列馬三萬,名三堵牆。 獻忠雖至殘忍,不逮也。諸營較所獲,馬騾者上賞,弓矢鉛銃者次之,幣帛又次 若淮 軍 、擊刺如飛、馬兵回擊,無不大勝。 止,卽出較騎射,日站隊。 、泗、涇、渭,則萬衆翹足馬背,或抱鬣緣尾,呼風而 凡殺人,束屍爲燎,謂之打亮。 前者返顧,後者殺之。 夜四鼓,蓐食以聽令。所過崇岡峻坂,騰馬直上。 攻城,迎降者不殺,守一日殺十之三,二日殺十 城將陷,步兵萬人環堞下,馬兵巡徼,無一 戰久不勝,馬兵佯敗誘官兵,步卒 渡,馬號所壅閼, 水爲不 水

厚自奉養,自成嘗嗤鄙之。汝才衆數十萬,用山西舉人吉珪爲謀主。自成善攻,汝才善戰, 所善賀一龍宴,縛之,晨以二十騎斬汝才於帳中,悉棄其衆。 兩人相須若左右手。自成下宛、葉,克梁、宋,兵强士附,有專制心,顧獨忌汝才。乃召汝才 自 成不好酒色,脫粟粗糲,與其下共甘苦。汝才妻妾數十,被服紈綺,帳下女樂數部,

宮殿居之。 自成在中州,所略城輒焚燬之。及渡漢江,謀以荆、襄爲根本,改襄陽曰襄京,修襄王 改禹州曰均平府,承天府曰揚武州,他府縣多所更易。

用事。 牛金星敎以創官爵名號,大行署置。 田見秀、劉宗敏爲權將軍,李巖、賀錦、劉希堯等爲制將軍,張鼐、党守素等爲威武將 自成無子,兄子過及妻弟高一 功,迭居左右,親信

之,而歸鄧氏於其家。六政府侍郎則石首喻上猷、江陵蕭應坤、招遠楊永裕、米脂李振聲、 城棗陽伯、保寧王紹圯宣城伯、肅寧王術授順義伯。 江陵鄧巖忠、西安姚錫胤,尋以宣城丘之陶代振聲爲兵政府侍郎。其餘受僞職者甚衆,不 爲右酮。 郎中、從事等官。 軍,谷可成、任維榮等爲果毅將軍,凡五營二十二將。又置上相、左輔、右弼、六政府侍郎、 國紳,安定人,嘗官參政。 要地設防禦使,府曰 既降,獻文翔鳳妻鄧氏以媚自成。 一尹,州曰牧,縣曰令。 以張國紳爲上相,牛金星爲左輔,來儀 封崇王由横襄陽伯、邵陵王在 自成惡其傷 同類,殺

使賀,且脅之曰:「老回回已降,曹操輩誅死,行及汝矣。」獻忠大懼,南入長沙。 自成既殺汝才、一龍,又襲殺養成,奪守應兵,擊殺袁時中於杞縣。獻忠方據武昌,自成遣 安陸,蕭雲林守荆門,謝應龍守漢川,周鳳梧守禹州。於是河南、湖廣、江北諸賊莫不聽命。 使高一功、馮雄守襄陽,任繼光守荆州,藺養成、牛萬才守夷陵,王文曜守澧州,白旺守

糧道。 順王。 關中,大王桑梓邦也,百二山河,得天下三分之二,宜先取之,建立基業。然後旁略三邊,資 當是時,十三家七十二營諸大賊,降死殆盡,惟自成、獻忠存,而自成獨勁,遂自稱曰新 集牛金星等議兵所向。金星請先取河北,直走京師。楊永裕請下金陵,日巴斷燕都 從事顧君恩曰:「金陵居下流,事雖濟,失之緩。直走京師,不勝,退安所歸,失之急。

其兵力,攻取 山西,後向京師,庶幾進戰退守,萬全無失。」自成從之。

饑而 自成空壁追,一日夜踰四百里,官軍死者四萬餘人,失兵器輜重數十萬。 戰,賊陣五重,官軍克其三。 賊澠池,至寶豐,再拔其城。 中軍,檄廣恩從新安來會。河南將陳永福守新灘,四川將秦翼明出商、洛,爲掎角。 道,迎糧,令永福守營。 擊之。朝議日督戰,不得已出關。以牛成虎、盧光祖爲前鋒,江三由靈寶入洛。 傳庭之敗於柿園而歸陝也,大治兵,制火車二萬輛,募壯士,使白廣恩、高傑將,欲俟賊 自成遣輕騎出汝州,要截糧道。 傳庭. 次姚, 旣行,永福 已而 稍却, 自成率萬騎還戰,復大敗,幾被擒。會天大雨,道濘,糧 兵亦爭發,不可禁,遂爲賊所躡。 火車奔, 騎兵亦大奔。 傳庭乃分軍三,令廣恩從大道, 賊縱鐵騎踐之,傳庭大敗 傳庭奔河北,轉趨 令高傑親隨從間 至南陽,傳庭還 前鋒敗 高傑為

潼關,氣敗沮不復振。

恩女樂 十餘 開 見黃龍纛,咸伏地呼萬歲。 東門納賊。 人,布政 冬十月,自成陷潼關 部,賞 使陸之祺等俱降。 自成 入關策也。 執秦王存樞 ,傳庭死,遂連破華陰、渭南、華、商、臨潼 諸將白廣恩、高汝利、左光先、梁甫先後皆降。 大發民,修長安城,開馳道。 以爲權將軍, 自成大掠三日,下令禁止。改西安曰長安,稱西京 永壽王誼況 自成每三日親赴教場校射 爲制將軍。 進攻西安,守將 巡撫馮師孔 陳永福以先射中 以 ), 百 賜 下死者 王根子 姓望 顧 君

自成 目,保山 **巓不敢下,自成折箭爲誓,** 招之, 亦降。 惟高傑以竊自成妻走延安,爲李過所

追,折而東,渡宜川,絕庸津以守。

掠徵 陝 王世 賊 林 成入陝西 金封 已沒,應桂 渡河,陷平陽,殺宗室三百餘人。 日 瑞 其 爵 自成 國、尤世威等,俱不屈死。 以去。 金,死者 等亦死。 兵所 自謂故鄉,毋 不能進。 至 改延安府曰天保府,米脂 瘞一穴。 進陷一 風靡,乃詣米脂祭墓。 西寧,於是肅州、山丹、永昌、鎭番、莊浪皆降,陝西地悉歸自成。 有侵暴,未一月抄掠如故。 榆林故死守,李過等不能克,自成大發兵攻陷之。 乘勝取寧夏,屠慶陽,執韓王亶壻。日日移攻蘭州,甘肅 高傑奔澤州。 日天保縣、清澗 向爲官軍所發,焚棄遺骴,築土封之。 韶以余應桂總督三邊,收邊兵剿賊,然全 又以士大夫必不附己, 日天波府。 鳳翔不下,屠之。 悉索諸薦 副使都任,總兵 求其宗 紳, 始, 叉遣 巡 搒 撫 自

朱企郊爲吏政尚書、平湖陸之祺爲戶政尚書、眞寧鞏焴爲禮政尚書、歸安張鱗然爲兵政尚 祖 弘文館、文諭院、諫議、直指使、從政、統會、尙契司、驗馬寺、知政使、 以下,加諡 復五等爵,大封功臣,侯劉宗敏以下九人,伯劉體純以下七十二人,子三十人,男五十 十七年正月庚寅朔,自成稱王於西安,僭國號曰大順,改元永昌,改名自晟。追尊其會 號,以李繼遷爲太祖。設天佑殿大學士,以牛金星爲之。增置六政府尙書,設 書寫房等官。以乾州

七九六三

战

師,帝許之。 近,自己指斥乘輿。 兵政侍郎楊王休爲都肄,出橫門,至渭橋,金鼓動地。令弘文館學士李化鱗等草檄馳諭遠 五 人。定軍制。有一馬儳行列者斬之,馬騰入田苗者斬之。籍步兵四十萬、馬兵六十萬。 是日,大風霾,黃霧四塞。事聞,帝大驚,召廷臣議。大學士李建泰請督

死。 州 遂犯陽和,由柳溝逼居庸,總兵官唐通、太監<u>杜之</u>秩迎降。 總兵朱三樂死。 ,徇河曲、靜樂,攻太原,執晉王求桂,巡撫蔡懋德死之。北徇忻、代,寧武總兵周遇吉戰 自成先遣游兵入故關,掠大名、眞定而北。身率衆賊並邊東犯,陷大同,巡撫衞景瑗、 時山西自平陽陷,河津、稷山、滎河皆陷,他府縣多望風送款。 自成殺代王傳濟,代藩宗室殆盡。犯宣府,總兵姜瓖迎降,巡撫朱之馮死。 二月,自成渡河,破汾

内侍。 莫對,有泣者。 騎探賊,賊輒勾之降,無一還者。 賈販都市,又令充部院諸掾吏,探刺機密。 三月十三日焚昌平,總兵官李守鑅死。〔15〕始,賊欲偵京師虛實,往往陰遣人辇重貨, 內侍專守城事,百司不敢問。 俄頃賊環攻九門,門外先設三大營,悉降賊。 賊游騎至平則門,京師猶不知也。 朝廷有謀議,數千里立馳報。 京師久乏餉,乘陴者少,益以 十七日,帝召問羣臣 及抵昌平,兵部發

十八日,賊攻益急,自成駐彰義門外,遣降賊太監杜勳縋入見帝,求禪位。 帝怒,叱之

主,趣 下,詔親征。 苦我民 皇后自 耳。」 徘徊 盡。 日暝,太監曹化淳啓彰義門,賊盡入。 十九日丁未,天未明,皇城不守,鳴鐘集百官,無至者。 久之,歸乾凊宮,令送太子及永王、定王於戚臣 帝出宫,登煤山,望烽火徹天,歎息曰: 周奎、田 乃復登煤山,書衣 弘遇第, 劍擊 長公

襟爲遺詔,以帛自縊於山亭,帝遂崩。

太監王承恩縊於側

流淚。 陞、 文、勳戚自劉文炳以下,殉節者四十餘人。 絕 而 張嶙然等騎而從。 復甦,昇至,令賊劉宗敏療治。 自 太子投周奎家,不得入,二王亦不能匿,先後擁至,皆不屈,自成羈之宮中。 成氈笠縹衣,乘鳥駁馬,入承天門。 登皇極殿,據御座, 宮女魏氏投河,從者二百餘人。 下令大索帝后,期百官三日朝見。 偽丞相牛金星,尚書宋企郊、喻上猷,侍郎黎志 象房象皆哀吼 文臣 自范景 長公主

告自成,改殮帝后,用袞冕禕翟,加葦廠云。大學士陳演勸進,不許。封太子爲宋王。 部、錦衣衞繫囚 賊爭戲侮, 己酉、昧爽、成國公朱純臣、大學士魏藻德率文武百官入賀、皆素服坐殿前。 「國亡君喪,若曹不思殯先帝,乃在此耶」」因哭,內侍數十人皆哭,藻德等亦哭。 已,乃知帝后崩,自成命以宮扉載出,盛柳棺,置東華門外,百姓過者皆掩泣。越三日 爲椎背、脫帽,或舉足加頸,相笑樂,百官懾伏不敢動。 太監王德化叱諸臣曰: 自成不出、羣 顧君恩以

列

恂。 府州縣曰尹、曰牧、曰令。召見朝官,自成南嚮坐,金星、宗敏、企郊等左右雜坐,以次呼名, 灼肉折脛,備諸慘毒。<br />
藻德遇馬世奇家人,泣曰:「吾不能爲若主,今求死不得。」<br />
賊又編排 議,十三道日直指使,翰林院日弘文館,太僕寺曰驗馬寺,巡撫曰節度使,兵備曰防禦使,**知** 甲,令五家養一賊,大縱淫掠,民不勝毒,縊死相望。徵諸勳戚大臣金,金足輒殺之。焚太廟 分三等授職。自四品以下少詹事梁紹陽、楊觀光等無不污偽命,三品以上獨用故侍郎侯 神主,遷太祖主於帝王廟。 其餘勳戚、文武諸臣奎、純臣、演、藻德等共八百餘人,送宗敏等營中,拷掠責財賂,至 自 成自居西安,建置官吏,至是益盡改官制。六部曰六政府,司官曰從事,六科曰 諫

極 淮 一儀,諏吉日。 ,巡撫路振飛發兵拒之,乃去。自成謂眞得天命,金星率賊衆三表勸進,乃從之,令撰登 鑄金璽及永昌錢,皆不就。 時賊黨已陷保定,李建泰降,畿內府縣悉附。 及自成升御座,忽見自衣人長數丈,手劍怒視,座下龍爪鬣俱動,自成恐,亟 聞山海關總兵吳三桂兵起,乃謀歸陝西 山東、河南徧設官吏,所至無違者。及

降。 萬,執吳襄於軍,東攻山海關,以別將從一片石越關外。三桂懼,乞降於我大淸。 至欒州,聞愛姬陳沅被劉宗敏掠去,憤甚,疾歸山海, 初,三桂奉韶入援,至山 海關,京師陷,猶豫不進。 自成劫其父襄,作書招之,三桂欲 襲破賊將。 自成怒,親部賊十餘 四月二十

走。 矢雨 殺 二日,自成兵二十萬,陣於關內,自北 賊 我兵追奔四十里,賊衆大潰,自相踐踏死者無算,僵屍偏野,溝水盡赤。 墮,天大風,沙石飛走,擊賊 數千人,賊亦力鬭,圍 開復 合。 如雹。 戰良久,我兵從三桂陣右 山垣 自成 海。 方挾太子登高 我兵對賊置陣、三桂居右翼末、悉銳卒搏戰, 岡觀戰, 突出,衝賊中堅,萬馬奔躍 知爲我兵, 自成奔永平 急策馬 下岡 飛

我 兵逐之。 三桂先驅至永平,自成殺吳襄,奔還京師

西走,而使偽將軍左光先、谷可成殿。 自成被冠冕,列仗受朝。 餅 降 ,騾車載 者始懼,多竄伏矣。 時牛金星居守,諸降人往 歸西安。 二十九日丙戌僭帝號於武英殿,追尊七代皆爲帝后,立妻高氏爲皇后。 自成至,悉鎔所拷索金及宮中帑藏、器皿,鑄爲餅,每餅千金,約數萬 金星代行郊天禮。 謁,執門生禮 甚恭。 是夕焚宫殿及九門城樓。 金星 曰:「訛言方起,諸君宜簡出。」由是 詰旦, 挾太子、

關,入山西。 光先傷足,賊負而逃。 時 福 王已監國南京,大學士史可法督師討賊。 五月二日,我大清兵入京師,下令安輯百姓,爲帝后發喪,議諡號,遣將偕三桂追自成。 會我兵東返,自成乃鳩合潰散,走平陽。 自成西走眞定,益發衆來攻,我兵復擊之。自成中流矢創甚,西踰故 自成至定州,我兵追之,與戰,斬谷可成,左

李巖者,故勸自成以不殺收人心者也。及陷京師,保護懿安皇后令自盡。 又獨於士大

列

夫無所拷掠,金星等大忌之。定州之敗,河南州縣多反正,自成召諸將議,巖請率兵往。金 星陰告自成曰:「巖雄武有大略、非能久下人者。 子之讖,得非巖乎。」因譖其欲反。自成令金星與巖飲,殺之,賊衆俱解體。 。河南,巖故鄉,假以大兵,必不可制。十八

西人大懼。 自用,僞尚書張第元、耿始然皆以小忤死。 建祖禰廟成,將往祀,忽寒慄不能就禮。 自成歸西安,復遣賊陷漢中,降總兵趙光遠,進略保寧。時獻忠以兵拒之,乃還。八月 自成始以巖言,謬爲仁義,及巖死,又屢敗,復强很 制銅鐁,江己官吏坐賕,即鐁斬。 民盗一雞者死。

從父僞趙侯、僞襄南侯及自成妻妾二人,金印一。又獲僞汝侯劉宗敏、僞總兵左光先、僞軍 十餘萬,改江夏日瑞符縣。 追至賊老營,大破之者八。當是時,左良玉東下,武昌虚無人。自成屯五十餘日,賊衆尚五 安,由龍駒寨走武岡,人襄陽,復走武昌。我兵兩道追躡,連蹙之鄧州、承天、德安、武昌,窮 龍衣金印,眇一目,村民乃大驚,謂爲自成也。時我兵遣識自成者驗其尸,朽莫辨。獲自成兩 遂縊死。或曰村民方築堡,見賊少,争前擊之,人馬俱陷泥淖中,自成腦中鉏死。剥其衣,得 城,行司竄於九宫山。秋九月,自成留李過守寨,自率二十騎略食山中,爲村民所困,不能脱, 順治二年二月,我兵攻潼關,僞伯馬世耀以六十萬衆迎戰,敗死。潼關破,自成遂棄西 尋爲我兵所迫,部衆多降,或逃散。 自成走咸寧、蒲圻, 至通

師宋獻策。 於是斬自成從父及宗敏於軍。 牛金星、宋企郊等皆遁亡。

封高氏忠義夫人,號其軍曰忠貞營,隸騰蛟麾下。 自 成 兄 子過 改 名錦, 偕諸賊帥奉高氏 降於總督 永明王時,赤心封興國侯, 何 騰 蛟。 時 唐王 立 於 闡, 葬死。 賜錦名赤心,

張 獻忠者,延安衞柳樹澗人也,與李自成同歲生。 長隸延綏鎭為軍,犯法當斬, 主將陳

洪範奇其狀貌,爲請於總兵官王威釋之,乃逃去。

也。 偕渡河。 專主,遇官軍,人自爲鬭,勝則爭進,敗則竄 王。 崇禎 明年, 賊或分或合,東西奔突,勢日强盛。 其冬,洪承疇爲總督,獻忠及汝才皆就撫。 自是、陝西、河南、湖廣、四川、江北數千里地,皆被蹂躪。 三年, 嘉胤死, 陝西賊大起,王嘉胤據府谷, 其黨王自用復聚衆三十六營,獻忠及高 山谷不相顧。 陷河曲。 已而叛入山西,偕羣賊焚掠。 獻忠以米脂十八寨應之,自稱八大 官軍遇賊追殺,亦不知所逐何賊 迎祥、羅汝才、馬守應等皆爲之 當此之時,賊渠率衆無 葬擾河北,又

議。 獻忠始與高迎祥並起作賊,自成乃迎祥偏裨,不敢與獻忠並。 八年,十三家會榮陽,議敵官軍。 守應欲北渡,獻忠嗤之, 守應怒,李自成爲解,乃定 及是遂相頡頏,與俱東

列

汝才諸 合兵 遁 掠 攻 桐 戰皆克, 道 連 復 城 麻 破 贼, 東。 ,陷廬江, 城,合守應等入關,會迎祥 河 南 各盤踞 俘斬 總兵官左 江 甚衆。 北 屠巢、無爲 鄖陽 諸 良玉、祖寬擊之,獻忠 縣,焚皇陵。 商 獻忠志, 、洛山中、不能救、獻忠亦遁山 潛 Щ 再合迎祥衆還戰,復大敗。 於 太湖、 鳳翔 而 迎祥、 宿 與迎祥 已,復出 松 自成 諸 城, 分道走。 西 商、洛 去。 應 中。 天 獻忠獨 「屯靈 巡撫 寬追 迎祥 張國 寶, 東, 尋與自成 獻忠、戰於嵩 以 維 圍 待 廬 禦之。 迎祥 州 入陝西 舒城, 縣及 o 獻忠 迎 祥 九 從 而 俱 英、 皐 至,則 不 山

賊 敗 賊 從 景文、操江 應 子 皆遁 間 官 走 塊 及 潛 道犯 軍 闖場天 自唐縣,並犯 明 於 Щ 年 獻忠入湖廣 安慶, 之天王古寨、三國維檄 秋 酆家店,殺參將程龍、陳于王等四十餘人。 都御史黃道直、 諸賊, 總督盧象昇去, 連營百里, 順 襄陽,衆二十餘萬。 流 東 下, 總兵官楊御蕃 巡撫國 與江北 苗胙 良玉搜山 維 土 一巡撫湖 告警。 賊賀 總兵秦翼 分汛固守, ,良玉 龍、賀錦等合,烽火達淮、揚。 廣,不習兵。 詔 左 明 一良玉、 不 兵寡不 應, 安 會總兵官牟文綬偕良佐來援,復破賊 池 馬爌 尋北 能 道副 於是獻忠自均州 禦, 去。 劉 使史可法親 湖廣 良佐 賊 乃 震動 合兵援之,遂大破 復 田 南京 一字應 率兵當 太湖,連蘄、黄, 獻忠 兵部 自新 糾汝才 賊 衝。 尙 野, 書范 守 賊 賊

是時,河南、湖廣賊十五家,惟獻忠最狡黠驍勍,次則汝才。 獻忠嘗爲爲官兵,欲給宛

城,良玉適至,獻忠倉皇走,前鋒羅岱射之中額,良玉馬追及,刃拂獻忠面,馬馳以免。 文燦爲總理,刊檄撫賊。 闖場天者,本名劉國能,與獻忠有郤,詣文燦降。 獻忠創甚,不能 會熊

先後俱降。 降於太 林銘球、分巡道王瑞栴與良玉謀,俟獻忠至執之,文燦不可。 剪殆盡 文燦不敢決。 大恩,得不死,公豈忘之邪。願率所部降以自效。」洪範亦喜,爲告文燦,受其降。 十一年春,偵知陳洪範隸文燦麾下爲總兵,大喜,因遣間齎重幣獻洪範曰:「獻忠蒙公 和山監軍太監李繼改。 陝西總督洪承疇、巡撫孫傳庭復大破李自成,自成竄崤、函山中,朝廷皆謂賊撲 時羣賊皆聚南陽,屠掠旁州縣。 明年,射塌天、混十萬、過天星、關索、王光恩等十三家渠帥, 文燦赴裕州、益大發燉撫賊。 獻忠遂據穀城,請十萬人餉, 汝才以戰敗乞 巡按御史

山,岱中伏死,良玉大敗。 十三家降賊一時並叛,惟王光恩不從。 財,不復憂也。 獻忠在穀城,訓卒治甲仗,言者頗疑其欲反。帝方信兵部尚書楊嗣昌言,謂文燦能辦 夏五月,獻忠叛,殺知縣阮之鈿,隳穀城,陷房縣,合汝才兵,殺 獻忠去房縣,左 良玉追擊之,羅岱為前鋒,至羅狹 知縣郝景春。

嗣昌已拜 列 僔 第 大學士,乃自請督師,帝大悅。 百 ル + 流 賊 十月朔,嗣昌至襄陽,集諸將議進兵。 時羣賊

忠。

四 川界, 、質錦犯隨、應、麻、黃,與官軍相持。 將西犯。 嗣昌視東略稍緩,乃宿輜重襄陽,濬濠築城甚固,令良玉專力剿獻 汝才及過天星竄伏漳、房、興、遠,獻忠踞

龍、李國奇夾擊,大敗之, 十三年閏正月,良玉擊賊枸坪關, 川將張令、方國安又邀擊於岔溪。獻忠奔柯家坪,張令逐北深入,被圍,應元、之鳳援 斬首千三百餘級,擒獻忠妻妾。 獻忠遁, 追至瑪瑙山。 湖廣將張應元、汪之鳳追敗之水 賊據山拒敵,良玉先登,賀人

至,與獻忠轉趨達州。 將汪之鳳戰死。三一遂陷大昌,進屯開縣,張令戰死,石砫女土司秦良玉亦敗。汝才復自東 者,輒戮之。 人龍守陽平、百丈險。 縣不利,汝才東走,過天星復軼開縣 山,欲渡江,爲官兵所扼。 山 之,復破賊。 民市 初, 鹽芻米酪,收潰散, 良玉之進兵也, 賊爭死鬭,官軍退走。賊畢渡,屯萬頃山,歸、巫大震。已而 獻忠率千餘騎竄興、歸山中,勢大蹙。 賊不得過,乃復走巴西。 川撫邵捷春退扼涪江。 與嗣昌議不合。 掩旗 獻忠至,遂與之合。 息鼓,益 而西。 西走白羊山。 獻忠遣間 諸將往復追逐,獻忠乃悉衆攻楚兵於土地嶺,副 賊北陷劍州,將入漢中。 獻忠雖累敗,氣益盛,立馬江岸,有不前赴 涪江師潰,捷春論死。獻忠屠縣州,越成都, 說良玉,良玉乃圍而弗攻。 時汝才及過天星從寧昌窺大昌、巫 總兵官趙光遠、賀 汝才、過天星犯 獻忠因得與

陷 瀘州 ,北渡陷永川,走漢川、德陽,气三人巴州。又自巴走達州,復至開縣

是,嗣昌聞賊入川,進駐重慶。 監軍萬元吉曰:「賊或東突,不可無備,宜分中軍間道

出梓潼、扼歸路。」嗣昌不聽,擬令諸將盡赴瀘州追賊。

應城,陷隨州。 妾。又去,陷樊城、當陽、郟。 嗣 師使者於道,取軍符,紿陷襄陽城。 游擊郭開等皆死。 昌以陷藩誅,王其努力盡此酒。」遂殺之,並殺鄖襄道張克儉、推官鄺曰廣,復得其所失妻 又拔鄖西,羣盜附者萬計,遂東略地。 十四年正月,總兵猛 偽張良玉幟,入泌陽。 獻忠果東出,令汝才拒鄖撫袁繼咸兵,自率輕騎,一日夜馳三百里,殺督 如虎、 合汝才入光州,殘商城、羅山、息縣、信陽、固始。 參將劉士傑追之開縣之黃陵城,賊還戰,官軍大敗,士傑及 獻忠縛襄王翊銘置堂下,屬之酒曰:「我欲借王頭,使楊 再攻應山,不克,去。攻鄖陽,守將王光恩力戰,始 分軍犯茶山

自成合,獻忠遂投自成。 已,復出商城,將向英山,又爲副將王允成所破,衆道散且盡,從騎止數十。時汝才已先與 賊 分官軍兵力。」乃陰與獻忠五百騎,使遁去。道糾土賊一斗穀、瓦罐子等,衆復盛,然猶佯推 衆數萬。 獻忠自瑪瑙山之敗,心畏良玉,及屢勝,有驕色。秋八月,良玉追擊之信陽,大破之,降 獻忠傷股,乘夜東奔,良玉急追之。會大雨,江溢道絕,官軍不能進,獻忠走免。 自成以部曲遇之,不從。 自成欲殺之,汝才諫曰:「留之使擾漢南,

列傳

第

百九

十七七

流敗

皆大喜。

自成。 圍急 一,督師 丁啓睿及左良玉皆往援汴,獻忠乘間陷亳州,入英、霍山中,與革、左、二賀相見, 賊營革 左二賀陷含、巢、潛諸縣,欲西合獻忠,以湖廣官兵沮 不得達。 及汴

腹心 於巢 撤湖廣兵自從。 高 斗光 湖。 婦豎盡走蘄水,革、左二賀北投自成。 明 年 、安慶巡撫鄭二陽逮治、詔起馬士英代斗光。 合攻,陷舒城、六安,掠民益軍。 太監盧九德以總兵官黃得功、劉良佐之兵戰於夾山 獻忠聞之,又襲陷黃梅 陷廬州,知府鄭履祥死。 已,獻忠復襲陷太湖。 是秋,得功、 敗績,江南 良佐 會良玉避自成東下 陷無爲、廬江, 大破賊於潛山, 大震。 鳳陽 習水師 獻忠 總督

蘄、黄等二十一 麻 號,改武昌曰天授府,江夏曰上江縣。 從鴨 開科取士。 兵,餘皆殺之。 城 蛋洲 人湯志者,大姓奴也,殺諸生六十人,以城降賊。 十六年春,連陷廣濟、蘄州、蘄水。 渡,陷 以 與國 州縣悉附。 武昌,執楚王華奎,籠而沈諸江,盡殺楚宗室。錄男子二十以下、十五以上爲 由鸚鵡洲至道士洑,浮胔蔽江,踰月人脂厚累寸,魚鼈不可食。 州柯、陳兩姓土官悍勇,招降之。題詩黃鶴樓。下令發楚邸金振饑民。 據楚王第,鑄西王之寶,偽設尚書、都督、巡撫等官, 入黃州,黃民盡逃,乃驅婦女剷城,尋殺之以塡塹。 獻忠改麻城 爲州。 又西陷漢陽,全軍 獻忠遂僭

悉衆趨 時李自成在襄陽,聞之忌且怒,貽書譙責。左良玉兵復西上,僞官吏多被擒殺。獻忠懼, 岳州 、長沙。 於是監軍道王瓚、沔陽 知州章曠、武昌生員程天一、白雲寨長易道三

沙陷。 州陷 於永。 逃。 孔 乃 西,陷吉安、袁州、建昌、撫州、永新、安福、萬載、南豐諸府縣。 昌祖墓,斬其屍見血。 婦女焚之,水光夜如晝。 皆起兵討 希貴等據城陵磯拒戰,自己三戰三克,殲其前部。獻忠怒,百道並進,乾德等不支,皆走,岳 賊有獻計取吴、越者,獻忠憚良玉在,不聽,決策人川中。 尋破 獻忠欲渡洞庭湖,卜於神,不吉,投珓而韵。 熙祚命中軍護三王入廣西,身入永死守,城陷見殺。 賊, **衡州,吉王、惠王、桂王俱走永州。** 蘄、黄、漢陽三府皆反正。 攻道州,守備沈至緒戰殁,其女再戰,奪父屍還, 騎而逼長沙,巡按劉熙祚奉吉王、惠王走衡州, 獻忠遂陷咸寧、蒲圻, 乃拆桂府材,載至長沙,造僞殿,而自追三王 將渡, 風大作,獻忠怒,連巨舟千艘,載 又陷寶慶、常德,發故督師楊嗣 廣東大震,南、韶屬城官民盡 偏 岳 州。 城獲全。 總兵尹先民降,長 **元撫李乾德、總兵** 遂東犯江

與天角。遂進陷成都,蜀王至澍率妃、夫人以下投於井,巡撫龍文光被殺。「尽〕是時我大清兵 兵。行意進陷佛圖關。破重慶,瑞王常浩遇害。是日,天無雲而雷,賊有震者。獻忠怒,發巨礮 已定京師,李自成遁歸西安。南京諸臣尊立福王,命故大學士王應熊督川、湖軍事,兵力弱 十七年春陷夔州, 至萬縣,水漲, 留屯三月。已,破涪州,敗守道劉麟長、總兵曾英

列

傳

第

百九十

七

流賊

不能計 鎭、襲完敬等爲尙 都 府州縣,悉陷之。 日 西京 賊 用汪 獻 忠遂僭號大西國王,改元大順。 光麟爲左丞相,嚴錫命爲右丞相。 保寧、順慶先已降自成,置官吏,獻忠悉逐去。 書。 養子孫可望、艾能奇、劉文秀、李定國等皆爲將軍,賜姓張氏, 冬十一月庚寅,即爲位,以蜀王府爲宮,名成 設六部五軍都督府等官,王國麟、江鼎 自成發兵攻,不克,逐據有 分徇諸

全蜀。

惟遵義

一郡及黎州土司馬金堅不下。

脅川 等義兵並起,故獻忠誅殺益毒。川中民盡,乃謀窺西安。 後決堤放流,名水藏,曰:「無爲後人有也。」當是時,曾英、李占春、于大海、王祥、楊展、曹勛 皆見殺。 奇。賊將有不忍至縊死者。 又創生剝皮法,皮未去而先絕者,刑者抵死。 將軍分屠各府縣,名草殺。 士 ,集於靑羊宮, 中士大夫使受偽職,敍州 獻忠黃面 其慘虐無人理,不可 長身虎頷, 盡殺之, 人號黃虎。 筆墨成丘塚。 偽都 督 張 爲官朝會拜伏, 勝紀。 布政使尹伸、廣元給事中吳宇英不屈死。 叉用 君用、王明等數十人,皆坐殺 性狡譎, 嗜殺, 一 坑 法移錦江,涸而 成都民於中園 呼獒數十下殿,獒所齅者, 將卒以殺 日不殺人,輒悒悒不樂。 人多少敍功次, 闕之,深數丈,埋金寶億萬計,然 殺各衛籍軍 人少,剝皮死,並屠其家。 引出斬之,名天殺 共殺男女六萬萬有 九十八萬。 諸受職 者,後尋亦 詭開科 叉遣四 取

順治三年,獻忠盡焚成都宮殿廬舍,夷其城,率衆出川北,又欲盡殺川兵。偽將劉進忠

故統川兵、聞之,率一軍逃。會我大淸兵至漢中,進忠來奔,乞爲鄉導。至鹽亭界,大霧。

獻忠曉行,猝遇我兵於鳳凰坡,中矢墜馬,蒲伏積薪下。於是我兵擒獻忠出,斬之。

民逃深山中,草衣木食久,徧體皆生毛。 川中自遭獻忠亂,列城內雜樹成拱,狗食人肉若猛獸虎豹,齧人死輒棄去,不盡食也。 獻忠旣誅,賊黨可望、能奇、文秀、定國等潰入川

南,殺曾英、李乾德等,後皆降於永明王。

### 校勘記

宜川 賊王左掛 宜川,原作「宜州」,按明代陝西有宜川縣,無「宜州」。 據本書卷四二地理志、

統志卷三六改。

四月甲午條、國權卷九〇頁五四七八、懷陵流寇始終錄卷二改。 參政洪承嚋擊破王左掛 參政,原作「參議」,據本書卷二六〇楊鶴傳、 懷宗實錄卷二崇禎二年

三式 監軍太監楊進朝信之 楊進朝,本書卷二七三左良玉傳及綏寇紀略卷二俱作「楊應朝」。

ETE 破夔州 九三頁五六三〇、懷陵流寇始終錄卷七均繫於崇禎七年二月。 本傳繫於六年。按本書卷二三莊烈帝紀、懷宗實錄卷七崇禎七年二月壬申條、國推卷

工 陷含山和州殺知州黎弘業及在籍御史馬如蛟等 本傳繫於九年春。按本書卷二九二黎弘業

列

僔

百 九 +

七

校

勘 記

七九七七

}傳 懷宗實錄卷 八崇禎八年十二月癸卯條、國権卷九四頁五七二二都繫於八年十二月。

- ゲレ 呼知縣邊大綬 邊大綬,本書卷二六二汪喬年傳、 明史稿傳一八三李自成傳都作「邊大受」。
- -1-2 靑 Ш 等州 縣 青川, 原作 「靑州」。 明代四川有青川無「青州」,據本書卷四三地理志改。
- 金堂典 史潘夢 科皆死 潘夢科 ,本書卷二九二徐尚卿傳作「潘孟科」。
- 九 時 承疇傳庭合擊於潼 在 Ē 月,與本傳上文「敗賊梓潼」合。 關 原 潼 關 原, 原作「梓潼原」。 潼關原之戰在十月,其時<u>自成已由川入陝,故下文稱「</u>臨 按本書卷二四莊烈帝紀, 梓潼之戰在四川,
- 王世子由崧裸而逃 由崧、原作「由松」、據本書卷一二〇福王傳改。

伏商、洛山

中」,與潼關原地望相合。

據本書卷二六二

孫傳庭傳、明史稿傳一八三李自成傳改。

- 即穿穴穴城 已條、國權卷九八頁五九一四及懷陵流寇始終錄卷一五改。 城,原作「成」,據明史稿傳一八三李自成傳、 懷宗實錄卷一五崇禎十五年正月辛
- 十五年正月 正月,原作「二月」,據本書卷二四莊烈帝紀、國権卷九八頁五九一四、平寇志卷
- 知州侯君擢皆罵賊死 侯君擢、原作「侯君耀」、據明史卷二九三關永傑傳附侯君擢傳及國権卷

九

八八頁

五九

一九改。

五.

改。

楊永裕請下金陵 楊永裕, 懷宗實錄卷一六崇禎十六年十月壬申條、 國権卷九九頁五九九六

俱作「楊承裕」。

二吾 以牛成虎盧光祖爲前鋒 李自成傳、懷陵流寇始終録卷一六補 牛成虎, 原脱「虎」字, 據本書卷二六二孫傳庭傳、 明史稿傳一八三

執韓王亶塉 亶 塉, 原作「稟塉」, 據本書卷二四莊烈帝紀、又卷一〇〇諸王世表、卷一一八諸

令弘文館學士李化鱗等草檄馳諭遠近 Ξ.傳及國權卷首頁二四、卷九九頁六○○五改。 李化鳞, 明史稿傳一八三李自成傳及懷陵流寇始終録

卷一七都作「李化麟」。

總兵官李守鑅死 植十七年三月癸卯條、國權卷一○○頁六○四○改。 李守鑅, 原作「李守鑠」, 據明史稿傳一八三李自成傳及懷宗實録卷一七崇

制銅鐁 銅鐁,原作「銅鏌」,據明史稿傳一八三李自成傳改。下同。

自成走咸寧蒲圻至通城 西南即通城縣。下文張獻忠傳正作「咸寧」,今據改。 咸寧,原誤作「延寧」。按地書無「延寧」。 湖廣有咸寧, 蒲圻鄰縣,其

賊走潛山之天王古寨 作「天堂古寨」,注稱「徐壽輝都此、殿磯猶存」。 天王古寨,本書卷二七四史可法傳作「天堂寨」,懷陵流寇始終録卷一〇

副將汪之鳳戰死 列 傳 第一 百 九十 七 汪之鳳,原作「潘之鳳」,據卷二六九張令傳附汪之鳳傳、懷陵流寇始終録卷 校 勘 記 七九七九

一三改。國權卷九七頁五八七四作汪雲鳳。

越成都陷瀘州 北渡陷永川走漢州德陽 永川、漢州,原誤作「永州」、「漢川」。 按永州、漢川均在

進軍路線合, 湖廣、去成都、瀘州遠甚。 今據明通鑑卷八七、明史紀事本末卷七七、綏寇紀略卷五、懷陵流寇始終録卷 永川縣屬四川重慶府,在江北,漢州屬成都府、德陽其領縣,與張獻忠

二世

**沅撫李乾德總兵孔希貴據城陵磯拒戰至岳州陷** 陵磯」,有城陵磯,明設巡檢司於此,今據本書卷四四地理志、明史紀事本末卷七七、明通鑑卷八 城陵磯、原作「陳陵磯」。按湖廣岳州府無「陳

九改。

○三〕敗守道劉麟長總兵曾英兵 曾英,原作「曹英」。本書卷二五三王應熊傳作「曾英」,明通鑑附編

卷一上附記上、綏寇紀略卷一〇、懷陵流寇始終録卷一八、南疆逸史列傳四十七、小腆紀年附考

卷六等也都作「曾英」,據改。

巡撫龍文光被殺 八改。按本書卷二六三陳士奇傳,稱士奇死於重慶,又同卷龍文光傳稱文光代陳士奇作四川 龍文光,原作「陳士奇」,據國權卷一〇二頁六一三七、懷陵流寇始終録卷

巡撫,死於成都。作「龍文光」是。

## 明史卷三百十

# 列傳第一百九十八

#### 士司

巴、夔以東及湖、湘、嶺嶠,盤踞數千里,種類殊別。 五尺道、置吏、沿及漢武、置都尉縣屬、仍令自保、此卽土官、土吏之所始歟。 自周武王時孟津大會,而庸、蜀、羌、髳、微、盧、彭、濮諸蠻皆與焉。及楚莊蹻王滇,而秦開 西南諸蠻,有虞氏之苗,商之鬼方,西漢之夜郎、靡莫、邛、莋、僰、爨之屬皆是也。 歷代以來,自相君長。原其爲王朝役使, 自

恩威 然調 道在於羈縻。 (遣日繁,急而生變,恃功怙過,侵擾益深,故歷朝徵發,利害各半。 兼濟,則得其死力而不足爲患。 迨有明踵元故事,大爲恢拓,分別司郡州縣,額以賦役,聽我驅調,而法始備矣。 彼大姓相擅,世積威約,而必假我爵祿,寵之名號,乃易爲統攝,故奔走惟命。 實錄載成化十八年馬平主簿孔性善言:「谿峒蠻僚,雖 其要在於撫綏得

第一百九十八 土司

列傳

文武 官隸驗封 納 必奉朝命,雖在萬里外,皆赴闕受職。天順末,許土官繳呈勘奏,則威柄漸弛。 司,日安撫司,日長官司。以勞績之多寡,分尊卑之等差,而府州縣之名亦往往 得 常梗化, 栗備 :人,示以恩信,諭以禍福,亦當革心。」帝嘉納之,惜未能實究其用,此可爲治蠻之寶鑑矣。 相維、比於中土矣。 嘗考洪武初,西南夷來歸者,即用原官授之。 振 亂 ,宣慰、招討等官隸武選。 ,則規取日陋。 畳 無 因。昔陳景文爲令,瑤、僮皆應差徭,厥後撫字乖方, 其間叛服不常,誅賞互見。 孝宗雖發憤釐革,而因循未改。 隸驗封者,布政司領之,隸武選者,都指揮領之。 其土官銜號曰宣慰司,曰宣撫司,曰招討 茲據其事蹟尤著者,列於篇 嘉靖九年始復舊制, 始仍反側。 有之。 以府州 成化 誠使守令 中,令 於是 、縣等

### 湖廣土司

陽,進克武昌,湖南諸郡望風歸附,元時所置宣慰、安撫、長官司之屬,皆先後迎降。 其兵爲用。 巴、夔相接壤,南通黔陽。 湖 南、古巫郡、黔中地也。其施州衞與永、保諸土司境、介於岳、辰、常德之西,與川東 諸苗亦爲盡力, 谿峒深阻,易於寇盜,元末滋甚。 有乞兵旁寨爲之驅使者,友諒以此益肆。及太祖殲友諒於鄱 陳友諒據湖、湘間,噉以利

原官授之,已而梗化。

僚,俘獲 之。 征 洞,籍其 南 十八年, 將 洪 軍, (武三年,慈利安撫使覃垕 、民一萬五千,收集潰散士卒四千五 四萬餘 率師 五開蠻吳面兒反, 人,諸苗始懼。 平散毛等三十六洞,日 而靖、沅、道、澧之間, 連構諸蠻入寇, 勢獗 港。 而副將軍吳良復平 命楚王楨 百餘人 征 ,平其地。 南 將征虜將軍湯 十年內亦尋 將軍 周 Ħ. 德 未幾,五開 開 興 起尋 平之。 古州 和 · 三 滅 諸蠻 、五谿諸蠻亂,討平 Ŧi. 擊斬九谿諸 雖開 年, 凡二百二十三 復命 國 一之初, 鄧 處蠻 愈 師

武

臣

一力,實太祖控制之道恩威備焉

宣慰 於是苗患漸平。 易他 以還,徵符四出,而 州 奔 北 赴不 狩 世世 帥 二百二十七寨,擒僞王侯伯等百餘人,斬賊首千四 永樂初,苗告繼絕,襲冠帶, 至武 中 能解平越之圍。 ,浸淫六七載。 .席富强,每遇征伐,輒願荷戈前驅, 原所 岡 在侵擾,苗 南至 蓋萌發於貴州 湖南 播州之境,不下二十萬, 至天順元年,總督石璞調 土司均備臂指矣。 乞急調京邊軍及征 勢殊熾。 ,而蔓衍於湖南,皆生苗爲梗。 益 景泰初,總兵官宮聚奏:「蠻賊 就 衝勒。 國家亦賴以撻伐,故泳、保兵號爲虓雄。 |麓川卒十萬前來,以資調遣。」 久而 圍困 垂百 總兵官方瑛,始剋期 焚掠諸郡邑、 年,而五開、銅鼓間又紛紛多警。 一百餘級,奪回軍人男婦千三百 諸土司初無動搖,而冰、保諸 臣 西至貴 所領官軍不及二萬, 征 州龍里,東至湖 剿。 破天堂、 師徵不至,更 時英宗 嘉、 隆 **[餘口** 小坪、 前後 廣沅

,

施 州 施 南宣 撫 司 散毛宣 撫 司 忠建 宣 撫 司 容美宣 撫 司

永順軍民宣慰使司 保靖州軍民宣慰使司

椒山 遠, 把 廣 東鄉 都司。 峒 ", 日 瑪 尯 隆奉,日西泙,三日 瑙,日五 五 州 上愛茶峒,日 路,日忠路,日忠孝,日金峒,日 領軍民千戶所 隋爲清江 峰石寶,日 郡, 下愛茶峒,日 改施州。 :日大田 東流, 石梁下峒 日 臘 劍 明初仍之。 , 日水盡 壁 南 領宣撫司三. 日施南, ''', 日 峒 龍潭,日大旺,日忠峒,日高 ō 木册, 源通塔平。 又有容美宣撫 洪武十四年 曰鎭南,曰唐崖。 司 改置施州 日散 者,亦在境內,領長官司 毛, 羅 衞軍民指 領蠻夷長官司 日忠建。 領長 官司 領安 揮使 七 撫 五: 司 四 司 日 日搖 屬湖 鎭 日

寶遣弟光受等,以元所授宣撫敕印 宣撫 各置長官 敕印 二洞, 來 初 司 各置長官 上,請改授。 、太祖即吳王位,甲辰六月,湖廣安定宣撫使向思明遣長官硬徹律等,以元 , 以 向 ,以沒葉 大旺 以向 爲之,統軍元帥二,以南木、潘仲玉爲之。 、大蟲、硬徹律爲之。 乃命仍置安定等處宣撫司二,以思明及其弟思勝爲之。 思 明、 唐漢 來上。 明爲之。至皆新降者。 命光寶爲四川 簳坪洞設元帥 行省參政,行容美洞等處軍民宣撫 府 一,以向 丙午二月,容美洞 抽爛、 顯 不用、黄石三洞, 祖 爲之。 又置懷德軍民 宣撫 梅梓 所授宣 使 、麻 田 光 寮 撫

司 事,仍置安撫元帥治之。 並立太平、臺宜、麻寮等十寨長官司

官。 十九峒,散毛宣慰司都元帥覃野旺 附,納元所授金虎符幷銀印、銅章、誥敕。 覃大興、光寶子答谷等皆來朝,納元所授金虎符。 司 爲正六品,以流官參用。 二月,容美宣撫田光寶復遣子答谷來朝。 洪 武 四年,宣寧侯曹良臣 五年, 帥兵取 忠建元帥墨池遣其子驢吾, 上偽夏所授印 桑植,容美洞元施南道宣慰使覃大勝弟大旺、 置忠建長官司及沿邊溪洞長官司,以墨池等爲長 征 南將軍鄧愈平散毛、柿谿、赤谿、安福等三 命以施州宣慰司 率所部溪洞元帥 爲從三品, 東鄉 阿巨 等來 諸 副宣慰 長官 歸

五. 年,置施南宣撫司,公 本司僉事。 十四年,江夏侯周德興移師討水盡源、通塔平、散毛諸峒,置施州衞軍民指揮使司。 景川侯曹震言:「散毛等洞蠻時寇掠爲民患,已令施州衞及施南宣撫覃大 隸施州衞。 十七年,散毛、沿邊安撫司安撫覃野旺之子起劇來朝,

勝招之,如負固,請發兵討。」

地 以藍玉奏散毛、鎭南、大旺、施南等洞蠻叛服不常、黔江、施州衞兵相去遠、難應援。今散毛 明年,涼國公藍玉克散毛洞,擒刺惹長官覃大旺等萬餘人。置大田軍民千戶所,隸施州衞 與大水田連,宜置千戶所守禦,乃改散毛爲大田,命千戶石山等領土兵一千五百人,置所 二十二年命忠建宣撫田思進之子忠孝代父職。時思進年八十餘,乞致仕,故有是命。

列

餘戍開元

,給衣糧遣之。

鎭之。 玉 復 分 兵 時 、 搜之, 忠建 、施南 殺獲男女一 叛蠻結寨於龍孔,玉遣指揮徐玉將兵攻之, 千八百餘人,械大勝及其黨八百二十人送京師。 擒宣 撫覃大勝, 磔大勝於市 餘 蠻 退走。

洪武間 隸施 餘戶 乞仍舊,既五峰石寶長官張再武亦以襲職請,從之。 崖長官覃忠孝,並言父祖 撫。 隸容美。 施 苗吳面兒之難 請仍設治所。 南 南。 **,請襲,許之。** 長官。 時應虎來朝,言其祖父自宋、元來,俱爲安撫,自蠻亂併其地入散毛,隔遠難治,乞仍 永樂 . 蠻亂民散,廢其治,今忠等以故官子姪來朝,奏請復設,並從之,各賜印章冠帶。 設石梁下峒、椒山瑪瑙、水盡源通塔平三長官司,以向潮文、劉再貴、唐思文爲之, 旣復設忠路、忠孝、金峒三安撫司,隸施州衞,以覃英、田大英、覃添貴爲之。 二年復設散毛、施南二長官司。 時高羅安撫田大民言,招復蠻民四百餘戶,乞還原職治所。 四年, 以其戶少, ,諸土司地 改施南、散毛仍爲宣撫司,以友諒、添富來朝故也。 五年,與南長官厚興等來朝,稱係世職,洪武中廢,今招徠蠻民三百戶, 世爲安撫,洪武時大軍平蜀,民驚潰,治所廢,今谷佐等招集三百 多荒 降爲長官司,隸大田軍民千戶所。 廢,長官亦罷承襲。 先是,洪武初,諸土司長官來降者,皆予 至是,故土官之子覃友諒等以招復蠻民, 同時,設東 以友諒爲散毛長官,覃添富爲 鄉五路安撫,以覃忠爲之, 木册長官田谷佐、唐 以田應虎 爲龍潭安 原官。 皆因 蠻

宣德二年設劍南長官司,「中」隸忠路安撫;搖把峒、上愛下愛二茶峒三長官司及鎭邊、

平,恐復加害。 夷官 木册長官田谷佐奏:「高羅安撫常倚勢淩轢,侵奪其土地人民,已蒙朝廷分理,然彼 蠻當順其情, 官子孫牟酋蠻等,各擁蠻民,久據谿洞,今就招撫,請設官司,授以職事。 隆奉二蠻夷官司,〔<〕皆隸東鄕五 司。 、、西泙蠻夷官司,隸金峒安撫。 元土官子孫量授以職,從所招官司管屬。 所授諸司,宜有等殺。 乞徑隸施州衞。」從之。 路安撫,東流 皆以其

長 兵部議以四百戶以上者設長官司,四百戶以下 、臘壁峒 爲之。 皆從之。 先是,忠路安撫司等各奏,前 二蠻夷官司,隸散毛宣撫,石 令三年一 朝貢如故事。 兵部以聞,帝以馭 宿怨未 者設蠻 元 關 九年, 放土 峒 長

**其母,其子仍禁錮之。** 兇暴,幷造不 容美宣撫田潮美老疾,請子保富代職,從之。 妻譚氏遣子忠等貢馬贖罪,然縉瑄 恩,命瑄試 獲, 斃獄 正統 三年命散毛宣撫覃友諒子瑄試職。 、職圖後效。 至是,本司以其子爲蠻民信服,乞襲職。 法誹謗之言,罪當刑。 景泰二年, 禮部奏:「散毛宣撫司副使黃縉瑄謀殺親兄,律應斬。 罪重,云法不可宥。宜給鈔以酬馬直。」從之。天順元年, 今其母向氏進馬以贖,恐不可從。」帝命給鈔百錠以慰 五年,禮部奏:「施州 初,友諒以罪械赴京,中路逃匿,後爲官軍所 帝以友諒罪重宜革,第以蠻故 木册長官司 土舍譚文壽 韷 法 其

子惟一人,恐身后土人爭奪,乞解部。」工部議非貢典,却之。 文驗,命予半賞。 原,重者難宥,宜下按臣察覈。」八年,容美宣撫貢馬及香,禮部以香不及數,馬多道斃,又無 官田賢及容美致仕田保富各進馬,爲土人譚敬保等贖罪。 已付邊衞騎操,而諸衞收馬文移不至,恐有虛詐,宜勘實給賞。皆從之。弘治二年,木册長 及數,恐使者侵盜,宜停其賞,仍移知所司。」施州等衞八安撫司各奏,成化五年朝覲進馬 虚,煽誘土蠻攻劫,乞調官軍剿治。」五年,禮部奏:「容美宣撫司田保富等,遣人進貢方物不 成化二年,搖把洞長官向麥答踵奏:「鄰近洗羅峒長,窺知本洞土兵調征兩廣,村寨空 九年,金峒安撫覃彦龍奏:「境內產杉木,嘗鬻金三千貯庫。 刑部言:「蠻民納馬贖罪,輕者可 今彦龍年老,

襲。 撫 白俚 揮僉事,以自陳討川寇功也。 水盡源 索,爲偵事 司 俾 同知田世瑛,奏獲鎮南軍民府古印,爲始祖田始進開熙二年頒給,乞改陞宣撫司爲軍 白俚俾恨之,賊殺其父及其弟。 正德四年, 奏辨,罪亦當坐。 通塔平長官司入貢後期,部議半賞,從之。 所發,自魯橋以北計千餘金。 容美宣撫幷椒山瑪瑙長官司所遣通事劉思朝等赴京進貢, 詔 以 十一年,容美宣撫田秀愛其幼子,將逐其兄白俚俾,而 蠻僚異類,難盡繩以法,免其並坐,戒飭之。 事聞,下鎭巡官驗治,磔死。 部臣 以聞,帝以遠蠻宥之。 九年命大田千戶所千戶冉霧子舜卿 土官唐勝富、張世英等為 散毛宣撫弁五峰石寶、 十五 沿途驛傳 年,容美宣 以 分幼子 爲指

民府。 禮部 議,以開設宣撫,頒印已久,不當更,古印宜繳,從之。

臣勘問 禮 有他虞,宜嚴禁諭。 人稱入貢,僞造關文,騷擾驛傳,應天巡撫以聞。 部按舊制 嘉 靖 七年,容美宣撫司、龍潭安撫司每朝貢 ,進貢不過百人,赴京不過二十人,命所司 二十六年,臘壁峒等長官司入貢,禮部驗印文詐僞,詔革其賞,幷下按 率領千人,所過擾害,鳳陽巡撫唐龍以聞 兵部議,土司違例入貢,且所過橫索, 中飭。 忠孝安撫司把事田春者數十 恐

世爵抗違之罪,如不悛,卽繩以法。」從之。 道備巡歷。 巡施州衞,以便控制,調廣西淸浪等戍軍,以實行伍。 世 勢孤懸,不可久居,戍軍亦非一時可集。 元楫對狀,世爵不出,陰與羅峒土舍黃中等謀叛。於是湖廣巡按御史周如斗請移荆南道 捕 相 元楫,下獄論死。世爵遂發兵,盡俘向氏,幷籍其土,皆沒入之。久之,撫按知其謀,責 仇。 三十三年詔湖廣川貴總督幷節制容美十四司。 元楫幼,世爵佯爲講好,以女嫁之,謀奪其產,因誣元楫以奸。 至世<equation-block>驕橫,有司不能攝治,獨久繫元楫何爲。 當移荆瞿守備於施州, 初, 疏下督臣馮岳等議,岳等言:「施州 容美土官田世爵與土官向元楫累 宜假督臣以節制容美之權,問 九永守備於九谿,上荆 有司恐激變,令自 南 分 地 與

時龍潭安撫黃俊素貪暴,據支羅洞寨,以睚眥殺人,繫獄。 會白草番反,俊子中請立功

霄襲職 自贖。 四川 爲 **父**貰罪, 之雲陽、奉節 ,賜紅紵衣一襲,以浙江黃宗山擊倭之功也 帝命追戮俊,梟示,仲實等論斬, 又自求爲副指揮,賄當事 間 ,副使熊逵等計擒俊與 者許之。 中謫戍, 八仲實。 俊出益 而賞有 俊 死 一騎,乃 於獄,中自 "功者。 與中及羣 三十五年,命容美宣撫田 縛 出 降 盜李仲實等, 恣行於 ,執餘黨譚景雷 等

之州 川東 究治。 設 長,聽支羅所百戶提調。 貰, 以 責後 號者,請嚴治,幷令兵巡道每歲經歷施州,豫行調集各官舍獎諭,令赴學觀化。」俱從之。 督 有傅 年,覃璧作 同 班 軍 門驛 友 所轄 知,撫治民蠻,均平徭賦,勿額外橫索。一,金峒世官不宜遽絕,貸覃勝罪,降安撫爲 隆慶元年,吏科給事朱繪等言,湖廣施州衞忠路安撫覃大寧一日奏五 德 百 都察院議,金峒安撫土舍覃壁爭印 所闢 巫山 人戍守。 、三會驛並 亂 功。」帝然之,命所司相機 ,傷官軍,撫按請治失事諸臣罪。 、建始、黔江、萬縣改屬上荆 取獨故道,名百里荒者,抵衞僅 一,施州衞 移近地,俾閭井聯絡。 一,施州所轄十四司應襲官舍,必先白道院,始許理事。 延袤頗廣,物產最饒,衞官朘削,致民逃夷地爲亂。 剿撫。 道。 相殺,及磁峒 而於百里荒及東卜壠仍創建哨堡,令千戶一員, 五. 年,巡撫  $\overline{\mathcal{H}}$ 兵部言:「本衞孤懸境外, 百餘里。 , 以荆州 劉慤以覃璧平,條 不當轄四川 去施 請以巴東之石砫 州 衞 遠, 俱 不便巡 議 下 事起 五 上,語多不實,請 撫按官勘報。 司 事 巡檢、 倉猝, 歷。 其擅立名 宜裁通 一,請以 施州 夷陵 宜從 寬 判 峒 西 几

萬曆十一年,湖廣撫按奏:「施州衞施南等宣撫司各官,仍聽鎭算參將節制,載入敕書,

以一事權。」從之。

釁。」帝命撫按核其事。 賓結七十二村, 糧戰馬,立遣土兵七千,令副長官陳一聖等將之前行。 |崇禎十二年,容美宣撫田元疏言: 「六月間, | 穀賊復叛, 撫治兩臣調用土兵。 鳩銀萬七千兩,賂巴東知縣蔡文陞以逼民從軍之文上報, 時中原寇盜充斥,時事日非,卽土司徵調不至,亦不能問矣。 悍軍<u>鄧維</u>昌等憚於征調,遂與譚正 阻忠義 臣卽捐行 而啓邊

以大兵, 司。 永順 仕羲降。 漢武陵、隋辰州、唐溪州地也。 熙寧中,築下溪州城,賜名會溪。 宋初爲永順州。 元時,彭萬潛自改爲水順等處軍民安 嘉祐中,溪州刺史彭仕羲叛,臨

衣。 宣慰彭添保遣其弟義保等貢馬及方物, 長官司六,曰臘惹洞,曰麥著黃洞,曰驢 遂置永順等處軍民宣慰使司,隸湖廣都指揮使司。 洪武五年,永順宣慰使順德汪倫、堂厓安撫使月直遣人上其所受僞夏印, 遲洞, 賜衣幣有差。 日施溶溪, 自是,每三年一入貢。 領州三,日南渭, 日白崖 洞, 日田 家洞。 日施溶, 永樂十六年, 詔賜文綺襲 九年,永順 日上谿;

列

宣慰彭源之子仲率土官部長六百六十七人貢馬

彭仲子世雄襲職。天順二年諭世雄調土兵會剿貴州東苗。 阻, 劫,又及後溪,招之不從,乞調兵剿之。」謀古賞等懼,願罰人馬贖罪,乃罷兵。 仍賜予如例。 宣德元 禮部以水順宣慰彭仲子英朝正後期, 總兵官蕭綬奏「酉陽宋農里、石提洞軍民被臘惹洞長謀古賞等連年攻 請罪之。 帝以遠人不無風濤疾病之 正統元年命

馬謝恩。十四年,世麒以北邊有警,請帥土兵一萬赴延綏助討賊。兵部議不可,賜敕獎諭 官一 并賜奏事人路費鈔千貫、免其明年朝觀、以方聽調征賊婦米魯故也 勞,[10]世麒乞陞職。 階,仍賜敕獎勞。 成化三年,兵部尚書程信請調永順兵征都掌蠻。十三年以征苗功,命宣慰彭顯英進散 兵部言非例,請進世麒階昭勇將軍,仍賜敕褒獎,從之。八年,世麒進 十五年免永順賦。弘治七年,貴州奏平苗功,以宣慰彭世麒等與有

給賞 如。 殺 賊 藍廷瑞 吏,流毒 (如例。 廷瑞以女結婚於永順土舍彭世麟,冀緩兵。 IE 德元年以世麒從征有功,賜紅織金麒麟服, 、鄢本恕等及其黨二十八人倡亂 黔 五. 楚。 年,永順 總制尙 與保靖爭地相攻,累年不決,訴於朝, 、書洪鍾等討之,不克。 兩川,烏合十餘萬人,僭王號,置四十八營,攻城 世麟偽許之,因與約期。 已而 世麒進馬謝恩。二年進馬賀立中宮,命 爲官軍所遏,乏食,乃佯聽撫,劫掠 命各罰米三百石。六年,四川 廷瑞、本恕及王 自

<sup>1</sup>阜,宣慰<u>彰明輔及都指揮曹鵬等以土軍追擊之,</u>賊倉卒渡河,溺死者二千人,斬首八十餘 金珠等二十八人皆來會,世麟伏兵擒之,餘賊潰渡河,官兵追圍之, 總制、巡撫以捷聞,獎賚有差,論者以是役世麟爲首功云。 七年,賊劉三等自遂平趨 擒斬及溺死 者七 百餘 東

巡撫李士實以聞。命永順宣慰格外加賞,仍給明輔誥命

保靖兩宣慰爭兩江口之議,詞連明輔, 芳等亦頌世麒功,乞蟒衣玉帶。 |Щ 官宴勞之。 陞都指揮使,賞蟒衣三襲,仍致仕,明輔授正三品散官,賞飛魚服三襲,賜敕獎勵,仍令鎭巡 諭 應得陞賞,以贖逮治之辱。 ,賞進奏人鈔千貫。十三年,世麒獻大楠木四百七十,子明輔亦進大木備營建。 十年,致仕宣慰彭世麒獻大木三十,次者二百,親督運至京,子明輔所進如之。 時政出權倖,恩澤皆由於于請。於是郴州民頌世麒征賊時號令嚴明,其土官彭 部議悉已之。 兵部格不可,乃已。 、主者議逮治。 世麒辭賞,請立坊,賜名曰表勞。 明輔乃令蠻民奏其從征功,悉辭 詔世 賜敕褒 會有

臣 年 戢,勿釀兵端。 ,巡撫陸傑言:「酉陽與永順以採木仇殺,保靖又煽惑其間,大爲地方患。」乃命川、湖撫 嘉靖六年,論擒岑猛功,免應襲宣慰彭宗漢赴京,而加宗漢父明輔、祖 是年,発永順 秋糧。 世 麒 銀幣。

三十三年冬,調 永順 土兵協剿倭賊於蘇、松。 明年,永順宣慰彭翼南統兵三千,致仕宣

列傳

第

百 九

十八

湖

廣

土

司

七九九三

潰。 慰彭 明輔 保靖 統 兵最,永順 兵二千,俱會於松江。 次之,帝降敕獎勵,各賜銀幣 時保靖兵敗賊於石塘灣。 ,翼南賜三品服 永順 兵邀擊, 賊奔王江涇,大

諭 兵 南遂授昭毅將軍。 掎之,永順 入,爲賊所 責 驕 所 先是,永順 過皆劫掠,緣江上下苦之。 **幷令衙、直練鄉勇,嗣後不得輕調** 角之,斬獲一千九百餘級,倭爲奪氣, 圍,皆死之。 兵剿新場倭,倭故不出,保靖兵爲所誘遽先入,永順土官田菑、 已, 陞右參政管宣慰事, 與明輔俱受銀幣之賜。 時保、永二宣慰破 議者皆言督撫經略失宜,致永順兵再戰再北。 御史請究治,部議以土兵新有功,遽加罰,失遠人心,宜 土兵。 蓋東南戰功第一云。 時邀功者方行賞,翼 及王江 一徑之戰,保靖 田豐等亦爭 倭後,

南 爲 右 四十二年以獻大木功再論賞,加明輔都指揮使,賜蟒衣,其子掌宣慰司事右參政彭翼 布 政使, 賜飛魚服, 仍賜敕獎勵。 四十四年, 永順復獻大木、詔加 明輔 翼南

永順 有 命究主兵者。 要挾之迹,命罷之。三十八年賜元錦都指揮銜,給蠎衣一襲,妻汪氏封夫人。 貢馬 萬 曆二十五年,東事棘,調永順兵萬人赴援。 後期,減賞。兵部言:「前調宣慰元錦兵三千人援遼,已半載,到關者僅七百餘人。」 四十八年進元錦都督僉事。先是,元錦以調兵三千爲不足立功,願以萬兵 宣慰彭元錦請自備衣糧聽調,旣而支吾, 四十七年,

往。 旨切責。 朝廷嘉其忠,加恩優渥。旣而檄調八千,僅以三千塞責,又上疏稱病,爲巡撫所劾,得 元錦不得已行,兵抵通州北,聞三路敗衄,遂大潰。 於是巡撫徐兆魁言:「調永順

兵八千,費踰十萬,今奔潰,虛糜無益。」罷之。

詔陞安撫司爲保靖宣慰司,以萬里爲之,隸湖廣都指揮使司。 自是,朝貢如 其屬歸附,命仍爲保靖安撫使。洪武元年,保靖安撫使彭萬里遣子德勝奉表貢馬及方物, 保靖,唐溪州地,宋置保靜州,元爲保靖州安撫司。明太祖之初起也,安撫使彭世雄率 制。

授斬平之。二十一年,宣慰彭藥哈俾遣人貢馬。 龍等爲亂,總兵梁福平之。未幾,者泥子吳擔竹復誘苗吳亞麻糾貴州答意諸蠻叛,都督蕭 之,隸保靖。 揮襲能等招諭草子坪等三十五寨生苗廖彪等,各遣子入貢,因設草子坪長官司,以彪爲 永樂元年以保靖族屬大蟲可宜等互仇殺,遣御史劉從政齎敕撫諭之。三年,辰州衞指 九年,宣慰彭勇烈遣人來貢。十二年,算子坪賊吳者泥自稱苗王,與蠻民苗金

殺, 一以殺 宣德元年,宣慰彭大蟲可宜遣子順來貢。 入當死,其同知以下官皆缺,請改流官治之。」帝以蠻性難馴,流官不諳土俗。令 四年,兵部奏:「保靖舊有二宣慰, 爲 人所

列傳

第

古

九十八

湖廣土司

:督蕭授擇衆所推服者以聞。 正統十四年, 保靖宣慰與族人彭南木答等相訐奏, 旣而講

和,願輸米贖誣奏罪,從之。

命。 功,顯宗、仕瓏皆進一階。十五年以災免保靖租賦。 **屪調征廣西及荆、襄、貴州有功也。七年,顯宗老不任事,命其子仕瓏代。十三年,以平苗** 拾怕俾卽選兵進討。三年,保靖奏夏災。成化二年,以保靖宣慰彭顯宗征蠻有功,命給誥 下部臣議,宜逮問,命鎭巡官諭之。 三年復調保靖兵征都掌蠻。五年免保靖宣慰諸土司成化二年稅糧八百五十三石,以 景泰七年命調保靖土兵協剿銅鼓、五開、黎平諸蠻,先頒賞犒之。天順二年敕宣慰彭 仕職奏,兩江口長官彭勝祖違例進貢

免明年朝覲,時有征<u>貴州</u>賊婦米魯之役故也。 征 剿。部覆以屢行按問不報,宜諭鎭巡官速勘奏聞,從之。十四年,以保靖宣慰等方聽調 弘治十二年,永順宣慰司奏,仕瓏擅率兵攻長官彭世英,仇殺多年,搆禍不已,乞發兵

逮問,死獄中,革副宣慰,而所據寨如故。 大別、大江、小江等二十八村寨。 之子大蟲可宜,諷土人奏已爲副宣慰,同理司事,因殺藥哈俾而據其十四寨。口己事覺, 初,保靖安撫彭萬里以洪武元年歸附,卽其地設保靖宣慰司,授萬里宣慰使,領白崖、 萬里卒,子勇烈嗣。 其後,勇烈之弟勇傑嗣,傳子南木杵,孫顯宗,曾 勇烈卒,子藥哈俾嗣,年幼。萬里弟麥

列傳第一百九十八 湖廣土司

歲。 江 轄 冥。 兵守之。 奏言之。於是巡撫閻仲宇、巡按王約等請以前後章奏下兵部、都察院,議:「令世英歸所據小 調 有 孫 仕瓏 七寨於仕職,止領大江七寨,聽仕職約束。 世 功, 土人亦 英從征 弘治十年,巡撫沈暉奏言,令世英入粟嗣父職,將以平之,而仕瓏奏訐 如不 仕瓏、世英並逮問,勝祖 英無官、恐仕瓏 授 與 兩 而徙世英於沱埠,以絕爭端。 入學者,不准承襲。 各分黨仇殺。 大蟲 江 貴州,而兵部移文有「兩江口長官司」字,仕職疑世英得設官署,將不聽約束,復 口 長官,勝祖成化中亦以功授前 可宜之子忠,忠子武,武子勝祖及其子世英,代爲仇敵。 奪其地,援例求世襲,奏行覈實,仕瓏輒沮之, 永順宣慰使彭世麒 照常例發遣。」奏上,從之。弘治十六年六月事 世麒黨於世英,法當治,但從征湖廣頗効忠勤,已有旨許以功 以後土官應襲子弟, 取勝祖女,復左右之,以是互相攻擊,奏訴無寧 職 其原居兩江口 が並隨 司 理 事 係襟喉要地,請調淸水溪堡官 ず, 無印 悉令入學, 署。 以是仇 弘治 漸染風 而武以正統 不止。 也 恨 初 益 化, 甚,兩 勝 是時,敕 以格 祖 中隨征 家 以年 頑 所

餘 霄 史吳廷舉勘 復 搆 前 E 怨 德 **計奏累八十餘章。** 四年 處。 永順宣慰彭 ,保靖兩江 廷舉乃令鎮巡議,以爲惠罪當誅,但土蠻難盡以法繩, 明 輔與之連姻,助以兵力,遂與 口土舍彭惠既以祖大蟲可宜 守巡官緊惠於 微,明 輔 率 九霄 ·衆劫 與彭藥哈俾世 往 之去,尋復 復 仇殺,數 仇 捕 宜徙 年不 繫。 , 至 是 與 宣 惠置辰、常城 息,死 事 聞 一慰彭九 者 詔 都 五 御

廷舉等復請以大江之右五寨歸保靖,大江之左二寨屬辰州,設大刺巡檢司,流官一人主之。 i 中,令九霄出價以易兩江口故地。 惠殆遷徙,仍居沱埠,以土舍名目協理巡檢事。 向 化,請敕獎諭 ,仍擢用爲首領。下兵部議,以惠徙內地,恐貽後患,令廷舉再議。 仍用文官左遷者二人爲首領官。以勸 部覆如廷舉言。 相之。 俟數年後革 於是

時已敍趙文華、宗憲功,復加蓋臣右參政,管宣慰司事,仍賞銀幣。 及是,以王江涇捷,進盡臣爲昭毅將軍。 新場,倭二千人伏不出,保靖土舍彭翅引軍探之,中伏,與所部皆死,贈翅一官幷賜棺殮具。 功,以保靖爲首,敕賜蓋臣銀幣幷三品服,令統兵益擊賊。 松 臣 征倭。 襲職時,免赴京。二十六年免保靖秋糧。三十三年詔調宣慰彭蓋臣帥所部三千人赴蘇、 嘉靖六年以擒岑猛功進九霄湖廣參政,賜銀幣。長子虎臣戰歿,贈指揮僉事,次子良 明年遇倭於石塘灣,大戰,敗之。賊北走平望,諸軍尾之於王江涇,大破之。錄 既又調保靖土兵六千赴總督軍前,從胡宗憲請也。 先是,都司李經率保靖兵追倭至

乾至涿州病,中夜兵逃散者三千餘人,部臣以聞。 事,贈彭象周、彭緄、彭天祐各都司僉書,以渾河之役一門殉戰,義烈爲諸土司冠云。 明年,象乾病不能行,遣其子姪率親兵出關,戰於渾河,全軍皆歿。 萬曆四十七年調保靖兵五千, 命宣慰彭象乾親統援遼。 帝嚴旨責統兵者,幷敕監軍道沿途招撫。 四十八年加象乾指揮使。 天啓二年進象乾都督食

### 校勘記

率師平散毛等三十六洞 三十六洞, 本卷施州傳、 太祖實錄卷七三洪武五年四月庚子條都作

「三十九洞」,本書卷一二六鄧經傳作「四十八洞」。

命楚王楨將征虜將軍湯和 征虜,原作「征南」,據本書卷三太祖紀、 又卷一二六湯和傳及太祖

實錄卷一七五洪武十八年九月戊子條改。

日西泙 西泙,本書卷四四號選志作「西坪」,下同。

抽攔不用黃石三洞 不用, 太祖實錄卷一四甲辰年(至正二十四年)六月戊戌條及國權卷二頁

三一三俱作「不夜」。

五二 以向思明唐漢明爲之 向思明,太祖實錄卷一四甲辰年六月戊戌條作「向志明」。

十五年置施南宣撫司 本書卷四四地理志及太祖實錄卷一五八洪武十六年十一月乙卯條繫於

十六年。

. . U 宣德二年設劍南長官司 本書卷四四地理志及宣宗實錄卷四三宣德三年五月戊寅條繫於

列 鎭邊隆奉二 傅 第 百 蠻夷官司 九 + 八 鎭邊, 校 勘 記 宣宗實錄卷四三宣德三年五月戊寅條同, 七九九九九 本書卷四四地理志及

卷九〇兵制、明史稿志二一地理志及志六七兵制都作「鎭遠」。

へたし 然縉瑄罪重 原脱「縉」字,據上文及英宗實錄卷二○○景泰二年正月壬戌條補。

【10〕以宣慰彭世麒等與有勞。彭世麒、原作「彭世騏」、下文「騏」又作「麒」。按明史稿傳一八四永順

軍民宣慰使司傳、武宗實錄卷一三二正德十年十二月丁丑條俱作「彭世麒」,據改。下同。

因殺藥哈俾而據其十四寨 原脱「哈♪字,據上文及孝宗實錄卷二○○弘治十六年六月乙巳條

補。

# 明史卷三百十一

# 列傳第一百九十九

## 四川土司

撻伐。 嘗設立文武爲之鈴轄,聽其自相雄長。雖受天朝爵號,實自王其地。以故終明之世,常煩 競尙,焚燒劫掠,習以爲恒。去省寫遠,莫能控制,附近邊民,咸被其毒。皆由規模草創,未 川、芒部舊屬雲南者,皆隸於四川,不過歲輸貢賦,示以羈縻。 明太祖略定邊方,首平蜀夏,置四川布政司,使招諭諸蠻,次第歸附。故鳥蒙、烏撒 四川土司諸境,多有去蜀遠去滇、黔近者。如鳥蒙、東川近於滇,鳥撒、鎮雄、播州近於 唯建昌、松、茂等處設立衞所,播州改遵義、平越二府以後,稍安戢云。 然夷性獷悍,嗜利好殺,爭相 東

## 四川土司

列 傅 烏蒙烏撒東川鎭雄四 第 百 九 + 九 四 川 土 軍民府 司 馬湖 建昌衞 寧番衞 越篱衞 鹽井衞

### 會 Щ 衞 茂州衞 松潘衛 天全六番招討司 黎州安撫司

部 鳥蒙王者。 據 ,元時嘗置軍民總管府,而於東川置萬戶府。 險阻深,與中土聲教隔離 烏蒙、 鳥撒、東川、芒部,古爲竇地、的巴、〇東川、大雄諸甸,皆唐爲蒙裔也。 元初置烏蒙路,遂以東川、芒部皆隸於烏蒙、烏撒等處宣慰司。 地勢並在蜀之東南、與滇、黔壤土相接,皆 烏撒富盛甲諸 宋有封

罪 副將軍永昌侯、右副將軍西平侯率師往征。猶恐諸部長未喻朕意,故復遣內臣往諭。 臣 、向義,當卽躬親來朝,或遣人入貢,亟攄誠款,朕當罷兵,以安黎庶。 爾共省之。」 有五年,而鳥蒙、鳥撒、東川、芒部、建昌諸部長猶桀驁不朝。 朕已遣征南將軍潁川侯、左 齎敕諭 明太祖旣平蜀,規取雲南,大師皆集於辰、沅,欲幷剪諸蠻以通蜀道。洪武十四年遣內 烏蒙、烏撒諸部長曰:「西南諸部,自古及今,莫不朝貢中國。 股受天命爲天下主 如悔

及聞 格孤 旣知士勇可用,乃縱兵接戰。 大軍繼進,皆遁。 山而南,以通永寧之兵,擣鳥撒。時元右丞實卜聞海洋兵至,乃聚兵赤水河以拒之。 時征南將軍傅友德已分遣都督胡海洋等帥師五萬,由永寧趨烏撒,復自率師由曲靖循 友德令諸軍築城,版牐方具,蠻寇大集。 有芒部土會率衆來援,實卜兵與合,鋒甚銳。 友德屯兵山岡,持重以待。 大軍鼓譟而前,

列傅第一百九十九 四川土司一

其 涿 城烏撒,克七星關以通畢節,又克可渡河。於是東川、烏蒙、芒部諸蠻震響,皆望風降附。 一角長多中槊墜馬死。 大軍益奮,蠻衆力不支,大潰,斬首三千,獲馬六百,實卜率衆遁

路, 劾順 撒、東川、芒部諸酋長雖已降,恐大軍一還,仍復嘯聚。 貴州已設都指揮使,然地勢偏東,今宜於實卜所居之地立司 各廣十丈,準古法,以六十里爲一驛。 中國,以享昇平。復識諸部長曰:「今置郵傳通雲南,宜率土人,隨其疆界遠邇,開築道 十五 年置東川、烏撒 、烏蒙、芒部諸衞指揮 符至奉行。」又敕征南將軍友德等曰:「鳥蒙、鳥 使司,詔諭諸部人民。以雲南已降附, 符到日,悉送其酋長入朝。」又諭 ,以便控制,卿其審之」。 宜益 以

款附,方可留兵鎭守。又諭宜乘兵勢修治道途,令土賲諭其民,各輸糧一石以給軍,爲持 還軍,會友德擊烏撒,大敗其衆,斬首三萬餘級,獲馬牛羊萬計,餘衆悉遁,復追擊破之。 之,征鳥撒、烏蒙諸叛蠻。 其家之不暇,必不敢出以抗大師。 留屯大軍蕩埽諸蠻,戮其渠長,方可分兵守禦耳。」乃命安陸 友德等,師捷後,必戮其渠魁,使之畏懼。 然雲南之地 已,烏撒諸蠻復叛,帝諭友德曰:「烏撒諸蠻伺官軍散處,即有此變, 朕前已慮之, 今果 如曲靖、普安、烏撒、建昌,勢在必守,其東川、芒部、烏蒙,未可遽守也。 **幷**諭 勿與蠻戰於關索嶺上,當分兵掩襲,直擣其巢,使彼 俟三將軍至,破擒之。 搜其餘黨,絕其根株,使彼智窮力屈,誠心 是月,副將軍西平侯沐英 侯吳復爲總兵,平涼侯費聚副 自大理 各奔救 且

久計。

能赴京。 刀耕火種,比年霜旱疾疫,民飢窘,歲輸之糧無從徵納。詔悉発之。二十年徵鳥撒知府阿 給布三十疋,或茶一百斤,鹽如之。實卜復貢馬,賜綺鈔。十八年,烏蒙知府亦德言,蠻地 其賦稅。 又定茶鹽布疋易馬之數,烏撒歲易馬六千五百匹,烏蒙、東川、芒部皆四千匹。凡馬一匹, 其柩於家。十七年割雲南東川府隸四川布政使司,幷島撒、烏蒙、芒部皆改爲軍民府,而定 F 部 長百二十人來朝,貢方物。韶各授以官,賜朝服、冠帶、錦綺、鈔錠有差。其鳥撒女酋實 十六年以雲南所屬烏撒、烏蒙、芒部三府隸四川布政使司。 加賜珠翠。 鳥撒歲輸二萬石,氊衫一千五百領,鳥蒙、東川、芒部皆歲輸八千石,氊衫八百領。 芒部知府發紹、烏蒙知府阿普病卒,詔賜綺衣幷棺殮之具,遣官致祭,歸 鳥蒙、鳥撒、 東川、芒部諸

將軍 但其 爭端,有事則相爲救援。 羅 。厥後 ,英與陳桓爲左右副將軍,率諸軍進討。 、地重關複嶺,上下三百餘里, 二十一年命西平侯沐英南征。 子 ,姓蕃衍,各立疆埸,乃異其名曰東川、烏撒、烏蒙、芒部、祿肇、水西。 若唐時閣羅鳳亡居大理,唐兵追捕,道經芒部諸境,羣蠻聚衆據險 人迹阻絕,須以大兵臨之。帝命潁國公傅友德仍爲征南 英言,東川强盛,據烏山路作亂,罪狀已著,必先加兵。 敕友德等曰:「東川、芒部諸夷、種類皆出於 無 事 則 互 起 羅

設伏。 撒 以聞,從之。復命景川侯曹震、靖寧侯葉昇等分討東川,平之,捕獲叛蠻五千五百三十八 軍民府葉原常獻馬三百匹、米四百石於征南將軍,以資軍用,且願收集土兵從征。 唐將不備,遂墮其計,喪師二十萬,皆將帥無謀故也。 今須預加防閑,嚴爲之備。」鳥 英等

府卜穆奏、霑益州屢侵其地、命沐春諭之。二十八年、戶部言:「烏撒、烏蒙、芒部、東川歲賦 **貢馬及氊衫。 自是,諸土知府三年一入貢,以爲常,或有恩賜,則進馬及方物謝恩 氊衫不如數,詔已殆徵。今有司仍追之,宜申明。」從之。二十九年,烏蒙軍民府知府實哲** 二十三年,烏撒土知府阿能,烏蒙、芒部土官,各遣子弟入監讀書。二十七年,烏撒知

讀書,以廣文治,從之。 以通判黃甫越言,元時本府向有學校,今文廟雖存,師儒未建。乞除教官,選俊秀子弟入學 年遣行人章聰、侯璉齎敕往諭,仍敕巡按與三司官往平之。 設烏蒙儒學教授、訓導各一員。 宣德七年,兵部侍郎王驥言,鳥蒙、鳥撒土官祿昭、尼祿等,爭地仇殺,宜遣官按問。八

叛亂,恐滋蔓鄰近,宜戒嚴防守,毋聽賊衆誘惑,倘來逼犯,便當剿殺。 校各一員,幷革烏撒、烏蒙遞運所。 正統七年裁烏撒軍民府通判、推官、知事、檢校各一員。十一 景泰元年敕諭烏撒、烏蒙諸府土官普茂等,以貴州諸苗 年裁烏蒙、東川 時鳥撒進萬壽表踰 知 事、檢

列傳第

百九十九

四川土

司

縣治,敕御史項愫會鎭巡官捕之。 賞者給其 期,部議宜究,詔以遠人宥之。 半。 天順 元年,鎭守四川 嗣後,朝貢過期及表箋不至者,朝廷率以土官多從寬貸, 中官陳淸等奏,芒部所轄白江蠻賊千餘作亂,攻圍筠連 應

大雷 梁及壓死 三年,以慰羣望。從之。 「雨不止,至二十九日,水漲山崩地裂,山鳴如牛吼,地陷湧出清泉數十派,衝壞廬舍橋 成化十二年,烏撒知府隴舊等奏,同知剛正撫字有方,蠻民信服,今九年秩滿,乞再任 人口牲畜無算。 弘治十四年,烏撒所轄可渡河巡檢司言:「自閏七月二十七日,「言 又本府阿都地方,八月亦暴風雨,田土渰沒二百餘處,死者三百

政傅習、都指揮許韶,督永寧宣撫司女土官奢爵等,討擒阿又磉等四十三人,斬一百十九 仇殺。所部僰蠻阿又磉等乘機倡亂流劫。 ,事乃定。 正德十五年討斬芒部僰蠻阿又磉等。初,芒部土舍隴壽,與庶弟隴政及兄妻支祿爭襲 事聞,命鎭守中官會撫按官捕治。至是,貴州參

級

然政與支祿倚鳥撒土舍安寧等兵力,仇殺如故。壩底參將何卿請於巡撫許廷光,發土兵二 時壽、政等爭襲,不敢離任。朝廷以嫡故立壽,恐壽赴京而政等乘隙爲亂,故有是命。 嘉靖元年命芒部護印土舍隴壽襲知府,免赴京。故事,土官九品以上,皆保送至京乃

百。 甚衆。 萬 黨 五 [11] 黑 千 政敗奔烏撒 兵部 等掠 人,命 言戝 周 貴 泥站 州 勢猖 卵機烏撒 參將楊仁 八七星 一蹶,宜 關 速征 等將之,受何卿 ,復遣 土舍安寧、土婦奢勿擒之。 阿核 於是 等糾 何 卿等進剿 集諸苗 節 制,相 ,斬首二百餘級,俘 機進 剽掠畢節諸處, 安寧佯許諾,僅 剿。 政、嚴 佯 殺 聽撫,乞緩 傷 以 二十餘 官 阿核 軍, 等 人,降其 燬官 屍 師 獻, 一, 而 民 竟不 房屋 衆 令 數 贼

出

政,兵久

不

解。

都御

史湯沐

以聞

,韶切責諸將及守巡官罪,

而

革

何卿

冠

一帶,

令

剿

贼

自

贖。

祖保、 省 時 以 分屬夷良、毋響、落角利之地,爲懷德、歸化、威信、安靜四長官司,使隴氏疏屬 眞僞未 一、王師 烏 政 隴 Ê 政 石 四 阿萬四 等 一爲官 年 可信 、支祿怙終稔 大舉,始克蕩平。 , 政 四十九寨, 軍 ,恐首惡尙在,不 人統之。 誘 擒 殺 於水西,追獲芒部印信,前後斬首六百七十四級,生擒一百六十七 壽,奪 惡,戕朝廷 以捷 如程番府例,令三年一入朝,貢馬十二匹,而以通判程洸爲試知府。」 其 聞。 印。 今其本屬親支已盡,無人承襲,請改爲鎭雄府,設流官知 無後慮,請覈實。」五年,兵部奏三世部隴氏,釁起蕭 貴州巡按劉廷簠言「烏撒 命吏,罪不 巡撫 王軏 、巡按 可赦。 劉黻 乃命鎭巡官諭安寧,縛政、祿 各上其事。 所獻 阿核等屍 黻言從蠻情,立支祿 及 水 西所 及諸 阿濟、 牆 府統之。 縛 人,招撫 助惡者。 騒 便。 白壽、 隴政, 動兩 邨

百人,洗奔畢節 六年,芒部賊沙保等謀復隴 事聞, 兵 科給事 氏,擁隴壽子勝糾衆攻陷鎮雄城,執程洸 中鄭自壁等言 「鎭雄初設流官,蠻情未服,而有司失先 奪其印 殺傷數

列

傅

第

百

九

+

九

四

Щ

土

司

當剿。 沙保出鎮雄府印乞降,然尚持兩端,欲立土官如故。 於是兵部覆言:「隴勝非眞隴壽子,故議設流官,有司撫循失策,遂生叛亂。 之防,不亟收遺裔隴勝,而令沙保得擁孺子,致煽禍一方。 何卿方守松潘 勢難相援,宜亟趣都御史王廷相之任,幷敕總兵牛桓調兵速進。」時 四川撫按以保狡悍不可馴,檄瀘州守 宜速遣總兵何卿倂力剿寇。」 沙保罪不容誅,

待阿濟 鳳儀 臣請 威並著。 懷不安,以是反者數起。 於是四川 又時值荒 部尙書李承勛以伍文定專主用兵爲失計,疏及之。 流官如舊。 備丁勇擊之。 如宣 七年,川、貴諸軍會剿,敗沙保等,擒斬三百餘級,招撫蠻羅男婦以千計。 以 金叉 巡撫唐鳳儀言:「烏蒙、烏撒、東川諸士官,故與芒部爲脣齒。 章下部覆,乃革鎭雄流官知府, 不 德中復安南故事,俯順輿情,則不假兵而禍源自塞。」川、貴巡按戴金、陳講等奏如 饉,小民救死不贍,何能 死 而芒部、烏撒、毋響苗蠻隴革等復起,攻劫畢節屯堡,殺掠士民,紛紛見告。 以
当惡
如毋響、
祖保等,
宜剿誅以折 ,然後復 又遣使勞賜芒部撫夷郤良佐,使計擒沙保。 隴勝故 今懷德長官阿濟等雖自詭擒賊,其心固望隴勝得一職,以存隴後 職,或降爲 趣戦。 知州。 而以隴勝爲通判, 時帝亦軫念災傷,令罷芒部兵,俟有秋再議征討 其長官或因 其驕氣,始下撫處之令, 而 御史楊彝復言芒部改土易流非長策, 保怒,復叛 署鎭雄府事。 或革,或分隸, 自芒部改流 令三年後果能率 庶操縱 許生獻沙保等, 捷聞, 得宜,恩 , 諸部內 設鎭 兵 雄

職奉貢,准復知府舊銜。時嘉靖九年四月也。

劫府 者濬 得革 取 姻 長 阿 連, 四 子堂 聚 等,各上書 得 即 并霑益、 乃起兵攻阿堂 革 及幼子殺之。 奔水 頗 九 擅 年 羅雄 西 權 命 [] 堂 謀奪 勘 賄結烏撒土官安泰,入東川 東 罪。 人口 所居寨, 堂以是怨九鼎 Ш 其官。 阿堂 性畜及 韶下雲、貴 之亂 破之。 因 侵地 先求烝安氏 一時相 初, 一、乞貸 四川 堂妻阿聚攜 東 攻擊。 Ш 撫按官 土 不 ,囚安氏, 得, 知 幼子 會勘 堂兵侵羅雄州 府 乃縱 禄 慶死, 奔霑益 奪其印。 火焚府 堂聽勘: 子 州 位 治, 境, 於 土官安九鼎 貴州宣 幼, 東洪江 走武 九鼎及禄位與羅雄 妻安氏 定州 慰安萬 , 具服 攝 萬銓 爲 銓故與祿氏 府 罪, 土官 脅 願 九鼎 所殺。 獻所 土官 有營

貲, 賦 議,行 以 前 故 時 復 時 雲、貴 斂 與 ]]] 必 法 位 九鼎治兵相 百出, 貴 所 擒 及弟僎 堂 必誅。 撫 之鄰壤未見侵越,此其非叛明矣。 以獻。 諸軍 按 已前 會勘具奏。 第彼 · 衛及 攻。 居敬 殁, **猶借朝廷之印** 有 九鼎訴 官府 信 司 之, 居敬遽調土漢兵五萬餘進剿。 土官舍等乘之爲姦利, 因 遂上疏言堂稔 之雲南巡撫游居敬 訊 禄 氏 以約土 所當襲者, 一蠻,冒祿氏之宗以 惡不 其與九鼎治兵相攻,彼此俱 悛, 堂以己幼子 遠近 謂 堂怙 請 一騷動。 專意 亂,請 雲南承平 進 圖 詭名祿哲以報。 巡按 (剿) 為 致討, 世 一職,而 久, 一 王大任言:「逆堂 地 且 四川 自詭 屬有罪 方除害。 旦兵動 當率 據 一,費 府 一税辨 帝 居敬乃 所 FII 奪 允 部 用 納 部 如 即 不

欲爲 一偏之詭辭,違會勘之明旨,輕動大衆,恐生意外患。 時堂聞大兵至東川,逃深箐,諸將分兵於新舊諸城,窮搜不獲,地方民夷大遭屠掠 **雪怨,及受各土官賂,攘盜帑積,皆有實跡。** 請亟罷居敬,暫停征剿爲便。」乃命逮居 且外議籍籍,謂居敬入九鼎重賄,

堂聞一 防衞。 署之,以照磨印畀羅雄土官者濬,而以寧著女妻者濬子。仍留水西兵三千於東川,爲寧著 擒,哲時年八歲。 土官私擅標署之罪。 四十年,營長者阿易謀於堂之心腹母勒阿濟等,掩殺堂於戛來矣石之地,其子阿哲就 因言:「東川地方殘傷,該府三印悉爲土官部置,請通敕川、貴總督及鎭巡官,按究各 水西 與東川鄰,萬銓本水西土官,故議者謂其有陰據東川之志。 事雖定,而府印不知所在。於是安萬銓取東川府經歷印,畀祿位 幷訪祿氏支派之宜立,與所以處阿哲者。」 部覆 報 可 巡按王大任 以誅 妻寧著 四

氏職 有旨 勘,印實亡失。 令照蠻俗罰牛例處分,務悔禍息爭,以保境安民,然終不能靖也。 而 以各 四十一年鑄給四川 私 必更,餘 所 同 親,彼 知 而祿位近派悉絕,惟同六世祖有幼男阿采。 後,令寧著署掌,後果能撫輯其衆,仍進襲知府。 如 此構 議。 先是,烏撒 禍,奏訐紛紜 東 JII 府印。 與永寧、烏蒙、霑益、水西 ,詳四川永寧土 初,阿堂旣誅,索府印不獲,人疑爲安萬銓所匿 司 傳 中,當事者頗厭苦之。 諸 撫按官雷賀、陳瓚請以采 土官,境土 其新印請 相 連, 更名,以 世 萬曆六年乃 戚 一,及 親 防奸 厚,既 是屢

落以 諸 郡 ,只隔 劫殺爲生,不事耕 三十八年詔 一嶺,出沒無時,朝發 東川 土司並聽雲南節 作。 蜀轄遼遠, 分至。 制。 法紀易疏。 時巡按 祿壽、祿哲兄弟,安忍無親,日尋干戈。 鄧渼疏稱: 滇 以非 我屬 圖「蜀之東川偪處武定、 內, 號令不行。 以是驕蹇成 其 尋甸

習,目無漢

法。

今惟改敕滇

撫兼制

東川。」因條三利以進,詔從之。

敵。 成。 民連 龍之妻隴氏,卽鎭雄女土官者氏之女也,以雲龍雖故,尚有遺孤,且挾外家 慶 此 實 也。 繼 下 名上 一通爲 與夫弟阿哥二人,率衆 紹慶則 効良倚父兵,强 先是,四川烏撒軍民府,雲南 已,祿墨及長子安雲龍與兩 一奏,事行兩省會勘,歷十有四 一家。 以隴氏所出,明係假子,亦倚霑 萬曆元年,霑益女土官安素儀 ·圖竊據,殺戮無辜。」因極言効良 歸順,授實卜以烏撒土知府,授阿哥以霑 霑益州 孫 惧殁, 年不結。 難愼 益兵力,與隴 安紹慶奏以次子安効良歸宗, 、蜀異轄、宗派 是年,安雲翔奏稱:「隴氏有子官保,今已長 無嗣,奏以土知府 不可立者數事 氏爲難。 一源。 彼此 旅墨 益土 明初 次子繼本州,即安紹 仇殺,流毒 一知州 大軍南 襲土知府。 兵力, 下,女土 其後,彼 與紹慶 方。 安雲 官 絕

始祖 必 得 曜飛 三省 三十九年,廷臣議行川、貴大吏勘報。 沙獻土歸順 會勘,始可定獄。 ,授爲世職 帝命速勘,乃命隴鶴書承襲鎭雄土知 知府,五傳而爲庶魯卜,別居於果利地,又四傳而爲庶祿 貴州 撫臣 以 土官爭職在 府。鶴書,原名阿卜,自其 雲南,而爲害在點、蜀,

列

傅

第

百

九

+

九

四川

土

司

易名隴正名者也。於是主立阿固,而先立其父阿章。章尋病死,阿固不爲夷衆所服,往復 姑,別居夷良、七欠頭地,又五傳而隴氏之正支斬矣。水西安堯臣贅於祿,欲奄有之,衆論 者氏且以印獻,遂定立阿卜,而以阿固充管事,從巡撫喬應星之議也 不平,始有驅安立隴之奏,奉旨察立隴後。女官者氏以阿固應。阿固者,魯卜之六世孫,而 者氏及四十八目、十五火頭等共推阿卜。阿卜者,祿姑之五世孫,咸以爲長且賢,而

効良,焚劫烏撒。 四十一年,烏撒土舍安効良初與安雲翔爭立,朝廷以嫡派立効良。 雲翔擾害地方,欺罔朝廷,罪原難赦,但爲奸人指使,情可原,姑准復冠帶。 四川撫按上其事,以効良爲雲龍親姪,雲翔乃其堂弟,親疏判然,効良自 雲翔數爲亂,謀逐 從之。

印,仇殺者二十年。夷民無統,盜寇蜂起,堡屯焚燬,行賈梗絕者亦二十年。 之門戶。 者, 滇、蜀之咽喉要地。 者蜀之土官,而蹂踐糜爛者點之赤子。 滋。」下所司勘奏。 **擁衆千餘**,剽掠 四十三年,雲南巡按吳應琦言:「東川土官祿壽、祿哲爭襲以來,各縱部衆,越境劫掠 効良據烏撒,又扼滇、蜀之咽喉。 兩府,浹旬之間,村屯並掃,荼毒未有如此之甚者。 貴州巡按御史楊鶴言:「烏撒土官,自安雲龍物故,安咀與安効良爭官奪 臣由普安入滇,七日始達烏撒。 誠改隸於黔, 則彈壓旣便, 干戈可戢。」又言:「烏撒 父子各據一方,且壤地相接,無他郡縣上司以隔 見効良之父安紹慶據霑益,當曲 或撫或剿,毋令養禍 是爭官奪印 日

絕鈐制之,將來尾大不掉,實 可寒 ιŗ 蓋黔有 可制之勢,而無其權,蜀有遙制之名, 而 其

實。誠以爲隸黔中便。」帝命所司速議。

千鍾 宜特 綏 静 之要 :敕蜀 、祿阿伽縱 泰昌元年,雲南 が 撫 按, 也。」詔下所司 凡遇襲替,務合兩省會勘。 賊披猖,爲患不已。 撫按沈儆炌等言: 是東川雖 [三] 蜀之東川,業奉朝命兼 圈察其世次,滇亦按無侵犯, 隸 蜀 而相 去甚遠, 制,然 雖不隸滇, 事權 方許起送, 全不 而 禍 相 實震 亦羈縻 關。 鄰。 禄

十六營,直抵霑益,對壘城下五 亦 重 鎭 諉勘 統 効良敗死。 伴爲 雄皆 轄 羅 安氏遂代効良爲土官,然亦未絕其虧,其虧亦以安氏爲安位姐,不敢抗 報 平 旣 時 然根。 - ,陷霑益,爲雲南巡撫閔洪學所敗。 ··,爾 分, 諸 觀望騎牆,心懷疑二。 土 事 年經月,卒無成畫,以致疆 妻安氏無子,妾設白生其爵、其祿。 司 權 又見黔師出陸廣,滇師出霑益,水、烏之勢已成騎虎,遂合永寧、 皆桀鰲難制,烏撒、東川、烏蒙、鎭雄諸府地界,復相錯於川、滇、黔、 不一,往往 軼出爲諸邊害。 於是安効良以鳥撒首附逆於邦彦,幷力攻 日。 副總兵袁善、宣撫使沙源等督將士力戰,出奇兵破之, 事日壞。 故封疆大吏紛 洪學以兵力不繼,好語招之, 令擒賊 播州 二婦素不相能,安氏居鹽倉,設白母子居抱 初平,永寧又叛,水西煽起,東川、烏蒙、 紛陳情,冀安邊隅,而 〉陸廣, 水西諸 中 復合霑益 自贖,効良 樞之臣動 楚之間 賊

列

傅

第

百九

十九

四

]]]

土

司

爲請 時皇 以拒 爵。 `請復烏 皇謂 其爵 於制府, 其爵夜襲安氏鹽倉,不克,與設白、其祿逃東川 撒 水西必 元 衞 年,四川 安邊亦欲偶安氏以拒其祿,以催 發順兵三千援其爵,滇撫 以自 糾霑、烏入犯。 贖 巡撫差官李友芝齎冠帶獎賞其爵母子,令管烏撒。 雲南巡撫謝存仁以聞,存仁因移鎭曲靖以觀變。 不應。 糧爲名至建昌。 安氏懼,謀迎霑益土官安邊爲婚,授之鳥撒 界,爲東川所拒,而抱渡又失。 安氏遂迎邊至鹽倉 安氏 心惡分, 成婚。 安邊、安 李友芝 始 絕

禄署 以守, 邊夜 橋。 復,束身歸命,意實緩師。 百餘,麾兵 遁 霑益 大兵入鹽倉,拔難民 二年, 且令圖 ,遂棄鹽倉,入九龍囤。 知 八奮擊, 總督朱燮元 州 獻安邊、安氏。 ,雖懦 賊盡奔箐中, 稚頗忠順,其母 調集漢土兵, 一千餘人。 乃復發兵逐安邊、安氏,以鹽倉授其爵。 其爵以鹽倉 烏撒 遂復 亦頗 鳥撒 陷賊八年,至是始復。 列營霑益, 師還,安邊、安氏復還鹽倉,遣 殘燬,乞移烏 城。 有 主 持,能 安邊駐三十里外, 趣眞撫會兵進烏撒 得 撒城, 衆 乃召其爵來 從之。 擁兵求見, 時其爵署烏撒 兵至望 人至 境。 鹽倉 安邊、 軍 一城坡, 前, ,令約束 諭令束 安氏 請俟 遇賊 知府, 身歸誠 逃避偏 九頭 鳥 哨騎 城 其 目

爵、 其祿 安邊屢乞降於總督朱燮元 燮元曲為調 護, 欲予以職銜, 且 藉 水西安位代 分鳥撒安置之。 申 以 邊實紹 雲南撫按堅執 慶 嫡 孫, 不可 宜襲 知 以安邊令其 州, 請罪 其

發難,邊遄死。不移日,其祿率兵至,詭言爲其叔報仇,士民歸者如流,於是其祿復有霑益。 位,納之霑益,而逐其祿,時安氏在也。 前功盡棄。 黨勒兵於野馬川,復以千金誘其虧頭目,日爲幷吞霑、鳥計。 鳥撒失,霑益危,而全演動搖,非但震鄰,實乃切膚。 旣而安氏死,安位與之貳,其祿乃假手羅彩令者布 萬一其爵被襲,則烏撒失,而 竟不行。 安邊乃乞師於安

而廟堂之上方急流寇,不復能問云。

夷,日 朝,獻馬十八匹,賜衣一襲、米二十石、鈔三十錠。 其弟,非奉上之道。」帝却其所貢馬。十二年,珉德貢香楠木,詔賜衣鈔。十六年,珉德來 蜀,珉德叔安濟遣子入朝,朝廷授以世襲知府,恩至渥矣。今珉德旣襲其職,不自來朝而遣 冬,馬湖路總管安濟,遣其子仁來歸附,詔改馬湖路為馬湖府。 領長官司四:曰泥溪,曰平 自是,三年一入貢。七年,馬湖知府珉德遣其弟阿穆上表貢馬,廷臣言:「洪武四年,大兵下 馬湖,漢牂牁郡內地也,有龍馬湖,因名焉。唐爲羈縻州四,總名馬湖部。 . 蠻夷,日沐川。以安濟爲知府,世襲。六年,安濟以病告,乞以子安仁代職,詔從之。 洪武四年

|永樂十二年,泥溪、平夷、蠻夷、沐川四長官司遣人貢方物,賜鈔幣。 宣德八年,平夷長 傳第一 百 九十 九 四 川土 司一

學會試,過期不至,例充吏。有學原籍長官司,因遣通事貢馬,乞宥罪,仍肄習太學,許之。 鈔,援永、宣時例,邊夷有犯,聽以馬贖,許之。三年,免馬湖府舉人王有學充吏。先是,有 匹。帝曰:「遠蠻能恭謹畏法如此。」置不問。正統二年,泥溪土官醫學正科田璣盜官藏絲 官司奏,比者火延公廨,凡朝廷頒降榜文、倉庫稅糧錢帛及案牘皆救免,乞宥罪,幷獻馬二

女,多淫之。用妖僧百足魘魅殺人。又令人殺平夷長官王大慶,大慶聞而逃,乃殺其弟。 爲橫二十年。巡按御史張鸞請治之,得實,伏誅,遂改馬湖府爲流官知府。

弘治八年,土知府安鰲有罪,伏誅。鰲性殘忍虐民,計口賦錢,歲入銀萬計。土民有婦

收復。 建昌衞,本邛都地。漢武帝置越巂郡。隋、唐皆爲巂州。 懿宗時,爲蒙詔所據,改建昌府,以烏、白二蠻實之。元至元間,置建昌路,又立羅羅 至德初,沒於吐番。貞元中

斯宣慰司以統之。

授符印。 五年置建昌衞指揮使司。元平章月魯帖木兒等自雲南建昌來貢馬一百八十匹,幷上元所 詔賜月魯帖木兒綺衣、金帶、鞾襪,家人綿布一百六十疋、鈔二千四百四十錠。 以 五年,羅羅斯宣慰安定來朝,而建昌尙未歸附,十四年遣內臣齎敕諭之,乃降。十

紗有差。 子僧保等四十二人入監讀書。二十五年,致仕指揮安配貢馬,詔賜配及其把事五十三人幣 知府,賜冠帶、襲衣、文綺、鈔錠,因命師克討東川、芒部及赤水河叛蠻。二十三年,安配遣 學,厚賜遣之。二十一年,建昌府故土官安思正妻師克等來朝,貢馬九十九匹。詔授師克 月魯帖木兒爲建昌衞指揮使,月給三品俸贍其家。十六年,建昌土官安配及土酋阿派先後 來朝,貢馬及方物,皆賜織金文綺、衣帽、鞾襪。十八年,月魯帖木兒舉家來朝,請遣 已而月魯帖木兒反,合德昌、會川、迷易、柏興、邛部幷西番土軍萬餘人,殺官軍男婦二 字入

仍諭 帖木兒詭詐,不可信其降,致緩師養禍 集,毅 置建昌 級,擒其黨十餘人。 百餘口,掠屯牛,燒營屋,劫軍糧,率衆攻城。指揮使安的以所部兵出戰,敗之,斬八十餘 將 且 士互相應援,設伏出奇,幷諭擒賊首獻者賞千金。復諭總兵官涼國公藍玉,以月魯 、蘇州二軍民指揮使司及會川軍民千戶所,<br />
(E) 調京衞及陝西兵萬五千餘人往戍之。 戰且却,復入城拒守。 敗退屯阿宜河,轉攻蘇州。 指揮**愈事魯毅率精騎**出西門擊之, 賊衆大 賊圍城,毅乘間遣壯士王旱突入賊營, **斫賊,賊驚**遁。 於是

遁。 能督兵追捕,攻托落寨,拔之。 四 Ш 都指揮使瞿能率各衞兵至雙狼寨,擒偽千戶段太平等,賊衆大潰,月魯帖木兒敗 轉戰而前,進至打沖河三里所,與月魯帖木兒遇,大戰,

列

傳

第

帖木兒把 分兵入普濟州 叉敗之。 俘 事七人,其截路寨土蠻長沙、納的皆中矢死。 其 搜 衆 捕 五百餘人,溺死者千餘,獲牛馬無算。 復駕橋於打沖河,遣指揮李華引兵追托落寨餘孽,進至水西, 能還攻天星、臥漂諸寨,皆克之,先 官軍入德昌,能遂調指揮同知徐凱 斬月魯

後俘殺千八

百餘人。

月魯帖木兒遁入柏

興州

魯帖 西番。 班 師克建昌 不密爲防。 師 ·木兒幷其子胖伯,遂降其衆,送月魯帖木兒京師,伏誅。 帝遣 松、茂、碉、黎當吐番出入之地,馬湖、建昌、嘉定俱爲要道,皆宜增屯衞。」報可,命玉 諭藍 ,授以指揮之職,自是從月魯帖木兒叛。玉率兵至柏興州,遣百戶毛海以計 其柏興州賈哈喇境內壓些等部, 玉 曰:「月魯帖木兒信其逆黨達達、楊把事等,或遣之先降,或親來覘我,不 更須留意。」賈哈喇者,麼些洞土會也。 玉因奏:「四川 地曠 山險,控扼 誘致月 初 王

叛。 力攻破之,遂就擒。 可通 執賈哈喇 普習 人行。 一十七年,麼些洞蠻寇打沖河西守堡,都督徐凱擊敗之。二十九年,威龍土知州普習 ,送京師,誅之。 ,月魯帖木兒妻兄也。 官軍至,輒自上投石,不得進。 因改建昌路為建昌衛,置軍民指揮使司。[+]安氏世襲指揮使,不給印, 寨地峻險,三面陡絕,下臨大江,江流悍急,不可行舟,惟一道僅 官軍捕之,普習中流矢死。三十一年,徐凱等平卜木瓦寨, 凱乃斷其汲道困之, 寇窮促, 凱督將士抵其案,

韃靼 置 以昌州 其居於城東郭外里許。 、回紇諸 、普濟、威龍三州長官隸之, 種散居山谷間 所屬有四十八馬站,大頭土番、僰人子、白夷、麼些、 北至大渡, 有把事四人, 南及金沙江,東抵烏蒙, 世轄其衆,皆節制於四川行都指 西訖 鹽井,延袤千餘里。 各鹿 揮使司 倮羅

西南土官,安氏殆爲稱首

平。 相 事 ,以族人世隆 能 配六世孫安忠無後, 因 .養那固爲假子,其奴祿而從臾搆難,歲 嗣 世隆 復無子,繼妻祿氏管· 妻鳳氏管指揮使事。 事。 仇殺。 鳳氏死,族人安登繼襲, **祿死,以族姪安崇業嗣。** 鎭巡官讞之,殺那固 復 無子,妻瞿 而 崇業 戍祿 與祿 亦, 氏 氏 事

禮州 置,公悉改爲長官司,仍隸建昌。 尼姑 則 以 强弱 ,漢蘇示縣,打沖河,唐沙野城 、吉撒加、白氐等歸附,皆令世襲爲 安氏 所轄四驛,日祿馬、阿用、白水、瀘沽,各百里有差。 爲向背。 所領昌州等三長官司 ,德昌,元定昌路也 其千戶所之隸於衞者 知 ,皆在 州 月魯帖木兒之亂,諸州皆廢革。 |衞東、西、南三|百里內。 有三. 日禮 其涼山拖郎、桐槽、熱水諸番 州 洪武十八年,土官盧 日 打沖 河, 永樂 元年復 一德昌

寧番衞,元時立於邛都之野,日 列 傳 第 九 十 九 四 Ш 土 蘇州。 司 洪武間,土官怕兀它從月魯帖木兒爲亂,廢州置

衞 環 而居者,皆西番種,故曰寧番。 有冕山 、鎭西、禮州中三千戶所。(云)

越巂衞,漢邛都及闌二縣地。〔10〕有奴諾城,即蜀漢時諸葛亮征蠻所築以憩軍者也。元

置邛部安撫招討司,已,改邛部州。

司 於邛部州 洪 武 中,嶺眞伯以招討使來歸,因改爲邛部軍民州。 ,[]]命指揮僉事李質領謫戍軍士守之。二十六年置越巂衞。 洪武二十五年置越巂軍民指揮使 永樂元年改邛部

爲長官司,隸越巂衞。

爲盜。 濟站 師,誘鳳起縶之,收其印,而誅從鳳起爲亂者百餘人。 數,鳳起病死,其衆爭歸附,因置平夷、歸化二堡以居之。 沙氏淫於族人阿祭,印復爲昇所奪。 廬舍,擁兵臨城。 萬曆 普雄部衆姑咱等乘勢蜂起,郵傳不通,遠近震恐。 中,土官嶺柏死,孽子應昇負印去,柏妾沙氏爭之不得。土目阿堆等擁沙氏,焚利 總兵劉顯率兵往撫之,沙氏悔禍,殺阿堆等自贖,顯遂以印授之。 祭死,其子嶺鳳起嗾他番刺殺應昇。 印無所歸,緘於庫。 有鎭西千戶所。 十五年,鎭巡官會師討之,斬馘千 鎭守官因平蠻之 部衆無統,肆行 後

鹽井衞,古定笮縣也。 元初爲落蘭部。 至元中,於黑、白鹽井置閏鹽縣,於縣置柏興

府。 其村落多白夷居之。長官世阿氏,洪武時歸附,授世職。 洪武中,改爲柏興千戶所,旋改鹽井衞,又於二井置鹽課司。 地接雲南北勝州,稱庶富,人亦擾 永樂五年設馬刺長官司

馴

隣, 麗江土官木氏侵削其地幾半。 刺非復貢馬赴京,自己授本所副千戶。 打沖河守禦中左千戶所,其土千戶刺兀,於洪武二十五年征賈哈喇效順來歸。 永樂十一年陞正,以別於四所。 地與魔江、永寧二府 其子馬

理,爲會川府。 會川衞,越巂之會無縣也。 元置會川路,治武安州,隸羅羅斯宣慰 唐上元中,移邛都縣於會川鎮, 司 以川 原並會故名。 宋屬大

武十六年歸附,以隨征東川、芒部勞,授世襲副千戶。 JII 革會川府。 衞 軍 洪武十七年,會川 民指 揮使司,領迷易千戶所。 初,月魯帖木兒反,土知府王春陷會川,燬民居府治,至是遂墮其 土同知馬誠來朝,復立會川府,領武安、永昌、 土官賢姓,其先雲南景東僰種也,徙其屬 居所治城外,所轄僰蠻僅 麻龍等 城。 州 來 八百戶。 田 尋改爲會 二十六年 種。 洪

茂州 古冉 駹 或 地。 漢武帝置汶山郡, 宣帝為北部都尉。 隋爲蜀州, 尋改會州 唐貞

觀改茂州。宋、元仍舊,治汶山縣。

之, 道。 遂 衞,留指揮楚華將兵三千守之。 野,得小舟渡,至龍止鐵冶寨,擊破之。 潛 蠻 衞 一衆伏 出 指 一發兵捕 士卒奮擊,大敗其衆。 兩 都 揮使司。 洪武六年,茂州權知州楊者七及隴木頭、 司 Щ 兩 遣 後,遲明從山頂張旗幟,發火礮,蠻驚潰。 山間,投石崖下,兵不能進。 斬者七。 指揮胡淵 時四川 生番不之覺,如期入寇,官軍掩擊敗之,於是盡徙民於城 、童勝等統兵分二道擊之,一由 都司遣兵修灌縣橋梁至陶關, 兩軍遂會於茂州, 十五年,者七陰結生番,約日伏兵陷城。 適汶川土官來降,得其間道。 其由石泉者次泥池 静州、 楊者七迎降,以者七仍領 師進 汶川土

全

孟

道

貴

疑

之

, 石泉,一由 岳希蓬諸土官來朝貢。 雁 門關 ,蠻悉衆拒。 灌 ,道險,蠻復據之。 口 o 乃選勇士 由灌 以其州。 千戶薛文突陣 有 集部 苏 口 **+** 一捲旗 者 外。 校密告於官 乃詔立茂州 進次陶關 落 年置 甲,乘夜 阻 乃駐 射却 茂州 陶關 平

張傑敗績。 攻 小 善,以黑爲惡。 東 正德二 路番 年,太監羅籥奏,茂州 寒,而 十五年,巡撫盛應期奏,綽頭番犯松州,總兵張傑克之,復犯雄溪屯, 茂州核桃溝上、下關番蠻懼,遂糾白石、羅打鼓諸寨生番,攻圍 禮部覆,番人向化,宜令入貢給賞。 所轄 卜南村、曲 山等寨, 從之。 乞爲白人, 十四年,巡撫馬昊調 願納糧差。 城堡,游擊 指揮杜欽 其 俗 松潘 以自

敗之,烟崇等寨皆降。 萬曆十九年,威、茂諸番作亂, 攻破新橋, 乘勢圍普安等堡。 四川巡

撫李尙忠檄諸路兵追剿過河,普安諸堡得以保 全

毛韃 桃坪者,為隴木司。 寧中,范百常知茂州,民請築城,而蠻人來爭。 而置威茂道,開府茂州,分游擊以駐 元,皆爲羌人所據,不置州縣者幾二百年。 相 茂州 通, 地方數千里,自唐武德改郡會州,自己領羈縻州九,前後皆蠻族,向無城郭。 出沒爲寇,相沿不絕云。 疊溪,規防始立。 其通西域要路,爲桃坪,即古桃關也,有繩橋渡江。 洪武十一 百常與之拒,且戰且築,城乃得立。 年平蜀,置疊溪右千戶所, 然東路生羌,白草最强,又與松潘黃 隸茂州衞。 自宋迄 宋熙

歸附 茂州長官司三:曰隴木,曰靜州,曰疊溪。 ,授承直郎,世襲長官,歲貢馬二匹。 所屬 ||玉亭、神溪十二寨, 俱爲編氓,有保長統之。 隴木長官司,其長官即隴木里人也。 洪武時

正德

間,與 勺襲職,轄法虎、核桃溝八寨,俱編戶爲氓,亦有保長統之。 |静州長官司,其地即||唐之||悉唐縣, 其長官亦||詩州里人也。 岳希蓬、節孝爲亂,攻茂城,斷水道七日。 節孝弟車勺潛引水以濟我軍。 襲官貢馬,與隴木同。 事平,使車

疊溪郁氏,洪武十五年歸附,給印世襲,凡三年貢馬四匹。 疊溪千戶所,永樂四年置。 領長官司二:日疊溪,在治北一 里,日鬱即,在治西十五里。 長官所轄河東熟番八寨,皆

列

僔

第

百 九 +

九

及 馬 路、小關 七族。 其土舍轄河西小姓六寨。 地土廣遠,饒畜產,秣麥路積

點,名雖熟番,與生番等。

姓,舊屬鬱卽,至是改屬疊溪。 元年,總兵蔣貴言其遼闊,亦改隸於疊溪守禦千戶。 鬱卽長官噉保,萬曆十八 年與黑水、松坪稱兵, 初,都督方政平曆日諸寨,設長寧安撫司, 攻新橋,明年伏誅。 隸松潘。 漢關墩附 至正統 近諸小

吐蕃將潘羅支領之,名潘州。 松潘 ,古氐羌地。 西漢置護羌校尉於此。 元置吐蕃宣慰司 唐初置松州都督,廣德初,陷於吐蕃。 宋時,

指 餉 道 進 朕 豈欲窮兵遠討,但 羌戎屢寇邊,征之不獲已也。 取潘 無阻 爲難,命罷之。未幾,指揮耿忠經略其地,奏言松州爲番蜀要害地,不可罷,命復置。 揮 使司。 洪武 州。 遏者,不可守也。 十二年命平羌將軍御史大夫丁玉定其地,敕之曰「松潘僻在萬山,接西戎之境, 若盡三州之地,則疊州 丁玉遣寧州衞指揮高顯城其地。 來降諸戎長,必遣入朝,朕親撫諭之。」遂併潘州於松州,置 不須窮兵,自當來服。 十三年,帝以松州衞遠在山谷,屯種 今捷至,知松州已克,徐將資糧於 須擇士勇者守納都、疊溪路,其驛 不給, 松州 容州, 餽 衞

民作亂,官兵討平之。 甃松州及疊溪城 宜以其戶口之數,量其民力,歲令納馬置驛,而籍其民充驛夫,供徭役。」從之。 朝,貢馬一百三匹,詔賜綺鈔有差。十六年,耿忠言:「臣所轄松潘等處安撫司屬各長官司, 又以思爨日安撫司附焉。諸長官司每三年入貢,賞賜 思、日思囊兒、日阿用、日潘斡寨、安撫司四、日八郎、日阿角寨、 司, 者多,日占藏先結,日包藏先結,日班班,日白馬路。其後復隸松潘者,長官司四, 四年置松潘等處安撫司,以龍州知州薛文勝爲安撫使,秩從五品。 七 品: 日勤都,日阿昔洞,日北定,日牟力結,日蛒匝,江巴日祈命,日山洞,日麥匝, 如例。 十五年,占藏先結等土

全來 日麻兒匝,曰芒兒者。 又置十三族長官 旣而松潘羌 日 阿

九十。 之。十八年,松州羌反。 人於道,復擊敗之,追至乞剌河乃還。 十七年,松潘八積族老虎等寨蠻亂。 景川侯曹震請擇良馬貢京師,餘給軍,其犏牛、氂牛非中國所畜,令易糧餉犒軍,從 成都衞指揮成信等率兵攻其牟力等寨,破之。 官兵擊破之,獲馬一百二十,犏牛三百,氂牛五百 兵還,又遇賊三千

番則路、南向等引草地生番千餘人寇潘州阿昔洞長官司,殺傷人口。指揮周助率馬步軍同 松潘衞軍討之,番寇率衆迎戰,千戶劉德破之,斬首三十四級,獲馬三十餘匹。 二十年改松州衞爲松潘等處軍民指揮使司,改松潘安撫司爲龍州。二十一年,朶貢生 賊潰,渡河

列

傳

衆,羣 衣。 四 十餘 里 復 收 二十六年,西番思襲日等族來歸,進馬百三十匹,命給金銅信符幷賜 敗卒屯 聚。 指揮周能追擊之,斬首一百三十餘級, 獲馬六十餘 匹, 溺死 文綺襲 甚

路。 司 撫。 以 、轄之。 松潘 宣德 麻兒匝 衞 二年,麻兒匝順化, 在阿樂 帝命置安撫,遣敕諭 指揮吳瑋遣人招之,因遣其姪完卜來貢獻,言其地廣民衆,過於八郎,請置宣撫 地,去松潘七百餘里。 喇嘛著八讓卜來歸。 之。 初, 著八讓卜時侵掠邊民及遮八郎安撫 置麻兒匝安撫司,以喇嘛著八讓卜爲 司 朝 貢

行。 宏於松潘以徇,幷竄諸將之貪淫玩寇者。三年,陳懷等率諸軍屢敗賊於圪答壩、葉棠關,奪 鎭 官軍者。 大軍將致討懾之,番衆驚潰,約黑水生番爲亂。 行,宏詭言番寇至,當追捕,冀免調。 有激之者。 撫侯璉死 時城 匹 JI 遣都指揮僉事蔣貴往,同松潘衞指揮吳瑋招撫番寇, 圍松潘、疊溪、茂州,斷索橋,官軍與戰皆敗,出掠緜竹諸縣,官署民居皆被焚燬、 巡按等奏松潘衞所轄阿用等寨蠻寇,擁衆萬餘,傷敗官軍,請討之。 之。 旣四川都司奏至,言並非番寇。 蜀王遣護衞官校七千人來援,命都督陳懷與指揮蔣貴等合師亟討之,而梟 又領軍突入麥匝諸族,逼取牛馬, 實由千戶錢宏因調發松潘官軍往征交阯 帝命逮宏等,而責諸司怠玩邊務,亟捕 **令調附** 近諸 致番人忿怨。 衛軍 帝意邊將必 二萬 衆 入以 諸 復 憚 傷 以

永鎭等橋,復疊溪,撫定祁命等十族,又招降渴卓等二十餘寨,松潘平。

益二分給之。 比因番人不靖、松潘、疊溪諸處倉糧,支銷殆盡,別無儲積。 以次進兵,平龍溪等三十七寨,班師還。 福,威、茂諸衞俱聽命,惟松潘、疊溪所轄任昌、巴猪、黑虎等寨梗化。政令指揮趙得、宮聚等 民,安分循理,毋作過以取罪戾。九年敕指揮僉事方政、蔣貴等撫剿松潘。政等至,榜論禍 八年,八部安撫司及思囊兒十四族朝貢之使陛辭,令齎敕還諭其土官,俾約束所轄蠻 命蔣貴佩平蠻將軍印,口三鎭守松潘。 帝命戶部於四川歲運之數,量 十年,貴奏,

往 成都左衞官軍及松潘士兵,合二萬人征之。已,翺知商巴爲都指揮趙諒所陷,乃按誅諒而 巴復聚浦江、新塘等關,據險劫掠,乞發大軍剿除。」帝命李安充總兵官,王翺參贊軍務,調 釋商巴等,事遂已。 諭之,皆歸服。 正統三年,巖州長官司讓達作亂,侵雜道諸邊,雜道長官安白訴於朝。 四年,松潘指揮趙得奏「祁命族番寇商巴作亂,官軍捕擒之。 帝命四川三司 其弟小商

初,多兒太掠茂州境,爲官 欲行擒剿,恐各寨驚疑, 九年,松潘指揮僉事王杲奏:「比者,黑虎等寨番蠻攻圍椒園、松溪等關堡,殺傷官民。 應諭 軍所獲,誠 能擒賊者重賞之。」報可。 而釋之。 未幾,復糾諸寨入掠。 十年,黑虎寨賊首多兒 帝命序班祁全往諭諸 太伏誅。公

列

百九

十九

四

川土司

松潘 惟 寨,擒 歪 衞 地 ;多兒太至京,梟其首。 骨鹿族二十寨不服,命督高廣、王杲等剿之。 先是,阿思觀父端葛,洪武 + 年以寇深爲僉都御史,提督松潘兵備 中歸順,給金牌撫番,至阿思觀 設思曩日安撫 又能 司,以 招撫,效有是命 阿思 時松 觀 潘 皆已向化, 爲 之使, 隸

患。」四年, 境剽掠。 命 統 處,擾糧道。六年敕松潘總兵許貴曰:「敍州蠻賊出沒爲患,比松潘尤甚,其馳往會剿。」貴聞 婦 河 五 領官軍,直抵桑坪,已將永等誅滅,邊境肅淸。」降敕襃賞。天順五年,番衆入龍安、石泉等 見結等 會兵敍州,追討昔乖件、莫洞、都夜三寨,分兵兩哨,克硬寨四十餘,斬首一千一百餘級。 梟斬 百餘 景泰 成化二年,鎮守太監閻禮奏:「松、茂、疊溪所轄白草壩等寨,番羌聚衆五百人,越龍州 於市。」七 白草番者,唐吐蕃贊普遺種,上下凡十八案。部曲素强,恃其險阻,往往剽奪爲 三年, 口,及故土官董敏子伯浩等二十餘人。今又糾合番蠻,攻劫地方。臣 禮復奏:「白草諸番擁衆寇安縣、石泉諸處,因各軍俱調征山都掌蠻,致指揮王璟 累年糾合於安化關 鎮守松潘刑部 年,提督松潘羅綺復奏:「松潘土番王永習性兇礦,嘗殺其土官高茂林男 劫掠。 左侍郎羅綺等奏: 臣會師抵其巢穴,斬首不計其數,生擒卓時芳、阿兒結 「雪兒卜寨賊首卓時芳等、ここ烟崇寨賊首 與指揮 周 貴等

斌以失機逮治。

九年,巡撫夏塤奏:「黑虎寨賊首夜合等劫攻關堡,左參將宰用、兵備副使

能遣指揮閻斌巡邊至廟子溝,番賊三百突至,殺傷相當

備禦不

謹。」命副總兵盧能剿之。

沈琮督兵馳詣松溪堡敗之,斬獲夜合等三十六級。」松潘指揮僉事堯彧奏,「臣與兵備沈琮

分剿白馬路水土、茹兒等番寨,大克之。」

漢、土官兵五萬,由東南二路分剿,自己破白羊嶺、鵝飲溪等三十一寨,斬四百餘級。商巴等 敗之。十三年,番賊入犯松潘壩州坡抵關,勢益獗。命逮指揮湯綱等,「八」而敕巡撫張瓚調 十六族明年朝覲,以守臣言其地方災傷也。七年,松潘空心寒番賊犯邊,都指揮僉事李鎬 崖死者不可勝計,諸番稍靖。 二十六族皆納款。十四年復攻黃頭、靑水諸寨,前後殺獲男婦七百餘人,赭其碉房九百,墜 弘治二年,松潘番寇殺傷平夷堡官軍,命逮指揮以下各官治之。三年発思襲日安撫等

年,松潘衞熟番八大禳等作亂,同知杜欽平之。 兩河。其土官已故子孫,自應承襲。今宜察勘,有原降印信者,方許襲。」報可。十六 正德元年,巡撫劉洪奏:「祈命族八長官司所攝番衆多至三十寨,少亦二十餘寨,環布

數人,俘斬九百七十餘級,克營寨四十七,毀碉房四千八百,獲馬牛器械儲積無算。 岡鳳,未幾皆爲巡撫劾罷。二十六年復命卿往鎭。時白草番亂,卿會巡撫張時徹討擒渠惡 降者日至。卿有威望,在鎭十七年,松潘以寧。二十三年以北警召卿入衞,繼之者李爵、高 嘉靖五年命都督僉事何卿鎭守松潘。時黑虎五寨及烏都、鵓鴿諸番叛,卿次第平之, 終嘉靖

列傳第

百九十九

四川土司

世,松潘鎭號得人,邊境安堵焉。

附,其部長李仁廣、王祥皆輸糧餉有功,亦得世襲。及宣德中,以征松潘功,陞州爲宣撫使, 仁廣爲副使,祥爲僉事,各統兵五百世守白馬、白草、木瓜番地 龍 旣置松州 州者,漢陰平道也。 初, 龍州 衞 ,仍以松潘爲龍州。 薛文勝於洪武六年來降,命仍知龍州。 旣置松潘安 撫 司,命文勝爲安撫使。 宋景定間,臨邛進士薛嚴來守是州,捍衛有功,得世襲。 宣德七年陞 龍州爲宣撫司、日日以上知州薛忠義 爲宣撫使。 自文勝歸

龍安府,設立流 五 利,求救於上下十八族番蠻,皆不應。 按檄兵備愈事趙敎勘其事。 年,兆乾伏誅,籍其家,母及其黨二十二人皆以同謀論斬,餘黨悉平。 、絕松潘餉道。 至嘉靖四十四年,宣撫薛兆乾與副使李蕃相仇訐,兆乾率衆圍執蕃父子,毆殺之。撫 官如馬湖,而割保寧之江油、成都之石泉二縣分隸之。 脅僉事王華,不從,屠其家。居民被焚掠者無算。是年春,與官軍戰,不 兆乾懼,與母陳氏及諸左右糾白草番衆數千人,分據各關隘拒 兆乾率其家屬奔至石壩,官軍追及之,就擒。 遂改龍州宣撫司為 四十

鎮虜,百戶杜世仁力戰,城得 之,火落赤之姪小王子死焉。 萬曆八年,雪山 國師喇嘛等四十八寨,勾北邊部落爲寇,圍漳臘,守備 全,世仁死焉。 十九年,巡按李化龍言:「松潘爲四川屛蔽,疊、茂爲松潘咽 又犯制臺,良賢復擊之,追至思答弄, 張良賢破之。 連戰大破 犯

亂,鎭巡官率兵剿之,俘馘八百餘級, 番戎作梗,松潘力不能支, 宜移四川總兵於松潘以備防禦。」是時疊、茂諸番衆糾結爲 番寇亦斬其部長黑卜、白什等,獻功贖罪。 而松坪諸

惡屯據大雪山頂,諸將卒搜討,亦有斬獲。

以捷聞,遂設平武縣於龍安府

荒 調兵啓釁,致動干戈, 不可罷,乃內修屯務,外輯羌戎,因俗拊循,擇人爲理,番衆相安者垂四十餘年。 ,斯籌邊者之所亟圖 松潘以孤 城介絕域,寄一綫饋運路於龍州,制守爲難。 也。 自是置鎭建牙,宿重兵以資彈壓,亦時服時叛。 洪武時欲棄者數,以形勝扼險, 自漳臘以北卽爲大 及宣德初,

**幷爲天全六番招討司,隸四川都司。** 之,隸雅州。 天全,古氐羌地。 元置六安撫司,屬土番等處宜慰司,後改六番招討,又分置天全招討司。 五代孟蜀時、置碉門、黎、雅、長河西、魚通、寧遠六軍安撫司。 明初 宋因

戶向與西番貿易,歲收其課。近在官收買,額遂虧,乞從民便,許之。先是,高敬嚴襲招討 正招討,楊藏卜爲副招討,秩從五品,每三歲入貢,賜予甚厚。二十一年,楊藏卜來朝,言茶 洪武六年,天全六番招討使高英遣子敬嚴等來朝,貢方物。 帝賜以文綺龍衣。以英爲

列傳第

百九十

た

四川

土司

直, 馬數少。 三十一年,帝諭左都督徐增壽曰:「曩因碉門拒長河西口 卒千餘人。 使,偕楊藏 可即檄所司開拓,以便往來。」 今聞有路自碉門出枯木任場徑抵長 1 至是藏卜來朝,奏其 奏請 簡土民爲兵,以守邊境,詔許之。 事,詔更天全六番招討司 河西口,自己通雜道長官司,道路平坦,往 敬嚴等遂招選土民,教以戰陣,得 ,道路險隘,以致往來跋涉 爲武 職, 令戍守邊界, 控 艱難,市 制 西番。 來徑 馬步

敬讓 例。 遣子虎貢馬。 永樂二年,高敬讓來朝,幷賀立皇太子,且遣其子虎入國子學,賜虎衣衾等物。 初, 虎入國學讀書, 以丁母憂去, 至是服闋還監, 皇太子命禮部賜予如

年命高 祖 戶 部 有 撫綏功,命暫理招討事。 令再辦芽茶二千二百斤, 山深地瘠, 艱於采辦, 乞減其數。」 帝令强烏茶只辦芽茶。 宣德五年,六番招討司奏:「舊額歲辦烏茶五萬斤,二年一次,運付碉門茶馬司易馬。今 鳳署天全六番招討司事。 正統四年命鳳襲 先是,敬讓以罪下獄死。 至是,其子鳳乞襲父職。 帝念其

文林等與蘆山縣民爭田搆釁,知縣處置失宜,致叛亂。 正德十五年,招討高文林父子稱兵亂,副招討楊世仁亦助惡。 踰年,討斬文林,擒其子繼恩,擇其 命四川撫按官討之。初,

歸附 ,始降司爲州, 初,天全招討司治碉門城,元之碉門安撫司也,在雅州境。 設雅州千戶所, 而設 碉門百戶 **,近天全六番之界。** 明初, 宣慰余思聰、 又置茶課司 王德貴 以平互

त्ते

蓋其

地爲南詔咽喉,三十六番朝貢出入之路。

番傳。 府者四 日 · 杂甘。 三十六番者,皆西南諸部落,洪武初,先後至京,授職賜印。 , 爲千戶所者十七,是爲三十六種。 爲宣慰司者三:日朶甘,曰董卜韓胡,曰長河西魚通寧遠。 或三年, 或五年一 朝貢,其道皆由雅州入,詳西 立都指揮使二...日烏斯藏 爲招討司 者六,爲萬戶

之君 天寶初,改爲洪源郡,尋改漢源。 黎州 請爲內臣,因置 ,漢沈黎郡地。 一 作都縣,復曰旄牛縣。 史記稱越巂以東北、君長以十數、作都最大。自唐蒙通夜郎、邛、作 宋屬成都路。 元鼎中,以爲沈黎郡。 元屬土番等處宣慰司 唐割 雅、巂二州置

邛部。 邛部州六番招討使。 洪武八年省漢源縣,置黎州長官司,以芍德爲長官。德,雲南人,馬姓。 至是,四川布政司招之,德遂來朝貢馬,請置長官司。 明氏據蜀,德兄安復爲黎州招討使。 明氏亡,蠻民潰散,德奉母 韶以德爲黎州長官,賜印及衣 祖仕元,世襲 還居

列

傳

第

百九

十九

四川

土司

錠 服 、文綺 綺帛 七疋。 年陞 自是,三年一入貢 爲 黎州安撫司, 刨 弘治 以德 十四 爲使。 年 命黎州安撫隸 十四四 年, 德 遣 使 貢 四 Ш 都 馬。 詔賜 德鈔五十 四

坪者 四 里,皆安撫族 年 所,下七枝仍屬 降黎州 萬曆十九年,安撫馬祥無後,妻瞿氏 **遂興兵攻城,奪印,番衆乘機剽掠。** 安撫司 人居之。 松坪馬氏約束。 爲千戶所,立所治於司南三十里大田 松坪在司 掌 時參將吳文傑方有征 司 之東 事,取瞿姓子撫之,將 南, 自炒米城直接峨眉,高山 川 壩。 東之役,移師剿 分 上七枝編戶,屬大渡河千 有 他 志。 | 群 姪 平之。 峻 坂三百餘 土舍居松

物, 捕 馬湖 瓜 有 州 畜牧蕃盛,時窺邊,邛部長官嶺柏不能制,嘉、峨、犍爲諸邊皆爲 爭 設 之,瓜兵益 乃定。 改流 訟。 安撫,於天全六番設招討,以示羈縻。 黎、雅諸 徼外大、小木瓜種分三枝, 腻乃卜最强, 世居 ,諸瓜叛入邛部,歸嶺氏。 其地四千八百四十餘畝,徵糧四百四十餘石,輸峨眉 熾,乃議大征,分建昌、越巂、馬湖三路兵進討。 蠻,宋時屢爲邊患。 明興,以諸蠻皆天全六番諸部,散居於二州之境,遂於黎 其地自西河至涼山 而 雅州 所屬,與招討所轄之蠻民, 「雪山 西河。 諸處, 瓜部始惶駭請降,願歲貢馬 初屬 縣 侵擾。 周 馬湖土官安氏 運 蟠據。 鎭巡官督邛部兵 境土 嘉 婦末, 鈐 相 轄, 連, 諸 自 時

明初與安撫司同置者,有大渡河守禦千戶所。唐時, 河平廣可通漕,戍將一不守, 則

空中落,船筏不通,名爲噎口,殆天設險以限内外云。 藝祖以玉斧畫圖曰:「外此,吾不有也。」自是之後,河中流忽陷下五六十丈,水至此,洶湧如 黎、雅、邛、嘉、成都皆動摇。 宋建隆三年,王全斌平蜀, 以圖來上。 議者欲因兵威復越傷,

## 校勘記

- 的巴 明史稿傳一八五烏蒙烏撒東川鎮雄四軍民府傳、明一統志卷七二作「巴的」。
- 烏撒女酋實卜 實卜,原作「卜實」,據本傳上下文及明史稿傳一八五烏蒙烏撒東川鎮雄四軍民
- 自閏七月二十七日 ????,太祖實録卷一五六洪武十六年九月戊午條、卷一六九洪武十七年十二月丁酉條改府傳,太祖實録卷一五六洪武十六年九月戊午條、卷一六九洪武十七年十二月丁酉條改 閏七月,原作「閏二月」,據本書卷三○五行志、孝宗實録卷一七八弘治十
- 四年八月癸丑條改。 按弘治十四年閏在七月,作「閏二月」誤。
- /^\ |Z%| 時巡按鄧渼疏稱 實録卷四六○萬曆三十七年七月甲申條、卷四六八萬曆三十八年三月丁酉條改 鄧美,原作「鄧漾」,據明史稿傳一八五烏蒙烏撒東川鎮雄四軍民府傳及神宗
- 噩 雲南撫按沈儆炌等言 泰昌元年十二月己巳條改。 沈儆炌,原作「沈敬炌」,據本書卷二四九蒸復一傳附沈儆炌傳、明實録
- <u>^</u> 及會川軍民千户所 列 僔 第一 百 九 十 九 會川,原作「會州」,據本書卷四三地理志、明史稿傳一八五建昌衞傳、太祖 校 勘 記

實錄卷二一八洪武二十五年六月癸丑條改。

- 卷三一八洪武二十五年六月癸丑條及明一統志卷七三俱繫此於洪武二十五年六月 因改建昌路為建昌衞置軍民指揮使司 本傳繫於三十一年。 按本書卷四三地理志、 太祖實錄
- 永樂元年復置 本書卷四三地理志及太宗實錄卷三〇永樂二年七月辛丑條均繁昌州等長官司

之復置於永樂二年。

- . ፇኄ Ш 建昌 所。 有冕山鎭西禮州中三千戶所 衛及下文越趨衛所屬千戶所基本相符。 又禮州 後千戶所及禮州 中中千戶所屬建昌衛, 按本書卷四三地理志稱寧番衞「領千戶所一」, 此處疑 行「鎭西禮州中三」六字。 鎭西後千戶所屬越巂衞, 即冕山橋後千戶 與本傳上文所記
- 洪武二十五年置越魯軍民指揮使司於邛部州 漢邛都及闌 二縣地 闌,原作「闡」,按漢書卷二八上地理志有 原脫 「二」字,作 「闌縣」、無「闡 「洪武十五年」,據本書卷四 縣」,據改。
- 其子馬剌非復貢馬赴京 宣德四年十月丁亥條改。 馬剌非, 原作「刺馬非」, 據本書卷三一三永寧傳及宣宗實錄卷五 九

地理志及太祖實錄卷二一九洪武二十五年七月丙午條補

自唐武德改郡會州 讀史方輿紀要卷六七改。 會州,原作「會川」,據本傳上文及舊唐書卷四一地理志、 寰宇通志卷六

- 日蛒匝 蛤匝, 太祖實錄卷一三五洪武十四年正月乙未條、明會典卷一○八同, 本書卷四三地
- 理志作「蠟匝」。
- 二吾 命蔣貴佩平蠻將軍印 平蠻將軍, 原作「征蠻將軍」,據本書卷一五五蔣貴傳及宣宗實錄卷
- 一三宣德九年十月乙丑條改。
- 二合 十年黑虎寨賊首多兒太伏誅 十年,原作「十五年」,據英宗實錄卷一二七正統十年三月戊子

國権卷二六頁一六八二删「五」字。按多兒太死於正統十年三月, 且正統無十五年,

字行。

- に出 雪兒卜寨賊首卓時芳等 卓時芳,本書卷一六○羅綺傳、 英宗實錄卷二一八景泰三年七月己
- 酉條作「卓勞」。下同。
- **番賊入犯松潘壩州坡抵關勢益獗命逮指揮湯綱等** 三年八月甲申條作「坡底關」、「楊綱」。 坡抵關、 湯綱, 孝宗實錄卷一六五弘治十
- 而敕巡撫張瓚調漢土官兵五萬由東南二路分剿 此繫於弘治十三年,疑係誤入。 按張瓚鎭壓

松潘 人民事, 在成化十三年,見本書卷一四憲宗紀、國朝獻徵錄卷三〇張瓚傳, 並參見本書卷

一七二張瓚傳及憲宗實錄卷一七九成化十四年六月丙申條。 且張瓚成化十八年已卒,不得預

弘治間事。

列傳第一百九十九 校勘記

[三0] 宣德七年陞龍州爲宣撫司 七年,原作「九年」,據本書卷四三地理志、寰宇通志卷七〇、明一

統志卷七〇改。

今聞有路自碉門出枯木任場徑抵長河西口 場,原作「傷」,據太祖實錄卷二五六洪武三十一

年正月丙午條改。

## 明史卷三百十二

## 列傳第二百

## 

播州宣慰司 永寧宣撫司 酉陽宣撫司 石砫宣撫司

遵義軍。元世祖授楊邦憲宣慰使,賜其子漢英名賽因不花,封播國公。 太原楊端應募復其城,爲播人所懷服,歷五代,子孫世有其地。宋大觀中,楊文貴納土,置 遵義府卽播州。秦爲夜郎且蘭地。漢屬牂牁。唐貞觀中,改播州。 乾符初,南韶陷播,

瑚等, 泥,日容山,日重安。 鏗、琛皆仍舊職。 洪武 相率來歸,貢方物,納元所授金牌、銀印、銅章。詔賜鏗衣幣,仍置播州宣慰使司, 四年平蜀,遣使諭之。五年,播州宣慰使楊鏗同知羅琛、總管何嬰、蠻夷總管鄭 領安撫司二,日草塘,日黃平,長官司六,日眞州,日播州,日餘慶,日白 以嬰等爲長官。 七年,中書省奏:「播州土地旣入版圖,當收其貢賦,

八〇三九

列

億

第二

百

四

JIJ

土

司二

其喪。 戰騎,宜率兵二萬、馬三千爲先鋒,庶表爾誠。」十五年城播州沙溪,以官兵一千人、土兵二 宣撫司。 宣慰使 千人戍之。 自是,每三歲一入貢。十四年遣使齎敕諭鏗:「比聞爾聽浮言,生疑貳。今大軍南征,多用 歲納糧二千五百石爲軍儲。」帝以其率先來歸,田稅隨所入,不必以額。 二十年徵鏗入朝,貢馬十匹。 司幷所 播州江渡蠻黃安作亂,貴州衞指揮張岱討平之。八年,鏗遣其弟錡來貢,賜衣幣。 。改播州宣慰司隸貴州,改黃平衞爲千戶所。十七年,鏗子震卒於京,命有司歸 屬宣撫司官,各遣其子來朝,請入太學,帝敕國子監官善訓導之。 帝諭以守土保身之道,賜鈔五百錠。二十一年,播州 已,復置播州黃平

輯 重安蠻民嚮化故也。 永樂 四年免播州 荒 七年,宣慰使楊昇招諭草塘、黄平、重安所轄當科、葛雍等十二寨蠻 田租、設重安長官司、隸播州宣慰司、以張佛保爲長官、以 佛保

懺 等四十一寨蠻作亂,日總兵陳懷 宣 | 德三年,昇賀萬壽節後期,禮部議予半賞。 剿撫之,旋定。 帝以道遠,勿奪其賜。 七年,草塘所屬穀

水歸

等苗 帝 命總督王來、總兵梁珤等, 賊 正 統 , 糾 十四年,宣慰使楊綱老疾,以其子輝代。 合草塘、江渡諸苗黃龍、韋保等,殺掠人民,屢撫復叛,乞調兵征 會同 四川 巡撫剿之。 景泰三年,輝奏:「湖、貴所轄臻 七年,調輝兵征銅鼓、五開叛苗,賜敕 剿,以靖民患。」 、剖、五坌

理 奏所屬天壩干地五十三寨及重安所轄灣溪等寨,屢被苗蠻占據,乞令湖、貴會兵征之。 如 同 輝言。 ,勵輝等振揚威武,以備征調,其機宜悉聽瓚裁處。 知 (羅宏奏,輝有疾,乞以其子愛代。 帝命愛襲職,仍敕愛卽 成化 部議以愛年幼,請仍起輝暫理軍事。又以輝難獨任,宜敕都御史張瓚親至播州督 十年以播州賊齎果等屢歲爲患,敕責川、貴鎭巡官。 ·率兵從總兵官剿賊。先是,輝 正統末,苗蠻聚衆寇邊,土官 命

之。 其家屬宜徙之同居,爲固守計。其工之未畢者,宜命臣子愛董之,而聽臣致仕如故。」詔從 設操守士兵一千五百人,今撥守懷遠、靖南、天漂、龍場各二百人,宣化百人,安寧六百人, 遠、宣化二長官司,建靖南、龍場二堡,命輝董其役。 撫男婦九千八百餘口。事下兵部,以苗就撫者多,宜量爲處分。 <u>貴州巡撫陳嚴奏:「苗賊齎果轉横,乞調川、湖等官軍五萬五千,剋期會貴州</u> 新襲,力弗能支,求援於川、貴二鎭。 諸長官,分甓城垣。 時灣溪旣立安寧宣撫,爛土諸蠻惡其逼,遂引齎果等攻陷天漂、靖南 十二年,瓚督諸軍及輝攻敗灣溪、天壩干地諸苗, 將竣,輝因奏:「各寨苗蠻,近頗知懼,但大軍還後,難保無虞。 兵部奏起輝再統兵剿之,又敕川、貴 輝調兵民五千餘,立治所,委所屬黃平 凡破山寨十六,斬首四百九十六級 瓚議設安寧宣撫司, 幷懷 兵 城堡,圍 、爲助。 ,聽儼節制。」兵 安寧。 十五 播州 向

傳第

百

四川土司

計,須 部言 1...「賊 軍 儲十三萬五千石, 作 於 四 JII 一而 貴州守臣 山路險峻,輸運之夫須二十七萬衆,況天將暑, 自欲節制諸軍, 恐有邀功之人主之。 且. 興 瘴癘可虞。」帝然 師 Ŧi. 萬, 以半 年

輝沒, 賂,以 取之。 輝不得已立愛, 且 密書往 在 日 謀嫡,盜官錢,皆有罪。 ,溺其庶子友,欲令承襲,長官張淵阿順之。 二十二年,愛兄宣撫楊友訐奏愛,帝命刑部侍郎何喬新往勘。 淵 其地設安寧宣撫司,冒以友任宣撫。 來,私習兵法、天文,謀不軌,事皆誣。」帝命斬淵、深。以愛信讒薄兄,友因 容山長官韓瑄以土民安輯日久,不 乃與 友潛謀刺愛,淵弟深亦 又欲割地以授友,謀於淵 愛贖復任,友遷保寧羈管,仍敕喬新從宜處治。 與謀,不果。 宜征。 ,因以天壩干乃本州懷遠故地,爲生苗所據,請兵 輝立券,以所有金玉、服用、莊田召諸子均分之。 安撫宋韜謂楊氏家法,立嗣 淵 友遂奏愛居處器用僭擬朝廷, 與輝 計執瑄,杖殺之。 二十三年, 前 巡撫 以嫡,愛宜立。 喬新奏: 叉通 張瓚受輝 公擅殺, 唐府,

勞愛。十四年,調播州兵五千征貴州賊婦米魯等。 弘治 元年增設重安守禦千戶所,命播州歲調土兵一千助戍守。七年,以平苗功,賜敕

旌賞部衆,無列銜方面者。 正 德二年陞播州宣慰使楊斌爲四川按察使,仍理宣慰事。 斌狡横,不受兩司節制,諷安撫羅忠等上其平普安等戰功,重賂 舊制,土官有功,賜衣帶,或

劉瑾,得之。 踰年,巡按御史兪緇言不宜授, 乃裁之,仍原 職

麟服。 斌宜 剿贼 爲亂。 報可。 歷司 其前 征之。 亂,攻播州,焚愛居第及公私廨宇略盡,遂殺才,多所殘戮。 安寧,乘之,朘剝尤甚,諸苗憤怨。 撫 撫 爲 功,皆許之。 會友死,遂緩師。 綏 輯 友所焚殺者,俱已隨土俗折償,且還所侵奪於官。 時斌又爲其父請進階及服色,禮科駁之,以服色等威所繫,不可假。 乞賜斌敕,令每年巡視邊境, 未幾,播州安撫宋淮奏:「貴州凱口爛土苗婚於凱里草塘諸寨,〔三〕 友旣編置保寧,愛益恣,厚斂以賄中貴,征取友向所居凱里地者獨苛。 諸蠻。 土衆,輯睦親族,以副朝廷優待之意。 其家衆置保寧者仍歸之,隸播州管轄。 斌復爲其子相請入學,幷得賜 已而鎭巡官言:「友子弘能悔過自新,且善撫馭,蠻衆願聽其約束。 凱里 會湖廣鎭巡官撫處。」部議, 民爲友奏復官, 冠帶。 因授致仕宣慰愛爲昭毅將軍 弗得, 幷諭 乞授弘冠帶爲土舍,協 斌與弘協和,不得再造釁端 愛屢奏於朝,帝命鎭巡官調兵 乃潛入保寧,以友還,糾衆 土官 向無領敕出巡者。 陰相搆結,誘山 ,給誥命,賜麒 兵部以愛舊 同知楊才居 同 播 州 諭 苗 作 經

掌 仇殺,侵軼 削 理 十二年,播州安撫羅忠、宋潍等奏:「斌有父喪,欲援文臣例守制,但邊防爲重,乞仍令 事。」 貴州 初,楊弘旣歸凱里,[三]與重安土舍馮綸等有怨。 境。 巡撫鄒文盛言狀,且請移文四川,會官撫處, 弘卒,綸等誘苗 踰歲不報。 蠻攻之,更相

列

僔

第

百

四川

土司

議 起 可 蔡潮 起。 任 事 了以制 土官應襲與否,屬四川 播 州 諸蠻寒。 ,督致仕 潮 楊斌撫平之。 有撫蠻勞,宜量 非黔所得專。 因言:「宜復安寧宣撫, 整。 盛所請難行,而 兵部議:「安寧已革不可復, 俾弘子弟襲之。 功不 ·可誣。」十六年賜斌蟒衣 斌子 斌 旣 未 衰,

玉

玩 置於理。 「張習父兄之惡,幸免於辜,敢肆然執印 法 戒。」 劫白泥 嘉 靖 若張悔 旣, 元年賜播州儒學四書集註,從宣慰楊相奏也。 司 遂許 Eli 信,復與 過輸情,還所獲印,尙 張襲宣撫,而改安寧爲 相構兵。 守臣乞改凱里 可量 信以要挾,當命川、貴守臣按其前 凱里,隸貴州 授 一官,聽 屬貴州 調殺賊 弘旣死, 以張爲 以自効。 土知 其弟張 州 倘 解 求襲職不 後 或怙終,必誅以爲 爭 釋 之。 產 殺 得, 兵 人諸罪, 部議 時盜

烈陽 烈 盜 許之。 兵逐 初 一場相 相。 及相 之祖 相走,客死水西。烈求父屍,宣慰安萬銓因要挾水烟、天旺 喪還,烈靳地不予,遂與水西搆難,又殺其長官王黻。時嘉靖二十三年也 父皆以嫡 庶相 争,梯 禍 數 世 0 至是,相復寵 庶子煦。嫡子烈母張,悍甚,與 故地,而 後 予屍,

聲揚 (烈助逆罪,烈暇救人乎。」 已,擒阿頂父子,斬獲四百餘人。 初, 嘉靖初,議分<u>凱里</u>屬貴 有言賊求援於播者,

盧

SP

項

者

亦久稱亂,邦憲以兵七千擊敗之。

烈

旣

代襲,遂與黻黨李保治兵相攻,

垂十年,

總督馮岳調總兵石邦憲討平之。眞州苗

邦憲曰:「吾方調

水西兵,

[][ 州 貴 守 臣 叉 異 以 議 播 地 不 决 多在 命 貴 總 州 督 境 會 幷 勘 改 屬 總 督 思 奏,仍 石 兵 備 以 播 及 歸 眞 四 州 jij 盜 而 平, 貴 地 州 方安靖 思石兵備 播 173 人 兼 以 制播 非 酉 便

平、邑諸土司事,報可。

楊烈 部 議 祭葬 隆慶 以斌 ′,從 五. 有 年 應 軍 功, 龍 烈 請 死, 且 也。 出 子 [特恩, 十 應 龍 匹 未 請 年 襲, 可 應龍 爲 命予 比 獻 職 大木七十, 帝命 0 萬曆 以 都 元 指揮 材美, 年給 使銜 賜飛 應龍宣 授 魚 應龍 一慰使敕 服 叉 復 書。 引 其 祖斌 年 賜 賜 故 蟒 宣 例 慰

等 禦 赴 其 世 兵 州 撫 臣 彈 松 嗜 所 按 以 等 潘 轄 壓, 殺 十八年, 疏 事 五 赴黔 辨 屬 所 調 且 變,告應龍 司 重 兵 轄五 播 改 在蜀 貴州 大, 驍 州 主 勇, 司 土 爲 兩省 者謂 巡撫 七 兵協守, 流 數征 反。 姓 利 應龍 葉夢熊 悉叛離。 悉屬 害 調有功, 夢熊請 一,豈漫 無 匹 重 可 וון 疏 慶, 勘之罪 嬖妾田 不 發兵剿之,蜀 巡 論 剪除未爲長策。 與化 相 按 應 李 關 龍 龍 化龍 兇惡 者,乞從公會勘 屠 在 意 妻張氏, 黔者謂蜀 復 諸 疏 中士 相左。 請 事 ,巡按 暫免勘問 大夫 以故,蜀撫按並主撫。 幷及 有 化龍 私暱 陳效 悉謂蜀三面 , 其 無執 遂引 母 應龍 俾 歷 O 成 數 應 妻叔 嫌 心 應龍 龍 之 求 鄰播 心 戴 張時照 斥。 + 罪 九 屬 + 於 圖 朝 蓋 年, 是 功 四 議 裔 與 應 給 大 命 所 龍 夢 以 罪。 事 由 勘 什 熊 部 本 是 中 何 雄 伯 主 應 張希 時 數, 恩、 则 猜 議 方 願 阻 貴 防

間 繼光 鮮, |J||光 新 至 徵天下兵,應龍 撫譚 承嗣 至, 重 原奏何恩詣綦江 慶 嚴 兵敗 希忠與貴州 提勘結, 與總兵 殺 傷 詣 劉 應龍抗 因 大半。 承 重 鎭、 奏辨,且願 慶對 縣 嗣 撫 等分兵三道進 不 會繼 簿 再 Щ̈́ 、坐法 議 光論 將五 剿 張時照等復詣 , 當 罷,卽 御 千兵征 斬,請 史薛繼 妻山! 撤 倭 以二 關, 兵, 茂主 自 奏闕 萬 委 贖 屯白石 棄輜 金贖。 撫 下,繼 詔 釋 應 重 口 之。 龍 光 御史張 略 應龍 用 Ŀ 盡 兵已啓行, 書自白 兵之議 黔師 鶴 佯 鳴 約 降 逐決。 方 遣 協 剿 、駁問、 ···, 而 其 尋 亦 黨 統 報 會倭 攜 無 苗 金 功。 兵 巡撫 入 據 大 年 京 關 入 時 朝 兀 衝

致餼 至 慶 國 而 亨卹 松坎受事。」士琦曰,「松坎亦曩奏勘地」, 知 黄平、白泥久 ,獻罰金,得自比安國亨。 府 牽 出 二十二年, 得除 王 典,兵部 如 禮,言:「應龍 士琦詣綦江,趣應龍安穩聽勘。 罪 一, 而 爲 尚書石星手札示 以兵部 仇 四方亡命竄 響, 侍郎 縛渠魁,待罪松坎。 宜 剪其枝黨。 那 國亨者, 玠 匿 疆臣, 一其間, 總督貴州。 曩亦被訐懼罪不出界,故應龍引之。 趣 乃檄 又幸 應 應龍 卽單騎 所不敢至安穩者,恐墮安穩仇民不測 龍 應 龍 二十三年,玠 就 龍 使弟兆龍至安穩,治郵舍,儲 反,因以為 吏得 **,謂當待** 往。 貰, 應龍 疆臣 利,驛傳文移,輒 以不 至蜀,察永寧、 果面 奉 死 「縛道旁,泣請 札 至 會 播 水 西宣 招 酉陽皆應龍 從 應 士琦 糒 中阻 慰安疆 山 加 死 罪 禍 為請于阶 時 頭 也,幸 ,願執罪 玠 七 臣 郊 烟 姓 請 迎 恐 重 父

朝棟代, 事東方,朝廷亦以應龍向有積勞,可其奏,於松坎設同知治焉,以士琦爲川東兵備副使彈 許之,應龍乃縛獻黃元等十二人。案驗,抵應龍斬, 次子可棟羈府追贖,黃元等斬重慶市,總督以聞。 論贖,輸四萬金助採木,仍革職,以子 時倭氛未靖,兵部欲緩應龍

硬手,州人稍殷厚者,沒入其貲以養苗。 吾子活,銀卽至矣。」擁兵驅千餘僧招魂去。 應龍 獲寬,益怙終不悛。 尋可棟死於重慶,益痛恨。 苗人咸願爲出死力。 分遣土目,置關據險。 促喪歸不得,復檄完贖,大言曰 厚撫諸苗。名其健者爲

縋城 黨圍黃平,戮重安長官家,勢復大熾。二十五年流劫江津及南川,臨合江,索其仇袁子升, 索城中,戮其父母,淫其妻女,備極慘酷 又侵湖廣四十八屯,阻塞驛站。 下,磔之。 一十四年,應龍殘餘慶,掠大阡、都壩,焚劫草塘、餘慶二司及興隆、都勻各衞。 時兵備王士琦調征倭,應龍益統苗兵,大掠貴州洪頭、高坪、新村諸屯。 詗原 奏仇民宋世臣、羅承恩等挈家匿 偏橋衛,襲破之。大 又遣其 E,

殲焉 ,國柱等盡 麻貴 十七年,貴州巡撫江東之令都司楊國柱部卒三千剿應龍,奪三百落。 陳璘、董一元南 死。 東之罷,以郭子章代,而起李化龍節 征。 時應龍乘大兵未集,勒兵犯綦江。 制川、湖、貴州 城中新募兵不滿三千, 諸軍 事 賊佯 調調 東征 北, 誘 師

庫

第

股 賊 生 兵 苗 八 萬 及 黑脚苗等爲助,屯官壩,聲 奄 至 一,游 擊張良賢巷 戰死,綦江 窺 蜀 陷。 已, 遂焚 應龍 盡 東坡、 殺城中 爛橋 人,投屍蔽江,水 一、楚、黔路 梗 爲 赤 益 結九

降文緩 蛇画 尋艇 以 關 痛 城, 兀 兵劉 奪賊 縗 月 諸 哭云:「田氏且降。」復詐爲應龍仰藥死報廣,廣輕信按兵。 連破 朔 日誓 破 屯 綖 二十八 安疆 師 ,師屯白石,應龍 視 九盤,入婁 破 微樵汲 龍 師 六月四日,天忽霽,凝先士卒,克土城。 師 其 賊 臣 爪、海雲險風,壓海龍風, 賊所倚天險, 前 年,應龍 總兵吳廣入崖門關,營水牛塘, , 分 八 路 連敗,乃乘隙突犯 路。八路師大集海龍囤,遂築長圍,更番迭攻。 亦奪落濛闊,至大水田,焚桃溪莊。 鋒 化龍念賊前囤險不能越,令馬孔英率勍兵倂力 楊朝 山 關 進。 五. 棟僅以 道 率諸苗決死 毎路 並 關 出,破 爲 |烏江 財前 身免,賊膽落。遂連克桑木、烏江、 約三萬人,官兵三之, 龍泉司 門,萬峰 戦。 稱水西隴澄 ō 凝親勒騎衝中堅,分兩翼夾擊,敗之。 時總督李化龍 插 與賊力戰三日,却之。 天,中通 賊見勢急,父子相抱哭,上囤死守,每路投 應龍益迫,散金募死士拒戰,無應者。 調飛 會哨,誘永 土司 鳥騰猿不能逾者。 一線。 七之, 已移駐重慶,徵 攻其後。 賊知 已,覘賊詐,益厲兵攻,燒二 **艇從間** 順兵,斷橋, 旗鼓甲仗 河渡三關 必死。 賊詭令婦人於囤上 道 天苦雨,將士馳泥淖 攀 る。 森 兵 會化龍聞父喪,詔 時偏沅師已破靑 藤毁栅入,陷焉 淹死 大 列 描 奪天都、三百 集,遂以二 追奔至養馬 將卒 大驚 ·無算。 一拜表 月 總

提刀巡壘,見四 面 火光燭天, 大兵已登囤, 破土 城 入。 應龍倉皇同愛妾二闔室縊 ,且自焚。

吳廣獲其子朝棟,急覓應龍屍,出焰中。 賊平。

獻俘闕下 計出師至滅賊,百十有四日,八路共斬級 ·, 剉 應龍屍、磔朝棟、兆龍等於市。 播州自唐入楊氏,傳二十九世,八百餘年,至應 二萬餘,生獲朝棟等百餘 人。 化龍 露布 以聞,

龍而亡。

遵義 府,屬黔者爲平越府。 三十一年,播州餘逆吳洪、盧文秀等叛,總兵李應祥等討平之。 分播地爲二,屬蜀者曰

永寧,唐藺州地。 朱爲瀘州江安、合江二縣境。 元置永寧路,領筠連州及騰川 縣,後改

爲永寧宣撫司。

據湖 鎭撫張壽。 戶李文質等。 南長 洪武 寧諸州縣,命成都衞指揮袁洪討之。 四年平蜀,永寧內附,置永寧衞。 編 編張 張遁匿溪洞,餘黨散入雲南。 遁走,復以兵犯江安諸縣。 六年,筠連州滕大寨蠻編張等叛,詐稱雲南兵, 帝聞之,敕諭洪曰:「南蠻叛服不常,不足罪。 洪引兵至敍州慶符縣,攻破淸平關,擒爲千 洪追及之,又敗其衆,焚其九寨,獲編張子偽

旣 寨悉平。 寒,洪 獲其 俘 移兵討敗之。 逐降 ', 宜 編 筠 爲 連州 軍。 爲縣,屬敍州,至 追至小芒部,張遁 且 駐 境上,必以兵震之,使響天威, 以九姓 一去,逐 長官司 取得花 隸永寧安撫 寨,擒 無遺後患。」未幾, 阿 普等。 司 自是, 張不 張 復聚· 敢復 、衆據滕 出 一,其

永寧宣 通永 有八十二處,云 多 年賦 故輸納 寧,乃鑿 馬皆已輸,惟糧 七 一撫使 年 陞 不 豫照 貢馬, 詔賜 永寧等處軍民安撫 石削崖,以通漕運。 及。命蠲之。 皆石塞其流。 不能 如數。 二十三年,永寧宣撫言,所轄 **鈔幣冠服**,定三年 韶景川 司爲宣撫使司 緣大軍 侯 ·南征, 曹震往疏鑿之。 ,秩正三品。 蠻民驚竄, 貢如 例。 地水道 二十四年,震至瀘州 十八年,祿照遣弟 耕種失時, 八 年以祿照 有一百九十難,其江 加以兵後疾疫死 爲宣撫使。 阿居來 按視,有枝河 十七七 朝,言比 門 亡者 大灘 年,

永 弟智皆在太學,遂以庶母奢尾署司事。 寧荒 十六年,以祿照子阿聶襲職。 先是,祿照坐事逮至京,得直,還卒於途。 至是,奢尾入朝,請以 阿聶襲,從之。 永樂四年,免 其子阿聶與

田

租

景泰二年,減永寧宣撫司稅課局鈔,以苗賊竊發,客商路阻,從布政司請也。 不 宣 通,難以訓 一德八年,故宣撫阿聶妻奢蘇朝貢。 誨。 永寧監生李源資厚學通,乞如雲南鶴慶府例,授爲儒學訓導。」韶從之。 九年,宣撫奢蘇奏二生儒皆土僚, 朝廷所授官言

成化元年,山都掌大壩等寨蠻賊分劫江安等縣,兵部以聞。 二年,國子學錄黃明善奏:

遣。」又請南京戰馬一千應用。皆報可。四年,信奏:「永寧宣撫奢貴開通運道,擒獲賊首 宜降璽書獎賚。」從之。 置得宜,招募民壯,須賞罰必信。」詔總兵官參用之。時總督尚書程信亦奏:「都掌地勢險 濛,令二府土官截其險要。 更用火器自下而上,順風延爇,寨必可攻。 且征調土兵,須處 宜督兵先時取其田禾,則三月之內蠻必餒矣。軍宜分三路:南從金鵝池攻大壩,中從戍縣 縣者,卽今之都掌多剛寨也。前代用鄉兵有明效,宜急募民壯,以助官軍。都掌水稻十月熟, 攻籌前,北從高縣攻都掌。小寨破,大寨自拔。又大壩南百餘里爲芒部,西南二百里爲烏 患。」三年, 安令永寧宣撫奢貴赴大壩招撫,亦未效。恐開釁無已,宜及大兵之集,早爲定計,毋釀邊 要,必得土兵嚮道。 四 Ш 山都掌蠻屢歲出沒,殺掠良民。 明善復言:「宋時多剛縣蠻爲寇,用白ガ子兵破之。 請敕東川、芒部、烏蒙、烏撒諸府兵,並速調湖廣永順、保靖兵,以備征 景泰元年招之復叛,天順六年撫之又反。近總兵李 白ガ子者,即今之民壯,多剛

成、珠、筠、高諸縣,在前代皆土官,國朝始代以流,言語性情不相習,用激變。 四朝,四命將徂征,隨服隨叛。景泰初,益滋蔓,至今爲梗。臣向嘗言仍立土官治之,爲久 十六年, 白羅羅羿子與都掌大壩蠻相攻, 禮部侍郎周洪謨言: 「臣敍人也, 洪、永、宣、正 知敍蠻情。

列傳

第

百

四川土司

南境寨蠻近赤水、畢節要路者,宜立二長官司,仍隸永寧宣撫。夫土官有職無俸,無損國 近芒部,宜卽隸之。齊子者,永寧宣撫所轄。而永寧乃雲、貴要衝,南跨赤水、畢節六七百 苗,攻破長寧九縣,今又侵擾都掌。其所居,崖險箐深,旣難剪滅,亦宜立長官司治之。 里,以一柔婦人制數萬强梁之衆,故每肆劫掠。臣以爲宣撫土僚,仍令宣撫奢貴治之。 世襲,庶可相安。」又言:「白羅羅者,相傳爲廣西流蠻,有衆數千,無統屬。景泰中,糾戎、珙 . 書程信統大兵,僅能克之。 臣以謂及今順蠻人之情,擇其衆所推服者,許爲大寨主,俾 m 都御史汪浩儌幸邊功,誣殺所保土官及寨主二百餘人,諸蠻怨入骨髓,轉肆劫掠。 地 其

川貴巡撫。議照蠻俗罰牛贖罪,報可。 墨 欲奪印,相

精發。 宣撫奢効忠 永寧、烏蒙、水西、霑益諸土官境相連,復以世戚親厚。 儲,有益邊備。」從之。二十五年,永寧宣撫司女土官奢祿獻大木,給誥如例 官安國亨有讐。 萬曆元年,四川巡撫曾省吾奏:「都蠻叛逆,發兵征討,土官奢効忠首在調,但與貴州 爲 土知府安承祖 報讐,彼此 請並令總兵官劉顯節制,使不得藉口復讐,妄有騷動。」從之。 方奏報間,總兵郭成、參將馬呈文利其所有,遽發兵千餘,深入落紅。 相攻。 ,赴京代奏。 而安國亨部下吏目與智有親,恐爲國亨所殺,因投安路墨 已而國亨亦令其子安民陳訴,與奢効忠俱奉命聽勘於 効忠死,妻世統無子,妾世續 旣而安國亨殺安信,信兄智結永寧 有幼子崇周。 初,烏撒 世 統以嫡 與

堯臣 等 澄 之 都 總 必 理 敗 氏 檀馬 督 復 與 司 事 激 績 九 以怖諸 焉 非 張 前 奢崇 利 隴 以 世 叉 3 功 中 澄 朝 隴 市中 聞 許 所 列 報 恨 起 檄 傳 釁 廷 明 氏 者 武 可。 積 朝 部 出 遂 取 朝 厭 種 尼 第 執 者 附 即 搜掠 不 水 宜 沙 + 議 兵, 世 如 無授鎭 給之。 効忠 水西 逮 知 西 ]]] h 命奢 續 故 百 四 南 安堯臣 宗傳 其 於 索印 年 而 親 道 爲堯臣 立 空。 世 崇明 崇明 四 議予二土 梅 雄 統 奢崇 弟 事 ][[ 阿 、盡忠 已定, 阿 意 也 世 或 世 暫管宣 承 利 土 統 續言印 利 續 0 也。 樓 周 襲幾 以自 司 堯臣 不 所俘 等方驛騷 隴 子 代 亦 婦 應 而 堯 職 發 氏 也。 撫 固 諸 , 冠 以是懷 蠻 臣 在 垂 兵 載, 事 復 未 帶 奸 丑: 外怙 鎭 絕 幼 尾 殺 安疆 仍 幾死 閻宗傳等 冀崇明 者言 一 雄 世 孤 其 把 己 兩端, 播功, 續 隴 分 後。 總 依 臣 可 澄 削 地 入贅 陰 世 鎮雄遣將魯大功督兵五 臥 處。 蠲 竟不 **人**, 効忠 陰助 各管所屬 陽 統 自 內仗水西 取 夙 多遂 撫 其 以 隴 與, 恨 聚 弟 世續。 昔 間 養 氏 冒 苗 沙 也。 1從世續 且 \_\_\_ 以 隴 **|** 蠻 兵 十三 以 其宣 收 意世 姓,稱 萬 兵 出 有 削 人 而 四 餘 拒 據鎮 私安 逐 年。 閻 心。 撫 續 出 欲 戰 世 宗傳 隴 司 得 雄 澄 疆 統 焚 攻 且 至 即 授 而 是, 營屯 制 臣 劫屯堡,官 邀 永 等 俟 阿利 八〇五 閻 殺 妻弟 永寧 敍 寧 水 毎 奢崇周 宗 送之永 沙卜 焚掠, 平 大壩, 西 洩 傳 則己 播州 阿 怨。 心 兵 等攻 , 利 報 成 寧, 兵 懼 據鎭 水西 必 蜀 響。 巡按 敍 掠 崇 不 稱 撫 巡 世 能 州 永寧 明立

雄

益

按

以

功

鎭

雄

續

遺

禁。

赴

襲

劾

成

成

兵

魯仲 渡馬 鈴堡,約攻永寧, 都 賢六大營助逆不 司 張 神武等所俘喚者、朗者,皆鎭雄土目,堯臣 退,聲言將抵敍南,攻永寧、 普市 逐潰, 宗傳等以空城棄去。 瀘州 亦不 奢崇明又言,堯臣 能 於是總兵侯國 解 , 啊等, 皆歸惡於堯 所遣 目把彭月政、

擎未<sup>i</sup> 安疆 朝廷已一意休兵。 蛇, 蜀 逐請 地 有 將。 弗窒之罅復 年矣。 撤 成,令貴州 臣 ,卒不可解。 黔 師 約束堯臣 中 議者遂以貪功起釁,爲蜀將罪。 撫 宗傳之背逆恃鎭雄,猶鎭雄之恃水西也。 按以西南多事,兵食俱詘,無意 爲 撫 歸本土司, 時播州 河也。」 三十五 按調兵與臣 清疆 疏上,廷議無敢決用 年,命釋奢世 聽遙授職銜, 之議方沸騰 一會剿。 倘堯臣 續 四川巡撫喬 黔 不許冒 赦閻宗傳等罪, 取鎭 師者。 稔 、蜀各紛紛。 惡如 真雕 雄。 壁星言「堯臣狡謀, 故,臣 久之,阿利 水西疆臣不助兵,臣已得其狀 職。 堯臣 於是宗傳降, 至是,永寧 即移師擊之,毋使弗摧之虺 因以普市、 訪求 死, 龍氏 ED 議兵 子 亦出 摩尼諸焚掠, 孫 欲篡 堯臣請避 爲 叉 蜀 鎭 如 鎭雄 雄 聚 中 訟 欲 宜 矣。 皆 逐 垂 堯臣 歸 並令 復 乘 涎 逆 藺

前勘諸案。 尼、普市千 舊 制 戶張 永 於是蜀撫擬張大策以失守城池罪,應斬, 寧衞隸黔,土司 大策等復請將永寧宣撫改 |舞る。 自冰、藺交攻,軍民激變,奢崇明雖立,而行 土爲流。 兵部言,無故 黔撫擬張神武以擅兵劫掠,公罪亦應 改流,置崇明 何 勘 地 未 命 報 速完

營, 慶而 中 援 明等,發兵四千,倍道兼行,潛渡重慶,營南坪關。 梁,布政使朱燮元、 與水西 等來降 等以增行 以 斬 其壻樊龍、 亦 兵亦漸 狀聞。 賊兵 軍 收 以 策,黔人,武,蜀人也。 餘 礟 破 啓 已故土官妻奢社輝爭地,安兵馬十倍奢,而奢之兵精 亂, 奢寅 瀘州 集。 糧 時變元已授巡撫,率川卒追崇明,江安、新都、遵義諸郡 四十八年,黔撫張鶴鳴以赤水衛白撒所屯 石擊毀之。 元年,崇明請調馬步兵二萬援遼,從之。 部黨張彤等,領兵至重慶,久駐不發。 數萬,據 爲名乘機 崇明父子倉皇奔,錢帛穀米委棄山積,窮民賴以得活。 遣 時寅攻城急,陰納劉勳等爲內應,事覺伏誅。 陷遵義, 賊 黨 周著,按察使林宰分門固守。 重慶險塞。 周鼎等分道來救 反,殺巡撫、 相持百日,會賊將羅乾象遣 興文知縣張 由是兩情皆不平,諸臣自相搆訟,復紛結不 燮元督良玉等奪二郎關 道、府、總兵等官二十餘員, 振德死之。 ,鼎敗走,爲合江民所縛。 人輸款, 興文,故九絲蠻 石砫土司女官秦良玉 巡撫徐可求移鎭重慶, 崇明 良玉自統精兵六千,沿江上趨成都。 地爲永寧占據,宜淸還,皆待勘未決 與子寅久蓄異志, 願殺 總兵杜文煥破佛圖 復造雲梯及旱船,晝夜薄城,城 ,兩相持。 逐據 賊自効。 官軍 地 邑皆復。 也。 重慶。 乾象 與平茶、酉陽、石砫 解。 遣弟民屏、この姪翼 蜀、黔撫按不能制 是夜, 進圍成都,偽號 因率 趣永寧兵。樊龍 借調兵援遼,遣 時二年三月也 分兵攻合江、 會奢崇明子寅 關 其黨胡汝高 乾象縱 諸 將迫重 火焚

列

傳

或

用

土 《黨 司 張 合 圍 重 慶 、石永高等三十餘 城 中乏食。 變元遂以計擒樊龍, 人,遂復 重 慶。 殺之,張彤亦爲亂兵所殺,生 |擒龍子友邦 及

崖 破 坎,率兵搏戰。 道、府,與 之於芝蔴 藺州 、天台諸國寨,降者 藺 時 · 焚九 州 安邦彦反於貴州, 遵義、 平。 塘, 鳳樓,覆 賊遁 總督朱燮元請以赤水河爲界,河 建武 大兵奮擊,敗之。 入青山。 聲勢聯絡。 其 H 巢。 至。 崇明遙倚爲聲援。 諸將 崇明 崇明 逼渭 、踉蹌 寅被創遁 勢益蹙,求 河, 走,投水西。 鏖入龍場 一、樊虎亦 救於水西, 三年,川師復遵義,進攻永 東龍場屬點,河 戦死。 陣, 邦彦與合兵,分犯遵義、 邦彦遣十六營過河援 獲崇明妻安氏 進克其城,降賊二 西赤水、 及奢崇輝等, 永寧屬 寧, 萬。 永寧 之。 遇 蜀。 奢寅 羅乾 復 斬 進 於 永寧設 JII 獲萬 象急 拔 師 紅 敗 地

明、 務, 稱 其 下所 元 邦彦皆授首。 大會師。 帥 未 殺, 者不 幾 貴州 而 可勝計, 變元 燮元定計誘賊深入向永寧,邀之於五峰山 巡撫王三善爲邦彦所襲死,崇明勢復張,將以踰春大舉寇永寧。 是役也,掃蕩蜀、黔數十年巨憝,前後皆變元功云。 亦 合兵十餘萬,規先犯赤水。 以父喪去,崇明、邦彦 得稽誅。 崇禎 崇明稱大梁王,邦彥號四裔 初,起變元總督貴、湖、雲、川、廣諸 桃紅壩, 令總兵侯良柱大敗之, 崇 大長老,諸 會奢寅爲 軍

酉陽,漢武 陵 郡 酉陽縣地 宋爲 酉陽州。 元屬懷德府

景川 冉德 長官楊 改 爲宣撫司,仍以冉如 侯謀反。 原 洪 再 武 楊隆 勝,謀殺兄子正賢及洞長楊通保等。 五 年 爲之, 一,酉陽一 帝命逮再勝鞫之,再勝辭服,當族誅,正賢亦應緣坐。 每三年一入貢。 軍民宣 彪爲使。 慰司 冉 置平茶、邑梅 如 石耶 彪 遣弟如 不能 、麻兔、石耶四洞長官司 正賢等覺之,逃至京師,訴其事,且 親至京, 喜來朝貢。 命附於酉陽。 置酉陽州,以 帝誅再勝, , 二十七年, 以楊底綱 如 彪為. 知 釋正賢,使 平茶 言再勝與 州 楊 金奉 洞署 八年

一撫司。 永樂 三年,指揮丁能、杜福 四年免酉陽荒田租。 撫諭 Ŧi. 年,興邦遣部長龔俊等貢方物,並謝立儒學恩。 亞堅等十一寨生苗一百三十六戶,各遣子入朝,命隸 酉

酉陽宣撫冉興邦

以襲職來朝,

命改隸渝州

撫冉雲散官 景泰七 一階,以助討叛苗及擒石全州之功也 年調宣撫僉事 冉廷璋兵, 征五 開、 銅鼓叛苗, 賜敕諭賞 **資。** 天順十三年命進宣

慰 賜 亦奏, 敕褒之。十二年,舜臣 弘治七年,宣撫冉舜臣以征 邑梅 副長官楊勝 奏宋農寨蠻賊糾脅諸寨洞蠻,殺掠焚劫,乞剿捕。 剛 父子謀據酉陽,結俊倍洞長楊廣震等,號召宋農、後溪諸蠻,聚 貴州 叛苗功,乞陞職。 兵部以非例,請進舜臣階明威將軍 保靖、永順二宣

列

傳

第

\_\_\_\_\_

兵 殺掠,請 並 兵部議, 酉陽溪洞 :連絡, 易煽動,宜卽撲滅,請行鎭巡官酌機宜。 十四年

調酉陽兵五千協剿貴州賊婦米魯。

請 兵剿 正 韶量. 捕。 德 三年, 加服色酬賞 八年,宣撫冉元獻大木二十,乞免男維翰襲職赴京,從之。 酉陽宣撫司 護印舍人冉廷璽及邑梅長官司奏, 湖廣鎭溪所洞苗聚衆攻劫, 二十年,元再獻大木

海關 見龍 胤及文光等領兵赴遼陽,駐 邊,宜加優恤,以風 書 誠之勸,從之。 張 振 鶴鳴言:「躍龍遣子弟萬里勤王,見龍既殺身殉 戰沒,死者千餘人。 萬曆十七年,宣撫冉維屛獻大木二十,價逾三千。 困招魂, 四十六年調 忠義可嘉。 **風諸邊。**」 撤守遼陽,又以降敵縱火,冉文煥等戰沒,死者七百餘人。 虎皮、黃山等處三載,解奉集之圍。 酉陽兵四千, 臣在貴州時,躍龍亦自捐餉征紅苗,屢建奇功。 命宣撫 冉躍龍將之援遼。 國,躍龍又自捐金二千兩, 工部議,應加從三品服,以爲 再援瀋陽,以渾河 四十七年,躍龍 運軍器至山 今又著節於 民失利, 冉 兵部 土官 遣子 輸 尙

叛,躍龍率援師合圍 爲弟見龍及諸陣亡者請賚卹。 天啓元年授躍龍宣慰使,並妻舒氏,皆給誥命,仍恤陣亡千七百餘家。 「重慶。 及崇明誅,其土舍冉紹文與有功。 命下所司 四年,躍龍以東西赴調效命, 二年,奢崇明

九年,宣慰使冉天麟疏言:「庶孽天胤假旨謀奪臣爵土,不遂,擅兵戕殺。」下撫按

察勘。時獨方憂盜,大吏自顧不暇,土官事多寢閣云。

石砫,以石潼關、砫蒲關而名。 後周置施州。 唐改青江郡。 宋末,置石砫安撫司。 元

改石砫軍民府、尋仍爲安撫司。

安撫 潮及其子 <u></u>
住宣撫同 洪武 司爲宣撫司,隸重慶府。十六年,石砫溪蠻寇施州,黔江守禦官軍擊破之。十八年,石 文義白金百兩,以從征散毛洞有功故也。 .知陳世顯遣子興潮等奉表貢方物,賀明年正旦。二十四年賜石砫宣撫同知陳興 、七年,石砫安撫使馬克用遣其子付德與同知陳世顯入朝,貢方物。八年,改石砫

用嘗効力先朝,命求其子孫之良者用之,故有是命。 宣德 五年 命宣撫馬應仁子鎭爲宣撫。 初,應仁有罪應死,貸謫戍。 至是,帝念其祖克

賊。 焚掠而去。以石砫地鄰酆都,互爭銀場相訐, 仁奏:「石砫歲辦鉛課 成化 十八年, 四川巡撫孫仁奏:「三月內盜三百人入石砫,殺宣撫馬澄及隸卒二十餘 五千一百三十斤,正統後停之。 有司不 為區 鄰境軍民假以徵課, 治, 致相讐殺。」 命責有司捕 乘機竊取,

列

傅

第

Ħ,

四川土

司

醸成 禍階。 請除其課,閉其洞,仍移忠州臨江巡檢於酆都南賓里之姜池,以便防守。」從之。

是年,命馬徽爲宣撫。

封夫人,自有傳。 次子千駟,謂應龍 與邦聘同就吏。」二十三年命四川撫 茂,擊賊大雪山,斬首捕寇,皆著有成勞,屢膺上官獎賞。今邦聘無故虔劉孤寡,臣豈不能 霖等,集衆數千,圍覃氏,縱火焚公私廬舍八十餘所,殺掠一空。覃氏上書言:「臣自從征疊、 與酉陽 而斗斛亦結應龍,兩家觀望,獄遂解。覃氏有智計,性淫,故與應龍通。長子千乘失愛,暱 出一旅與之角勝負,誠以非朝命,不敢也。 萬曆二十二年,石砫女土官覃氏行宣撫事。土吏馬邦聘謀奪其印,與其黨馬斗斛、斗 冉御龍同征應龍。 可恃,因聘其女爲千駟妻。 應龍敗,千駟伏誅,而千乘爲宣撫如故。 按讞其獄,事未決。 今叛人斯在,請比先年楚金洞舍覃碧謀篡事,願 千駟 入播,同應龍反。 會楊應龍反播州,草與應龍 千乘卒,妻秦良玉以功 千乘襲馬氏爵,應調, 為姻,

## 校勘記

草塘 所 屬 穀 微 等 四 十 寨蠻 作 亂 穀懺 ,明史稿傳一八六播州宣慰 司傳作「穀 撒

貴州凱口 爛土苗婚於凱里草塘諸寨 凱里 原作 「凱離」,據本卷上下文、 本書卷四六地理志

## 改從一致。

- 楊弘旣歸凱里 楊弘,原避淸諱作「楊宏」,據本傳上文、本書卷一九四鄒文盛傳、 明史稿傳一
- 八六播州宣慰司傳改。下同。
- **遂連克桑木烏江河渡三關** 河渡,原脫「河」字。按明史稿傳一八六播州宣慰司傳作「連克桑

寅,克河渡關。」萬曆三大征考稱三月初八日克桑木關,十一日克烏江關,十二日克河渡關。據 木鳥江河渡三鬬」, 國権卷七八頁四八五〇稱萬曆二十八年三月「壬子,貴陽兵克烏江關,甲

補。

- 八五 **逐降筠連州為縣屬敍州** 此繫於洪武六年,本書卷四三地理志繫於洪武四年。
- 其江門大灘有八十二處 十餘灘」、太祖實錄卷二〇四洪武二十三年九月「是月」條作「八十二處」,據補。 八十二處,原作「十二處」,脫「八」字。按本書卷一三二豐震傳作「八
- ヘキン 張神武傳、神宗實錄卷四三二萬曆三十五年四月丁未條改。 而閻宗傳等攻掠永寧普市 普市,原作「普寧」,據本書卷二七一童仲揆傳、明史稿傳一二九
- 黔撫擬張神武以擅兵劫掠 四川都指揮使故稱「蜀人」,非指籍貫。 處一見。 本書卷二七一童仲揆傳附有張神武傳,事跡與此合,據改。 張神武,原作「張仲武」。按上下文都稱「張神武」,「張仲武」只此 神武、江西新建人, 時為

[九] 分兵攻合江納溪 納溪,原作「汭溪」,據本書卷四三地理志改。

石砫土司女官秦良玉遣弟民屛 民屏,原作「明屏」,據本書卷二七〇秦良玉傳、又卷二四九王

三善傳改。

元屬懷德府 懷德府,原作「紹慶府」,據本書卷四三地理志、元史卷六〇地理志改。

